

NCHAA NÀCUÁA NÍ QUIDE CUE TÉE NÍ TÁÚCHÍÚⁿ JÈSÚS DACUÀHA ÑAHA XII ÑÁYIU TNÚHU-GÁ

Jèsús ní cachí tnúhu ndáá-gá sá quíxí Espíritú Yă Ndiöxí cundecu ndihi ñáyiu

¹ Te duha ní cáháⁿ té Lùcá ní xíi-dé té Těofilú: Yúhú sa ní chídó tnùn-í núú librú ndéé díhna nchaa sá nĩ quide Jèsús, ndihi nchaa sá nĩ dácúáhá-gă ñáyiu. Te ní chídó tnùn-í nchaa sá nĩ quide-gá ndéé nduu nĩ quesaha-gă quidé chiuⁿ-gá, ² ndihi nchaa sá nĩ quide-gá ndéé òré cuándaa-gă andiu. Te sa ta cùyatni nduu ndaa-gă andiu, te ní ndatnúhu-gă ndihi cue téé ní cáháⁿ-gă dacuàha ñaha xii ñáyiu tnúhu-gă, te mee Espíritú Yă Ndiöxí ní chindee ñàha-xi xii-gă ní xáhaⁿ-gă nàcuáa cada-güedé. ³ Te sáta nĩ xíhí-gă te ní ndoto-gă, te ní xíndecu-gă údico nduu. Te titní xito ní sáháⁿ-gă núú nĩ xíndecu-güedé, te ducaⁿ nĩ quide-gă cuendá quini-güedé sá ndáá ní ndoto-gă, te ní xáhaⁿ-gă nàcuáa quide Yă Ndiöxí ndíhu ndaha-gă ñáyiu.

⁴ Te iⁿ nduu ndècu ndihi ñaha-gă xii-güedé, te ní xáhaⁿ-gă:

—Vá quée-ní-ndó ñùú Jerusàlén, chi cundetu-ndo quixi Espíritú Yă Ndiöxí cundecu ndihi-ndo, chi sa ní cachí tnúhu-í sá dúcáⁿ nĩ cáháⁿ Tătá-ó Dűtú Ndiöxí Yaá ndécú àndiu nacuáa cunduu. ⁵ Te ndáá sá ndí Juáá ní dácúándùte ñaha

ndíi xii-ndo, dico vitna ñá túú-gă cuéhé nduu, te quexìo Espiritú Yă Ndiôxí cundecu ndihi-ndo —câchí-gă xăhaⁿ-gă xii-güedé.

Jèsús cuándaa-gă andïu

⁶ Te òré ní xíndecu-güedé ndihi Jèsús, te ní xăhaⁿ-güedě xii-gă:

—Mèstrú, cuìní-ndí cachí tnúhu-n nũu sa ta cùyatni nduu chindee-n ñăyiu ñuú Isràél cuèndá taxi tnùní tucú-yu ñuú-yu —câchí-güedé xăhaⁿ-güedě xii-gă.

⁷ Te ní xăhaⁿ Jèsús xii-güedé:

—Ñá túú xini ñuhu-xi cunaha nchohó xiăⁿ, chi Tătá-ó Dütú Ndiôxí năhá-gă ná nduu càda-gă nchaa sá nĩ căháⁿ-gă. ⁸ Te òré quexìo Espiritú Yă Ndiôxí cundecu ndihi-ndo, te cuyi-ndo nĩ yuhu nĩ iní-ndó quĩhíⁿ-ndó căháⁿ-ndó tnũhu-í núú ñăyiu ñuú Jerusálén ndihi núú ñăyiu distritú Jùdeá ndihi núú ñăyiu distritú Sàmariá. Te ducaⁿ-ni căháⁿ-ndó quĩhíⁿ-ndó nĩ caxico ñuyíú —câchí-gă xăhaⁿ-gă xii-güedé.

⁹ Te sátá dúcáⁿ nĩ căháⁿ-gă, te ndèhe-güedé ní ndanchita-gă cuándaa-gă andïu cuăndihu-gă xití vícò, te ñá túú-gă ní xini ñăhá-güedě xii-gă.

¹⁰ Te ndèhe vihi-güedé andïu núu ndée quini ñăhá-güedě xii-gă yòtnúhu, te ní quexìo cunu úú cue téé nìhnu dóó cuixíⁿ núú ndécú-güedě. ¹¹ Te xăhaⁿ-güedě:

—Nchòhó cue téé Galileá, ¿ná cuèndá ndéhé-ndó àndïu? Te dàtná-ni càa Jesús cuándaa-gă andïu vitna, te ducaⁿ-ni cùnduu-gă quixi tucu-gă —câchí cue téé nìhnu dóó cuixíⁿ-áⁿ xăhaⁿ-güedě.

*Cuèndá sá ñà túú-gă ndii Jùdás nũu ní nan-
ducu-güedě té Màtiá ní nucúnutnii-dé núú ndii*

¹² Te ní ndee-güedé yucu Òlívú cuánuhú-güedé ñuú Jerusálén, te ní xúhuⁿ-güedé cuèdicó cuádava òré ichi. ¹³ Te òré ní ndexìo-güedé ñuú-áⁿ, te cuándaa-güedé cuàrtú ndéé núú nĩnu, chi vehe yòdo tnahà ndecu-güedé. Te ní naníhí tnáhá-güedě nchaa-güedé té Pèlú, té Jàcobó, té Juàá, té Ndrìxí, té Lìpé, té Mǎxí, té Bartolòmé, té Mǎteú, té Jàcobó déhe té Àlfeú, ndihi té Xǐmú téé ní cundihi cue téé canànistá, ndihi té Jùdás ñaní té Jàcobó. ¹⁴ Te ní naníhí tnáhá-güedě nchaa-güedé yàcáⁿ ndihi tá Mǎriá nǎná Jèsús, ndihi cue ñaní-gá ndihi dava-gá cue ñáyiú dìhí. Te ñⁿ-ni nĩ cuú-yu ní cáháⁿ ndihí-yu Yá Ndiǒxí.

¹⁵ Te ñⁿ nduu ní xíndecu dàtná ñⁿ cièndú ócò mee-ni ñáyiú sàndáá iní tnúhu Jèsús, te ní ngúnutnii té Pèlú núú-yu, te ní xáhaⁿ-dě xií-yu:

¹⁶⁻¹⁷ —Nchòhó cue ñáyiú ndècu ndihi-í ichi Xítóhó Jesucristú, na càni-í cuèndú núú-ndó nàcuáa ní chídó tnùní ndii Dàvíí téé ní xíndecu ndéé sanaha nàcuáa ní cáháⁿ Espíritú Yǎ Ndiǒxí cuèndá té Jùdás. Te dacuitíí dùcaⁿ ní cuu, chi tnáhá té Jùdás ní xíndecu ndihi-o, te ní xinu cuechi-o ndihi-dé núú-gă sá dǐhna, te ducaⁿ nĩ quide-dé ní sáha cuèndá-dé Jèsús núú cuè téé cùu úhú iní ñáhá xì-gá. ¹⁸ Te ní cháhu ñaha-güedě xii-dé cuèndá sá nĩ sáha cuèndá ñáhá-dě xii-gá. Te ní sáháⁿ-dé ñⁿ xichi ní sata caa-dé méé-dě, te ní ngava-dé, te ní cahndí duuⁿ xití-dé te xiáⁿ nĩ xíhí-dé. Te ní naqueheⁿ-güedé díhúⁿ sǎ nĩ cháhu-güedé ndii, te ní nacuaaⁿ-güedé ñuhu núú nĩ ngava ndii-áⁿ.

19 Te nchaa ñáyiú Jerusàlén ní níhĩ-yu tnúhu, te ní dánánĩ-yu ñuhu-áⁿ Acèldamá. Te tnúhu mée-yu quèe-xi: Ñuhu núú nĩ sati níñí. 20 Te duha ní cáháⁿ ndíi Dàvií ní chídó tnùní ndíi núú librú Sălmú ní dándóo ndíi: “Nà ndóo nahi vèhe-dé, vá yóo ñⁿ quíhíⁿ cundecu”, duha ní cáháⁿ ndíi. Te ingá tucu tnúhu ní cachí ndíi: “Na nanducu-güedé ingá tée nucúnutnĩⁿ núú ndíi”, duha ní cáháⁿ ndíi Dàvií — cachí té Pélú xăhaⁿ-dê xii-yu.

21-22 Te ní xăhaⁿ tùcu-dé:

—Te ducaⁿ nĩ cáháⁿ ndíi Dàvií, te vitna xini ñuhu-xi nanducu-o ñⁿ tée nucúnutnĩⁿ-dé núú ndíi Jùdás, te xini ñuhu-xi diu-ni ñⁿ tée ní xica cuu ndihi Xítóhó Jesucristú cútnàhá ní xica cuu-o ndihi-gá, ñⁿ tée ní xiní ndéé òré ní dăcuándute ñaha ndíi Juăă xii-gá, te ndéé òré cuândaa-gá andiu. Te tée nanducu-o cundecu-dé cáháⁿ-dé năcuăa ní cuu ní ndoto-gá —cachí té Pélú xăhaⁿ-dê xii-yu.

23 Te ní cacunehe-güedé úú tnàhá-güedé nũu ndědacăa-güedé nduu táhú-güedě nucúnutnĩⁿ-güedé núú ndíi. Te ñⁿ-dé nání-dě Chée Barsăbás, àdi Justú chi úú diu-dé, te ingă-dé nání-dě Mătiă. 24 Te ní cáháⁿ ndihi-güedé Yă Ndiöxí, te xăhaⁿ-güedě xii-gă:

—Yòhó Dútú Ndiöxí xini-n iní nchaa ñáyiú, te mee-n năha-n núu nděda căa núú úú cue tée-a tnàhá iní-n 25 căháⁿ-güedé tnúhu-n nũú ñáyiú, te tée-áⁿ nucúnutnĩⁿ-dé núú ndíi Jùdás, chi cuăháⁿ ndíi núú ùhú núú ndàhú núú tàu-xi quíhíⁿ ndíi —cachí-güedé xăhaⁿ-güedě xii-gă.

26 Te ní xito ndéé-güedé, te ní cutnùní sá tée nàni Mătiă quendóo-dé ndihi úxí ñⁿ cue tée ní táúchíúⁿ-gă dăcuăha ñaha xii ñáyiú tnúhu-gă.

2

Ní quexìo Espíritú Yă Ndiǒxí cundecu ndihî ñáyiu

¹ Te ní sáá nduu còo vico Pentecostés te xĩndecu nchaa ñáyiu ìñ-ni xìchi. ² Te ní tecú dóho-yu uuⁿni ní ñihî andiu, dàtná quidé ìñ táchí ñihî vìhi ní quide-xi, te ducaⁿ ñi cuu ndéé xití vehe núú ndécũ-yu nchaá-yu. ³ Te ní xiní-yu dàtná cáá itá ñuhú cáá sã ndécú xití vehe, te ní xité nuu-xi ní ngoyo ndodo-xi díquĩ-yu nchaá-yu. ⁴ Te ducaⁿ ñi quide-xi òré ní quexìo Espíritú Yă Ndiǒxí ní ngúndecu ndihî-yu nchaá-yu. Te ní ngũíta-yu ní cáháⁿ-yu tnúhu cue ñáyiu ñá túú cùu ñáyiu isràél, te nchaa xĩăⁿ ní quide Espíritú Yă Ndiǒxí.

⁵ Te vâi ñáyiu isràél xĩndecu nchaa dava-gá ñuú ní tacá-yu ñuú Jerusalén, te ñáyiu-áⁿ ïo ndùcu ndéé-yu dàcuahá-yu nchaa ndudú sá dâcuàha tnahî-yu. ⁶ Te òré ní tecú dóho-yu ñihî, te ní sáháⁿ-yu ní xĩndedóho-yu tnúhu càháⁿ mée-yu ìñ ìñ ñuú-yu, chi ndi díñⁿ ndi díñⁿ tnúhu càháⁿ ñáyiu ndècu-áⁿ. ⁷ Te xĩăⁿ ío ní cuñúhu ñáyiu véxi dava-gá ñuú, te ní xĩtnàhá-yu:

—Ñáyiu ducaⁿ xĩcáháⁿ cúũ-yu ñáyiu distritú Galileá. ⁸ ¿Te nása ní quidé-yu ní cutúha-yu nâcuáa càháⁿ-ó ìñ ìñ-o ndéé lĩhli-o? ⁹ Te iha véxi ñáyiu dava nâción, chi véxi ñáyiu Pàrtiá, véxi ñáyiu Mèdiá, véxi ñáyiu Èlám, véxi ñáyiu Mesopòtamiá, véxi ñáyiu Jùdeá, véxi ñáyiu Capàdociá, véxi ñáyiu Pòntó, véxi ñáyiu Àsiá, ¹⁰ véxi ñáyiu Frigíá, véxi ñáyiu Pànfilíá, véxi ñáyiu Ègiptú, véxi ñáyiu Áfricá ñáyiu ndècu ndéé núú-gă-xi ñuú Cìrené. Te tnàhá ñáyiu ñuú

Ròmá véxi, te ñáyiú-áⁿ chi ñá díú mèe-ni ñáyiú isràél cúu-yu nchaá-yu, dico ñⁿ-ni cùu sá dácuaàhá-yu.

¹¹ Te véxi ñáyiú Crětá, véxi ñáyiú Àrabiá. Te nchaá-o sa ndèdóho-o càháⁿ-yu nàcuáa cuáháⁿ tnúhu mee-o ñⁿ ñⁿ-o. Te nchaá ñáyiú xícáháⁿ tnúhu-o càháⁿ-yu cuèndá nchaá sá vǎ yǒo tnàhí ndàcu cada ní guide Yá Ndiǒxí —càchí-yu xǐtnàhá-yu.

¹² Te ní cuñúhu vǐhí-yu, te ñá ná sàá iní-yu nása ní cuu, te xǐtnàhá-yu:

—¿Nása ní cuu duha càháⁿ-yu tnúhu-o? —
càchí-yu xǐtnàhá-yu.

¹³ Te davá-yu ní sácú ndeé yíchí ñáhǎ-yu, te xǐtnàhá-yu:

—Xǐxíni ñáyiú-áⁿ nǔu ñá náhǎ-yu tnúhu càháⁿ-yu
—càchí-yu xǐtnàhá-yu.

Tnúhu ní xáhaⁿ tǎ Pèlú xii cue ñáyiú

¹⁴ Te ní ngúnutnǐi té Pèlú ndihi úxí ñⁿ cue téé ní táúchíúⁿ Jèsús dacuaà ñaha xii ñáyiú tnúhu-gá, te níhi ní cáháⁿ-dé, te xáhaⁿ-dě xií-yu:

—Nchaá nchòhó ñáyiú distritú Jùdeá ndihi nchòhó ñáyiú ñuú Jerusàlén, cundedóho váha-ndo tnúhu na càháⁿ-í-a. ¹⁵ Ñá ndàá tnúhu càháⁿ-ndó, chi ñá túú xǐni-ndí te ducaⁿ càháⁿ-ndó, chi davitna cùu-xi caá ñⁿ dátneé, vátá tnàhá-gá òré coho ñáyiú ndidí. ¹⁶ Te yúhú ná càchí tnúhu-í xii-ndo vǐtna nacuáa ní xáhaⁿ Yá Ndiǒxí xii ndíi Joél téé ní xóo cáháⁿ tnúhu-gá ndeé sanaha nàcuáa cada ñaha-gǎ xii ñáyiú, te ndíi-áⁿ nǐ chídó tnùnǐ ndíi nàcuáa ní cáháⁿ-gá. ¹⁷ Te duha ní xáhaⁿ-gǎ xii ndíi:

Cùmání-gǎ sǎá nduu nàa ñuyíú, te cuǎñaha-ĩ
Espíritú-í cundecu ndihí nchaa ñáyiú na
quǐndáá iní ñáhá xìi-í.

Te cue déhe-yu cáháⁿ-yu tnúhu-í,
te cue téé cuechi dacòto núú ñáhá-xí xì-güedé,
te ducaⁿ-ní cuè téé ní sàhnu cáháⁿ saní-güedé,
te diu-ni cuendá nchaa sá quídè-í ducaⁿ dàcoto núú
ñáhá-xí xì-güedé.

18 Te nchaa ñáyiú xínu cuechi núu-í cáháⁿ-yu
tnúhu-í, te cuǎñaha-ĩ Espíritú-í cundecu
ndihí-yu.

19 Te ndéé andiu, yàcáⁿ vǎi sá cáda-í nàcuáa cuñúhu
vìhí-yu,

te núú ñuyíú-a cada-í ìⁿ sá vǎtá quíní tnàhí-gá-yu,
te ngoyo níñí te ngoyo ñuhú te quene vìhi ñúhmá.

20 Te vǎ dáyèhé-gǎ nchícanhii,
cuu nee ñuyíú te cuu ticuèhé núú yóó dàtná ticuèhé
níñí.

Te dàvá-áⁿ sǎá nduu quìxi Yáá cúú Xìtohó-yu,
te nduu-ǎⁿ cuu-xi ìⁿ nduu càhnu vihi, chi cada-gǎ
nchaa sá ñà túú xìní-yu, te cuñúhu vìhí-yu.

21 Te òré xíaⁿ te nchaa ñáyiú càháⁿ ndihí ñaha xìi Yáá
cúú Xìtohó-yu-áⁿ naníhí tàhú-yu.

Duha ní xáhaⁿ Yǎ Ndiǒxí xii ndíi Jòél ní chídó tnùní
ndíi.

22 Te nchòhó ñáyiú isràél, cundedóho váha-ndo
tnúhu na càháⁿ-í-a cuendá Jèsús téé ñuú Nazàrét.
Te Jèsús ní quide-gǎ chiúⁿ Yǎ Ndiǒxí, chi mee Yǎ
Ndiǒxí ní chindee ñàha-gǎ ní quide Jèsús ná daha
núú chiúⁿ, núu xǎⁿ ní ndacu-gǎ ní quide-gǎ nchaa
sǎ vǎ yóo tnàhí ndàcu cada, te xǎⁿ ní cuñúhu
vìhi-ndo. Te sa nàha-ndo nacuéa ní quide-gǎ

cútnàhá ní xica cuu-gá ñuyíú. ²³ Te ndíi Jùdás ní taxi cuendá ñáhá ndíi Jèsús xii nchòhó cue tée ní cuu úhú iní ñáhá xii-gá, te ní ndúcú-ndó cuè tée úhú iní-xi ní tñi ñaha-güedé xii-gá te ní sata caa ñaha-güedé núú cùrúxí, te núú cùrúxí-án ñí xíhí-gá. Dico sa ní cutnùní iní Yá Ndiöxí sá dúcáⁿ càda-ndo Jèsús, te mee Yá Ndiöxí ní cachí-gá sá dúcáⁿ ndòho Jèsús. ²⁴ Te ñu-ni mee Yá Ndiöxí ní dándótó-gá Jèsús, chi sa ní cáháⁿ-gá sá òré cuú-gá te vá cuú dúcáⁿ-gá. ²⁵ Te ndíi Dàvií tée ní xíndaha ñaha xii cue ñaní tnáhá-ó ñí xíndecu ndéé sanaha ñí chídó tnùní ndíi nàcuáa ní cáháⁿ Jèsús, te duha ní cáháⁿ-gá:

Cùtnuní iní-í sá ncháá ndùu ndecu ndíhi-í Yá Ndiöxí, te ío chìndee ñaha-gá xii-í, te ñá túú tnàhí sá yùhú-í.

²⁶ Te ío ndàcáⁿ táhù-í núú Yá Ndiöxí chi cùdúú iní-í, chi sa nàha-í sá cùú-í dico ndoto-í,

²⁷ chi vá dáñá-gá quíhíⁿ dúcáⁿ àlmá-í núú ndécú ñäyiu ní xíhí,

te vá dáñá-gá téhyú yiqui cùñú-í chi cùu-í Déhe-gá, te yùhú sa nàha-í sá cúú iní ñáhá-gá xii-í.

²⁸ Te sa ní cachí tnúhu-gá nàcuáa cada-í cundecu-í ichi váha, te cuendá sá ndécú ndíhi ñaha-gá xii-í núu ío cùdúú iní-í.

Duha ní cáháⁿ Jèsús, te ducaⁿ ñí chídó tnùní ndíi Dàvií.

²⁹ Te nchòhó cue ñaní tnáhà-í, na càchí tnúhu ndáá-í xii-ndo cuendá ndíi Dàvií tée ní xíndecu ndéé sanaha vihi, chi ní xíhí-dé, te ní chindúxi ñaha-güedé, te nàha-o tnavíí núú ñí chindúxi ñaha-güedé. ³⁰ Te ndíi Dàvií ní xóo cáháⁿ ndíi tnúhu Yá Ndiöxí, te sa nàha ndíi sá Yá Ndiöxí ní cáháⁿ

ndáá cuiti-gá sá díú-ní ìⁿ tnaha ndíi taxi tnùní-dé ñáyiú isràél ndéé cuèé-gá dàtná ní xóo taxi tnùní méé ndíi cútnàhá ní xíndecu ndíi, te téé taxi tnùní-áⁿ cúú Crístú chi cùu-gá ìⁿ tnàha ndíi. ³¹ Te sa ní cutnùní iní ndíi sá ndótó Crístú, núu xíǎⁿ ní chídó tnùní ndíi sá vǎ dáñá Yǎ Ndiǒxí sá quíhíⁿ dúcáⁿ àlmá-gá cundecu-xi núú ndécú ñáyiú ní xíhí, te vǎ dáñá-gǎ téhyú yiqui cùñú-gá.

³² Te ndáá chi Yá Ndiǒxí ní dándótó-gǎ Jèsús, te nchúhú ní xiní-ndí sá nǐ ndoto-gá. ³³ Te ní xáhaⁿ Yǎ Ndiǒxí xii Jèsús sá cùndecu ndíhi ñaha-gá, te taxi tnùní Jèsús nǐ caa nǐ quíhíⁿ. Te Yá Ndiǒxí ní sáñaha-gǎ Espíritú-gá ní ngúndecu ndíhi-gá nàcuáa ní xáhaⁿ-gǎ, te diu Jèsús ní quide-gá nchaa sá nǐ xiní-ndó vǐtna ndíhi nchaa sá nǐ xíndedóho-ndo. ³⁴ Te ndíi Dàvíí ñǎ túú ní ndàa túu ndíi andíu ndíhi yiqui cuñú ndíi, te òré ndécú-gǎ ndíi ñuyíú-a ní cachí ndíi:

Dútú Ndiǒxí ní xáhaⁿ-gǎ xii Yaá cúú Xǐtohó-í:

“Ngóo xio cùha-í,

³⁵ te yúhú cada-í te nchaa sá cúú ũhú iní ñáhá xii-n canehe-xi sá yíñùhu núú-n.”

Duha ní xáhaⁿ Dútú Ndiǒxí xii Yaá cúú Xǐtohó-í càchí ndíi.

³⁶ Te nchòhó ñáyiú isràél cùu-ndo ndí mee-í, te cuíní-í cundedóho váha-ndo ìⁿ tnúhu na càháⁿ-í-a. Jèsús ní sata caa-ndo-gǎ núú cùrúxí, dico Yá Ndiǒxí ní cachí-gá sá Jèsús dacăcu nihnu-gǎ ñáyiú, te vǎ cání ìⁿ caní úú iní-ndó, chi diu-gǎ cùnùu-gǎ núú nchàa ñáyiú —càchí té Pèlú xáhaⁿ-dě xii-yu.

³⁷ Te ñáyiú ní xíndedóho tnúhu ní cáháⁿ té Pèlú ní ndixi túu iní-yu nàcuáa quidé-yu ndécú-yu, te ní

xáħăⁿ-yu xii-dé ndihî dava-gá cue téé ní táúchíúⁿ
Jèsús dacuàħa ñaha xií-yu tnúhu-gá:

—Nchaa nchòhó cue ñaní tnáħá-ndĩ, ¿nása cachí-ndó cùnduu, nása cada-ndí vitna? —càchí-yu xăħăⁿ-yu xii-güedé.

³⁸ Te ní xáħaⁿ të Pèlú xií-yu:

—Daña-ndo nchàa sá cuèhé sá dúhá quìde-ndo, te cada càhnu iní Yă Ndiöxí nchaa yíca cuèchi-ndo. Te cuandute-ndo cuèndá quini-yu sá nĩ natuha-ndo ìchi Jesús, te ducaⁿ te taxi Yá Ndiöxí Espiritú-gá cundecu ndihî-ndo, ³⁹ chi cuini-gá taxi-gá Espiritú-gá xii mee-ndo ndihî déhe-ndo, te cuáñaha-gá Espiritú-gá xii nchaa ñáyiú nĩ càa xico ñuyíú, ñáyiú cáhăⁿ-gá cundecu ichi-gá ndéé idá-gá —càchí té Pèlú xăħaⁿ-dë xií-yu.

⁴⁰ Te titní-gá tnúhu ní xáħaⁿ-dë nàcuáa cadá-yu, te xăħaⁿ tùcu-dé:

—Daña-ndo nchàa sá cuèhé sá dúhá quìde-ndo, vá cadá-ndó să quidé dàva-gá-yu —càchí-dé xăħaⁿ-dë.

⁴¹ Te nchaa ñáyiú ní sándáá iní-xi tnúhu ní cáhăⁿ té Pèlú ní sanduté-yu, te ñu-ni nduu-ăⁿ nĩ cuu dàtná úní mĩ ñáyiú ní sándáá iní-xi ní xíndecu ndihî ñáyiú xídăcuáħa tnúhu Yá Ndiöxí. ⁴² Te ío ní xíndedóho-yu tnúhu ní cáhăⁿ cue téé ní táúchíúⁿ Jèsús dacuàħa ñaha xií-yu tnúhu-gá, te ío váħa ní xíndecú-yu ní xóo ndatnúhu váħa-yu. Te ní xóo caxi càhnú-yu cuèndá náħă-yu sá dúcáⁿ nĩ quide Jèsús cútnàħa vátá cáhní ñàħa-gá-güedé xii-gá, te ní xóo cáhăⁿ ndihî-yu Yá Ndiöxí.

*Nàcuáa ní quide nchaa ñáyiú ní sándáá iní tnúhu
Jèsús ndéé dîħna nuu*

⁴³ Te nchaá-yu ní cuñúhu vîhî-yu, chi cue téé ní táuchíuⁿ-gă dacuàha ñaha xiî-yu tnúhu-gá ní quide-güedé titní núú sǎ vǎ yǎo tnàhî ndàcu cada, te xiǎⁿ ní cutnùní inî-yu sá mée Yǎ Ndiǒxí chindèe ñaha-gá xii-güedé. ⁴⁴ Te nchaa ñáyiú sàndáá inî tnúhu Jèsús càháⁿ ndîhi tnàha váha-yu, te cuèi-ni nchaa ndachîuⁿ nandîhi-yu ndècu cahnu. ⁴⁵ Te ní dícǒ-yu nchaa ndachîuⁿ sá ñà túú xìni ñuhú-yu, te ní níhî-yu díhúⁿ te ní sǎñàhá-yu xii nchaa ñáyiú ñǎ nîhî. ⁴⁶ Te ìⁿ nduu ìⁿ nduu ní xóo quíhîⁿ ndîhi tnàhá-yu veñúhu càhnu sá ïo cùnûu. Te ní xexi ndîhi tnàhá-yu vehé-yu. Te ío ní cudîí inî-yu chi ìⁿ-ni ní cuú-yu nchaá-yu. ⁴⁷ Te ío ní ndacáⁿ táhû-yu núú Yǎ Ndiǒxí, te nchaa dava-gá ñáyiú ní cáháⁿ váha-yu cuendá ñáyiú-áⁿ. Te mee Yǎ Ndiǒxí ní quide-gá ní sándáá inî vâi-gá ñáyiú, te ní xîndecú-yu ndîhi dava-gá ñáyiú xîdâcuáhâ tnûhu-gá.

3

Quide tátna-güedé ìⁿ téé yacua

¹ Te ìⁿ nduu òré caá únî sacuaa, òré xîcáhâⁿ-yu ndîhi Yǎ Ndiǒxí cuáhâⁿ té Pèlú ndîhi té Juáá veñúhu càhnu sá ïo cùnûu sácúú-xí ñáyiú isrâél. ² Te ndècu ìⁿ téé yacua, te ducaⁿ-ni càa-dé ní cacu-dé. Te sàháⁿ ndîhi ñàhá-yu veñúhu càhnu sá ïo cùnûu, te sácóo-dé ìⁿ xio yuyèhe veñúhu sá nánî Yèhe Vii Caa, chi ducaⁿ nàni-xi, te xîcáⁿ ndàhú-dé núú nchaa ñáyiú sàháⁿ veñúhu. ³ Te ní xinî-dé té Pèlú ndîhi té Juáá cuánguihu-güedé veñúhu, te xîcáⁿ ndàhú-dé núú-güedé. ⁴ Te ní ndacoto-güedé núú-dé, te ní xáhaⁿ tǎ Pèlú xii téé yacua-ǎⁿ:

—Cundehe ñàha xii-ndí —càchí té Pèlú xǎhaⁿ-dě xii-dé.

⁵ Te ní xíndéhé ñàha-dé xii-güedé, chi ní cáháⁿ-dě sá íó ñⁿ sá cuǎñaha-güedé. ⁶ Te ní xáhaⁿ tǎ Pèlú:

—Ñá túú tnàhí díhúⁿ néhè-í dico chindee ñàha-í xii-n, te Xítóhó Jesucrístú Yaa ní xíndecu ñuú Nazàrét, ndacu-gá cada tátna ñaha-gǎ xii-n, ndacuíñí te caca-n —càchí-dé xǎhaⁿ-dě.

⁷ Te té Pèlú ní tní-dé ndaha cùha té yacua-ǎⁿ, te ní ngüíta-dé ndàcàni ñaha-dé, te òré xiáⁿ nǐ naníhí ndéé-dé, te ní ndúha sáhá-dé. ⁸ Te ní ndacuíñí cunu mee-dé te ní xica-dé, te ní cachí-dé sá ío càhnu cuu Yá Ndiǒxí cuèndá sá nǐ ndúha-dé, te ta sǎndava-dé cuánguihu ndíhi ñaha-güedé veñúhu. ⁹ Te nchaa ñáyíu xíndecu-áⁿ nǐ xiní-yu sá nǐ nduu váha-dé, te ndéhé-yu ndàcáⁿ táhú-dé núú Yǎ Ndiǒxí. ¹⁰ Te ní naquiní ñǎhǎ-yu xii-dé sá díú tǎe xicáⁿ ndàhú té ní xóo cunucóo yuyèhe veñúhu sá nání Yèhe Vii Caa cuu-dé, te ní cuñúhu vǐhí-yu sá nǐ ndúha-dé.

Té Pèlú ní cáháⁿ-dé corrèdór sá néhé òu ndí Salòmón

¹¹ Te sátá véñúhu càa corrèdór sá néhé òu ndí Salòmón. Yàcáⁿ ndécú tǎ Pèlú ndíhi té Juáá ndíhi té ní ndúha sáhá-xi, te ñá cuìní té ní ndúha sáhá-xi-áⁿ dañ-dé quíhíⁿ-güedé dandóo ñaha-güedé xii-dé. Te chítú-yu ní quexìo coyó-yu núú ndécú-güedé, te ní cuñúhu vǐhí-yu sá nǐ ndúha sáhá tǎe cùhú-áⁿ. ¹² Te té Pèlú ní xiní-dé ní quexìo coyó-yu, te ní xáhaⁿ-dě xií-yu:

—Nchòhó ñáyíu isràél, ¿ná cuèndá ndéé dúcáⁿ ndèhe ñaha-ndo xii-ndí te cùñúhu-ndo sǎ nǐ ndúha té yacua-áiⁿ? Nchòhó cáháⁿ-ndó sǎ méé-ndí

ní quide tátna-ndí-dé sá ïo váha iní-ndí, dico ñáhá chi ñá díú mée-ndí ní quide tátna-ndí-dé.

¹³ Chi Yá Ndiöxí ní ndadúha ñaha-gã xii-dé, chi diu-gá cúú Ndiöxí ndíi Àbrahám ndíi ndíi Isàác ndíi ndíi Jàcób, te diu-ni cue téé-áⁿ cúú ñàní tnáhá-ó nǐ xíndecu ndéé sanaha vǐhi. Te diu-ni Ndiöxí-áⁿ nǐ xáhaⁿ-gã xii Déhe-gá Jèsús sá táxí tnùní-gá nchaa sá ìo andiu ndíi nchaa ñáyíu ndècu ñuyíú-a, dico mee-ndo nǐ sáha cuendá-ndó Jèsús núú tée cùchiuⁿ. Te té Pilatú ní cuiní-dé dacăcu-dé Jèsús ní cùu, te mee-ndo ñǎ ní cuiní-ndó.

¹⁴ Te Yá Ndiöxí ní cachí-gá sá ïo váha iní Jèsús te ñá túú tnàhí cuéchi-gá. Te mee-ndo ñà túú ní cuiní-ndó căcu-gá nǔu ní xáhaⁿ-ndo xii té Pilatú sá vǎha-gá dacăcu-dé ñⁿ téé ndècu vihi cuéchi-xi, te vá dăcăcu-dé Jèsús. ¹⁵ Te ní xáhaⁿ-ndo sǎ cǎhni-güedé Jèsús Yaá quidé nchito-o ndecu-o, dico Yá Ndiöxí ní dándótó ñaha-gá, te ní xiní-ndí sá ndàá ní ndoto-gá.

¹⁶ Te nchúhú sa nàha-ndí sá díú Xìtohó Jesucrìstú ní ndadúha-gá téé yacua, te nái-dé nútnǎi-a. Te ducaⁿ nǐ quide-gá chi ní sándáá iní ñáhá-dé xii-gá, te vitna ní xiní-ndó sǎ ndàá ní ndúha-dé.

¹⁷ Te nchòhó ndíi cue téé cùnuyú ní sahní-ndo Xìtohó Jesucrìstú, chi ñá ní cùtnuní iní-ndó sǎ nǐ quide-ndo. ¹⁸ Te cue téé ní xóo cǎháⁿ tnúhu Yá Ndiöxí ndéé sanaha nǐ chídó tnùní-güedé năcuáa ní xáhaⁿ Yǎ Ndiöxí xii-güedé sá Crìstú quixi-gá ñuyíú-a, te ndoho vǐhi-gá, te xǎⁿ nǔu ducaⁿ nǐ cuu ìo ní ndoho-gá. ¹⁹ Te vitna te dañá-ndo nchàa sá cuèhé sá dúhá quide-ndo. Te quindáá iní-ndó Yǎ Ndiöxí, te ducaⁿ te cada cǎhnu iní-gá nchaa sá ñà túú vǎha ní quide-ndo ñuyíú-a, te canu ichi

ñaha-gă xii-ndo ìⁿ ichi váha. ²⁰ Te ní tendaha-gă Crìstú ní quixi-gă ñuyíú-a, chi mee Yă Ndiöxí ní cachí-gă sá díú Crìstú taunihnu ñaha-gă xii-ndo. ²¹ Te dacuití cùndecu-gă andiu ndée ná sàà nduu nàtaxi ndecu-gă nchaa sá ndécú ñuyíú nàcuáa sàni iní méé-gă. Te diu ducaⁿ nĩ cáháⁿ Yă Ndiöxí nũu ducaⁿ nĩ chídó tnùnĩ cue téé ní xóo cáháⁿ tnúhu-gă ndée sanaha. ²² Te ndí Moisés ní xáhaⁿ ndĩ xii cue ñaní tnáhá-ó nĩ xíndecu ndée sanaha: “Yă Ndiöxí tendaha-gă ìⁿ téé quixi-dé cáháⁿ-dé tnúhu-gă dàtná cuíní-ndó nĩ quide ñaha-gă xii yúhú, te téé-áⁿ cuu-dé ìⁿ ñaní tnáhá-ndó. Te cundedóho váha-ndo nchàa tnúhu cáháⁿ-dé. ²³ Te nchaa ñáyiu vá quíndáá iní tnúhu cáháⁿ-dé, te cuíta nihnú-yu chi vá quíhíⁿ-yu núú quíhíⁿ ñáyiu sàndáá iní tnúhu Yă Ndiöxí”, duha ní xáhaⁿ ndĩ Moisés xií-yu —càchí té Pèlú xăhaⁿ-dě xií-yu.

²⁴ Te ní xáhaⁿ tùcu té Pèlú xií-yu:

—Ndí Sàmúél ndihĩ nchaa cue téé nchìcúⁿ-gă ní xóo cáháⁿ tnúhu Yă Ndiöxí ndée sanaha nĩ cáháⁿ-güedé nàcuáa cada-xi vitna. ²⁵ Te Yă Ndiöxí ní cáháⁿ-gă ndihĩ cue téé ní cáháⁿ tnúhu-gă ndée sanaha. Te ní quide ndáá-gă ndihĩ nchaa ñaní tnáhá-ó nĩ xíndecu ndée sanaha nàcuáa cada-gă naníhí tàhú-ó. Te duha ní xáhaⁿ-gă xii ndí Àbrahám: “Ìó nduu cacu ìⁿ tnàha-n, te téé-áⁿ cada-dé te naníhí tàhú ñáyiu ñuyíú-a”, duha ní xáhaⁿ-gă xii ndí Àbrahám. ²⁶ Núu xíăⁿ ní tendaha-gă Déhe-gă ní quixi-gă núú ndécú-ndó cuèndá dañ-ndo nchàa sá cuèhé sá dúhá quide-ndo, te naníhí tàhú-ndó —càchí té Pèlú xăhaⁿ-dě xií-yu.

4

Té Pèlú ndihì té Juàá ndécú-güedě ndaha té cùchiuⁿ

¹ Te té Pèlú ndihì té Juàá càháⁿ dúcáⁿ-ni-güedě ndihì ñáyiu, ní quexìo cue dútú ndihì té tàxi tnuní ñáhá xii cue té quide cuendá veñúhu càhnu sá ïo cùnunu, ndihì cue té cùu saducéú. ² Te ní cudééⁿ-güedě nchaa-güedé núú tě Pèlú ndihì té Juàá sá xăhaⁿ-güedě xii ñáyiu sá ndótó ñáyiu ní xíhí dàtná ní ndoto Jèsús. ³ Te ní tñii ñaha-güedě ní chihi ñaha-güedě vecaá xii-güedé, te ñá ní quide ndáá té cùchiuⁿ cuéchi-güedé nduu-ăⁿ chi sa ní cuaa. ⁴ Te ío vâi ñáyiu ní sándáá iní-yu tnúhu ní cáháⁿ-güedé, te ñáyiu-áⁿ ndihì ñáyiu sa ní sándáá iní-xi ndéé căni-gá ní xínu dàtná úhúⁿ mĩ mee-ni cuè té, te dîiⁿ ñáyiu dîhí ndihì landú.

⁵ Te nduu tněé-áⁿ diu-ni ñuú Jerusàlén-áⁿ nĩ tacá cue té yîndaha veñúhu, ndihì cue té cùu sacuéhé núú ñáyiu isrâél ndihì cue té dàcuaha ñaha xii-yu nchaa tnúhu ní chídó tnùnı ndı Moısés. ⁶ Te tnàhá dútú cúnunu-gá té nani Anás ndécú ndihì té Caífás, ndihì té Juàá, ndihì té Lìjandrú ndihì dava-gá ñanı tnàhá dútú cúnunu-gá-áⁿ ndécú. ⁷ Te ní xăhaⁿ-güedě xii cue té xínu cuechi núú-güedě:

—Chí cuàháⁿ queñuhu-ndo tě Pèlú ndihì té Juàá vecaá, te na quixi-güedé iha —càchí-güedé xăhaⁿ-güedě.

Te ní quexìo té Pèlú ndihì té Juàá núú cuè té cùnunu, te cue té cùnunu-áⁿ nĩ xícáⁿ tnúhú-güedě núú-güedě, te xăhaⁿ-güedě:

—¿Nása ní quide-ndo cuèndá tée yacua-ǎn? ¿Yoo ní táuchíúⁿ dùcaⁿ cada-ndo? —cachí-güedé xǎhaⁿ-güedé.

⁸ Te ndècu ndihì té Pèlú Espiritú Yǎ Ndiǒxí, núu xǎǎⁿ ní xáhaⁿ-dë xii-güedé:

—Nchòhó cue tée cùchiuⁿ ndihì nchòhó cue tée cùu sacuéhé núú ñǎyiu isràél, ⁹ te núu cuíní-ndó quíní-ndó nása ní quide-ndí ní ndúha tée yacua-ǎn, ¹⁰ te cundedóho-ndo ñⁿ tnúhu na càháⁿ-í-a. Xìni ñuhu-xi cundedóho nchaa ñáyiu isràél cuèndá quíní-yu nàcuáa ní cuu ní ndúha té-ǎⁿ. Xítohó Jesu-crístú Yáa ní xíndecu ñuú Nazàrét ní quide tátna-gá sáhá tée yacua ní ndúha, te diu-ni-gá ní sata caa-ndo núú cùrúxí te núú cùrúxí-ǎⁿ ní xíhí-gá, te ní dándótó ñaha Yá Ndiǒxí xii-gá. ¹¹ Te núú tùtú Yǎ Ndiǒxí càchí-xi: “Crístú cúu-gá dàtná ñⁿ yúu ndécú xǐquí ñⁿ vehe. Te yúu càchí-yu sá ñà túú nàndíhi, te diu xǎǎⁿ ní nàndíhi-xi ní ngúnutnǐi-xi xǐquí véhé”, duha càchí-xi núú tùtú-gá. Te ducaⁿ sǎtnahá-xi cùu Jesús, chi càchí-ndó sǎ ñà túú nàndíhi-gá, ¹² dico Yá Ndiǒxí ñà túú ndèé ní tàxi ndecu-gá ingá tée dàcácu nihnu ñaha xii-o núú ùhú núú ndàhú, chi ñⁿdiì díí-ni Déhe-gá Xítohó Jesucrístú dacácu nihnu ñaha-gǎ xii-o —càchí té Pèlú xǎhaⁿ-dë xii-güedé.

¹³ Te té Pèlú ndihì té Juáa ñà túú tǔha-güedé, te cùñúhu cue tée cùchiuⁿ sá ïo ñí xǐndáa-güedé. Te ní cutnùní iní cue tée cùchiuⁿ-ǎⁿ sǎ Jèsús ní xica cuu ndihì-güedé, núu xǎǎⁿ ñà túú tnàhí yùhú-güedé càháⁿ-güedé. ¹⁴ Te cuèndá ndécú ndihì té Pèlú ndihì té Juáa té ní ndúha sáhá-xi, núu xǎǎⁿ ñà ní ñíhí cue tée cùchiuⁿ tnúhu cáháⁿ-güedé. ¹⁵ Te ní xáhaⁿ-güedé xii té Pèlú ndihì té Juáa sá quée-güedé

quehé cuendá ndóo mee-güedě ndatnúhu-güedě.

¹⁶ Te ní xítñàha-güedě:

—¿Nása cada-o úú cue téé-ǎn?, chi nchaa ñáyiú ñuú Jerusálén náhǎ-yu sá ñi quide tátña-güedě ñi téé yacua, te xǎn xǐcuñúhu vìhi ñáyiú. Te vá cúú càchí-ó sǎ ñǎ ndàá, chi vìi ñáyiú ní xiní nàcuáa ní cuu. ¹⁷ Te dayùhú-ó-güedě te cúñaha-o sǎ vǎ càhǎn-gá-güedě tnúhu Jèsús, chi núu ñáhá te quíndáa-gá iní-yu —càchí-güedě xítñàha-güedě.

¹⁸ Te ní cana tucu-güedě té Pèlú ndihí té Juàá, te xǎhaⁿ-güedě sá vǎ dǎcuàha-gá-güedě ñáyiú tnúhu Jèsús. ¹⁹ Te té Pèlú ndihí té Juàá ní xǎhaⁿ-güedě:

—Chí cuǎha cuendá, te núu sá càchí nchòhó cada-ndí àdi sá càhǎn Yǎ Ndiǒxí cada-ndí. Te cada càhnu iní-ndó chi vá cúú càda-ndí sá càchí-ndó, chi cada nahí-ni-ndí sá càchí Yǎ Ndiǒxí. ²⁰ Chi dacuitíi cǎhǎn-ndí nàcuáa ní cǎhǎn Jèsús, te cǎhǎn-ndí nchaa sá ñi xiní-ndí ní quide-gá —càchí-güedě xǎhaⁿ-güedě.

²¹ Te cue téé cùchiuⁿ níhi-gá ní cǎhǎn-güedě xǎhaⁿ-güedě sá cáda càstiú ñáhǎ-güedě núu vá dáñǎ-güedě sá dǎcuàha-güedě ñáyiú. Te ducaⁿ te ní dáñǎ ñàha-güedě cuánuhú-güedě, chi ñǎ ní ñihí-güedě nása cada-güedě cada castiú ñáhǎ-güedě, chi nchaa-yu ndàcǎn táhǎ-yu núu Yǎ Ndiǒxí sá ñi ndúha téé yacua. ²² Te téé ní quide tátña-güedě-ǎn ndécú-dě vìhi-gá údico cuíá-dě, te ío ní cuñúhu-yu sá ñi ndúha-dé.

Ñáyiú sàndáa iní tnúhu Jèsús xicǎn táhǎ-yu núu-gǎ sá vǎ yùhú-yu cǎhǎn-yu tnúhu-gǎ

²³ Te ní ndee té Pèlú ndihí té Juàá cuánuhú-güedě núu ndécú cuè téé cùndihí-güedě, te ní nacani

tnúhu-güedé nàcuáa ní xáhaⁿ cuè dútú cúnùu ndihi
 cue téé cùu sacuéhé nùú ñáyiú isràél. ²⁴ Te sátá
 nĩ xíndedóho-yu tnúhu ní cáháⁿ-güedé, te ìⁿ-ni
 tnúhu ní cáháⁿ-yu ncháá-yu ndihi Yá Ndiöxí, te ní
 xáhãⁿ-yu xii-gá:

—Yòhó Dútú Ndiöxí, ní cadúha-n àndiù, ní
 cadúha-n ñùyíú, ní cadúha-n làmár, ní cadúha-n
 nchàandi túhú sá ío ñuyíú. ²⁵ Te ndíi Dàvíí ní sándáá
 iní ndíi tnúhu ní cáháⁿ-n, te ní chídó tnùní ndíi
 nàcuáa ní xáhaⁿ-n cãháⁿ ndíi, te ñiⁿ-ni Espiritú-n nĩ
 chindee ñàha-xi xii ndíi ní chídó tnùní ndíi, te duha
 ní chídó tnùní ndíi:

Ñáyiú ñá túú cùu ñáyiú isràél ío cùdéẽⁿ-yu núú Yá
 Ndiöxí,
 te cuíní-yu nàá-yu ndihi-gá, dico vá ndácũ-yu chi
 mee-gã cúnùu-gá.

²⁶ Te cue téé yíndaha nacióⁿ ndihi cue téé cùchiuⁿ
 tacá-güedé nàá-güedé ndihi Dútú Ndiöxí
 ndihi Crìstú Yáa ní quixi ñuyíú-a.

Duha ní chídó tnùní ndíi Dàvíí nàcuáa ndùu tnúhu
 ní cáháⁿ-n —càchí-yu xáhãⁿ-yu xii Yá Ndiöxí.

²⁷ Te xãhaⁿ tùcú-yu xii-gá:

—Ndáá ní cáháⁿ ndíi Dàvíí chi ñiⁿ-ni ñuú iha
 ní tacá té Hèrodés ndihi té Pònciú Pilatú ndihi
 ñáyiú ñá túú cùu ñáyiú isràél ndihi ñáyiú isràél ní
 cáháⁿ cuèhé-yu cuèndá Jèsús. Te Yòhó Dútú Ndiöxí,
 Déhe-n cùu Jesús nùu ío váha iní-gá, te ní sáha
 chiuⁿ-n-gá, te ío úhú ní cuu iní ñáhá ñáyiú xii-gá.

²⁸ Te ní quidé-yu nàcuáa ní sani iní-n càdá-yu ndéé
 sanaha, ndéé cútnáhá ní ngáva ñuyíú. ²⁹ Te Yòhó
 Dútú Ndiöxí sa nàha-n nása càháⁿ cue téé cuíní cada
 úhú ñáhá xii-ndí. Te quíde-ndí chiuⁿ tahu-n, te
 vitna chindee ñàha-n xii-ndí cuèndá sá vã yùhú-ndí

cáháⁿ-ndí tnúhu-n. ³⁰ Te cada tátna-n ñáyi cùhú, te chindee ñàha-n xii-ndí, te cada-ndí nchaa sá vǎ yǎo tnàhí ndàcu cada nacuáa cuñúhu vǐhí-yu. Te xíní-ndí sá méé Jèsús chindee ñàha-gá xii-ndí, chi quǐde-gá chiùⁿ tahu-n —cachí-yu xǎhǎⁿ-yu xii Yá Ndiǒxí.

³¹ Te sátá nǐ yáha ní cáhǎⁿ-yu ndihí Yá Ndiǒxí, te ní quǐdi-xi vehe núú xǐndecú-yu, te òré-áⁿ nǐ cutáhú tucú-yu nchaá-yu Espíritú-gá. Te ní cáhǎⁿ-yu tnúhu Yá Ndiǒxí, te ñǎ túú tnàhí ni yùhú-yu.

Cuèndá nchaa ndachìuⁿ cánehe chiùⁿ-yu

³² Te nchaa ñáyi ní sándáá iní tnúhu Yá Ndiǒxí ñⁿ-ni tnúhu ní cáhǎⁿ-yu nchaá-yu. ñⁿ-ni tnúhu ní sani iní-yu, te ní xóo chindee tnàhá-yu chi ní xóo cuáha táhú tnáhǎ-yu nchaa sá xíní ñùhú-yu, te ni ñⁿ-yu ñǎ túú ní cǎhǎⁿ-yu sá ndàchiúⁿ-yu ñⁿdii-ní-yu cùu nchaa sá ndécú ndihí-yu. ³³ Te cue téé ní táuchíúⁿ Jèsús dacuàha ñaha xii-yu tnúhu-gá ío váha ní cáhǎⁿ-güedé nàcuáa ní cuu ní ndoho Xítóhó Jesucristú. Te ío ní chindee ñàha Yá Ndiǒxí ní cáhǎⁿ-yu tnúhu-gá, te ñǎ túú ní cǎhǎⁿ cuèhé dava-gá-yu cuèndá ñáyi dācuaha tnúhu-gá. ³⁴ Te ñǎ túú tnàhí ni cùndahú-yu díhúⁿ, chi nchaa ñáyi ndècu ndihí ñuhu-xi, ndihí nchaa ñáyi càa vehe-xi ní nadicó-yu, te da ñⁿ da ñⁿ ndachìúⁿ-yu ní nadicó-yu òré xíní ñùhú-yu díhúⁿ. ³⁵ Te ní sǎñàhá-yu xii cue téé ní táuchíúⁿ Jèsús dacuàha ñaha xii-yu tnúhu-gá, te cue téé-áⁿ nǐ dǎcǎhñu-güedé nchaa ñáyi xini ñuhu. ³⁶ Te distritú Chìpré ndécú ñⁿ téé nàni-dé Chèé ñaní tnàhá ndí Lèví, te ní xóo cunu cuechi-dě veñúhu ñáyi isràél. Te cuèndá sá sǎñaha-dě tnúhu ndee iní xii-yu, xǎⁿ núu ní dǎnání ñàha-güedé Vèé

xii-dé. ³⁷ Te téé-áⁿ nĩ nadico-dě luha ñuhu-dé, te nèhe-dé díhúⁿ cuáháⁿ núú cuè téé ní táúchíúⁿ-gă dacuàha ñaha xií-yu tnúhu-gá.

5

Té Ananiás ndihi tá Sàfirá ñá túú ní quide ndáá-yu

¹ Te ndècu ìⁿ téé nàni Ananiás, te ñadìhí-dé nání-áⁿ Sàfirá, te ñáyíu-áⁿ nĩ nadìcò-yu luha ñuhú-yu. ² Te ní taxúha-dé sacú díhúⁿ, te sacú-gá néhé-dě cuáháⁿ ní sáñaha-dě xii cue téé ní táúchíúⁿ Jèsús dacuàha ñaha xii ñáyíu tnúhu-gá, te ní dándàhú ñáhá-dě xii-güedé, chi ní xáhaⁿ-dě sá nìhií ní sáñaha-dě, te nàha ñadihí-dé sá dúcáⁿ nĩ quide-dé. ³ Te ní xáhaⁿ tẽ Pèlú xii-dé:

—Ananiás, ¿ná cuèndá ducaⁿ nĩ quide-n nĩ dáñá-n nĩ quíhu sácúíhná ìní-n? Te ní dácuándèhnde-n núú Espíritú Yă Ndiöxí, te ní taxúha-n sàcú díhúⁿ nĩ níhí-n cuèndá ñuhu-n. ⁴ ¿Te ñuhu-áⁿ cuèndá sá ñúhú mée-n, àdi díhúⁿ-áⁿ cuèndá sá díhúⁿ méé-n cùu-xi, te cuu-ni cada-n nàcuáa càchí ìní-n càhaⁿ-n ñá? ¿Ná cuèndá ducaⁿ nĩ quide-n? ¿Ná ní quide-xi ìní-n nùu ní dácuándèhnde-n núú Yă Ndiöxí? Chi ñá díú-ní mée-ni ñáyíu nĩ dándahú-n —càchí té Pèlú xáhaⁿ-dě xii-dé.

⁵ Te òré ní ndihi tnúhu ní xáhaⁿ tẽ Pèlú, te uuⁿni ní nduá-dé te ní xíhí-ni-dé. Te nchaa ñáyíu ní níhí tnúhu sá nĩ xíhí-dé, te ní yùhú víhí-yu. ⁶ Te ní quixi ìⁿ úú cue téé cuechi, te ní ndanehe ñaha-güedě ní sacáⁿ ñáhá-güedě núú yuu, te ní ducuⁿ nuu ñaha-güedě yuu-áⁿ, te ní xido ñaha-güedě néhé ñaha-güedé cuáháⁿ chìndúxi ñaha-güedě xii-dé.

⁷ Te ní cuu úú uní òré, te ní quexìo ñadihí téé ní xíhí-án, te vátá quíní-gá-aⁿ sá ní xíhí yíi-aⁿ. ⁸ Te ní xáhaⁿ tẽ Pèlú xii-aⁿ:

—Cuíní-í cachí tnúhu ndáá-n. ¿Ndědau ní dícó-ndó ñùhu, ní dícó-ndó nàcuáa ní cachí yíi-n ăⁿ? —càchí té Pèlú xáhaⁿ-dě xii-aⁿ.

Te ní xáhaⁿ-aⁿ:

—Ndáá sá díú-ní dùcaⁿ —cachí-aⁿ xáhaⁿ-aⁿ.

⁹ Te ní xáhaⁿ tẽ Pèlú:

—¿Ná cuendá ducaⁿ ní chitnàha tnúhu-ndo dùcaⁿ ní quide-ndo ní cuíní-ndó dándahú-ndó Espiritú Yă Ndiǒxí? Quíní-n, chi sa cuándixi cue téé ní sáháⁿ ní chindúxi yíi-n, te yòhó tnàhá-n càndeca ñaha tucu-güedé xii-n quíhíⁿ vitna —càchí-dé xáhaⁿ-dě xii-aⁿ.

¹⁰ Te òré-án ní nduá-aⁿ núú tẽ Pèlú, te ní xíhí-ni-aⁿ. Te cuándihu cue téé cuechi-ăⁿ xití vehe, te ní xiní-güedé sá sà ní xíhí-aⁿ, núu ní xido ñaha tucu-güedé cuáháⁿ chindúxi-güedé-aⁿ diñi yíi-aⁿ.

¹¹ Te ní yùhú víhí ñáyíu ní sándáá iní tnúhu Yă Ndiǒxí, ndihí dava-gá ñáyíu ní níhí tnúhu nàcuáa ní cuu.

Ní quide-güedé titní núú sǎ vǎ yǒo tnàhí ndàcu cada te ío ní cuñúhu ñáyíu

¹² Te cue téé ní táúchíúⁿ Jèsús dacuàha ñaha xii-yu tnúhu-gá titní víhí sǎ vǎ yǒo tnàhí ndàcu cada ní quide-güedé, te ní cuñúhu víhí-yu. Te nchaa ñáyíu ní sándáá iní-xi tnúhu Jèsús ní xóo tacá-yu corrèdór néhé diù ndíi Salòmón. ¹³ Te nchaa ñáyíu ñá túú dàcuaha tnúhu-gá ñá ní cùyíi-yu chitnahá-yu ñáyíu ní sándáá iní-xi tnúhu-gá, dico nchaá-yu ní cáháⁿ váha-yu cuendá ñáyíu ní sándáá iní-xi tnúhu-gá.

14 Te vài téé, vài ñadihi ní sándáá iní-yu tnúhu-gá.
 15 Te cuendá sá ñí ñíhi-yu tnúhu sá quidé tātna cue téé ní xica cuu ndihi Jèsús, núu xiǎⁿ ní queñuhú-yu nchaa ñáyi cùhú ichi, te davá-yu ní quide túha-yu camá te davá-yu ní quide túha-yu yuu, núu núu nchaa xiǎⁿ tá sàcáⁿ-yu cue ñáyi cùhú-áⁿ cuáháⁿ, te xiǎⁿ cáa-yu ndètú-yu, chi ní sani iní-yu sá òré yáha té Pèlú te cuèdicó cuándáhú-dě yáha ndodo ñaha-xi xií-yu te ndúha-yu. 16 Te ní quixi ñáyi ñuú yatni Jerusálén ndécã-yu ñáyi cùhú, ndihi ñáyi yìhi ñaha espíritú cùndihi yucu ñávãha ní quixi, te nchaá-yu ní ndúha.

Ío ní quide úhú-güedé té Pèlú ndihi té Juáá

17-18 Te dútú cùnù-gá ndihi cue téé cùu saducéu cue téé cùndihi-dé ní cudééⁿ-güedé sá ïo chítú-yu dàcuaha tnúhu Jèsús, núu xiǎⁿ ní tñi-güedé cue téé ní táuchíuⁿ Jèsús dacuàha ñaha xií-yu tnúhu-gá ní chihi ñaha-güedé vecaá. 19 Te xití niú-áⁿ ñí quexìo ïⁿ espíritú xínú cuèchi núu Yã Ndiõxí ní nacaáⁿ-xi yèhe vecaá ní quee-güedé, te ní xáhaⁿ-xi xì-güedé:

20 —Quíhíⁿ-ndó vèñúhu càhnu sá ïo cùnùu te cùñaha-ndo xì ñáyi nàcuáa cadá-yu naníhi tàhú-yu —càchí espíritú-áⁿ xáhaⁿ-xi xì-güedé.

21 Te sá dúcáⁿ ñí xáhaⁿ-xi nùu sátá ñí túndaá, te ní sáháⁿ-güedé vèñúhu càhnu sá ïo cùnùu sá cúu-xí ñáyi isràél ní dácuahá ñaha-güedé xií-yu.

Te dútú cùnù-gá ndihi cue téé cùndihi-dé ní nadatácá tnáhá-güedé ndihi nchaa cue téé cùu sacuéhé nùu ñáyi isràél ndihi cue téé cùchiuⁿ, te ní tendaha-güedé sandàdú cuáháⁿ queñuhu-güedé cue téé yìhi vecaá ní cùu. 22 Te ní quexìo-güedé yèhe

vecaá, te ní xiní-güedé sá nì ìⁿ-gá cue téé dàcuaha ñaha xii ñáyiú tnúhu Jèsús ñá túú-gă-güedé yíhí. Te cuánuhú-güedé ²³ ní xítñúhu-güedé cue téé cùchiuⁿ, te xăhaⁿ-güedě:

—Ní sáháⁿ-ndí ní sándéhé-ndí vecaá, te ndèé chóó-ni, te xĩndecu-ni sandàdú cue téé xĩndeé yèhe vecaá. Te ní nacaáⁿ-ndí vecaá, te vá yôo ìⁿ-gá yíhí —càchí-güedé xăhaⁿ-güedě.

²⁴ Te sá dúcáⁿ nĩ xáhaⁿ-güedě, te cuáháⁿ iní cue dútú cúnùu ndihí téé tàxi tnuní cue téé xĩndeé veñúhu càhnu sá ìo cùnùu, te ní xítñàha-güedé:

—¿Nása cada-xi vitna duha càa ní cuu ní xinu cue téé yíhí vecaá-i? —càchí-güedé xítñàha-güedé.

²⁵ Te ní quexìo ìⁿ téé ní xáhaⁿ-dě:

—Cundedóho-ndo na càchí tnúhu-í ìⁿ tnúhu. Cue téé ní chihi-ndo vècaá ndécú-güedě veñúhu càhnu sá ìo cùnùu dacuaha-güedé ñáyiú —càchí-dé xăhaⁿ-dě.

²⁶ Te cue téé ndèé veñúhu ndihí téé tàxi tnuní ñáhá xii-güedé cuánguaca ñaha-güedě, te ñá túú ní quide úhú ñáhá-güedě, chì ní yùhú-güedé cuáha yúú ñáhá ñáyiú dii ñùú-xi-áⁿ. ²⁷ Te ní ndexìo ndihí ñaha-güedé núú cuè téé cùu sacuéhé ndihí núú cuè téé cùchiuⁿ. Te dútú cúnùu-gá ní ngüíta-dé ténáá ñáhá-dě xii-güedé, te xăhaⁿ-dě:

²⁸ —Te náa ñá díú nĩ cachí-ndí sá vă dăcuaha-gá-ndó ñáyiú tnúhu Jèsús te dàcuaha-ni-ndó-yu, te vitna nchaa ñáyiú ñuú Jerusálén ní níhí-yu tnúhu năcuáa càháⁿ-ndó. ¿Te ná cuendá ducaⁿ quide-ndo, te càchí-ndó să nchũhú ndécuéchi-ndí ní sahani-ndí Jèsús-i? —càchí dútú cúnùu-gá xăhaⁿ-dě xii-güedé.

29 Te té Pèlú ndihì dava-gá cue téé ní táúchíúⁿ Jèsús dacuàha ñaha xií-yu ní xáhaⁿ-güedě xii cue téé cùchiuⁿ:

—Nchúhú, Yá Ndiöxí cúnùu-gá sàndáá iní-ndí tnúhu càháⁿ-gá dàcúúxí tnúhu càháⁿ ñáyiú. 30 Te nchòhó ní sata caa-ndo Jèsús núú cùrúxí te núú cùrúxí-áⁿ nì xihí-gá, dico ní dándótó ñaha Yá Ndiöxí xii-gá. Te Yá Ndiöxí ní sàndáá iní cue ñaní tnáhá-ndí ní xíndecu ndéé sanaha. 31 Te Yá Ndiöxí ní xáhaⁿ-gá sá cùndècu Jesús xio cùha-gá cuendá taxi tnùnì-gá te dacăcu nihnu-gá ñáyiú isràél núú ùhú núú ndàhú. Te ducaⁿ-ni dacăcu nihnu-gá nchaa ñáyiú na dàña nchaa sá cuèhé sá dúhá, te cada càhnu iní-gá nchaa yíca cuěchi-yu. 32 Te ní xini-ndí nàcuáa ní quide-gá, núu xíáⁿ cání-ndí cuendú núú nchàa ñáyiú, te Espiritú Yá Ndiöxí chíndèe ñaha-xi xii-ndí càháⁿ-ndí tnúhu-gá. Te ñu-ni Espiritú-gá ní sáñaha-gă xii nchaa ñáyiú ní sàndáá iní-xi tnúhu-gá —càchí té Pèlú ndihì dava-gá-güedé xáhaⁿ-güedě xii cue téé cùchiuⁿ.

33 Te sátá dúcáⁿ nì xáhaⁿ-güedě xii cue téé cùchiuⁿ, te ní cudééⁿ-güedě, te ní ndatnúhu-güedé sá cáhni ñaha-güedé. 34 Te ñⁿ téé cùu fariséú tnàha-dé cúú-dě chiúⁿ, te nàni-dé Gamaliél, te cùu-dé mèstrú dăcuàha-dé ñáyiú nàcuáa ní chídó tnùnì ndí Moisés, te ío yíñùhu caháⁿ ndihì ñàhá-yu xii-dé. Te ní ngúnutní-dé, te ní xáhaⁿ-dě sá ná quèe tnaa té Pèlú ndihì dava-gá-güedé quehé. 35 Te ní xáhaⁿ-dě xii cue téé cùchiuⁿ:

—Nchòhó cue téé isràél, xìni ñuhu-xi sá cání vâha iní-ndó năsa cada-ndo ndihì cue téé-ăⁿ. 36 Chi ní cunaha nì xíndecu ñⁿ téé ní xínani Tèudás, te

ní cachí-dé sá cúnùu-dé, te ní cundihi-dé dàtná cúmí cièndú cue téé, te ñá ní cuìní-güedé cuu ñnuu-güedé ndihi cue téé cùchiuⁿ. Te ní sahani ñaha cuè téé cùchiuⁿ-áⁿ xii téé Tèudás, te ní ndihi cue téé ní xica cuu ndihi-dé ní xité nuu-güedé, te ñá túú-gǎ ní quide-güedé nàcuáa ní sani iní-güedé cada-güedé. ³⁷ Te sátá nì xíhí téé-áⁿ, te ní tnahá nduu nùcódó tnùnì ñáyiú. Te dàvá-áⁿ nǐ xíndecu ñ téé distritú Galileá ní xínani-dě Jùdás. Te títí-güedé ní chitnahá ñáhá-güedé xii-dé. Te tnàhá-dé ní sahani ñaha tùcu cue téé cùchiuⁿ, te nchaa cue téé ní xica cuu ndihi-dé ní xité nuu-güedé. ³⁸ Te na càchí tnúhu-í sá dáñá-ndó cuè téé-áⁿ, te nì ñà túú nǎgá tnúhu cúñaha-ndo xii-güedé, chi núu chiuⁿ mee-güedé quidé-güedé te cuíta-güedé, ³⁹ dico núu chiuⁿ Yá Ndiöxí quidé-güedé, te vá ndínihnu chiuⁿ quide-güedé. Te núu quide-güedé chiuⁿ Yá Ndiöxí, te vá nàá-ndó ndihi-güedé, chi Yá Ndiöxí nàá ndihi-ndo sǎ dúcáⁿ xǐquide-ndo —càchí té Gamaliél xǎhaⁿ-dě xii cue téé cùchiuⁿ.

⁴⁰ Te nchaa-güedé ní cáháⁿ sá tnúhu ndáá càháⁿ-dé. Te dàtnùnì ní nacana tucu-güedé té Pèlú ndihi dava-gá-güedé te ní caniha-güedé, te ní cáháⁿ níhi-güedé, te xǎhaⁿ-güedé sá vǎ càháⁿ-gá-güedé tnúhu Jèsús, te dàtnùnì ní dáñá ñàha-güedé cuánuhú-güedé. ⁴¹ Te ío ní cudíí iní-güedé, chi mee Yá Ndiöxí ní cachí-gá sá dúcáⁿ ndòho-güedé dacuàha-güedé ñáyiú tnúhu Jèsús. ⁴² Te ñ nduu ñ nduu ní dácuáhá-güedé ñáyiú xití veñúhu càhnu sá ïo cùnuu ndihi nchaa vehé-yu. Te ní xǎhaⁿ-güedé xií-yu sá Jèsús cúú-gǎ Crìstú Yáá ní quixi ñuyíú-a.

6

Ní ndúcú-güedě úsá cue té cundecu dacăhñu sá cáxí ñăyiu

¹ Te diu-ni dàvá-áⁿ nǐ sándáá iní vai ñáyiu tnúhu Jèsús. Te cue ñáyiu grìégú ní cáháⁿ cuèhé-yu cuendá ñáyiu israél, sá ñáyiu dìhí ñáyiu quèè ñáyiu càháⁿ tnúhu grìégú ñá túú tnàhá sá cáxí-yu, chi ñá túú sǎñaha ñⁿnuu-güedé. ² Te cue téé úxúú ní táúchíúⁿ Jèsús dacuàha ñaha xií-yu tnúhu-gá, cue téé-ǎⁿ nǐ cana-güedé nchaa ñáyiu sándáá iní tnúhu Jèsús. Te ní xáhaⁿ-güedě xií-yu:

—Nchúhú chi vá cúú dàcáhñu-ndí sá cáxí-yu, chi mee-ni tnúhu Yá Ndiǒxí càháⁿ-ndí. ³ Te nchòhó cue téé ndècu ndihí-ndí ichi Xítóhó Jesucrìstú cáháⁿ ndihí-ndo ùsá cue téé xíndecu iha, cue téé càháⁿ ndihí ñàhá-yu mee-ni tnúhu yíñùhu, cue téé ndècu ndihí Espíritú Yǎ Ndiǒxí, mee-ni cuè téé cùtnuní váha iní-xi. Te cue téé-án cuàha-ndí-güedé chiuⁿ cada-güedé dacăhñu-güedé sá cáxí-yu. ⁴ Te nchúhú mee-ni Yǎ Ndiǒxí cáháⁿ ndihí-ndí, te mee-ni tnúhu-gá dacuàha-ndí-yu —càchí-güedé xǎhaⁿ-güedě xií-yu.

⁵ Te nchaá-yu ní tñí-yu tnúhu ní cáháⁿ-güedé, núu ní ndúcú-yu cue téé cada chiuⁿ-án. Te ñⁿ-dé nání-dě Těvá, te ío váha sándáá iní-dé Yǎ Ndiǒxí, te ndècu ndihí-dé Espíritú-gá. Te duha ní xínani dàva-gá-güedé: té Lìpé, té Prǒcoró, té Nicànor, té Tímón, té Pàrmenás, té Lǎxí téé ñuú Antiòquia téé ní sándáá iní-xi sá dácuaàha ñáyiu israél te vitna ní sándáá iní-dé tnúhu Jèsús. ⁶ Te úsá cue téé-án nǐ sáháⁿ-güedé núú cuè téé úxúú ní táúchíúⁿ

Jèsús dacuàha ñaha xií-yu tnúhu-gá, te cue téé úxúú-án ñí cáháⁿ ndihi-güedé Yă Ndiöxí, te ní sacáⁿ ndodo-güedé ndaha-güedé díquí cuè téé úsá-án.

⁷ Te ñáyiú ní sándáá iní tnúhu Jèsús cuáháⁿ-yu titní xichi càháⁿ-yu tnúhu-gá. Te vâi-gá ñáyiú ta sándáá iní-yu tnúhu-gá cuáháⁿ, te ní xíndecú-yu ndihi dava-gá ñáyiú dàcuaha tnúhu-gá ñuú Jerusálén. Te titní dútú ñí sándáá iní-güedé tnúhu-gá.

Ní tnî-güedé té Těvá

⁸ Te té Těvá ní quide-dé titní núú sǎ vǎ yǎo tnàhí ndàcu cada, te ní cuñúhu vîhí-yu sá dúcáⁿ ñí quide-dé, te ducaⁿ ñí quide-dé chi ndècu ndihi-dé Yă Ndiöxí chîndèe ñaha-gá. ⁹ Te ní xíndecu cue téé ní xóo cunu cuechi núú ñîⁿ téé tàxi tnuní, te téé tàxi tnuní-án ñǎ ní xǎo dañá tnàhí-dé quee-güedé núú chíúⁿ-dě, te ní xînu-ná-güedé. Te sâtá xǎǎ, te ní dácáá-güedé veñúhu-güedé, te veñúhu-án sàháⁿ ñáyiú ñuú Cîrené, ñáyiú ñuú Alejándriá, ñáyiú ñuú Ciliciá, ndihi ñáyiú distrítú Àsiá. Te nchaa ñáyiú-án ñí nàá ndihí-yu té Těvá. ¹⁰ Te ñǎ ní ñîhí-yu tnúhu cáháⁿ-yu, chi ío váha ní sáá díquí-dě nàcuáa ní xáhaⁿ-dě xií-yu, chi Espíritú Yă Ndiöxí ní chîndee ñàha-xi xîi-dé. ¹¹ Te ní cháhu-yu cue téé ní dâcuándèhnde tnúhu ní cáháⁿ té Těvá núú-yu. Te ní xáhaⁿ-güedé sá càháⁿ cuèhé-dé cuèndá ndîi Moîsés ndihi cuèndá Yă Ndiöxí. ¹² Te cuèndá sá dúcáⁿ ñí dâcuándèhnde-güedé núú ní sándáá iní-yu, te ní cudéèⁿ-yu núú tǎ Těvá. Te ní cudéèⁿ cue téé cùu sacuéhé, te tnàhá cue téé dàcuaha ñaha xií-yu nchaa tnúhu ní chídó tnùnî ndîi Moîsés

ní cudéén-güedě. Te ní sáhán-güedé ní tn̄i-güedé té Těvá ndécá ñàha-güedé cuáhán núú quidé cuè té cùchiuⁿ jundá, ndihi cue té cùu sacuéhé.
¹³ Te ndécá-yu cue té dācuandehnde cuáhán núú quidé-güedě jundá, te ní quesaha-ni tùcu-güedé càhán cuèhé-güedé, te xǎhaⁿ-güedě:

—Tée-a mee-ni càhán cuèhé-dé cuendá veñúhu sá ïo cùnuu, veñúhu ní cuu íí, te càhán cuèhé-dé cuendá nchaa sá ñí chídó tn̄n ní ndíi Moisés.
¹⁴ Te ní tecú dóho-ndí cāchí-dé sá Jēsús téé ñuú Nazārét dangòyo-dé veñúhu càhnu sá ïo cùnuu te vá dáñá-gǎ-dé cada-ndí nācuáa ní cachí ndíi Moisés cada-ndí —cāchí-güedé xǎhaⁿ-güedě.

¹⁵ Te nchaa cue té ndècu jundá ní ndacoto váha-güedé núú tē Těvá. Te ní dáyèhé-xi núú-dě dàtná quidé-xí núú espíritú xínú cuèchi núú Yǎ Ndiǒxí.

7

Té Těvá xǎhaⁿ-dē sá ñà túú cuèchi-dē

¹ Te ní xáhaⁿ dūtú cùnùu-gá xii-dé:

—¿Ndáá tnúhu càhán-güedé cuendá-n-ǎ? —
 cāchí-dé xǎhaⁿ-dē.

² Te té Těvá ní xáhaⁿ-dē xii-güedé:

—Nchòhó cue ñaní tnáhà-í ndihi nchòhó cue té cùu sacuéhé, cundedóho-ndo ñⁿ tnúhu na càhán-í-a. Yá Ndiǒxí ío cùnuu-gá, te ní cáhán ndihi-gá ndíi Àbrahám nàcióⁿ Mesopòtamiá cútnàhá vátá quíhíⁿ-gá ndíi cundecu ndíi ñuú Hàrán. ³ Te ní xáhaⁿ-gǎ xii ndíi: “Daña-n nchàa ñaní tnáhá-n, te daña-n ñùhu-n, te quíhíⁿ-n ñⁿ xichi núú dánèhé ñáhà-í cundecu-n”, ñuha ní xáhaⁿ Yǎ Ndiǒxí xii

ndíi Àbrahám. ⁴ Te sáta dúcáⁿ nǐ xáhaⁿ Yǎ Ndiöxí xii ndíi Àbrahám, te ní ndee ndíi ñuú Cáldeá, te cuáháⁿ ndíi cundecu ndíi ñuú Hàrán. Te sáta nǐ xíhí tǎtá ndíi, te ní xáhaⁿ Yǎ Ndiöxí quixi ndíi cundecu ndíi núú ndécú-ó vǐtna. ⁵ Te Yá Ndiöxí ñá túú ní sǎñaha-gǎ ni lùha ñuhu cuu cuendá ndíi núú nǐ xíndecu ndíi. Te ní xáhaⁿ ndǎá Yǎ Ndiöxí xii ndíi sá cuǎñaha-gǎ ñuhu cuu cuendá ndíi, te na cùú ndíi, te ndóo ndíhi nchaa ñanǐ tnáhá ndíi cacu túu ndéé cuéé-gá. Te ducaⁿ nǐ xáhaⁿ-gǎ cuéi vátá cundècu-gá ni ñⁿ déhe ndíi. ⁶ Te ní xáhaⁿ tùcu Yá Ndiöxí xii ndíi Àbrahám sá díú-ní ñanǐ tnáhá ndíi quíhíⁿ-yu núú xícá cundécú-yu cúmi cièndú cuíá, te vá dáñǎ-yu queé-yu núú chíǔⁿ-yu, te ío dandòho ñaha-güedé núú cundécú-yu. Duha ní xáhaⁿ Yǎ Ndiöxí xii ndíi, te ndǎá ducaⁿ nǐ cuu. ⁷ Te ní xáhaⁿ tùcu Yá Ndiöxí xii ndíi Àbrahám: “Yúhú dandòho-í nchaa ñáyíu na dàndòho ñaha xii cue ñanǐ tnáhá-n. Te dàvá-án te ndee cue ñanǐ tnáhá-n núú cundécú-yu, te quixí-yu chiñuhu ñahá-yu xii-í iha”, duha ní xáhaⁿ Yǎ Ndiöxí xii ndíi Àbrahám, te ndǎá ducaⁿ nǐ cuu. ⁸ Te Yá Ndiöxí ní quide ndǎá-gá ndíhi ndíi Àbrahám, te ní xáhaⁿ-gǎ xii ndíi sá cuǎha-güedé sèñá ñⁱⁱ nchaa landú té cuendá cunàhá-yu nàcuáa ndúu sá nǐ quide ndǎá-gá ndíhi ndíi Àbrahám. Núu xǎⁿ núú ùná nduu sá nǐ cacu té Isàác déhe ndíi Àbrahám, te ní sáha ndíi sèñá ñⁱⁱ-dé. Te díu-ní ducaⁿ nǐ quide tucu té Isàác déhe-dé té Jàcób, te díu-ní ducaⁿ nǐ quide té Jàcób, chi úxúú déhe-dé ní xíndecu, te nchaa-güedé ducaⁿ nǐ quide-dé. Te ndí ùxúú cue téé-áⁿ nǐ cuu-güedé ñanǐ tnáhá-ó.

⁹ Te ñⁿ déhe té Jàcób ní xínani-dě Chèé. Te ñá ní cùu váha iní cue ñanǐ-dé núú-dě, núu ní dícó

ñàha-güedé ní queheⁿ ñaha cuè téé cuáháⁿ nàcióⁿ Ègiptú, te Yá Ndiõxí ñá ní dàña ñaha-gá xii-dé cuíta nihnu-dé. ¹⁰ Te ní chindee ñàha-gá xii-dé ní cácu-dé cútnàhá ní ndoho vìhi-dé. Te téé yìndaha Ègiptú ío ní cudíí ìní-dé té Chèé, te ní cutnùní ìní-dé sá ïo váha túha té Chèé, te ducaⁿ ñí cutnùní ìní-dé, chí Yá Ndiõxí ní chindee ñàha-gá xii té Chèé. Te ní xáhaⁿ tée yìndaha Ègiptú xii té Chèé sá díú tē Chèé coo-dé gobièrnú Ègiptú, te taxi tnùní-dé nchaa ñáyíu xìnu cuechi núú tē yìndaha Ègiptú-áⁿ.

¹¹ 'Te ní quíhu tnamá nihíi nàcióⁿ Ègiptú ndíhi nàcióⁿ Cànaá, te ío ní ndohó-yu. Te nchaa ñaní tnáhá-ó ñí xíndecu ndéé sanaha ñă ní xõo níhí-gă-yu sá cáxi-yu. ¹² Te ní níhí tē Jácób tnúhu sá ío triú Ègiptú, núu ní tendaha-dě cue déhe-dé ní sáháⁿ-güedé ní sânguaaⁿ-güedé triú-áⁿ, te dàvá-áⁿ ñí sáháⁿ cue ñaní tnáhá-ó xito díhna nuu nàcióⁿ Ègiptú. ¹³ Te xito cùu uú cuáháⁿ-güedé, te ní xáhaⁿ tē Chèé sá ñàní-dé cúú-güedě. Te téé yìndaha Ègiptú ní cutnùní ìní-dé sá díú-ní ñàní té Chèé cúú-güedě. ¹⁴⁻¹⁵ Te ní cana té Chèé tătá-dě té Jácób ndíhi nchaa ñaní tnáhá-dě. Te cùu-xi datná únídico sáhúⁿ-yu ndèca té Jácób cuáháⁿ nàcióⁿ Ègiptú núú ndécú tē Chèé, te xíaⁿ ñí quexió-yu ní ngóo-yu. Te yàcáⁿ ní xíhí té Jácób ndíhi nchaa déhe-dé cue ñaní tnáhá-ó. ¹⁶ Te sátá ñí cuu titní cuía, te ní natava-güedé yiqui ndíi Jácób ndíhi nchaa déhe ndíi nchìdo-güedé cuáháⁿ ñuú Sìquém. Te ndíi Àbrahám sa ní cuu titní-gá cuía sã ñí nacuaaⁿ ndíi ñuhu núú cuè déhe ndíi Hà mòr. Te xíaⁿ nchíi yaú ní nachindúxi-güedé

yiqui-áⁿ.

¹⁷ Te cútnàhá vátá nátàva-gá-güedé yiqui cue ndíi, te sa ta tnàhá yatni cada Yá Ndiöxí nàcuáa ní xáhaⁿ-gã xii ndíi Àbrahám cada-gá sá cúú-xí ñãyiu isràél ndécú Ègiptú, te ta cãyá víhĩ-yu cuáháⁿ. ¹⁸ Te dàvá-áⁿ chi ingá tée yìndaha nacióⁿ Ègiptú, te ñá túú-gã ní xìní-dé nása ní xóo cada ndíi Chèé. ¹⁹ Te tée yìndaha Egiptú ñá ní quìde ndáá-dé, chi ío ní dándóhó-dě ñaní tnáhá-ó ñĩ xíndecu dàvá-áⁿ. Te ní táúchíúⁿ-dě sá xócuñíⁿ-yu dándóo-yu déhe yiquiⁿ cuendá ndihi-güexi cuú. ²⁰ Te dàvá-áⁿ ñĩ cacu té Moisés, te ío ní cudíí ñiní ñáhá Yá Ndiöxí xii-dé. Te ní xíndecu ndihi ñaha nãná-dě ndihi tãtá-dě úní-ni yóó. ²¹ Te ndèca ñahá-yu cuáháⁿ ingá xichi, te yàcáⁿ ní dándóo ñahá-yu xii-dé, te ní naníhí ñáhá déhe yoco tée yìndaha Egiptú, te ní xito-xi-dé dàtná xító-xí ñⁿ déhe mee-xi ñĩ xito-xi-dé ndéé ní sahnu-dé. ²² Te ní cutúha-dé nchaa sá xìní cue tée ègiptú, te ío váha ní sáá díquí-dě tnúhu cáháⁿ-dé ndihi nchaa sá cádá-dě.

²³ Te cútnàhá ndécú-dě údico cuía-dě, te ní cachí-dé sá quihíⁿ-dé cáháⁿ ndihi-dé cue ñaní tnáhá-dě ñáyiu isràél. ²⁴ Te ní xìní-dé ní caniha ñⁿ tée ègiptú xii ñⁿ tée isràél, te ñá ní cùndee iní-dé cundehe-dě ñũu ní sáháⁿ-dé ní chindee-dě tée isràél, te ní sahni-dé tée ègiptú, ²⁵ chi ní cachí Yá Ndiöxí sá díú-dě dacăcu-dé ñaní tnáhá-dě ñáyiu isràél núú cuè tée ègiptú. Te ní sani iní-dé sá cútnuní iní-yu nàcuáa ní xáhaⁿ Yá Ndiöxí xii-dé, dico ñá túú ní cùtnuní iní-yu. ²⁶ Te nduu tnéé ní xìní-dé nàá úú cue tée isràél, te ñá túú ní tnàhá iní-dé nàá-güedé ñũu ní xáhaⁿ-dě xii-güedé: “¿Ná

cuendá ducaⁿ xĩnàá-ndó? ¿Náa ñá díú ndĩmee-ndo núu ducaⁿ xĩnàá-ndó?” Duha ní xáhaⁿ tẽ Moisés xii-güedé. ²⁷ Te tée ndècuéchi ní sáháⁿ-dé ní chin-daha ñĩnu-dé té Moisés ñⁿ xio, te ní xáhaⁿ-dẽ: “¿Ná cúú yòhó núu véxi-n tàxi tnuní ñáhá-n? ²⁸ Te tnàhá-ni tucu yúhú cahni-n dàtná ní sahani-n tẽe ègiptú icu càhaⁿ-n á”, duha ní xáhaⁿ-dẽ xii té Moisés. ²⁹ Te sá dúcáⁿ ñĩ cáháⁿ tée israél núu ní yúhú té Moisés ní xinu-dé cuáháⁿ-dé ní sáá-dé nacióⁿ Mèdián. Yàcáⁿ ní ngóo-dé, te yàcáⁿ ní tnándaha-dé, te ní cacu úú déhe tée-dé.

³⁰ Te sátá ñĩ xínu údico cuíá, te ní sáháⁿ té Moisés ñⁿ xio yucu Sinái. Te yàcáⁿ ní xiní-dé ñⁿ tnutáu nchìcúⁿ ñuhú, te xití itá ñuhú-áⁿ ñĩ xiní-dé yíhí ñⁿ espíritú xínú cuèchi núú Yá Ndiöxí. ³¹ Te òré ní xiní-dé sá yíhí-xí xití itá ñuhú-áⁿ, te ní cuñúhu vìhi-dé sá ñĩ xiní-dé espíritú-áⁿ xití itá ñuhú-áⁿ, te ní sándehe-gá-dé, te ní xíndéhé vǎha-dé. Te ní tecú dóho-dé ní cáháⁿ Yá Ndiöxí, te xáhaⁿ-gǎ xii-dé: ³² “Yúhú cúú-í Ndiöxí ní cáháⁿ ndihi cue ñaní tnáhá-n ndéé sanaha, ndíi Àbrahám ndihi ndíi Isàác ndihi ndíi Jàcób, ndihi dava-gá cue ñaní tnáhá-n. Nchaa cue ndíi-áⁿ ñĩ xóo cáháⁿ ndihi-í.” Duha ní xáhaⁿ-gǎ xii té Moisés. Te ní quidi ñaha-xi xii té Moisés sá ñĩ yúhú-dé, te ñá ní cùyi-gá-dé cundehe-dẽ tnutáu nchìcúⁿ ñuhú-áⁿ. ³³ Te Yá Ndiöxí ní xáhaⁿ-gǎ xii-dé: “Queñuhu chàú-n, chi núú ñúhú ñĩ cuu íí núnñi-n. ³⁴ Te yúhú ndéhè-í sá ïo ndòho nchaa ñáyiú cùu cuendá-í, ñáyiú ndècu nacióⁿ Ègiptú. Te ní tecú dóho-í sá ïo ndàhú xícáháⁿ-yu, núu xǎⁿ véxi-í càchí tnúhu-í sá nùhú-n nacióⁿ Ègiptú cuendá ndeñùhú-n-yu yàcáⁿ.” Duha ní xáhaⁿ Yá Ndiöxí xii té Moisés.

³⁵ 'Te ñá ní sàndáá iní-yu té Moisés ndée díhna, chi ní xáhãⁿ-yu: “¿Ná cuendá véxi-n tàxi tnuní ñáhá-n xii-ndí?” Duha ní xáhãⁿ-yu xii té Moisés. Te ñu-ni té Moisés ní tendaha ñàha Yá Ndiõxí ní sáháⁿ-dé dacăcu-dé ñáyi isràél nàcióⁿ Ègiptú cuèi ñá ní sàndáá iní ñáhãⁿ-yu xii-dé. Dico ní taxi tnùní-dé-yu, chi ducaⁿ ñí xáhaⁿ-gă òré ní xíní-dé espíritú xínú cuèchi núú-gă xití tnutàù nchícúⁿ ñuhú. ³⁶ Te té Moisés ní ngüta-dé ní quide-dé sá vă yõ tnàhí ndàcu cada, te ní cuñúhu vîhí-yu sá dúcáⁿ ñí quide-dé, te ducaⁿ ñí quide-dé Ègiptú ndihî Lámár Tícuèhé. Te ní ngódó núú-dě núú-yu ní queé-yu Ègiptú cuáháⁿ-yu ñⁿ ichi xití yucu núú vă yõ tnàhí ndècu, te ní xîhî-yu údico cuíá xití yucu-áⁿ, te xíaⁿ ñí xóo cada-dé sá vă yõ tnàhí ndàcu cada. ³⁷ Te ñu-ni té Moisés ní xáhaⁿ-dě xii cue ñaní tnáhá-dě dàvâ-áⁿ: “Yá Ndiõxí cada-gă te coo ñⁿ ñaní tnáhá-ndó ndée cuèé-gă, te téé-áⁿ cǎháⁿ-dé tnúhu-gă núú-ndó dàtná cuíní-ndó ñí cachí-gă quidé yũhú, te ío xîni ñuhu-xi cundedóho-ndo tnũhu cáháⁿ-dé”, duha ní xáhaⁿ tẽ Moisés xií-yu dàvâ-áⁿ. ³⁸ Te ñu-ni té Moisés ní xíndecu ndihî-dé ñáyi isràél xití yucu, te ní sáá-dé yucu Sinàí, te xíaⁿ ñí quixi ñⁿ espíritú xínú cuèchi núú Yá Ndiõxí ní cáháⁿ ndihî ñàha-xi xii-dé, te yàcáⁿ ní dăcuáhá ñàha-xi tnúhu-gă, te ñu-ni tnúhu-áⁿ ñí ndóo dăcuaha-o.

³⁹ 'Te cue ñaní tnáhá-ó ñí xíndecu ndée sanaha ñă ní sàndáá iní-yu té Moisés, te ñá ní ndée iní ñáhãⁿ-yu xii-dé, chi ní cuíní-yu nuhú tucú-yu ñuú Ègiptú cundecú-yu. ⁴⁰ Te òré ndécú tẽ Moisés yucu ní xáhãⁿ-yu xii ñaní-dé té Àrón: “Cadúha-n ñⁿ úú

ndiõxí díhúⁿ cuàáⁿ codonùu núú-ó cùhuⁿ-o ichi, chi ñá túú cùtnuní iní-ó ndèé ichi cuáháⁿ té Moisés, téé yòdo nuu núú-ó ndùu ní quee-o Ègíptú”, duha ní xĩ-yu té Àrón. ⁴¹ Te dàvá-áⁿ ñí cadúha-güedé ìⁿ chěhlu mee-ni dĩhúⁿ cuàáⁿ, te ní sahní-güedé ìⁿ ùú quiti nchìto ní quide càhnu-güedé chěhlu-áⁿ. Te ío ní cudĩ ìní-yu quiti-áⁿ, chi ní cachí-yu sá díú-ní ndiõxí cúú-dí. ⁴² Te sá dúcáⁿ ñí quidé-yu, xiáⁿ ní dáñá ñàha Yá Ndiõxí xii-yu. Te ní dáñá-gă ní xóo cada càhnú-yu nchíanchii, ndihí yóó, ndihí nchaa chódíní. Te duha ní chídó tnùní ìⁿ téé ní xóo cáháⁿ tnúhu Yá Ndiõxí ndéé sanaha nàcuáa ní xáhaⁿ-gă xii ñáyiú dàvá-áⁿ:

Nchòhó ñáyiú isràél, ní cuu údico cuía yíhí-ndó yùcu,

te ní sahní-ndo quiti-ndo ní quide càhnu ñaha-ndo xii-í cáháⁿ-ndó, dico ñáhá chi ní sahní-ndo-güèdì ní quide càhnu-ndo sá ñí cadúha mee-ndo.

⁴³ Te ní cadúha-ndo ìⁿ veñúhu lĩhli,

te ní sanutnĩ-ndo Mòlóc sá càchí-ndó cùu ndiõxí-ndó xica nchido-ndo xití yucu,

te ní cadúha-ndo ìⁿ chódíní, te quiti-ăⁿ càchí-ndó să cúú-dí ndiõxí Rènfán,

te ndi ndùu sá ñí cadúha-ndo-ăⁿ ñí quide càhnu-ndo.

Te cuendá sá dúcáⁿ ñí quide-ndo te yúhú queñuhu ñaha-ĩ xii-ndo quĩhĩⁿ-ndó cùndecu-ndo ingá xio nàcióⁿ Babiloniá.

Duha ní xáhaⁿ Yá Ndiõxí xii-yu, te ducaⁿ ñí chídó tnùní téé ní xóo cáháⁿ tnúhu-gă.

44 'Te xití yucu-án nĩ dácáá-güedě ñⁿ veñúhu vehe dóó. Te vehe-án nĩ cuu-xi ñⁿ sá cútnùní iní-yu sá Yă Ndiöxí ndécú ndihi ñaha-gá xií-yu. Te vehe-án nĩ dácáá-güedě nàcuáa ní xáhaⁿ Yă Ndiöxí xii té Moisés, chi ní dánèhé ñáhá-gă xii-dé nàcuáa dacàa-güedě. 45 Te sátá nĩ xihí nchaa cue téé-án, te ní ndóo ndihi nchaa déhe-güedě veñúhu-án. Te ní xido tucu-güedě veñúhu-güedě cuáhán-güedě, te cuáhánⁿ ndihi-güedě té Jòsué núú cündécú-yu. Te sátá nĩ quexiö-yu, te ní dácúnũ-yu ñáyiu dii ñúú-xi-án chi mee Yă Ndiöxí ní chindee ñaha-gá xií-yu. Te sátá nĩ ndihi nchaa ñáyiu ní xica nchido veñúhu dóó-ăⁿ nĩ xihí, te ní ndóo ndihi dava-gá-yu. Te ducaⁿ-ni ndècu-xi ní cacu té Dàvií, téé ní xindaha ñaha xií-yu. 46 Te Yă Ndiöxí ní cudíí víhí iní-gá té Dàvií. Te ní xicáⁿ tnúhú-dě núú-gă nõu cuu dacàa-dé veñúhu cuu cuendá-gá, chi ñⁿ-ni Yă Ndiöxí ní xóo cada càhnu té Dàvií ndihi té Jácób, ñaní tnáhá-ó nĩ xindecu ndéé sanaha vîhi-gá. 47 Te Yă Ndiöxí ñá ní dàña-gá dacàa té Dàvií veñúhu-gá dico déhe-dé té Salòmón, chi ní dáñá-gă ní dácáá-dě veñúhu cuu cuendá-gá 48 cuèi ñá túú sàcúndecu-gá veñúhu dàcaa cue téé ñuyíú-a, chi ndëni xiáⁿ ndécú-gă chi espíritú cúú-gă. Te duha ní chídó tnùní téé ní xóo cáháⁿ tnúhu Yă Ndiöxí ndéé sanaha nàcuáa ní cáháⁿ-gá:

49 Yúhú táxi tnùní-í andíu ndihi ñuyíú,
te xiáⁿ nõu nchòhó vá ndácú-ndó chihí ñaha-ndo
xití veñúhu dàtná quidě-yu sá cächí-yu cùu
ndiöxí-yu ní cadúha-yu.

Te ñá túú xìni ñuhu-í núú ndétàtú-í,

50 chi yúhú ní cadúha-í nchaa sá iò ñuyíú-a.

Duha ní cáháⁿ Yă Ndiöxí, te ðiu-ni ducaⁿ nĩ chídó tnùnĩ téé ní xóo cáháⁿ tnúhu-gá —duha ndùu nchaa tnúhu ní xáhaⁿ tẽ Těvá xii-güedé.

⁵¹ Te ní xáhaⁿ tùcu-dé:

—Nchòhó, ío sàá iní-ndó chi quìde-ndo datná quidé ñăyiu ñá túú cùu ñăyiu isràél chi ñá túú tédòho-ndo tnúhu càháⁿ Yă Ndiöxí, chi ñá cuíní-ndó quíndáá iní-ndó tnúhu-gá, mee-ni cùu úhú iní-ndó Espíritú-gá dàtná ní xóo cada cue ñanĩ tnáhá-ndó nĩ xínecu ndéé sanaha. ⁵² Chi cue téé-áⁿ ò ní xóo dandòho-güedé nchaa cue téé ní xóo cáháⁿ tnúhu Yă Ndiöxí ndéé sanaha. Te ní sahni-güedé nchaa cue téé ní cáháⁿ sá quíxí Crìstú ñuyíú-a, te Yaá-áⁿ ñá túú cuěchi-gá. Te ðiu-ni ducaⁿ nĩ quide-ndo Crìstú cùtnàhá ní quixi-gá ñuyíú-a, chi ní sáha cuendá-ndó-gă núú cuè téé ní cuu úhú iní ñáhá xii-gá ní sahni ñaha-güedě. ⁵³ Te ndècu ndìhi-ndo tnúhu ní chídó tnùnĩ ndíi Moisés nàcuáa ní xáhaⁿ espíritú xínú cuèchi núú Yă Ndiöxí xii ndíi, te ní dùcaⁿ ñá túú sàndáá iní-ndó tnúhu-áⁿ nùu ní sahni-ndo Jèsús. Te ðiu-ni tnúhu-áⁿ ndécú ndìhi-ndo ndéé vitna —càchí té Těvá xáhaⁿ-dě xii-güedé.

Ní sahni-güedé té Těvá

⁵⁴ Te sá dúcáⁿ nĩ xáhaⁿ tẽ Těvá xii-güedé, te ní cudééⁿ víhí-güedě núú-dě, núu ní quide rúhñú-güedě núhu-güedé sá sàtú iní-güedé. ⁵⁵ Te té Těvá ndécú ndìhi-dé Espíritú Yă Ndiöxí, te ní ndacoto váha-dé andiu, te ní xíní-dé súúni dàtásaⁿ-xi núú ndécú Yă Ndiöxí, te ní xíní-dé Xítóhó Jesucrìstú nútnĩ-gá xio cùha Yă Ndiöxí. ⁵⁶ Te ní xáhaⁿ tẽ Těvá xii-güedé:

—Chí cündèhe andïu chi yúhú ndéhè-í Xítóhó Jesucrístú nútnî-gá xio cùha Yá Ndiöxí, te diu-gá cúú-gá ñaní tnàhá-ndó nchàa-ndo —cachí-dé xăhaⁿ-dě.

⁵⁷ Te ní sadí-güedé dóho-güedé cuendá sá ñă ní tnàhá iní-güedé cundedóho-güedé tnúhu càháⁿ-dé, te uuⁿni ní cuáá-güedé, te ní taxi ndaha ñăha-güedé xii-dé ⁵⁸ ndécá ñăha-güedé cuáháⁿ ndée ñⁿ xio yuhu ñúú, te yàcáⁿ ní sãñaha-güedě yúú xii-dé. Te ndècu ñⁿ téee cuechi nàni-dé Sàulú, te téee-án ñí quide cuendá-dé dóó-güedě cuendá ní nune ndaha-güedé ní sãñaha-güedě yúú xii té Těvá. ⁵⁹ Te òré sãñaha-güedě yúú, te ní cáháⁿ ndihi-dé Xítóhó Jesucrístú te xăhaⁿ-dě:

—Yòhó Xítóhó Jesucrístú, naqueheⁿ-n ñní-í —càchí-dé xăhaⁿ-dě xii-gá.

⁶⁰ Te ní ngüíñí xítí-dě, te níhi ní cáháⁿ-dé, te xăhaⁿ-dě:

—Yòhó Xítóhó Jesucrístú, vá técuěchi-n cuè téee-a sá dúhá quide ñăha-güedé xii-í —càchí-dé xăhaⁿ-dě xii-gá.

Te xíăⁿ-nă ní cáháⁿ-dé, te ní xíhí-dé.

8

Té Sàulú chíhí-dě ñăyiu sàndáá iní-xi tnúhu Jèsús vecaá

¹ Te té Sàulú ní nduu vétú iní-dé sá ñí sahní-güedé té Těvá.

Te diu-ñí nduu-ăⁿ ñí cuu níhi cuendá nchaa ñăyiu sàndáá iní-xi tnúhu Jèsús ñúú Jerusálén. Te ní ndihí-yu ní xité nuu cuáháⁿ-yu distritú Jùdeá ndihi distritú Sàmariá. Te cue téee ní táuchíúⁿ Jèsús dăcuàha ñăha xií-yu tnúhu-gá ní ndóo-güedé ñúú

Jerusalén. ² Te nchaa cue téè càháⁿ ndihí Yá Ndiöxí ní chindúxi-güedé ndíi Těvá. Te ío ní ndáhyú ñáyiú ní sándáá iní tnúhu Jèsús sá nĩ xíhí ndíi. ³ Te té Sàulú ío dándoho-dé-yu, chí ndí vehe ndí vehe cuáháⁿ-dé cuátníi-dé cuěi téè cuěi ñadíhí ndécá-dě cuáháⁿ vecaá.

Càháⁿ-yu tnúhu Yá Ndiöxí distritú Sàmariá

⁴ Te nchaa ñáyiú ní xité nuu cuáháⁿ-yu càháⁿ-yu tnúhu Jèsús nchaa núú quéxió-yu. ⁵ Te té Lìpé cuáháⁿ-dé distritú Sàmariá càháⁿ-dé tnúhu Xítóhó Jesucristú Yaa ní tendaha Yá Ndiöxí ní quixi ñuyíú-a. ⁶ Te ío vại núú sǎ vǎ yǎo tnàhí ndàcu cada ní quide-dé, te ní cuñúhu vǐhí-yu, te ní xíndedóho váha-yu nchaa tnúhu ní cáháⁿ-dé. ⁷ Te vại ñáyiú yǐhí ñaha espíritú cundíhí yucu ñávǎha ní queñuhu-dé nchaa espíritú-áⁿ yiqui cuñú-yu, te ní cana saa-xi òré ní ndee-xi yiqui cuñú-yu cuáháⁿ-xi, te ní ndúha-yu. Te vại ñáyiú cùhú ñá cúú-gǎ candá nihnú-yu ndihí ñáyiú yacua ní quide tátna-dé, te ní ndúha-yu. ⁸ Te sá dúcáⁿ nĩ cáháⁿ-dé tnúhu Jèsús te ní quide tátna-dé-yu, xǎⁿ ío ní cudíi iní ñáyiú ñuú-áⁿ.

⁹ Te diu-ni ñuú-áⁿ ndécú ñⁿ téè nàni Xímú, te téè-áⁿ xìní-dé cada ndùu-dé, te ní cuu naha dùcaⁿ quide-dé, te ní xóo cuñúhu ñáyiú distritú Sàmariá sá dúcáⁿ quide-dé, te ní cachí-dé sá díú-ní-dě cúnùu.

¹⁰ Te nchaa ñáyiú cuěi ñáyiú cuica te cuěi ñáyiú ndàhú ío nèhé-yu sá yǐñùhu núú-dě, te xǐtnàhá-yu:

—Tée-ǎⁿ ío chĩndee ñaha Yá Ndiöxí xii-dé nũu vại núú sǎ quídé-dě —cǎchí-yu xǐtnàhá-yu.

¹¹ Te ní sándáá iní-yu nàcuáa ní xóo cada ndùu-dé, te ní xóo cuñúhu vǐhí-yu, te ní cuu naha dùcaⁿ-ni dandahú ñáhá-dě xǐi-yu. ¹² Te té Lìpé

ní cáháⁿ-dé tnúhu Xítóhó Jesucrístú, te ní xáhaⁿ-dě xii-yu sá Yă Ndiöxí cuiní-gá ndíhu ndaha ñàha-gá xii-yu. Te cuëi té cuëi ñadìhí ní sándáá iní-yu tnúhu-gá, te ní sanduté-yu. ¹³ Te tnàhá té Xǐmú ní sándáá iní-dé tnúhu-gá, te ní sandute-dé, te ní xica cuu-dé ndihí té Lìpé, te ní cuñúhu-dé chi titní núú sǎ vǎ yǒo tnàhí ndàcu cada ní quide té Lìpé, te ní cuñúhu vǐhi nchaa ñáyiu.

¹⁴ Te dava-gá cue té ní táuchíuⁿ Jèsús dacuàha ñaha xii ñáyiu tnúhu-gá ní níhí-güedě tnúhu sá ñáyiu distrítú Sàmariá ní sándáá iní-yu tnúhu Yá Ndiöxí. Te ní tendaha-güedě té Pèlú ndihí té Juáa cuáháⁿ-güedé distrítú Sàmariá. ¹⁵ Te ní quexìo-güedé, te ní cáháⁿ ndihí-güedé Yă Ndiöxí ní xícáⁿ-güedé Espíritú-gá quixi cundecu ndihí-yu. ¹⁶ Chi ní ñⁿ-yu vátá sàá-gá Espíritú-gá cundecu ndihí-yu, chi òré ní sanduté-yu, te mee-ni Jèsús ní cacunehe-güedé. ¹⁷ Te òré ní sacáⁿ ndodo-güedé ndaha-güedé díquǐ-yu, te ní quexìo Espíritú-gá ní ngúndecu ndihí-yu.

¹⁸ Te ní xiní té Xǐmú nàcuáa ní quide-güedé ní quexìo Espíritú-gá ní ngúndecu ndihí-yu, te cuiní-dé cuañaha-dě díhúⁿ xii té Pèlú ndihí té Juáa ní cùu. ¹⁹ Te ní xáhaⁿ-dě:

—Chindee ñàha-ndo cuendá nděda-ni càá-yu cacáⁿ ndodo-í ndaha-í díquǐ-yu, te níhí-yu Espíritú Yă Ndiöxí cundecu ndihí-yu —càchí-dé xǎhaⁿ-dě xii-güedé.

²⁰ Te té Pèlú ní xáhaⁿ-dě xii-dé:

—Yòhó cuíta nihnu-n ndihí díhúⁿ-n, chi cuiní-n cuàaⁿ-n sá vǎha quide Yá Ndiöxí. ²¹ Yòhó vá cúu

càda-n chiuⁿ quide-ndí, chi ñá túú ndècu váha iní-n nũú Yă Ndiõxí. ²² Te vá dúcáⁿ cǎháⁿ-n, chi ío nèhé cǎháⁿ-n sǎ dúcáⁿ cǎháⁿ-n. Te cǎháⁿ ndàhú-n nũú Yă Ndiõxí sá ná cǎdá cǎhnu iní-gá tnúhu ní cǎháⁿ-n. ²³ Te yúhú sa xini-í sá ío úhú iní-n, chi mee-ni sǎ cuèhé sá dúhá chido nuu-n quide-n —cachí té Pèlú xǎhaⁿ-dě xii té Xímú.

²⁴ Te ní xǎhaⁿ tǎ Xímú xii-güedé:

—Cǎháⁿ ndàhú-ndó nũú Yă Ndiõxí sá ñà túú nǎ tnahá-í sá dúcáⁿ nǐ cǎháⁿ-í —cǎchí-dé xǎhaⁿ-dě.

²⁵ Te té Pèlú ndihí té Juàá ní cǎháⁿ-güedé tnúhu Yá Ndiõxí núú ñǎyiu ñuú-áⁿ. Te ní xǎhaⁿ-güedé nchaa nǎcuáa ní quide Jèsús ní xini-güedé òré ní xica cuu-gá ñuyíu-a. Te ní tñi-güedé ichi cuánuhú-güedé ñuú Jerusálén, te ní yáha-güedé titní ñuú yíndèhu distritú Sàmariá, te ní cǎháⁿ-güedé tnúhu-gá.

Té Lìpé ndihí ñⁿ tée ñuú Etiòpiá

²⁶ Te ñⁿ espíritú xínú cuèchi núú Yă Ndiõxí ní quexìo-xi ñuú Jerusálén ní xǎhaⁿ-xi xii té Lìpé:

—Cada túha-n chi quée nuu-n ñuú Gǎzá, dico mee-ni xití yucu cuáháⁿ ichi —cǎchí-xi xǎhaⁿ-xi xii-dé.

²⁷ Te ní xica-dé cuáháⁿ-dé, te ní natnahá-dé ñⁿ tée nacióⁿ Etiòpiá ñúhú-dě ichi. Te cùu-dé tesorèrú xínú cuèchi-dé núú ñⁿ ñadihí ñaha yíndaha nacióⁿ Etiòpiá, te ñaha-áⁿ nání-áⁿ Cándacé. ²⁸ Te tée etiòpiá-áⁿ nǐ sáháⁿ-dé ñuú Jerusálén ní cǎháⁿ ndihí-dé Yă Ndiõxí, te ñúhu-dé ichi cuánuhú-dé ñuú-dé ñúhú-dě carrètá, te dàcuaha-dé tnúhu ní chídó tnùní ndí Chàíá tée ní xóo cǎháⁿ tnúhu Yă Ndiõxí ndéé sanaha. ²⁹ Te ní xǎhaⁿ Espíritú Yă Ndiõxí xii té Lìpé:

—Quíhín tuha-n càrretá-ǎn —càchí Espíritú-gá xǎhaⁿ-xi xii-dé.

³⁰ Te té Lìpé ní sátuha-dé carrètá-án, te ní tecú dóho-dé nàcuáa càháⁿ tée etiòpiá-án, tée ññhu carrètá-án dácuaàha-dé nàcuáa ní chídó tnùní ndíi Chàíá. Te ní xáhaⁿ tē Lìpé xii tée etiòpiá-án:

—¿Técú tnùní-n nchàa tnúhu dàcuaha-n-án? —càchí té Lìpé xǎhaⁿ-dē xii-dé.

³¹ Te ní xáhaⁿ tē etiòpiá:

—¿Nása tecú tnùní-í te vá yǎo dànehé ñáhá xii-í? Ta quène iha coo-n chì danèhé ñáhá-n —càchí-dé xǎhaⁿ-dē xii té Lìpé.

Te cuáaá té Lìpé núú carrètá ní ngóo-dé. ³² Te ndédóho-dé nàcuáa dàcuaha tée etiòpiá-án nàcuáa ní chídó tnùní ndíi Chàíá núú tùtú Yǎ Ndiǒxí núú càchí-xi:

Dàtná quidé ìⁿ mbéé cada-dé òré candeca ñaha-güedē xii-dé quíhín cahni ñaha-güedē chì ñá túú nǎ cada-dé,

dàtná cuìní-ndó quide mbéé òré dèté-di ñá túú ndàhí-di ducaⁿ cada-dé òré cahni ñaha-güedē chì ni vǎ càháⁿ-dé.

³³ Te mee-ni cùdiquí ndeé ñáhá-güedē xii-dé, te ni vǎ ndúcú tnúhu-güedé núú-dē nñu ndáá ndècuéchi-dé.

Te ío cuu nduu cuihna ìní cue ñaní tnáhá-dē, chì cahni ñaha-güedē xii-dé ñuyíú-a.

Duha càháⁿ tùtú ní dácuaá tē etiòpiá ní xíndedóho té Lìpé.

³⁴ Te ní xáhaⁿ tùcu tée Etiòpiá xii té Lìpé:

—Cundee ìní-n càchí tnúhu-n yòo cacunehe tée ní cáháⁿ tnúhu Yǎ Ndiǒxí ndéé sanaha, núu

càháⁿ-dé cuèndá méé-dě àdi caháⁿ-dé cuèndá ingá ñaiyu —càchí téetiòpiá-áⁿ xăhaⁿ-dě xii té Lìpé.

³⁵ Te té Lìpé ní cani-dé cuèndú núú tēetiòpiá nàcuáa ní cáháⁿ ndí Chàíá nàcuáa cada Jèsús òré quixi-gá ñuyíú-a. Te ní xăhaⁿ-dě nàcuáa ndùu tnúhu Jèsús ndíhi nàcuáa ní quide-gá. ³⁶ Te ñùhu-güedé ichi cuáháⁿ-güedé ní naníhí-güedé ìⁿ xichí núú ñúhú ndute, te ní xăhaⁿ tēetiòpiá:

—Iha ñùhu ndute, ¿te vá cúú cuàndute-í iha-ăⁿ?
—càchí-dé xăhaⁿ-dě xii té Lìpé.

³⁷ Te xăhaⁿ tē Lìpé:

—Te núu sàndáá ndisa iní-n Jèsús, te cuu cuandute-n —càchí-dé xăhaⁿ-dě.

Te ní xăhaⁿ tēetiòpiá:

—Sàndáá ndisa iní-í sá Dēhe Yá Ndiôxí cúú Xítohó Jesucristú —càchí-dé xăhaⁿ-dě.

³⁸ Te ní ngani-dé carrètá, te ní nuu-güedé ndi ndùú-güedé, te cuánguee-güedé xití ndute, te ní dácuándute ñaha té Lìpé xii-dé. ³⁹ Te òré ní nene-güedé xití ndute, te ndèca ñaha Espiritú Yá Ndiôxí xii té Lìpé cuáháⁿ. Te ñá túú ní xíní tēetiòpiá ní sandute-áⁿ ndéé ichi cuáháⁿ té Lìpé. Te ío ní cudíí iní-dé sá ñí natuha-dé ichi Yá Ndiôxí, te cuándaa-dé núú carrètá-dé cuánuhú-dé. ⁴⁰ Te ní quexìo té Lìpé ñúú Àzotó, te ndi tnahá ñúú ndi tnahá ñúú cuáháⁿ-dé càháⁿ-dé tnúhu Yá Ndiôxí, te ní yáha-dé cuáháⁿ-dé ní quexìo-dé ndéé ñúú Cèsareá.

9

*Té Sàulú ní tuha-dé ichi Xítohó Jesucristú
(Hch. 22:6-16; 26:12-18)*

¹ Te té Sàulú mee-ni càháⁿ cuèhé-dé cuèndá ñáyiú ní sándáá iní tnúhu Jèsús, te cuìní-dé cahni ñaha-dě xií-yu. Te ní sáháⁿ-dé núú dǔtú cúnùu-gá, ² te ní xáhaⁿ-dě sá cádǔha dútú-ǎⁿ ǎⁿ tutú canehe-dé quíhíⁿ cuáha-dé cue téé xǐndeé nchito veñúhu ñúú Dàmascú, chi cuìní-dé tnǐ-dé nchaa ñáyiú dàcuaha tnúhu Xítóhó Jesucrístú candeca ñaha-dě quíhíⁿ ñúú Jerusalén. ³ Te ní xica-dé cuáháⁿ-dé tá cùyatni-dé ñúú Dàmascú, te uuⁿni ní quee ñuhú andiú, te ní dáyèhé-xi ndéé núú nútñǐ-dé. ⁴ Te ní nduá-dé ndéé ñuhu, te ní tecú dóho-dé càháⁿ ǎⁿ sá càháⁿ núú ñnu, te xáhaⁿ-xi xii-dé:

—Yòhó Sàulú, ¿ná cuèndá cúú úhú iní ñáhá-n xii-í te dàndoho ñaha-n? —cachí sá càháⁿ-ǎⁿ xáhaⁿ-xi xii-dé.

⁵ Te ni xáhaⁿ-dě:

—¿Ná cúú yòhó sá càháⁿ-ǎⁿ-í? —càchí-dé xáhaⁿ-dě.

Te ní xáhaⁿ sǎ càháⁿ xii-dé:

—Yúhú cúú-í Jèsús téé cùu úhú iní-n. Te ío dàndoho-n mee-n, chi dàtná quidé ndìcutu quide-n, chi quiti-ǎⁿ nǔu na cǔxi-güedé-di pùyá te sǎha-di patadá núú-xi, te quide úhú-di mee-di. Te ducaⁿ sǎtnahá-xi cùu yohó chi ñá túú sándáá iní ñáhá-n xii-í —càchí sá càháⁿ-ǎⁿ xáhaⁿ-xi xii-dé.

⁶ Te té Sàulú ní quidi ñaha-xi xii-dé sá ñi yùhú-dé, te ní xáhaⁿ-dě:

—Xítóhó Jesucrístú, ¿te ná cuìní-n càda-í-í? —càchí-dé xáhaⁿ-dě.

Te Jèsús ní xáhaⁿ-gǎ xii-dé:

—Ndacóo, te quíhíⁿ-n ñúú-ǎⁿ, te yàcáⁿ tecú tnúhu-n nǎ cúú sǎ cádá-n —càchí-gá xáhaⁿ-gǎ xii-dé.

⁷ Te cue tée cuáháⁿ ndihi té Sàulú ní tecú dóho-güedé càháⁿ ìⁿ sá càháⁿ, dico vá yõo tnàhí ní xìní-güedé, te ní yùhú víhí-güedě, te ñá túú tnàhí ní càháⁿ-güedé. ⁸ Te ní ndacóo té Sàulú, te ñá ní cùu-gá cundehe-dě, chi ní cuaa-dé, te ní tñi-güedé ndaha-dé ndécá ñàha-güedé cuáháⁿ ñuú Dàmascú. ⁹ Te yàcáⁿ ní xindecu-dé úní nduu, te ñá ní cùu tnahí cundehe-dě, te ñá túú nă ní xèxi-dé, te ñá túú ní xìhi-dé ndute.

¹⁰ Te ndècu tée sàndáá iní tnúhu Jèsús ñuú Dàmascú, nání-dě Anàniás, te ní sáháⁿ Jèsús núú sàní-dé, te ní xáhaⁿ-gă xii-dé:

—¡Anàniás! —càchí-gă xáhaⁿ-gă.

Te ní xáhaⁿ-dě:

—¿Yúhú càháⁿ ndihi-n-ăⁿ? —càchí-dé xăhaⁿ-dě.

¹¹ Te ní xáhaⁿ-gă:

—Ndacuíñí, te quíhíⁿ-n ìⁿ chiuⁿ ichi núú dánàni-güedé Ichi Ndáá, te yàcáⁿ nanducu-n vèhe té Jùdás, chi vèhe téé-áⁿ ndécú ìⁿ téé ñuú Tàrsú nání-dě Sàulú, te téé-áⁿ sa càháⁿ ndihi ñaha-dě xii-í.

¹² Te téé-áⁿ nǐ dácótó ñàha-xi sá nǐ xìní ñáhá-dě xii-n nǐ quexìo-n núú ndécú-dě, te ní sacáⁿ ndodo-n ndàha-n díquí-dě, te ducaⁿ te ní nacaáⁿ núú-dě ní dácótó ñàha-xi xii-dé —càchí-gă xáhaⁿ-gă.

¹³ Te té Anàniás ní xáhaⁿ-dě:

—Yòhó Xítóhó Jesucristú, càchí tnúhu-í xii-n sǎ nǐ níhí-í tnúhu nàcuáa quìde-dé sá ïo quìde úhú-dé ñáyiú càháⁿ ndihi-n ñuú Jerusalén. ¹⁴ Chi nèhe-dé tutú ní sáñaha cuè dútú cúnúu cuendá níhí-dě nàcuáa cada-dé tñi-dé nchaa ñáyiú sàndáá iní ñáhá xii-n —cachí-dé xăhaⁿ-dě xii-gă.

¹⁵ Te Jèsús ní xáhaⁿ-gă xii-dé:

—Quíhíⁿ-n ndàtnúhu-n ndíhi-dé, chi cuíní-í cada-dé chiúⁿ-í, quíhíⁿ-dé cáháⁿ-dé tnúhu-í núú cuè ñáyiú isràél, ndíhi núú cuè ñáyiú ñá túú cuú ñáyiú isràél, ndíhi núú cuè téé yìndaha ñaha xií-yu.
¹⁶ Te yúhú cúñaha-í xii-dé sá ndóhó vìhi-dé cuèndá-í —càchí-gá xáhaⁿ-gã xii té Anàniás.

¹⁷ Te cuáháⁿ té Anàniás vehe núú ndécú tè Sàulú te ní sacáⁿ ndodo-dé ndaha-dé díquí tè Sàulú, te ní xáhaⁿ-dë:

—Yòhó té Sàulú téé ndècu ndíhi-í ichi Xítóhó Jesucristú, diu-ni Xítóhó Jesucristú Yaá ní cáháⁿ ndíhi ñaha xii-n ichi ní tendaha ñàha-gá véxi-í cuèndá cacáⁿ táhù-í núú-gã cuèndá-n te ndúha núú-n, te dàtnùní quixi Espiritú-gá cundecu ndíhi-n —càchí-dé xáhaⁿ-dë.

¹⁸ Te dàtná sá ñí xócání-ó ìⁿ sá ndèdí núú-dë ní quide ñaha-xi xii-dé, te ní nacaáⁿ núú-dë, te ní sandute-dé. ¹⁹ Te ní xexi-dé, te ní naníhí ndéé-dë, te titní nduu ní xíndecu ndíhi-dé ñáyiú ní sándáá iní tnúhu-gá ñuú Dàmascú.

Té Sàulú dácùaha-dé ñáyiú tnúhu Yá Ndiöxí ñuú Dàmascú

²⁰ Te sátá ñí ndúha núú-dë, te ní sáháⁿ-dé veñúhu cue ñáyiú isràél ní xáhaⁿ-dë sá Jèsús cúú-gã Déhe Yá Ndiöxí. ²¹ Te nchaa ñáyiú ní xíndedóho tnúhu ní cáháⁿ-dé, te ní cuñúhu vìhí-yu, te ní xítñahá-yu:

—Diu téé-ãⁿ ní sahani-dé ñáyiú ní xóo chiñuhu ñaha xii Jèsús ñuú Jerusalén. Te ní quixi-dé iha ní cuíní-dé tñi ñaha-dë xií-yu candeca ñaha-dë quíhíⁿ núú cuè dútú cúnùu ni cuu —cachí-yu xítñahá-yu.

²² Te íó iní-gá té Sàulú xáhaⁿ-dë xií-yu sá díú Jèsús cúú-gã Crìstú Yaá ní tendaha Yá Ndiöxí ní quixi

ñuyíú-a, te xíǎⁿ ñá ní nǐhí ñǎyiu isràél ndécú ñuú Dàmascú tnúhu cáháⁿ-yu, te ní cuñúhu vǐhí-yu.

Té Sàulú ní dáxíó-dě núú ñǎyiu isràél

²³ Te sátá nǐ cuu titní nduu, te ní ndatnúhu cue téé isràél sá cáhní-güedě té Sàulú. ²⁴ Te té Sàulú ní níhí-dě tnúhu nàcuáa càháⁿ-güedé cada ñaha-güedě xii-dé, te cuěi nduu cuěi niú néhé cuendá-güedé yuyèhe núú ñúdòco ndóho yuhu ñuú cuendá cuìní-güedé tñi ñaha-güedě xii-dé te cahni ñaha-güedě. ²⁵ Te ìⁿ niú ndécá ñàha cue téé ní sándáá iní-xi tnúhu Jèsús cuáháⁿ ndéé núú ñúdòco ndóho yuhu ñuú. Te ní sáá-güedé núú ndóho, te ní chihi ñaha-güedě xii-dé xití tídihi te ní dándèe ñaha-güedě núú ñúhú, te ní quene-dé cuáháⁿ-dé.

Te Sàulú ndécú-dě ñuú Jerusàlén

²⁶ Te té Sàulú ní nasáá-dé ñuú Jerusàlén, te cuìní-dé chitnahá-dé ñáyiu sándáá iní tnúhu Jèsús, te ní yùhú-yu chi ní cáháⁿ-yu sá dándàhú ñáhá-dě sá sándáá iní-dé Jèsús. ²⁷ Te té Bèé ndécá-dě té Sàulú cuáháⁿ núú ndécú cuè téé ní táúchíúⁿ Jèsús dacuàha ñaha xií-yu tnúhu-gá. Te ní caní té Bèé cuèndú núú-güedě nàcuáa ní cuu ní naníhí tnáhá tǎ Sàulú ndihi Jèsús ichi, te ní cáháⁿ ndihi ñaha-gǎ xii-dé. Te ní xáhaⁿ tùcu té Bèé nàcuáa ní cáháⁿ té Sàulú tnúhu Jèsús núú ñáyiu Dàmascú, te ñá túú tnàhí ni yùhú-dé ní cáháⁿ-dé, càchí té Bèé xǎhaⁿ-dě xii-güedé. ²⁸ Te ní xíndecu té Sàulú ndihi ñáyiu xídácuáhá tñuⁿ-gá ñuú Jerusàlén. Te ní ndicuu ndicuu-dé ní cáháⁿ-dé tnúhu Jèsús, te ñá túú tnàhí ni yùhú-dé ²⁹ ní cáháⁿ ndihi-dé ñáyiu isràél ñáyiu càháⁿ tnúhu grìégú. Te ñáyiu-áⁿ nǐ ngüíta-yu

ndàtnúhu-yu sá cáhni ñàhá-yu xii-dé. ³⁰ Te ñáyiú sàndáá iní tnúhu-gá ní níhí-yu tnúhu nàcuáa cuíni ñáyiú càháⁿ tnúhu griégú cada ñàhá-yu xii té Sàulú, núu ní sàndeca ñàhá-yu xii-dé ñuú Cèsareá, te yàcáⁿ ní tendaha ñàhá-yu cuánuhú-dé ñuú Tàrsú.

³¹ Te sáta xǎaⁿ te ní sanaá-yu ñá túú-gǎ ní xǎo cada úhú-yu nchaa ñáyiú sàndáá iní tnúhu Jèsús níhí distritú Jùdeá, ndihí distritú Galileá, ndihí distritú Sàmariá. Te ní níhí ndéé-yu ní quidé-yu nàcuáa ní xáhaⁿ Yǎ Ndiǒxí cadá-yu, te ío ní xíndecu yíñùhú-yu núú-gǎ, te Espíritú-gá ní chindee ñàha-xi xií-yu, te vǎi-gǎ ñáyiú ní sàndáá iní-yu tnúhu-gá.

Té Pèlú ní quide tátna-dé té Èneás

³² Títí xichi ní sáhán té Pèlú ní cáháⁿ-dé tnúhu Yá Ndiǒxí. Te ñⁿ nduu ní sáhán-dé ñuú Lìdá ní cáháⁿ ndihí-dé ñáyiú sàndáá iní ñàhá xii Jèsús. ³³ Te yàcáⁿ ní naníhí-dé ñⁿ té nàni Èneás, te ní cuu úná cuíá cùhú-dé, te ni lùha ñá cúú-gǎ candá nihnu-dé. ³⁴ Te ní xáhaⁿ tǎ Pèlú xii-dé:

—Èneás, Xítóhó Jesucrístú cada tátna ñàha-gǎ xii-n tnàví. Ndacóo te ndocani-n yùu-n —cachí-dé xǎhaⁿ-dǎ.

Te òré-ni ní ndacóo-dé. ³⁵ Te nchaa ñáyiú ñuú Lìdá ndihí ñáyiú ñuú Sàrón ní xiní-yu sá ní ndúha-dé, te ní sàndáá víhí iní-yu Xítóhó Jesucrístú.

Ní ndoto tá Dòrcás

³⁶ Te ñuú Jòpé ndécú ñⁿ ñadihí sàndáá iní-aⁿ tnúhu Jèsús, te nàni-aⁿ Tabitá, te tnúhu griégú xǎhǎⁿ-yu Dòrcás, te ío váha ní xóo cada-aⁿ chí ío váha iní-aⁿ, te ní xóo chindee-aⁿ ñáyiú ndàhú. ³⁷ Te váha-ni ndècu-aⁿ ni cuu, te ní tní ñàha cuéhé ní xíhí-aⁿ, te

ní nadacùchi ñahá-yu, te ní chihi ñàhá-yu ñⁿ cuàrtú ndécú ndéé núú ññu. ³⁸ Te ñáyu ní sándáá iní tnúhu Jèsús ñuú Jòpé ní níhí-yu tnúhu sá ndécú tē Pèlú ñuú Lìdá. Te yatni-ni càa ñuú-áⁿ, te ní tendàhá-yu úú cue tēe cuáháⁿ-güedé núú ndécú-dě cuèndá cúñaha-güedě candeca ñaha-güedě xii-dé quíhíⁿ núú ndécú-yu. Te ní xáhaⁿ-güedě xii té Pèlú:

—Yáchí ná quíhíⁿ-ó ñuú-ndí, chi yàcáⁿ cáná ñàhá-yu quíhíⁿ-n tnàvíí —càchí-güedé xáhaⁿ-güedě xii té Pèlú.

³⁹ Te té Pèlú ní xica-dé cuáháⁿ-dé ndihí cue tēe-áⁿ ñuú Jòpé, te òré ní quexìo-güedé ndihí-dé, te cuásaá ndihí ñaha-güedě cuàrtú ndéé núú ññu. Te nchaa ñáyu dìhí ñáyu quèé ní tacá ndéé ñàhá xii ndíyi-áⁿ xíndáhyú-yu, te ní dánèhé ñàhá-yu nchaa dóó ní cadúha ñaha ní xíhí-áⁿ. Chi ní xóo cadúha-aⁿ dícúⁿ, te ní xóo cadúha-aⁿ díó òré ní xíndecu-aⁿ ñuyú-a, te nchaa xíáⁿ ní dánèhé ñàhá-yu xii té Pèlú. ⁴⁰ Te té Pèlú ní xáhaⁿ-dē sá quèé-yu nchaá-yu quehé, te ní queé-yu. Te ní ngüíñí xítí-dē te ní cáháⁿ ndihí-dé Yá Ndióxi, te dātnùní ní ndacoto-dé núú cándòdo ndíyi-áⁿ, te ní xáhaⁿ-dē:

—Tàbitá, ndacóo —càchí-dé xáhaⁿ-dē.

Te ní ndacoto-aⁿ núú tē Pèlú te ní ndacóo-aⁿ. ⁴¹ Te ní tñi-dé ndaha-aⁿ ní ñacanutñi ñaha-dē. Te ní cana-dé nchaa ñáyu dìhí ñáyu quèé ndihí nchaa ñáyu sándáá iní tnúhu Jèsús cuèndá quini-yu sá ní ndoto-aⁿ. ⁴² Te nchaa ñáyu ñuú Jòpé ní níhí-yu tnúhu nàcuáa ní quide té Pèlú ní ndoto ñaha ní xíhí-áⁿ, te vái-yu ní sándáá iní-yu Xítoho Jesucristú. ⁴³ Te tñí nduu ní xíndecu té Pèlú vehe té Xímú tēe dàcuitá ñi.

10

Té Pèlú ndihi té Còrneliú

¹ Te ndècu ìíⁿ téé nàni-dé Còrneliú ñuú Cèsareá te cùu-dé capitáⁿ, te ndècu ndihi-dé ìíⁿ cièndú sandàdú. Te cue téé-áⁿ nání-güedě Sandàdú Itàlianú. ² Te téé cùu capitáⁿ ío váha iní-dé, te mee-dě ndihi ñadihí-dé ndihi nchaa landú-dé ío nèhé-yu sá yíñùhu núú Yă Ndiöxí, te sáha-dé ñáyíu ndàhú ñáyíu israél díhúⁿ, te ío càháⁿ ndihi-dé Yă Ndiöxí. ³ Te ìíⁿ nduu dàtná òré caá úní sacuaa ní dácótó núú ñáhá-xí xii-dé sá ní sáháⁿ ìíⁿ espíritú xínú cuèchi núú Yă Ndiöxí núú-dě, te ní xáhaⁿ-xi:

—Còrneliú —càchí-xi xăhaⁿ-xi xii-dé.

⁴ Te ní xiní-dé ndi ndúú xio núú-dě espíritú-áⁿ. Te ío ní yùhú-dé. Te ní xáhaⁿ-dě:

—¿Ná chíúⁿ vëxi-n? —càchí-dé xăhaⁿ-dě.

Te xăhaⁿ-xi:

—Ío càháⁿ ndihi-n Yă Ndiöxí, te ñáyíu ndàhú sãñaha-n díhúⁿ-n, te nchaa xíăⁿ sa nàha-gá. ⁵ Te vitna tendaha-n cuè téé na quihíⁿ-güedé ñuú Jòpé quíngana-güedé ìíⁿ téé nàni Xímú, àdi Pelú chi úú dîu-dé, te candeca ñaha-güedě quixi. ⁶ Te òré quexìo-dé te cachí tnúhu-dé nchaa dava-gá sá cuení Yă Ndiöxí cada-n. Te ndècu-dé vehe ingá tucu téé nàni Xímú téé dàcuitá ñîi, te vehe téé-áⁿ caá ìíⁿ xio yuhu lamár —càchí-xi xáhaⁿ-xi xii-dé.

⁷ Te sátá cuáháⁿ espíritú-áⁿ, te té Còrneliú ní cana-dé úú tnàhá cue téé xínu cuechi núú-dě ndihi ìíⁿ sandàdú xínú cuèchi tucu núú-dě, te tnàhá sandàdú-áⁿ ío càháⁿ ndihi-dé Yă Ndiöxí. ⁸ Te té Còrneliú ní cani-dé cuèndú núú-güedě nàcuáa ní cáháⁿ espíritú xínú cuèchi núú Yă Ndiöxí. Te ní tendaha ñàha-dé xii-güedé cuáháⁿ-güedé ñuú Jòpé.

9 Te nduu tněé-áⁿ ñúhú-ní-güedě ichi cuáháⁿ-güedé, te cùu-xi datná òré cauxúu nduu ta cùyatni-güedé ñuú-áⁿ, te òré-áⁿ ñi sáá té Pèlú díquí véhé càháⁿ ndi^{hi}-dé Yă Ndiöxí. 10 Te òré-áⁿ sa xihí-dé docó cuiní-dé caxi-dé, te ñini càdúha-yu sá caxí-dě ní dácótó núú ñáhá-xí 11 sã ñi xini-dé ñiⁿ sá ndécú àndi^u, te càa datná cáá ñiⁿ dóó cáhnú nchicúⁿ yoho ndi cù^{mí} xíquí-xi véxi cuuⁿ núú ñúhú. 12 Te núú dǎó-ăⁿ yódó cǎó ndi^{hi} quiti ndàva ndi^{hi} nchaa núú quiti ndèé cú^{mí} sáhá-xi. 13 Te ní tecú dóho-dé càháⁿ ñiⁿ sá càháⁿ, te xăhaⁿ sã càháⁿ-áⁿ xii-dé:

—Pèlú, ndacuí^{ñi} cahni-n nděda-ni càa quiti-a caxi-n-di —cachí sá càháⁿ-áⁿ xăhaⁿ-xi xii-dé.

14 Te té Pèlú ní xáhaⁿ-dě:

—Vă cáhni-í-di chi cǎchí tnúhu sá sánú ichi ñaha xii nchúhú ñáyi^u isràél sá vă cúú cǎxi-ndí nchaa quiti-a chi cuu cuéchi, te vátá cǎxí-gǎ-í-di ñi ñiⁿ xito —cachí-dé xăhaⁿ-dě.

15 Te ní cáháⁿ tucu sá ñi cáháⁿ-áⁿ, te xăhaⁿ-xi:

—Vă cúú cǎchí-n sã vă cúú cǎxi-n-di, chi mee Yă Ndiöxí ní cachí-gá sá díú nchàa quiti-a cuu caxi-o vitna —cachí sá ñi cáháⁿ-áⁿ xăhaⁿ-xi xii-dé.

16 Te ducaⁿ ñi cáháⁿ sá ñi cáháⁿ-áⁿ ù^{ní} xito, te dǎtnù^{ní} cuándaa tucu dóó-ăⁿ andi^u. 17 Te té Pèlú ñă ní cùtnuní iní-dé ná cuendá ducaⁿ ñi dácótó núú ñáhá-xí xii-dé, núu xíăⁿ ío cuéhé ñi sani iní-dé. Te òré-áⁿ ñi quexio cue téé ní tendaha té Còrneliú ndéé yuyèhe, chi ndi vehe ndi vehe cuáháⁿ-güedé ndúcú tnúhu-güedé ndéé cáá vèhe té Xímú téé dii vèhe-xi ndecu té Pèlú. 18 Te ní cáháⁿ níhi-güedé, te xăhaⁿ-güedé:

—Ñá túú cùdana iha ndecu ìⁿ té nànducu-ndí nání-dě Xǐmú, àdi Pelú chi úú diu-dé —càchí-güedé xǎhaⁿ-güedě.

¹⁹ Te té Pèlú vài sani iní-dé sá nǐ dácótó nǔú ñáhá-xí xii-dé. Te òré-áⁿ nǐ xáhaⁿ Espíritú Yá Ndiǒxí xii-dé:

—Cundedóho-n ìⁿ tnúhu na càháⁿ-í-a. Ní quexìo úní cue té nànducu ñaha xii-n. ²⁰ Yáchí, cuandèe chi quíhíⁿ-n ndihi-güedé, te vá yùhú-n chi yùhú ní xáhaⁿ-í véxi cuaca ñaha-güedě xii-n —càchí Espíritú-gá xǎhaⁿ-xi xii té Pèlú.

²¹ Te ní xica-dé cuàndee-dé núú ndécú cuè té xica nanducu ñaha xii-dé, te xǎhaⁿ-dě xii-güedé:

—Yùhú cúú tée nànducu-ndo-áⁿ. Náu-í-a núú ná chíúⁿ cuìní ñáhá-ndó —càchí-dé xǎhaⁿ-dě xii-güedé.

²² Te xǎhaⁿ-güedě:

—Tée cùu capitáⁿ té nàni Corneliú ní tendaha ñaha-dé véxi-ndí, te téé-áⁿ ò váha iní-dé, chi ò sàndáá iní-dé Yá Ndiǒxí, te nchaa ñáyíu isràél ò váha càháⁿ-yu cuèndá-dé. Te ìⁿ espíritú xínú cuèchi núú Yá Ndiǒxí ní xáhaⁿ-xi xii-dé sá cáná ñaha-dé xii-n quíhíⁿ-n vèhe-dé dacuàha-n-dé tnúhu Yá Ndiǒxí —càchí cue té ní tendaha té Còrneliú xǎhaⁿ-güedě xii té Pèlú.

²³ Te ní xáhaⁿ tē Pèlú sá quǐhu-güedé vehe-dé, te candeca tnàha-güedé ndihi-dé quíhíⁿ ndée nduu tnée. Te nduu tnée-áⁿ nǐ xica-güedé ndécá tnàha-güedé ndihi té Pèlú cuáháⁿ, te tnàhá ìⁿ úú cue té sàndáá iní tnúhu Jèsús ñúú Jòpé cuáháⁿ ndihi ñaha-güedě xii-dé.

²⁴ Te ndée ingá nduu ní quexìo-güedé ñúú Cèsareá. Te té Còrneliú ndétú ñaha-dé xii-güedé

vehe-dé te sa ndècu túha-dé ndihi ñadìhí-dé ndihi nchaa landú-dé ndihi cue tée ío váha tnàhá tnúhu ndihi-dé, chi ní cana ñaha-dé ní nítnáhá-yu ndihi-dé cundetú-yu té Pèlú. ²⁵ Te sáta ní quèxio té Pèlú vehe té Còrneliú, te ní quee-dé quehé, te ní ngüñí xítí-dé núú tē Pèlú chíñùhu ñaha-dé ní cùu.

²⁶ Te té Pèlú ní xáhaⁿ-dē:

—Ndacuíñí vá ngüñí xítí-n nùú-í chi ñá díú Ndiöxí cùu-í, dìcò ñⁿ tée ñuyíú-a cùu-í —càchí té Pèlú xăhaⁿ-dē xii-dé.

²⁷ Te ta căháⁿ té Pèlú ndihi té Còrneliú cuánguihu-güedé xítí vehe, te chitu ñăyiu xìxíhi xítí vehe. ²⁸ Te ní xáhaⁿ tē Pèlú xií-yu:

—Sa nàha-ndo sá cāchí tnúhu sá sánú ìchi ñaha xii nchúhú ñăyiu isrâél sá vă cúú quixi-ndí vehe ní ñⁿ nchohó ñăyiu ñá túú cùu ñăyiu isrâél te ní vă cúú tnàhá tnúhu ndihi ñaha-ndí xii-ndo. Dico Yá Ndiöxí ní cachí-gá sá vă cúú căháⁿ-í sá vă cúú căháⁿ ndihi-í ñăyiu ñá túú cùu ñăyiu isrâél, chi cuu cuéchi.

²⁹ Núu xăⁿ ndíhi-ni véxi-í òré ní quexìo tnúhu sá cáná ñàha-ndo. Te cachí tnúhu-ndo nă cuendá cáná ñàha-ndo —cachí té Pèlú xăhaⁿ-dē xií-yu.

³⁰ Te té Còrneliú ní xáhaⁿ-dē:

—Ní cuu cúmí nduu, te diu-ni dàtná òré iha cùu-xi, te yúhú ndècu-í diu-ni vehe-í, te ñá túú tnàhí ná xéxi-í cáháⁿ ndihi-í Yă Ndiöxí, te òré-án ní quexìo ñⁿ espíritú xínú cuèchi núú-gă níhnú-xí dđó cuixíⁿ dóó chàhnchí. ³¹ Te cāchí-xi: “Còrneliú, ní xíndedóho Yá Ndiöxí tnúhu ní cáháⁿ-n ndihi-gá, te xíní-gá sá săñaha-n díhúⁿ xii ñăyiu ndàhú. ³² Te ñuú Jòpé ndécú ñⁿ tée nàni Xímú, àdi Pelú chi úú diu-dé, te ndècu-dé vehe ñⁿ tée nàni tucu Xímú tée dàcuitá ñii, te càa vehe-dé ñⁿ xio yuhu làmár,

te cana-n-dě ná quìxi-dé ndatnúhu-n ndìhi-dé”, duha ní cáháⁿ espíritú xínú cuèchi núú Yă Ndiöxí.

³³ Núu xíăⁿ ndìhi-ni ní cana ñaha-ĩ xii-n. Te táxăhu xii-n să yěxi-n chi iha ndècu-ndí nchaa-ndí ndétú ñaha-ndí xii-n cùndedóho-ndí tnúhu Yă Ndiöxí, te cuíní-ndí cachí tnúhu-n nchàa tnúhu ní cachí Yă Ndiöxí cáháⁿ-n —càchí té Còrneliú xăhaⁿ-dě.

Té Pèlú ní ndatnúhu-dé ndìhi ñáyiu ní tacá vehe té Còrneliú

³⁴ Te té Pèlú xăhaⁿ-dě xií-yu:

—Vitna ní xiní-í sá Yă Ndiöxí càháⁿ ndìhi-gá ñáyiu cuèi nděda-ni càa ñuú, te ìⁿ-ni quide-gá ndìhi nchaá-yu. ³⁵ Te nchaa ñáyiu nèhe sá yíñùhu núú Yă Ndiöxí, te xíquide váha-yu, te nchaá-yu cùu váha iní ñáhá-gă xií-yu. Te ñá túú quide cuendá-gá cuèi ná ñáyiu ñuú cúŭ-yu. ³⁶ Te Yă Ndiöxí ní tendaha-gă Xítóhó Jesucrístú ní sáháⁿ-gá ní xíndecu-gá nàcióⁿ Isràél, te ní xăhaⁿ-gă xií-yu ìⁿ tnúhu váha nàcuáa cuu váha iní-yu. Te ðiu-ni mee Jèsús cúnùu-gá núú ñáyiu ni càa xico ñuyíú. ³⁷ Te nàha-ndo sá ðìhna-gá ndí Juàà ní cáháⁿ ndí tnúhu Yă Ndiöxí núú ñáyiu, te ní dăcuándùte ñaha ndí xii-yu. Te dătnùní ní ngüíta Jèsús ní cáháⁿ-gá tnúhu-gá ðistrítú Galileá, te dătnùní ní sáháⁿ-gá ñìhí nàcióⁿ Isràél ní cáháⁿ-gá tnúhu-gá núú ñáyiu. ³⁸ Te sa nàha-ndo sá Yă Ndiöxí ní săñaha-gă Espíritú-gá xii Jèsús tée ñuú Nazàrét ndécú ndìhi-dé chíndèe ñaha-xi xii-dé. Te nàha-ndo sá ñí xica cuu Jèsús ní quide tátna-gá nchaa ñáyiu yìhi ñaha espíritú cùndìhi yucu ñávăha. Te ío vâi-gá sá văha ní quide ñaha-gă xií-yu, te ducaⁿ ñí quide-gá, chi Yă Ndiöxí ní chindee ñaha-gă. ³⁹ Te mee-ndí ní xiní-ndí nàcuáa ní quide Jèsús

ñuú Jerusàlén ndihi nihìi nàcióⁿ Isràél. Te ní sata caa ñaha-güedě xii-gá núú cùrúxí te yàcáⁿ ní xíhí-gá. ⁴⁰ Te núú ùní nduu ní dándótó ñàha Yá Ndiöxí xii-gá. Te ní cuiní-gá sá cündècu Xítóhó Jesucristú titní nduu sátá nǐ ndoto-gá cuèndá cáháⁿ ndihi ñaha-gǎ xii-ndí nchaa-ndí nàcuáa ní xica cuu-ndí ndihi-gá. ⁴¹ Te ñá ncháá ñǎyiu nǐ xìní ñáhá xii-gá, chí mee-ni nchǔhú cue téé ní cachí-gá sá cáháⁿ ndáá-ndí sá nǐ ndoto-gá, chí ní xíndecu ndihi-ndí-gá, te ní xihí ní xexi-ndí ndihi-gá, núu cáháⁿ ndáá-ndí sá nǐ ndoto-gá. ⁴² Te ní cachí-gá sá nchǔhú quíhíⁿ-ndí cúñaha-ndí xii ñáyiu sá méé Yá Ndiöxí ní táuchíuⁿ-gǎ sá Jèsús cada ndáá-gá cuéchi nchaa ñáyiu ndècu vívú ndihi cuéchi nchaa ñáyiu ní xíhí. Te ducaⁿ nǐ xáhaⁿ Yá Ndiöxí xii Jèsús, te ñu-ni ducaⁿ nǐ cachí Jèsús cáháⁿ-ndí. ⁴³ Te cue téé ní cáháⁿ tnúhu Yá Ndiöxí ndéé sanaha nǐ cáháⁿ-güedé sá quíxí Jèsús, te ní cachí-güedé sá ncháá ñáyiu na quíndáá iní ñáhá xii Jèsús, te cada càhnu iní-gá nchaa cuéchi-yu —càchí té Pèlú xǎhaⁿ-dě xii-yu.

Ní quexìo Espíritú Yá Ndiöxí ní ngúndecu ndihi cue ñáyiu ñá túú cùu ñáyiu isràél

⁴⁴ Te mei òré cáháⁿ-dé ndèdóho-yu ní quexìo Espíritú Yá Ndiöxí ní ngúndecu ndihi nchaa ñáyiu-áⁿ. ⁴⁵ Te cue téé isràél cuáháⁿ ndihi té Pèlú, cue téé ní sándáá iní tnúhu Jèsús ní cuñúhu víhi-güedé sá nǐ quexìo Espíritú Yá Ndiöxí ní ngúndecu ndihí-yu, chí cuèndá sá ñà díú ñáyiu isràél cúu-yu núu xǎaⁿ ní cuñúhu-güedé. ⁴⁶ Te ní cutnùní sá nǐ quexìo Espíritú Yá Ndiöxí ní

ngúndecu ndihí-yu, chi ní ngúíta-yu càháⁿ-yu tnúhu sá dácàhu iní ñáhá Espíritú-gá, tnúhu sá ñà túú xìní-yu càháⁿ-yu. Te ní ndacáⁿ táhũ-yu núú Yá Ndiõxí cuendá nchaa sá ñi quide-gá. ⁴⁷ Te dàtnùní ní xáhaⁿ tẽ Pèlú:

—Vitna te cuandute ñáyiú ní natuha ichi Xítóhó Jesucristú chi sa ndècu ndihí-yu Espíritú Yá Ndiõxí dàtná cuíní-ndó ndècu ndihí nchoo, núú xiǎⁿ vá cúú càchí dava-gá ñáyiú sá vǎ cúú cuàndutè-yu — càchí-dé xǎhaⁿ-dẽ xií-yu.

⁴⁸ Te dàtnùní ní xáhaⁿ-dẽ xii ñáyiú:

—Vitna te cuandute-ndo, te òré-áⁿ te cacunehe-ndo Xítóhó Jesucristú —càchí-dé xǎhaⁿ-dẽ xií-yu.

Te dàtnùní ní càháⁿ ndàhú-yu núú tẽ Pèlú cundecu ndihí ñaha-dẽ xií-yu ñⁿ ǔú nduu.

11

Té Pèlú ní cani-dé cuèndú núú ñáyiú sàndáá iní tnúhu Jèsús ñuú Jerusàlén

¹ Te cue téé ní táúchíúⁿ Jèsús dacuàha ñaha xii ñáyiú tnúhu-gá, ndihí cue ñáyiú ní sàndáá iní tnúhu-gá, ñáyiú ndècu distritú Jùdeá ní níhí-yu tnúhu sá ñáyiú ñà túú cùu ñáyiú isràél ní sàndáá iní-yu tnúhu Yá Ndiõxí. ² Te òré ní ndexìo té Pèlú ñuú Jerusàlén, te ñáyiú isràél ñáyiú ní cachí sá cáda nchaa nacuaá ní càháⁿ ndí Moisés ní satnuhu ñàhá-yu xii-dé. ³ Te ní xǎhǎⁿ-yu xii té Pèlú:

—¿Ná cuendá ní sáháⁿ-n ndèé ndíácǎⁿ ní càháⁿ ndihí-n ñáyiú-ǎⁿ, te ñà túú quidé-yu dàtná quidé nchòo-i? Te ní sáháⁿ-n yàcáⁿ ní xexi-n ndihí-yu — càchí-yu xǎhǎⁿ-yu xii-dé.

⁴ Te té Pèlú ní caní-dé cuèndú nàcuáa ní cuu núú nǐ sáháⁿ-dé, te xáhaⁿ-dě:

⁵ —Ní xíndecu-í ñuú Jòpé. Te òré càháⁿ ndihí-í Yǎ Ndiǒxí, te ní dácótó ñàha-xi xii-í sá vǎxi cuuⁿ ñⁿ dóó cáhnú àndiu, te ndùtu ndi cumí xíquí-xi, te ní ngava-xi núú ndécù-í. ⁶ Te ní xíndéhé vǎha-í, te ní xíní-í nchaa quiti yòdo núú-xi. Te ñⁿ xichi yòdo quiti cúmí sáhá-xi, te ñⁿ xichi yòdo quiti dééⁿ, te ñⁿ xichi yòdo cóó, te ñⁿ xichi yòdo quiti ndava. ⁷ Te ní tecú dóho-í càháⁿ ñⁿ sá càháⁿ, te càchí-xi: “Pèlú, ndacuíñí cahni-n nděda-ni càa quiti-a caxi-n-dí”, cachí sá nǐ càháⁿ-áⁿ. ⁸ Te ní xáhaⁿ-í: “Vá cáhní-í-dí chí càchí tnúhu sá sánú ìchi ñàha xii nchúhú ñáyíu isràél sá vǎ cúu càxi-ndí nchaa quiti-a”, xáhaⁿ-í. ⁹ Te ní tecú dóho-í càháⁿ-ni tucu núú ñnu, te càchí sá càháⁿ-áⁿ: “Vá cúu càchí-n sǎ vǎ cúu càxi-n-dí, chí mee Yǎ Ndiǒxí ní cachí-gá sá díú nchaa quiti-áⁿ cuu caxi-o”, càchí sá càháⁿ-áⁿ. ¹⁰ Te ducaⁿ nǐ càháⁿ sá nǐ càháⁿ-áⁿ ùní xito, te dǎtnùní cuándaa dóó-ǎⁿ ndihí nchaa quiti-áⁿ andiu. ¹¹ Te òré-ni ní quexìo úní cue téé vehe núú ndécù-í. Te cue téé-áⁿ nǐ tendaha ñàha ñⁿ téé ñuú Cèsareá nándùcu ñàha-güedé xii-í. ¹² Te mee Espiritú Yǎ Ndiǒxí ní cachí-xi sá quihíⁿ-í ndihí-güedé, te ní cachí-xi sá ñà túú nǎ caní iní-í. Te tnàhá ínú cue téé ndècu iha ní sáháⁿ ndihí ñàha-güedé xii-í, te nchaa-ndí ní sáháⁿ-ndí vehe té Còrneliú ñuú Cèsareá. ¹³ Te ní caní-dé cuèndú nàcuáa ní cuu ní sáháⁿ ñⁿ espíritú xínú cuèchi núú Yǎ Ndiǒxí vehe-dé, te ní quihu-xi ndéé xití vehe-dé, te ní xáhaⁿ-xi xii-dé: “Tendaha-n cuè téé na quihíⁿ-güedé ñuú Jòpé quíngana-güedé ñⁿ téé nàni Xímú, àdi Pelú chí úú diu-dé. Te candeca

ñaha-güedě quixi. ¹⁴ Te té-e-áⁿ cachí tnúhu-dé nása cada-n nàníhí tàhú-n ndihí ñadihí-n, ndihí landú-n, ndihí nchaa ñáyiú xínu cuechi vehe-n”, duha ní xáhaⁿ espíritú-áⁿ xii té Còrneliú. ¹⁵ Te òré ní ngüíta-í càháⁿ ndihí-í-yu ní quexìo Espíritú Yă Ndiöxí ní ngúndecu ndihí-yu dàtná ní quide-xi cútnàhá ní taxi Yă Ndiöxí Espíritú-gá ndéé díhna ní ngúndecu ndihí nchoo. ¹⁶ Te ní ndacu iní-í nàcuáa ní cáháⁿ Xítóhó Jesucristú, te duha ní cachí-gá: “Té Juàá ní xóo dacuàndute-dé ñáyiú, dico yúhú sãñaha-í Espíritú Yă Ndiöxí cundecu ndihí-yu”, duha ní cachí-gá. ¹⁷ Te Yă Ndiöxí ní sãñaha-gă Espíritú-gá cundecu ndihí ñáyiú ñá túú cùu ñáyiú isràél dàtná ní quide-gá cútnàhá ní sándáá iní-ó tnúhu Jèsús, núu xíáⁿ vá càchí-í sá vă cúú càda-í ìⁿ sá cuíní Yă Ndiöxí cada-í —càchí té Pèlú xáhaⁿ-dě xií-yu.

¹⁸ Te sátá dúcáⁿ nĩ xáhaⁿ tẽ Pèlú, te ñá túú-gă ná tnúhu ni càháⁿ-yu, te ío ní cudíí iní-yu nchaa nàcuáa ní quide Yă Ndiöxí, te ní xítnàhá-yu:

—Tnàhá nchaa ñáyiú ñá túú cùu ñáyiú isràél naníhí tàhú-yu núu na dàñá-yu nchaa sá cuèhé sá dúhá quidé-yu, chi ducaⁿ cuíní Yă Ndiöxí cunduu —càchí-yu xítnàhá-yu.

Ñáyiú sándáá iní tnúhu Jèsús ñuú Antiòquiá

¹⁹ Te sátá nĩ sahani-güedé té Těvá, te ní cuíní-güedé cada úhú-güedé nchaa ñáyiú ní sándáá iní-xi tnúhu Jèsús, te ní xité nuú-yu ndi tnahá ìⁿ ñuú. Te davá-yu cuáháⁿ-yu ndéé distritú Fèniciá ndihí distritú Chìpré ndihí ñuú Antiòquiá. Te ní cáháⁿ-yu tnúhu Jèsús núu mee-ni ñáyiú isràél, te ñá ní xítnúhu-yu dava-gá-yu. ²⁰ Te dava-gá ñáyiú distritú Chìpré ndihí ñáyiú ñuú Cirené ní sáháⁿ-yu

ñuú Antiòquiá. Te ñá díú mée-ni ñáyu isràél ní cǎháⁿ ndihí-yu, chi tnàhá ñáyu ñá túú cùu ñáyu isràél ní xáhǎⁿ-yu tnúhu Jèsús. ²¹ Te ní chindee ñàha-gá xii ñáyu cǎháⁿ tnúhu-gá, te vǎi-gá-yu ní sándáá iní-yu-gá chi ní tuhá-yu ichi-gá.

²² Te ñáyu ndècu ñuú Jerusàlén ñáyu ní sándáá iní tnúhu Jèsús ní níhí-yu tnúhu nàcuáa ní cuu, núu xǎǎ ní tendàhá-yu té Bèé cuáhǎⁿ-dé ñuú Antiòquiá.

²³ Te òré ní quexìo té Bèé, te ní xiní-dé nàcuáa ní quide ñàha-gǎ xii-yu sá nǐ naníhí tǎhú-yu, núu xǎǎ ío ní cudǎ iní-dé. Te ní dácáhú iní ñáhǎ-dě, te ní xáhaⁿ-dě:

—Ío nducu ndèe-ndo cada-ndo nchaa sá cǎchí Yǎ Ndiǒxí cada-ndo —cǎchí-dé xǎhaⁿ-dě xii-yu.

²⁴ Te té Bèé cúú-dě ìⁿ téé váha iní-xi, te ndècu ndihí-dé Espíritú Yǎ Ndiǒxí, te ío sándáá iní-dé tnúhu Jèsús. Te vǎi vihi ñáyu ní tuhá-yu ichi-gá.

²⁵ Te dǎtnùní cuáhǎⁿ té Bèé ñuú Tǎrsú cuánúndúcú-dě té Sàulú. ²⁶ Te òré ní naníhí ñáhǎ-dě, te ndèca ñàha-dé cuáhǎⁿ ñuú Antiòquiá, te yàcǎⁿ ní xíndecu-güedé ìⁿ cuíá ndihí ñáyu ní sándáá iní tnúhu Jèsús, te vǎi-yu ní dǎcuáhǎ ñàha-güedé tnúhu-gá. Te dǎu-ni ñuú Antiòquiá ní dánání ñàhá-yu Cristiànú xii nchaa ñáyu sándáá iní tnúhu Jèsús.

²⁷ Te ndéé dǎvǎ-áⁿ nǐ quee ìⁿ ũú cue téé cǎháⁿ tnúhu Yǎ Ndiǒxí ñuú Jerusàlén cuáhǎⁿ-güedé ñuú Antiòquiá. ²⁸ Te ìⁿ-dé nání-dě Àgabú, te ní chindee ñàha Espíritú Yǎ Ndiǒxí xii-dé, te ní sáhǎⁿ-dé núu nchaa ñáyu sándáá iní tnúhu-gá, te ní xáhaⁿ-dě xii-yu sá quíxí ìⁿ tnamá nihíí ñuyíú. Te ducaⁿ nǐ cuu sátá nǐ ngúnutnǎí té Clàudiú téé yìndaha

cuéhé nacióⁿ. ²⁹ Núu xiǎⁿ nchaa ñáyiú sàndáá iní tnúhu Jèsús ñuú Antiòquia ní ndatnúhu-yu sá chíndèé-yu nchaa ñáyiú sàndáá iní tnúhu-gá ndécú dìstritú Jùdeá cuèndá vá ndóhó vîhî-yu docó. Te nàcuáa ní níhî-yu, te ducaⁿ ñí sacáⁿ tnáhă-yu. ³⁰ Te ní tacá díhúⁿ-ăⁿ, te nèhe té Bèé ndîhî té Sàulú cuáhăⁿ, cuáha-güedé cue tée yîndaha ñáyiú sàndáá iní tnúhu-gá.

12

Sátá ñí xîhî té Jàcobó, te ní ngava té Pèlú vecaá

¹ Te ndéé dàvá-áⁿ ñí nguíta té Hèrodés tée yîndaha ñaha xii ñáyiú isràél ní quide úhú-dé ñⁿ úú ñáyiú sàndáá iní tnúhu Yá Ndiöxí. ² Te ní táuchíúⁿ-dê ní tñî-güedé té Jàcobó ñanî té Juàá, te ní sahnî ñaha-güedê ndîhî machîtî. ³ Te ío ní cudîî iní dava ñáyiú isràél cuèndá sá ñí sahnî ñaha-güedê xii té Jàcobó, núu xiǎⁿ ní tendaha tùcu té Hèrodés sandàdú-dé ní sáhăⁿ tñî tucu-güedé té Pèlú. Te ducaⁿ ñí quide-dé cútnàhá ní xóo vico ní xexî-yu pàá sá ñà túú yîhî levadurá. ⁴ Te ní nanîhî-güedê té Pèlú, te ní tñî ñaha-güedê ndécá ñaha-güedê cuáhăⁿ vecaá. Te té Hèrodés ní táuchíúⁿ-dê cuáhăⁿ sáhúⁿ ñⁿ sandàdú cùndeé-güedé té Pèlú. Te ní xáhaⁿ-dê:

—Cundee-ndó ndî cúmî ndî cúmî-ndó tẽ-ăⁿ — cächî-dé xáhaⁿ-dê xii-güedê.

Te té Hèrodés ní sani iní-dé queñuhu-dé té Pèlú vecaá òré ná yáha vico cuèndá cahni ñaha-güedê cáhăⁿ-dê ní cùu. ⁵ Te ní xîhî-nî té Pèlú vecaá, te ní xíndeé cuaa ñaha sandadú xii-dé. Te cue ñáyiú sàndáá iní tnúhu Yá Ndiöxí ío ní xícăⁿ táhŭ-yu núú-gă cuèndá sá ñà túú nă cada ñaha-güedê xii-dé.

Yá Ndiõxí ní dácăcu-gá té Pèlú vecaá

⁶ Ỉⁿ niú-gá quihi té Pèlú vecaá ní cùu, te nduu tněé tauchìuⁿ té Hèrodés quíh^{ĩn} sandàdú queñuhu ñaha-güedě xii-dé vecaá cuèndá quini nchaa ñáyiú nása cada ñaha-güedě ní cùu. Te té Pèlú cáá-dě xidí-dé xití vecaá, te ndi nduú dúcúⁿ ndáhá-dě ndútú càdená, te xio xio dñi-dé ndécú sandadú, te dava-gá sandadú xĩndeé-güedé yèhe vecaá. ⁷ Te ní quexìo ỉⁿ espíritú xínú cuèchi núú Yă Ndiõxí xití vecaá núú cáá tẽ Pèlú xidí-dé, te uuⁿni ní dáyèhé-xi xití vecaá, te ní danguĩhi ñaha-xi xii-dé, te xăhaⁿ-xi xii-dé:

—Yáchí, ndàcáo —càchí-xi xăhaⁿ-xi xii-dé.

Te ní ndacáo-dé, te nchaa cadèná ndútú dúcúⁿ ndáhá-dě ní nandáxí. ⁸ Te ní xăhaⁿ tùcu espíritú-áⁿ xii-dé:

—Yáchí, nucuĩhnu dóó-n, te ndĩhu-n chàú-n —càchí-xi xăhaⁿ-xi xii-dé.

Te ní ndĩhu nuu-dé dóó-dě, te ní xăhaⁿ tùcu espíritú-áⁿ:

—Candixi dóó-n, te na quíh^{ĩn}-ó —càchí-xi xăhaⁿ-xi xii-dé.

⁹ Te té Pèlú ní chinchícúⁿ-dé espíritú-áⁿ, te ñá ní cùtnuní iní-dé nũu ndáá ỉⁿ espíritú xínú cuèchi núú Yă Ndiõxí ducaⁿ quide àdi ñáhá, te dàcoto ñaha-xi xii-dé ní saní iní-dé. ¹⁰ Te nděndaha-ni-dě espíritú-áⁿ cuáháⁿ ní yáha-dé nàcuáa xĩnutnĩ sandadú, te ta yăha-gá-dé núú ndécú dàva-gá-güedé. Te ní sáá-dé ndée yuyèhe núú ndedì cáa nàcuáa ní yáha ichi sá cuáháⁿ ndée xití ñuú, te ní nacaáⁿ mée yèhe-áⁿ, te ní quee-dé cuáháⁿ-dé ndihi espíritú-áⁿ. Te ní tnahá-dé ỉⁿ tnuú,

te yàcáⁿ ní dándõo ñaha espíritú-áⁿ xii-dé. ¹¹ Te dătnùní ní nene váha saní núú-dě, te ní cutnùní iní-dé, te ní cachí-dé:

—Ndáá sá Yă Ndiõxí ní tendaha-gă espíritú-ăⁿ ní quixi-xi ní dácăcu ñaha-xi xì-í cuendá sá và cáhni ñaha té Hèrodés. Te dava ñăyiu isrâél ío ní cudíí iní-yu cuendá sá nĩ cuiní té Hèrodés cahni ñaha-dě xii-í —duha ní cachí-dé sátá nĩ cutnùní iní-dé.

¹² Te sátá nĩ cutnùní iní-dé sá nĩ cácu-dé, te cuáháⁿ-dé vehe ìⁿ ñaha nàni Mariá năná tẽ Juáá, àdi Mácú chi úú diu-dé, te xíaⁿ ndécú vâi-yu cáháⁿ ndihí-yu Yá Ndiõxí. ¹³ Te té Pèlú ní quexìo-dé ndée yuyèhe ní dácásáⁿ-dě, te ní quixi ìⁿ xíchí nání Ròdé ní quixi ndehe-xi nă cúú ñăyiu dăcasaⁿ. ¹⁴ Te ní nucúhuⁿ ndudú-xi sá díú tẽ Pèlú, te ní cudíí víhí iní-xi, dico ñá ní năcaáⁿ-xi yuyèhe. Te ní quene cunu-xi cuáháⁿ ngúñaha-xi xì-yu sá nútnĩ té Pèlú yuyèhe ndaa quehé. ¹⁵ Te ñá ní sàndáá iní-yu tnúhu ní cáháⁿ-xi, te xăhăⁿ-yu xii-xi:

—jNá tnúhu vîhi cáháⁿ-õⁿ xíchí lùcú! —càchí-yu xăhăⁿ-yu.

Te xăhaⁿ-xi să ndàá nútnĩ-dé, te xăhăⁿ-yu:

—Ñá díú tẽ Pèlú chi espíritú sá xító ñaha xii-dé cúú să cáháⁿ —càchí-yu xăhăⁿ-yu xii-xi.

¹⁶ Te òré ducaⁿ xĩtnàhá-yu, te té Pèlú ní dácásáⁿ tùcu-dé yuyèhe. Te ní sáháⁿ-yu ní nacaáⁿ-yu yuyèhe, te ní xiní-yu sá díú tẽ Pèlú, te ní cuñúhu vîhí-yu. ¹⁷ Te ní quide-dé ndaha-dé núu-yu cuendá cadí-yu yuhú-yu. Te ní ngüíta-dé ní caní-dé cuendú năcuáa ní quide ñaha Yă Ndiõxí xii-dé sá nĩ dácăcu

ñaha ñⁿ espíritú xínú cuèchi núú-gă xii-dé vecaá, te ní xáhaⁿ-dě xií-yu:

—Cúu-ndo tē Jàcobó ndihì dava-gă ñáyiú sàndáá iní tnúhu Jèsús nàcuáa ní quide ñaha Yă Ndiǒxí xii-í —càchí-dé xăhaⁿ-dě xií-yu.

Te sátá dúcáⁿ nǐ xáhaⁿ-dě, te ní quee-dé cuáháⁿ-dé ingá xichì.

¹⁸ Te sátá nǐ túndaá, te ní ngüíta nchaa sandàdú càháⁿ ñⁿ càháⁿ ñⁿ-güedé, te xǐtnàha-güedé:

—Ñá túú-gă té Pèlú yíhí vècaá, ¿te nása cada-o-i? —càchí-güedé xǐtnàha-güedé.

¹⁹ Te té Hèrodés ní tendaha-dě títñí sandàdú cuáháⁿ-güedé cuánúndúcú ñàha-güedé, te ñá ní nàníhí ñáhá-güedě xii-dé. Te dătnùní ní cana-dé sandàdú cue téé ní xindeé ñáhá xì té Pèlú, te ní tenàá ñáhá-dě xii-güedé, te ní xáhaⁿ-dě xii dava-gă cue sandàdú-dé:

—Cahni-ndo cuè téé-ăⁿ —càchí té Hèrodés xăhaⁿ-dě.

Te dătnùní ní quee té Hèrodés distrítú Jùdeá cuáháⁿ-dé ñuú Cèsareá, yàcáⁿ ní ngúndecu-dé.

Ní xíhí té Hèrodés

²⁰ Té Hèrodés ní cudééⁿ-dě núú ñăyiú ñuú Tírú ndihì núú ñăyiú ñuú Sídón. Te xíăⁿ ní ndatnúhu-yu ní cuu ñⁿnuu tnúhu-yu, te ní xicá-yu cuáháⁿ-yu cuáháⁿ ndatnúhu ndihì ñáhá-yu xii-dé, te ní ndatnúhu ndihí-yu té Blástú. Te téé-áⁿ cúú-dě chiuⁿ quide-dé núú tē Hèrodés, te ní chindee tnúhu ñaha-dě xií-yu, chí ní cáháⁿ ndàhú-yu núú tē Hèrodés sá vă cádá ũhú ñáhá-dě xií-yu. Te ducaⁿ nǐ quidé-yu cuèndá ñuú té Hèrodés-áⁿ quée să xéxí-yu. ²¹ Te ní xáhaⁿ tē Hèrodés ná

nduu quíhíⁿ-yu ndatnúhu ndíhi ñaha-dě xii-yu, te nduu-ãⁿ ñí quíunuu-dé ñⁿ dóó vǎha, ñⁿ sá sácuĩhnu téé tàxi tnuní. Te ní ngóo-dé núú xilé váha, xilé sá sácóo nchihi téé tàxi tnuní, te ní ngúíta-dé ní cáháⁿ sàhú-dé dóho-yu. ²² Te uuⁿi ní cuáá-yu te càchí-yu:

—¡Tée-a càháⁿ-dé dico ñá díú tée ñuyíú-a cùu-dé chi ndiǒxí cúú-dě! —càchí-yu xĩtnàhá-yu.

²³ Te ñíu-ni òré-áⁿ ñí yáha ñⁿ espíritú xínú cuèchi núú Yá Ndiǒxí, te ní sáñaha-xi cuéhé xii té Hèrodés. Te ducaⁿ ñí tnahá-dé chi mee-dě ñá ní xǎhaⁿ-dě sá ñáyiú cùu-dé, te ní cáháⁿ-yu sá ndiǒxí cúú-dě. Te nchìto-gá-dé ní sanú ñáhá tìndácú xii-dé, te dǎtnùní ní xíhí-dé.

²⁴ Te ío títí xichi ní sáháⁿ ñáyiú sàndáá iní tnúhu Yá Ndiǒxí ní cáháⁿ-yu tnúhu-gá, te ío chítú-yu ní sándáá iní-yu tnúhu-gá.

²⁵ Te té Bèé ndíhi té Sàulú ní ndíhi chiùⁿ-güedé, te ní ndee-güedé ñuú Jerusàlén cuáháⁿ-güedé ndíhi té Juàá, àdi Mácú chi úú ñíu-dé.

13

Té Bèé ndíhi té Sàulú cuáháⁿ-güedé dácuàha-güedé ñáyiú tnúhu Yá Ndiǒxí nchaa ñuú xícá

¹ Te ñuú Antiòquia ndécú ñⁿ úú cue téé càháⁿ tnúhu Yá Ndiǒxí núú nchàa ñáyiú ní sándáá iní-xi tnúhu-gá. Te ndècu tucu ñⁿ úú cue téé cùu mestrí dácuàha ñaha-güedé xii-yu tnúhu-gá. ñⁿ-dé nání-dě Bèé, te ñⁿ-dé nání-dě Xímú, te té Xímú-áⁿ xǎhaⁿ-güedé Nègrú chi tnuu-dě. Te ingá-dé nání-dě Lùciú, te téé-áⁿ cúú-dě téé ñuú Cìrené. Te ingá-dé nání-dě Sàulú, te ingá tucu-dé nání-dě Manàén. Te

té Manaén-áⁿ ndihi té Hèrodés téè cùu gobiernú Galileá ío váha ní xóo cáháⁿ ndihi tnáha-güedé cútnáhá ní cuu lĩhli-güedé. ² Te ñⁿ nduu ñá túú ná ní xèxi ñáyiú ní sándáá iní tnúhu Yá Ndiõxí cuendá mee-ni-gã ní cáháⁿ ndihí-yu, te ní xáhaⁿ Espiritú Yá Ndiõxí xii-yu:

—Tendaha-ndo tẽ Bèé ndihi té Sàulú quĩhĩⁿ-güedé dava-gá ñuú cada-güedé chiúⁿ tahu-í, chi ducaⁿ cuiní-í cunduu —càchí Espiritú-gá xáhaⁿ-xi xii-yu.

³ Te ní cáháⁿ ndihi tucú-yu Yá Ndiõxí, te ñá túú tnáhí ná ní xèxi tucú-yu, te ní sacáⁿ ndodo-güedé ndaha-güedé díquí tẽ Bèé ndihi té Sàulú. Te sátá dúcáⁿ ñi quide-güedé, te ní quide ndee iní ñáhã-yu xii-güedé.

Té Bèé ndihi té Sàulú cuáhãⁿ-güedé distritú Chìpré cáháⁿ-güedé tnúhu Yá Ndiõxí

⁴ Te té Bèé ndihi té Sàulú ní quee-güedé cuáhãⁿ-güedé cuendá ducaⁿ cuiní Espiritú Yá Ndiõxí cunduu sá cáca cùu-güedé dava-gá ñuú, te ní quexìo-güedé ñuú Selèuciá, te yàcáⁿ ní quée-güedé bàrcú cuáhãⁿ-güedé distritú Chìpré. Te ñuú-áⁿ cáá xití làmár chi ndècu ñuhu yichí xití ndute. ⁵ Te ní quexìo-güedé mei ñuú Salàminá, te ní quene-güedé bàrcú, te ní xica-güedé cuáhãⁿ-güedé nchaa veñúhu ñáyiú isràél càháⁿ-güedé tnúhu Yá Ndiõxí. Te cuáhãⁿ ndihi-güedé té Juàá cuendá chindee ñáha-dé xii-güedé. ⁶ Te ní tñi-güedé ichi cuáhãⁿ-güedé ñuú Páfós cáá ndàa ingá xio Chìpré, te yàcáⁿ ní naníhí tnáhã-güedé ndihi ñⁿ téè isràél nání-dẽ Barjèsús, te téè-áⁿ xìní-dé cada ndùu-dé, te càchí-dé sá càháⁿ-dé tnúhu Yá Ndiõxí dico ñá

ndàá. ⁷ Te téé-áⁿ quidé chiùⁿ-dé ndihí té Sèrgiú, àdi Páblú chi úú diù-dé, te cùu-dé gobièrnú Chipré, te ío túha-dé. Te ní cana-dé té Bèé ndihí té Sàulú, chi cuìní-dé cundedóho-dé tnúhu Yá Ndiöxí. ⁸ Te téé quide nduu-áⁿ ñã ní dàña-dé cáháⁿ-güedé tnúhu-gá, chi ñá ní cuìní-dé sá tée cùu gobièrnú-áⁿ tuha-dé ichi Yá Ndiöxí. Te ducaⁿ ñí quide té Barjèsús, téé xăhaⁿ-güedě Èlimás. ⁹ Te tnàhá tucu té Sàulú ndécú úú diù-dé chi xăhaⁿ tùcu-güedé Păblú, te ndècu ndihí-dé Espiritú Yă Ndiöxí. Te ní xíndéhé ñĩ ñáhá-dě xii téé quide nduu-áⁿ. ¹⁰ Te ní xáhaⁿ-dě:

—Yòhó, chi dàtná quidé yùcu ñávăha quide-n chi mee-ni dândahú-n ñăyiu. Yòhó cúú-n dēhe sácuihná, chi nchaa tnúhu váha cuìní Yă Ndiöxí cáháⁿ-yu, te yòhó ñá dáñá-n. ¹¹ Te vitna quini-n năcuăa cunduu, chi taxi Yá Ndiöxí ñⁿ castiú xii-n chi vá cútnuní-gá núú-n càca cuu-n ñⁿ úú nduu —càchí-dé xăhaⁿ-dě xii téé quide nduu-áⁿ.

Te òré ducaⁿ ñí xáhaⁿ tē Păblú xii-dé, te òré-ni ní cuaa-dé, te ñá túú ní cùtnuní tnàhí-gá núú-dě, te ní xóo nducu-nă-dé ñăyiu ní xóo cuita nehe ñaha xii-dé. ¹² Te téé cùu gobièrnú ní xini-dé năcuăa ní quide té Păblú, te ío ní cuñúhu-dé. Te ní tnahá iní-dé tnúhu Jèsús, núu xíăⁿ ní sândáá iní-dé.

Té Păblú ndihí té Bèé ndécú-güedě ñuú Antiòquia Pìsidiá

¹³ Te té Păblú ndihí dava-gá cue téé xica cuu ndihí-dé ní queé-güedé bàrcú, te ní quee-güedé ñuú Páfós cuáhăⁿ-güedé ñuú Pèrgé, te ñuú-áⁿ yíndèhu-xi distritú Pànfilíá. Te té Juàá ní năcuico-dě ní dándöo ñaha-dě xii-güedé cuánuhú-dé ñuú Jerusalén.

¹⁴ Te dava-gá-güedé ní quee-güedé ñuú Pèrgé

cuáháⁿ-güedé ñuú Antiòquiá, te Pìsidiá yíndàha-xi ñuú-áⁿ. Te nduu xíndetátú-yu, te ní sáháⁿ-güedé veñúhu ñáyiú isràél, te ní ngóo-güedé xití veñúhu. ¹⁵ Te cue téé ndècu veñúhu ní queheⁿ-güedé tutú yódó tnùní nchaa tnúhu sá nǐ chídó tnùní ndíi Moisés ndihí tutú yódó tnùní nchaa tnúhu sá nǐ chídó tnùní dava-gá cue téé ní xóo cáháⁿ tnúhu Yá Ndiòxí ndéé sanaha, te ní dácuáhá-güedé ní xíndedóho cue ñáyiú, te dǎtnùní cue téé yíndaha veñúhu-áⁿ nǐ xáhaⁿ-güedé xii té Pǎblú ndihí dava-gá-güedé:

—Nchòhó cue téé cùu ñaní tnáhá-ndǐ, te núu cuíní-ndó cáháⁿ-ndó tnúhu Yá Ndiòxí, te cuu cáháⁿ-ndó tnávíi cuèndá cutúha-yu —cǎchí-güedé xáhaⁿ-güedé.

¹⁶ Te té Pǎblú ní ndacuíñí-dé, te ní ndacani-dé ndaha-dé cuèndá cadí-yu yuhú-yu te cundedóho-yu tnúhu cáháⁿ-dé, te ní xáhaⁿ-dǎ:

—Te nchòhó ñáyiú quide nchaa nacuáa cáháⁿ Yá Ndiòxí ndihí nchaa nchòhó ñáyiú isràél, cundedóho-ndo ncháa-ndo ñⁿ tnúhu na cáháⁿ-í-a. ¹⁷ Te cuèi ndéé sanduu te cuèi vitna chindee ñaha-ni Yá Ndiòxí xii nchaa ñáyiú isràél, te ní nacáxi ñaha-gǎ xii-yu te ní chindee ñaha-gá cuèndá cáyá-yu, chi cuíní-gá sá cúú vǎi-yu, te ducaⁿ nǐ quide-gá cútnáhá ní xíndecú-yu nàcióⁿ Ègiptú. Te dǎtnùní ní dǎcǎcu ñaha-gǎ xii-yu ñuú-áⁿ, chi mee-gǎ nchaa ndàcu-gá quidé-gǎ. ¹⁸ Te ní xíndecú-yu ñⁿ xichi núú ñà túú tnàhí sàcúndecu ñáyiú údico cuía, te xití údico cuía-ǎⁿ nǐ cundee ìní-gá nchaa sá nǐ quidé-yu. ¹⁹ Te Yá Ndiòxí ní chindee ñaha-gá xii ñáyiú isràél, te ní dánáǎ-yu úsá nàcióⁿ, chi cuèndá ní cuíní-gá cuu

cuendá-yu ñuhú-áⁿ. ²⁰ Te dătnùní ní cachí Yă Ndiôxí sá díú-ní cuè téè cùchiuⁿ taxi tnuní-güedé nchaa ñáyi, te ducaⁿ ñí quide-güedé dătná cúmí ciendú dava cuíá. Te sátá xǎⁿ, te ní xíndecu té Sămuél téè ní cáháⁿ tnúhu Yă Ndiôxí. ²¹ Te dăvâ-áⁿ ñí cuiní ñáyi isràél sá cündecu ñⁿ téè quindaha ñàha-dé xií-yu, te Yă Ndiôxí ní cachí-gá sá tǎ Sàul quindaha-dě-yu, te téè-áⁿ ñí cuu-dé déhe té Cís, te té Benjămín téè ní xíndecu ndéé sanaha-gă ní cuu ñaní tnáhá-dě. Te té Sàul ní xíndaha-dě ñáyi údico cuíá. ²² Te Yă Ndiôxí ñá ní cuiní-gá cundecu-ni-dé quindaha-dě ñáyi, chi ní cuiní-gá sá tǎ Dăvií ndíhu ndaha-dě cue ñáyi isràél, te ní cachí-gá: “Ío váha ní tnahá iní-í năcuáa quide té Dăvií déhe téè Isàí, te cada-dé nchaa năcuáa cúñaha-í xii-dé”, duha ní cachí Yă Ndiôxí —càchí té Păblú xăhaⁿ-dě xií-yu.

²³ Te ní xăhaⁿ tùcu té Păblú:

—Díu-ní ñaní tnáhá tǎ Dăvií cúú Jèsús. Te Yă Ndiôxí ní tendaha-gă Jèsús ní quixi-gá ñuyíú-a cuendá nchaa ñáyi isràél ná quindáá iní ñáhá xii Jesús naníhí tǎhú-yu, chi ducaⁿ ñí cachí Yă Ndiôxí cunduu. ²⁴ Te cútnàhá vátá ngüita-gá Jèsús cáháⁿ-gá tnúhu Yă Ndiôxí, te ní cáháⁿ té Juàá núú ñáyi isràél sá xíní ñuhu-xi dañá-yu nchaa sá cuèhé sá dúhá, te cuanduté-yu. ²⁵ Te sa ta cùyatni-ni-gá cuú-dé, te ní xăhaⁿ-dě xií-yu: “Nchòhó càchí-ndó sǎ yǎhú cúu-í Crístú Yáá ndétú-ndó dico ñáhá, chi ñá díú yǎhú cúu-í Crístú, chi davitna quixi Crístú Yáá tendaha Yă Ndiôxí quixi ñuyíú-a. Te yúhú cúu-í ñⁿ téè duuⁿ duuⁿ ñá túú tàú nandaxi cuèdicó chàú-gá dico quide-í chiúⁿ-gá”, duha ní cáháⁿ te Juàá —càchí té Păblú xăhaⁿ-dě xií-yu.

26 Te ní xáhaⁿ tùcu té Păblú:

—Cundedóho tucu-ndo ìngá tnúhu na càháⁿ-í. Nchòhó tnàhá-ndó cùu-ndo ñaní tnàhá ndíi Àbrahám, te xìní-ndó sǎ Yǎ Ndiǒxí cúnùu-gá. Te diu-ni-gá cuíní-gá sá ncháá-ndó cundedóho-ndo tnúhu-gá, chí cùu-xi tnúhu sá càháⁿ nàcuáa naníhí tàhú-ndó. 27 Te nchaa ñáyiú ndècu ñuú Jerusálén ndíhi nchaa cue téé cùnùu ñá ní cùnùní iní-yu ndíhi-güedé sá Yǎ Ndiǒxí ní tendaha-gǎ Jèsús ní quixi-gá ñuyíú-a. Te ñá ní sǎha-yu cuendá sá díú Jèsús ní cacunehe cue téé ní cáháⁿ tnúhu Yá Ndiǒxí ndéé sanaha cuèi ní dácúahǎ-yu tnúhu-gá veñúhu-yu ndi tnahá úná nduu, nduu ndetátú-yu. Te ní cachí-yu sá ndècuéchi Jèsús, te ní xáhǎⁿ-yu sá cáhní ñàha-güedé xii-gá. Te xǎⁿ sa nàha cue téé ní xóo cáháⁿ tnúhu-gá ndéé sanaha sǎ dúcáⁿ càháⁿ-yu. 28 Te cuèi ñá túú nǎ ní quide-gá te ní xáhǎⁿ-yu xii té Pilatú téé cùu gobiernú sá táuchìuⁿ-dé cahni ñàha-güedé xii-gá. 29 Te xǎⁿ nùu ní sata caa ñàha-güedé xii-gá núú cùrúxí. Te ní quide-güedé nchaa nàcuáa ní chídó tnùní cue téé ní cáháⁿ tnúhu Yá Ndiǒxí ndéé sanaha. Te sátá nì xíhí-gá, te ní nunehe ñàha-güedé xii-gá núú cùrúxí, te nchìdo ñàha-güedé cuáháⁿ, te ní chihi ñàha-güedé ìⁿ xití yaú. 30 Te Yá Ndiǒxí ní dándótó-gǎ Jèsús. 31 Te titní xito ní sáháⁿ Jèsús núú ndécú ñáyiú ní xica cuu ndíhi-gá, ñáyiú ní quee distritú Galileá ní sáháⁿ-yu ndíhi-gá ñuú Jerusálén. Te vitna nchaa ñáyiú-áⁿ xáhǎⁿ-yu xii dava-gá ñáyiú isràél nàcuáa ní cuu ní ndoto-gá.

32 Te nchúhú càháⁿ-ndí nàcuáa cada-ndo naníhí tàhú-ndó, chí Yá Ndiǒxí ní xáhaⁿ-gǎ xii cue ñaní

tnáhá-ó nĩ xíndecu ndéé sanaha sǎ téndàha-gǎ Déhe-gǎ Jèsús quixi-gǎ ñuyíú-a. ³³ Te ní quixi-gǎ ní xíhí-gǎ, te ní dándótó ñàha Yá Ndiǒxí xii-gǎ, te núu xíǎⁿ naníhí tǎhú-ó núu na quìndáá iní-ó-gǎ. Te ìⁿ téé ní cáháⁿ tnúhu Yá Ndiǒxí ndéé sanaha nĩ chídó tnùní-dé núú sǎlmú cúú úú nàcuáa ní cáháⁿ Yǎ Ndiǒxí ní xáhaⁿ-gǎ xii Déhe-gǎ, te duha ní xáhaⁿ-gǎ: “Yòhó cúú-n Dèhe-í, te vitna cutnùní iní ñáyiú sǎ yǔhú cúú-í Tǎtá-n”, duha ní xáhaⁿ-gǎ xii Jèsús. Te ñiú-ni ducaⁿ nĩ chídó tnùní téé ní cáháⁿ tnúhu-gǎ ndéé sanaha. ³⁴ Te ìngá xichi tucu núú tǔtú-gǎ ní chídó tnùní ìⁿ téé ní xíndecu ndéé sanaha nàcuáa ní xáhaⁿ-gǎ xii Déhe-gǎ, te duha ní xáhaⁿ-gǎ: “Mee-ni sǎ vǎha cada ñaha-í dàtná ní xíí-í té Dàvíí”, duha ní xáhaⁿ-gǎ. Te ducaⁿ nĩ chídó tnùní téé ní xíndecu ndéé sanaha nàcuáa ní cáháⁿ Yǎ Ndiǒxí, chi òré ní xíhí Jèsús te ní dándótó ñàha-gǎ cuèndá sǎ vǎ tíú yìqui cuñú-gǎ. ³⁵ Te núu xíǎⁿ duha ní chídó tnùní ìⁿ téé ní xíndecu ndéé sanaha núú librú Sǎlmú nàcuáa ní xáhaⁿ-dě xii-gǎ: “Vá dáñá-n sǎ tíú yìqui cuñú Déhe-n chi ío vǎha quide-gǎ”, duha ní chídó tnùní téé ní xíndecu ndéé sanaha —càchí té Pǎblú xáhaⁿ-dě xii-yu.

³⁶ Te xáhaⁿ tùcu-dé:

—Te té Dàvíí ní quide-dé nchaa chiúⁿ ní táhú Yǎ Ndiǒxí cada-dé, te dàtnùní ní xíhí-dé. Te ní chindúxi ñaha-güedě xii-dé yatni nàcuáa yíndúxi cue ñaní tnáhá-dě ndéé sanaha-gǎ, te xíǎⁿ nĩ téhyú yìqui cùñú-dé. ³⁷ Te Jèsús chi ñǎ ní téhyú yìqui cùñú-gǎ, chi ní dándótó ñàha Yá Ndiǒxí xii-gǎ. ³⁸ Te cuìní-í cachí tnúhu-í xii-ndo cuèndá cutnùní iní-ndo nchaa-ndo sǎ cadá càhnu iní Yǎ Ndiǒxí nchaa cuéchi-o, chi ní xíhí Jèsús cuèndá naníhí

tàhú-ó. ³⁹ Te nchaa ñáyi na quìndáá iní ñáhá xìi Jesús te cada càhnu iní-gá nchaa sá ñà túú vǎha ní quidé-yu, chi núu mee-ni tnũhu ní chídó tnùnì ndíi Moisés ná quìndáá iní-yu te vá nánihí tàhú-yu.

⁴⁰⁻⁴¹ Te ío coto-ndo mée-ndo cuendá sá vǎ yǎha-ndo dàtná ní cachí Yǎ Ndiõxí yáha cue ñáyi ñá túú ní quide vǎha ní xíndecu ndéé sanaha. Te nàcuáa ní cáhán-gá ní chídó tnùnì ñⁿ téé ní cáhán tnúhu-gá ndéé sanaha, te duha ní xáhaⁿ-gǎ xií-yu dàvǎ-áⁿ:

Cundedóho nchaa nchòhó ñáyi cuèhé yuhu-xi na càhán-í ñⁿ tnúhu te quini-ndó nǎ cuñúhu-ndo,

yúhú quidè-í vǎi núú sǎ ïo vǎha vitna ndècu-ndo ñuyíú-a,

te cuèi na còo ñáyi cachí tnúhu xii-ndo nàcuáa ndùu nchaa sá vǎha-áⁿ, dico nchòhó vá quìndáá iní-ndó,

te sá dúcán càda-ndo vá quìndáá iní-ndó, te dàcuíta nihnu-ndo mée-ndo.

Duha ní xáhaⁿ-gǎ xií-yu te ducaⁿ ñǎ chídó tnùnì téé ní cáhán tnúhu-gá ndéé sanaha —càchí té Pǎblú xǎhaⁿ-dè xií-yu.

⁴² Te òré ní ndee té Pǎblú veñúhu ñáyi isràél ndihí cue téé xica cuu ndihí-dé, te ní cáhán ndáhú ñáyi yihí veñúhu núú-dè sá quihíⁿ-dé núú ùná nduu, te diu-ni tnúhu ní cáhán-dé cáhán tucu-dé òré quexìo-dé. ⁴³ Te sátá ñǎ túhú veñúhu-yu, te vǎi ñáyi isràél ndihí ñáyi ní chitnahá ñáhá xií-yu nchìcúⁿ nihnu quide nacuáa quidé-yu càhán ndihí-yu Yá Ndiõxí cuáhán ndihí-yu té Pǎblú ndihí té Bèé. Te ní xáhaⁿ-güedè xií-yu sá vǎ dáñá ndèé-yu

canchicúⁿ nihnú-yu tnúhu sá càháⁿ nàcuáa quide Yá Ndiöxí sá cúu-xí-yu.

⁴⁴ Te núú ùná nduu, nduu ndètátú-yu ní quexìo vai vihi ñáyiú, chi nihíi ñuú ní quexìo ndedóho-yu tnúhu Yá Ndiöxí. ⁴⁵ Te cuendá sá ïo vai ñáyiú ní quexìo, núu xíáⁿ ní cuu cuédú ínì ñáhá ñáyiú isràél xii té Păblú, te ní xícuèhé ñáhă-yu xii-dé. Te ní xáhăⁿ-yu xii-dé sá dándăhú ñáhă-dě xii-yu ndihî tnúhu càháⁿ-dé. ⁴⁶ Te té Păblú ndihî té Bèé ñá túú ní yùhú ñáhă-güedě xii-yu. Te ní xăhaⁿ-güedě:

—Xini ñuhu-xi dîhna-gá nchòhó ñáyiú isràél cáháⁿ ndihî-ndí tnúhu Yá Ndiöxí, te mee-ndo ñă cuiní-ndó cùndedóho-ndo. Te sá dúcáⁿ quide-ndo, te vâ nânihî tàhú-ndó, te ni vă càháⁿ-gá-ndí tnúhu Yá Ndiöxí núú-ndó, dico cáháⁿ-ndí núú dăva-gá ñáyiú cuèi ñă díú ñáyiú isràél cúu-yu, ⁴⁷ chi ducaⁿ ñî táúchíúⁿ Yă Ndiöxí cada-ndí. Te ní cachí-gá:

Cuini-í cundecu-ndo dătnă ïⁿ tée yòtnuú ñuhú cundecu-ndo
căháⁿ-ndó tnúhu-í núú nchăa ñáyiú ñă túú
cùndihî-ndo ñáyiú ndècu nihíi ñuyíú, te
naníhî tàhú-yu,
duha ní cáháⁿ-gá —căchí té Păblú ndihî té Bèé
xăhaⁿ-güedě xii-yu.

⁴⁸ Te ñáyiú ñă túú cùu ñáyiú isràél ío ní cudíi ínì-yu sá dúcáⁿ ñî cáháⁿ-güedě, te ní xítnăhá-yu sá ïo văha cuáhăⁿ tnúhu Yá Ndiöxí. Te mee Yă Ndiöxí sa năha-gá nândi cùu ñáyiú naníhî tàhú, te diu-ni ñáyiú-ă ñî sândăá ínì-yu. ⁴⁹ Te nchaa xichi xíáⁿ ñî sáhăⁿ-yu ní cáháⁿ-yu tnúhu-gá. ⁵⁰ Te cue tée isràél ní ndatnúhu-güedě ndihî cue tée cùnuu, ndihî cue ñáyiú dîhî cùnùu, te ñáyiú dîhî-ă ñă túú

tnàhí cùmání-yu veñúhu. Te ní xáhaⁿ-güedě sá cádá ũhú-yu té Păblú ndihí té Bèé, te dătnùní cuícúⁿ ñáhă-yu xii-güedé, te ducaⁿ nĩ quidé-yu. ⁵¹ Te ní casaⁿ ñuhu té Păblú ndihí té Bèé sáhă-güedě ní naquidi-güedé tícă chúhmă nĩ tnĩ sáhă-güedě. Te ducaⁿ nĩ quide-güedé cuendă cutnùní iní-yu sá ñă túú ní quide váha-yu. Te dătnùní ní quee-güedé cuáhăⁿ-güedé ñuú Ìconiú. ⁵² Te ñáyiu ní sândăă iní-xi tnúhu Jèsús ío váha ní cuu iní-yu cuendă sá nĩ naníhí tǎhú-yu, te nchaá-yu sa ndècu ndihí-yu Espíritú Yă Ndiǒxí.

14

Té Păblú ndihí té Bèé ndécú-güedě ñuú Ìconiú

¹ Te ní quexío té Păblú ndihí té Bèé ñuú Ìconiú. Te ní sáhăⁿ-güedé veñúhu ñáyiu isrâél, te ío váha ní cáhăⁿ-güedé tnúhu Yă Ndiǒxí, te vâi ñáyiu isrâél ndihí ñáyiu ñă túú cùu ñáyiu isrâél ní sândăă iní-yu tnúhu-gă. ² Te dava ñáyiu isrâél ñă ní sândăă iní-yu, te ní cáhăⁿ cuèhé-yu cuendă té Păblú ndihí té Bèé cuendă sá vă quindăă iní ñáyiu ñă túú cùu ñáyiu isrâél. ³ Te ní xíndecu-güedé titní nduu, te ñă túú tnàhí ni yùhú-güedé ní dăcuáhă-güedě ñáyiu tnúhu Yă Ndiǒxí. Te mee-gă ní chindee ñàha-gă ní quide-güedé titní núú sǎ vă yǒo tnàhí ndàcu cada, te ío ní cuñúhu-yu. Te ducaⁿ nĩ quide-gă cuendă cutnùní iní-yu sá ndăă cǎhăⁿ-güedé sá mée-gă ío cùu iní ñáhă-gă xií-yu, te naníhí tǎhú-yu núu na quindăă iní-yu tnúhu-gă. ⁴ Te ní quee dava ñáyiu ñuú Ìconiú, davá-yu cùndihí-yu ñáyiu isrâél ñáyiu ñă túú sândăă iní tnúhu Jèsús. Te

davá-yu cùndihí-yu cue téé ní táúchíúⁿ Jèsús càhánⁿ tnúhu-gá. ⁵ Te ñáyiú isràél ndihí dava-gá ñáyiú ñá túú sàndáá iní-xi ní cuu ñⁿnuú-yu ndihí cue téé cùnū sá cáni-yu-güedé, te cuáha yúú ñáhă-yu xii-güedé. ⁶ Te té Păblú ndihí té Bèé ní níhí-güedé tnúhu sá cuení-yu canihá-yu, núu xiăⁿ dayuhu ñi quee-güedé cuáhán-güedé ñuú Lìstrá ndihí ñuú Dèrbé. Te ndi nduú ñuú-ánⁿ yíndèhu-xi Licaoniá. Te ní sáhán-güedé dava-gá ñuú lĩhli càa yatni xiăⁿ. ⁷ Te nchaa ñuú-ánⁿ ñi cáhán-güedé tnúhu Jèsús.

Ñuú Lìstrá ní sáha yúú ñáhă-yu xii té Păblú

⁸ Te ñuú Lìstrá ndécú ñⁿ téé yacua, mee-ni núcóo-dé chi ducaⁿ tnàhí càa-dé ní cacu-dé. ⁹ Te ndédóho-dé tnúhu càhánⁿ té Păblú, te ní cutnùní iní té Păblú sá ño sàndáá iní téé yacua-ăⁿ sá Yă Ndiôxí cada tátna ñaha-gă xii-dé, núu xiăⁿ ní xíndéhé ñaha váha té Păblú xii-dé. ¹⁰ Te té Păblú ní cáhánⁿ níhi-dé, te ní xáhaⁿ-dě:

—Ndacuíñi cunutñi váha-n —càchí-dé xăhaⁿ-dě.

Te ní ndacuíñi cunu-dé te ní xica-ni-dé. ¹¹ Te òré ní xini-yu sá tē Păblú ní quide tátna-dé téé yacua-ăⁿ, te nchaá-yu ní cáhánⁿ-yu tnúhu mēé-yu tnúhu Licàoniá. Te ní cáhánⁿ níhi-yu, te xitnàhá-yu:

—Cue téé-ăⁿ sànuu sá ñáyiú cùu-güedé dico ñáhă, chi ndiôxí cúu-güedé te ní quexiô-güedé ñuyíu-a —càchí-yu xitnàhá-yu.

¹² Te ní cachí-yu sá tē Bèé cúu-dě ndiôxí dánàni-yu Júpiter, te té Păblú cúu-dě ndiôxí dánàni-yu Mèrcuriú, chi cuendá téé-ánⁿ cúu-dě téé càhánⁿ. ¹³ Te càa ñⁿ veñúhu yuhu ñuú-ánⁿ núu quidé càhnú-yu ndiôxí sá dánàni-yu Júpiter. Te dútu yíndàha veñúhu-ánⁿ ndécá-dě ñⁿ úú ndicutu

cuáháⁿ quehé veñúhu, te ñùhu itá dúcúⁿ-güedi. Te cue quiti-áⁿ cahni-dé cada cahnú-dé ndihí-yu té Bèé ndihí té Păblú ní cùu, chi ducaⁿ quidé-yu quide cahnú-yu ndiöxí-yu. ¹⁴ Te té Bèé ndihí té Păblú ní níhí-güedě tnúhu nàcuáa sàni iní-yu cadá-yu, te ní ndátá-güedě dóó-güedě cuendá cutnùní iní-yu sá ñă tnàhá iní-güedě nàcuáa sàni iní-yu cadá-yu. Te xínu-güedě cuánguihu-güedě tnuú-yu, te níhi ní cáháⁿ-güedě, te xăháⁿ-güedě:

¹⁵ —¿Ná cuendá ducaⁿ cuiní-ndó càda-ndo? Te ñu-ni tnàha ñăyiu-ndo cùu-ndí, dicó-ni tnúhu Yá Ndiöxí véxi-ndí dacuàha ñaha-ndí xii-ndo cuendá sá vă cadá-gă-ndó nàcuáa quide-ndo, te quindáá iní-ndó Yă Ndiöxí, chi ñndi-ni Yá Ndiöxí ndécú. Te ñu-gá ní cadúha-gá andiú ndihí ñuyíú-a ndihí lâmar ndihí nchaandi túhú sá ño ñuyíú-a. ¹⁶ Te ndée sanaha ñí dáñá Yă Ndiöxí ní quidé-yu nàcuáa cuáháⁿ iní méě-yu. ¹⁷ Te ní xóo cada-gá sá văha cuendá cutnùní iní-yu sá ño văha iní-gá. Te ñu-gá dácùuⁿ-gá dáú, te tàxi-gá sá nchító-ó chi xito-gá nchaa tatá xítú-ó, te xíăⁿ cúđí iní-ó ndecu-o ñuyíú-a —càchí té Păblú ndihí té Bèé xăháⁿ-güedě xíi-yu.

¹⁸ Te cuěi ducaⁿ ñí xăháⁿ-güedě nchaa tnúhu-áⁿ, dico ño úhú ní sándáá iní-yu ñá ní sàhní-yu ndicutu-áⁿ chi cuendá ducaⁿ tnàhí quidé-yu sàhní-yu ndicutu òré quidé cahnú-yu ndiöxí-yu.

¹⁹ Te ñuú Antiòquiá ndihí ñuú Ìconiú xíndecu dava ñăyiu isràél, te ní queé-yu cuáháⁿ-yu ñuú Lìstrá núú ndécú tè Păblú. Te xíăⁿ ñí quexió-yu te ní xăháⁿ-yu xii ñăyiu ñuú xíăⁿ să cáhñi-yu té Păblú. Te ní sáha yúú ñăháⁿ-yu xii-dé, te ní cáháⁿ-yu sá ñí xíhí-dé, te ní tñi ñaha-güedě xii-dé,

te tañuhu ñaha-güedé xii-dé cuáháⁿ ñⁿ xio yuhu ñuú ní sá dáquéné ñàha-güedé. ²⁰ Te ní quexìo cue ñáyiú sándáá iní tnúhu Jèsús núú cátùu-dé-áⁿ, te ní nadúcúⁿ ndèé ñáhă-yu xii-dé, te ñini xĩnutnĩ-yu-áⁿ ñĩ ndacóo-dé cuánuhú ndihĩ ñaha tùcu-dé xií-yu xitĩ ñuú. Te nduu tněé-áⁿ ñĩ ndee-dé ndihĩ té Bèé cuáháⁿ-güedé ñuú Dèrbé.

²¹ Te ní cáháⁿ-güedé tnúhu Yá Ndiöxí ñuú-áⁿ, te ío vãi ñáyiú ní sándáá iní-yu tnúhu-gá. Te dătnùnĩ ní quee-güedé cuáháⁿ tucu-güedé ñuú Lìstrá, ndihĩ ñuú Ìconiú, ndihĩ ñuú Antiòquiá. ²² Te ní xáhaⁿ-güedé xií-yu sá vă dáñá ñìhnú-yu tnúhu Jèsús. Te sá dúcáⁿ ñĩ cáháⁿ-güedé, te vîhi-gá ní cudĩí iní-yu cadá-yu nàcuáa cuìní Yă Ndiöxí cadá-yu, te ní xáhaⁿ-güedé:

—Dacuitĩ cùndecu-o ñuyíú-a ndoho-o, te dătnùnĩ ducaⁿ te nacuaça ñaha Yă Ndiöxí xii-o —càchĩ-güedé xáhaⁿ-güedé xií-yu.

²³ Te ní sáháⁿ-güedé ndi tnahá ñⁿ ñⁿ xichi núú ndécú ñáyiú dàcuaha tnúhu Yá Ndiöxí, te ní taxi ndecu-güedé cue téé quindaha ñàha xií-yu, te ní cáháⁿ ndihĩ-güedé Yă Ndiöxí, te ñá túú tnàhĩ ná ní xèxi-güedé cuèndá sá ñĩ cáháⁿ ndihĩ-güedé-gá. Te ní xáhaⁿ-güedé sá Yă Ndiöxí coto ñaha-gă xií-yu chi ñi-u-ni-gá ní sándáá iní-yu.

Té Păblú ndihĩ té Bèé cuáháⁿ tucu-güedé ñuú Antiòquiá Sîriá

²⁴⁻²⁵ Te dătnùnĩ ní quee té Păblú ndihĩ té Bèé cuáháⁿ-güedé, ní yáha-güedé distrítú Pìsidiá. Te ní quexìo-güedé ñuú Pèrgé, xiáⁿ ñĩ cáháⁿ-güedé tnúhu Jèsús. Te ñuú-áⁿ yíndèhu-xi Panfiliá. Te

dătnùní cuáháⁿ-güedé ñuú Àtaliá. ²⁶ Te yàcáⁿ ní quée-güedé bàrcú cuánuhú tucu-güedé ñuú Antiòquiá. Te ñuú-áⁿ cúú-xí ñuú núú nĩ xícáⁿ táhũ-yu núú Yá Ndiõxí cuendá sá chindèe ñaha-gá xii-güedé chiúⁿ quide-güedé. Te cuendá sá nĩ ndihĩ chiúⁿ-güedé nchaa ñuú núú nĩ sáháⁿ-güedé, núu xíáⁿ cuánuhú-na-güedé. ²⁷ Te ní ndexìo-güedé ñuú-áⁿ, te ní cana-güedé nchaa ñáyiú sàndáá iní tnúhu-gá, te ní cani-güedé cuendú núũ-yu nchaa nàcuáa ní cuu núú nĩ sáháⁿ-güedé, te xáhaⁿ-güedé: “Yá Ndiõxí ío ní chindee ñaha-gá xii-ndĩ ní cáháⁿ-ndĩ tnúhu-gá núú nĩ sáháⁿ-ndĩ, te mee-gá ní quide sá tnàhá ñáyiú ñá túú cùu ñáyiú isràél ní xíndedóho-yu tnúhu-gá cuendá quíndáá iní-yu”, càchí-güedé xáhaⁿ-güedé xii-yu. ²⁸ Te vài nduu ní xíndecu-güedé ñuú Antiòquiá ndihĩ nchaa ñáyiú ní sàndáá iní tnúhu Jèsús.

15

Ní natacá ñáyiú sàndáá iní tnúhu Jèsús ñuú Jerusàlén

¹ Te ní quee ñⁿ ũú cue téé distrítú Jùdeá cuáháⁿ-güedé ñuú Antiòquiá, te ní sáá-güedé, te ní xáhaⁿ-güedé xii ñáyiú sàndáá iní tnúhu Jèsús sá núu vá cuáha-güedé seña ñⁿ nchaa cue téé dàtná ní cachí ndĩ Moisés, te vá nánihĩ tàhú-güedé. ² Te sá dúcáⁿ nĩ cáháⁿ cue téé-áⁿ, te ní ngüíta té Páblú ndihĩ té Bèe ní tenàá-güedé cue téé-áⁿ, chi dandàhú ñáhá-güedé cuíní-güedé ní cùu. Te nchaa ñáyiú sàndáá iní tnúhu-gá ní cachí-yu sá quíhĩⁿ té Páblú ndihĩ té Bèe ndihĩ ñⁿ ũú-gá-güedé ñuú Jerusàlén. Te yàcáⁿ cada-güedé ñⁿ jùndá ndihĩ mee-ni cùe

tée ní táúchíúⁿ Jèsús càháⁿ tnúhu-gá, ndihí cue tée yìndaha ñáyiú sàndáá iní tnúhu-gá ñuú-áⁿ, te jùndá-áⁿ cada ndáá-güedé tnúhu ní cáháⁿ cue tée ní sáá ñuú Antiòquiá.

³ Te nchaa ñáyiú sàndáá iní tnúhu-gá ní quide ndee ìní ñáhă-yu xii-güedé, te ní tñi-güedé ichi cuáháⁿ-güedé. Te ní yáha-güedé distrítú Fèniciá ndihí distrítú Sàmariá, te yàcáⁿ ní cani-güedé cuèndú nása ní cuu ní tuha ñáyiú ñá túú cùu ñáyiú isràél ichi Yá Ndiòxí, te ní cudíí víhí ìní nchaa ñáyiú ní xíndedóho-áⁿ.

⁴ Te té Páblú ndihí té Bèé ní ndexìo-güedé ñuú Jerusàlén, te ío ní cudíí ìní-yu sá nǐ ndexìo váha-güedé. Te ndècu dava-gá cue tée ní táúchíúⁿ Jèsús dácuaàha ñaha xii-yu tnúhu-gá, ndihí cue tée yìndaha ñaha xii-yu, ndihí dava-gá ñáyiú sàndáá iní tnúhu-gá, te ní cani-güedé cuèndú núŭ-yu nàcuáa ní quide Yá Ndiòxí ní chindee ñaha-gá xii-güedé ní quide-güedé chiuⁿ-gá. ⁵ Te ndècu ñⁿ úú cue tée ní tuha ichi Yá Ndiòxí, te cue tée-áⁿ cúú-güedé cue tée fariséú, te ní ndacuíñí-güedé, te ní xáhaⁿ-güedé:

—Dacuíí xini ñuhu-xi sá cuàha-güedé sèñá ñi cue tée cùmání cue tée ñá túú cùu ñáyiú isràél, te cùñaha-ndo sǎ ná cádá-güedé nchaa nàcuáa ní chídó tnùní ndíi Moisés —càchí cue tée cùu fariséú-áⁿ xáhaⁿ-güedé xii-güedé.

⁶ Te cue tée ní táúchíúⁿ Jèsús dácuaàha ñaha xii ñáyiú tnúhu-gá, ndihí cue tée yìndaha ñáyiú sàndáá iní tnúhu-gá ní quide-güedé jùndá cuèndá ní ndatnúhu-güedé nása cunduu. ⁷ Te vǎi vihi tnúhu ní cáháⁿ-güedé. Te té Pèlú ní ndacuíñí-dé, te ní xáhaⁿ-dē xii-güedé:

—Nchòhó cue té ndècu ndihí-í ichi Xítóhó Je-sucrístú, chí cùndèdóho ìⁿ tnúhu na càháⁿ-í-a. Sa nàha-ndo sá nǐ cachí Yǎ Ndiǒxí sá diù-í cáháⁿ-í tnúhu Jèsús núú ñáiyu ñá túú cùu ñáiyu isràél cuèndá sá quíndáá iní-yu, te naníhí tàhú-yu. ⁸ Dico Yá Ndiǒxí sa nàha-gá nása càa iní ìⁿ ìⁿ ñáiyu. Te cùtnuní iní-ó sǎ cúú iní ñáhá-gǎ xii cue ñáiyu ñá túú cùu ñáiyu isràél, chí ní sáñaha-gǎ Espíritú-gá ndécú ndihí-yu dàtná cuìní-ndó nǐ taxi-gá ndécú ndihí nchoo. ⁹ Chi Yá Ndiǒxí ìⁿnuu-ní cùu iní ñáhá-gǎ xii-o nchàa-o ndihí cue ñáiyu ñá túú cùu ñáiyu isràél, chí tnàhá-yu ní xócání-gǎ nchaa sá cuèhé sá dúhá nǐ xóo cadá-yu ndée òré ní sándáá iní-yu Jèsús. ¹⁰ ¿Te ná cuèndá nchòhó cuìní-ndó càda ñáiyu ní sándáá iní tnúhu-gá ìⁿ sá ñǎ tnàhá iní-gá sá cadǎ-yu? Te cuìní-ndó dàndoho-ndó-yu. Te nǐ nchòo te nǐ cue ñaní tnàhá-ó nǐ xíndecu ndée sanaha ñǎ ní ndàcú-yu cadá-yu nchaa xiǎⁿ. ¹¹ Te vá dúcǎn cáháⁿ-ndó, chí sa nàha-ndo sá Yá Ndiǒxí ní cundàhú iní ñáhá-gǎ xii-o, te dió ducaⁿ nǐ quide-gá sá nánihí tàhú-ó nchàa-o. Te diu-ni ducaⁿ nǐ quide-gá ñáiyu ñá túú cùu ñáiyu isràél, te ní naníhí tàhú-yu —càchí té Pèlú xǎhaⁿ-dǎ xii-güedé.

¹² Te dǎtnùní té Bèé ndihí té Pǎblú ní ngüíta-güedé ní cáháⁿ-güedé, te ní xíndedóho-yu nchaa tnúhu ní cáháⁿ-güedé. Te ní xáhaⁿ-güedé xií-yu nàcuáa ní chindee ñàha Yá Ndiǒxí xii-güedé, te ní quide-güedé vǎi núú sǎ vǎ yóo tnàhí ndàcu cada, te ducaⁿ te ní cutnùní iní ñáiyu ñá túú cùu ñáiyu isràél sá ndàá càháⁿ-güedé. ¹³ Te òré ní ndihí cuèndú ní cáháⁿ-güedé, te té Jàcobó ní xáhaⁿ-dǎ:

—Nchòhó cue té ndècu ndihí-í ichi Xítóhó Je-

sucrístú, chí cúndèdóho ìⁿ tnúhu na càháⁿ-í-a.
 14 Té Xímú, àdi Pelú chi úú dèu-dé, ní cani-dé
 cuèndú nàcuáa ní quide Yá Ndiǒxí ndéé díhna ní
 dáquéé dèⁿ-gá ñáyiú ñá túú cùu ñáyiú isràél tnuú
 nchaa ñáyiú ñá túú ndècu ichi-gá, cuèndá cuìní-gá
 chiñuhu ñàhá-yu xii-gá. 15 Te dǎtnùní ní cáháⁿ-dé
 nàcuáa ní cáháⁿ Yá Ndiǒxí ndéé sanaha. Te duha
 ní chídó tnùní cue téé ní xóo cáháⁿ tnúhu-gá ndéé
 sanaha nàcuáa ní cáháⁿ-gá, te duha ní cachí-gá:

16 Dàtná cuìní-ndó cùu ìⁿ vehe ní sáá te ní ngoyo te
 dàndaa-güedé xito cùu uú, ducaⁿ sǎtnahá-xi
 cada-xi ìⁿ nduu,

chi ñaní tnáhá ndǐi Dàvií ní xóo cáháⁿ ndihí ñàhá-yu
 xii-í ní cùu, te ní dǎñá ndèe-yu ichi-í,

te na quìxi-í te natuha ñaha tùcú-yu.

17 Te ducaⁿ te vǎi ñáyiú ñá túú cùu ñáyiú isràél
 nandúcú-yu ichi-í te cáháⁿ ndihí ñàhá-yu.

18 Duha ní cáháⁿ Yá Ndiǒxí, te ducaⁿ ní chídó tnùní
 cue téé ní xóo cáháⁿ tnúhu-gá ndéé sanaha —càchí
 té Jàcobó xǎhaⁿ-dè xii-güedé.

19 Te xǎhaⁿ tùcu-dé:

—Yúhú càchí iní-í sǎ vǎ cúú dǎsatú-ó iní nchaa
 ñáyiú ta sàndáá iní-xi tnúhu Yá Ndiǒxí, ñáyiú ñá
 túú cùu ñáyiú isràél, te ìⁿ úú-ni tnúhu cúñaha-o
 nàcuáa cadá-yu. 20 Dico xini ñuhu-xi daquihíⁿ-ó
 tùtú cúñaha-o sǎ vǎ cǎxí-gǎ-yu nchaa sǎ nchító-ó
 ndùu táhú nchaa sǎ càchí-yu cùu ndiǒxí-yu. Te
 cúñaha-o sǎ vǎ càháⁿ ndihí cue téé ñadihí tẹ núu
 ñá díú ñadihí-güedé cúú-yu, te ní cuè ñáyiú dèhí vǎ
 càháⁿ ndihí-yu téé te núu ñá díú yǐ-yu cùu-güedé,
 te vǎ cǎxí-yu cuñú quiti cuèhné, te vǎ cǎxí-yu
 níñí. 21 Te ducaⁿ cǔñaha-o, chi ndi tnahá ñuú

núú ndécũ-yu, te xĩndecu ñáyiú isràél dácuaàhá-yu
tnúhu ní chídó tnùnĩ ndĩ Moisés, te ndi tnahá nduu
ndètátú-yu dàcuahá-yu tnúhu ndĩ veñúhu-yu —
càchí té Jàcobó xǎhaⁿ-dě xii-güedé.

²² Te dǎtnùnĩ cue téé ní táuchíúⁿ Jèsús dacuaàha
ñaha xií-yu tnúhu-gá, ndihĩ cue téé yĩndaha ñáyiú
sàndáá iní tnúhu-gá ní cachí-güedé sá ndúcú-güedé
ĩⁿ úú-gá cue téé quíhĩⁿ ndihĩ té Pǎblú ndihĩ
té Bèé ñuú Antiòquia, te diu-ni ducaⁿ nĩ cáhánⁿ
dava-gá ñáyiú ndècu ichi-gá. Te úú cue téé ní
ndúcú-güedé, ĩⁿ-dé nání-dé Silás, te ĩⁿ-dé nání-dé
Júdás, àdi Barsabás chi úú diu-dé, te cùnuu-güedé
ndi ndùú-güedé. ²³ Te ní cadúha nchaa cue téé
cùnuu tutú canehe-güedé quíhĩⁿ, te duha càhán-xi:

“Còvǎha dĩí-ndó nchàa-ndo. Nchúhú cue téé ní
táuchíúⁿ Jèsús cáhán-ndĩ tnúhu-gá, ndihĩ cue téé
yĩndaha cue ñáyiú sàndáá iní tnúhu-gá quide ndee
iní ñáhá-ndĩ xii nchòhó cue ñáyiú ndècu ndihĩ-ndĩ
ichi-gá cuèi ñá dĩú ñáyiú isràél cúú-ndó. Te nchòhó
ñáyiú xĩndecu ñuú Antiòquia, ndihĩ nchòhó ñáyiú
ndècu distritú Sìriá, ndihĩ nchòhó ñáyiú ndècu
distritú Cìliciá, càchí tnúhu-ndĩ xii-ndo sǎ ²⁴ nĩ
nĩhĩ-ndĩ tnúhu sá ĩⁿ úú cue téé ndècu iha ní
quixi-güedé núú ndécú-ndó, te ñá túú chiúⁿ nĩ
tahu-ndĩ quixi-güedé. Te sá ĩⁿ tnúhu ní cáhán-güedé
ní xáhaⁿ-güedé xii-ndo sǎ ngũndecu sèñá ñĩ-ndo, te
canchicúⁿ nihnu-ndo nchàa nacuaá ní chídó tnùnĩ
ndĩ Moisés, te xǎⁿ ní sani ĩⁿ ní sani úú iní-ndó,
chi ñá túú xini-ndó nũu ndáá tnúhu càhán-güedé
àdi ñá ndàá. ²⁵ Te ní ndatnúhu-ndĩ nàcuáa cun-
duu sá téndàha-ndĩ úú cue téé quixi-güedé ndihĩ

té Bèé ndihí té Păblú, cue téé ío cùu iní-ndí, te cue téé-án cǎháⁿ-güedé nàcuáa cǎháⁿ-ndí-a. ²⁶ Te diu-ni té Bèé ndihí té Păblú ní sáháⁿ-güedé ní cǎháⁿ-güedé tnúhu Xítóhó Jesucrístú nchaa xichi. Te ndi tnahá cuáháⁿ-güedé cuíní-yu cahni ñàhá-yu xii-güedé. ²⁷ Te tendaha-ndí té Jüdás ndihí té Silás quixi-güedé tnàhá-güedé cachí tnúhu váha-güedé nàcuáa cuáháⁿ tnúhu cǎháⁿ-ndí. ²⁸ Te diu-ni ducaⁿ cǎháⁿ-ndí cǎchí tnúhu-ndí nàcuáa cǎháⁿ Espíritú Yǎ Ndiǒxí cada-ndo, chi nchúhú vá cǎháⁿ-ndí sá cádá-ndó nchaa sá ní cǎháⁿ ndí Moisés cada ñáyi, chi ío úhú, te vá yǒo ndacu cada. Te vitna na cǎháⁿ-ndí ñⁿ úú-ni tnúhu nàcuáa cada-ndo. ²⁹ Vá cáxí-ndó sá nchító-ó ndúu táhú nchaa sá cǎchí ñáyi cùu ndióxí-yu, te vá cáxí-ndó ñíí, te vá cáxí-ndó cùñú quiti cuèhné, te vá cǎháⁿ ndihí cue téé ñadihí te núu ñá díú ñadihí-güedé cúu-yu, te ní cué ñáyi dihí vá cǎháⁿ ndihí-yu téé te núu ñá díú yí-yu cùu-güedé. Te núu na càda-ndo nchaa nacuáa cǎháⁿ-ndí-a, te cada váha-ndo. Te vitna ío cada ndee iní-ndó nchaa-ndo-na.” Duha ní chídó tnúni-güedé núu tütú ní tendaha-güedé cuáháⁿ.

³⁰ Te ní quide ndee iní-yu cue téé quíhí ñuú Antiòquiá, te ducaⁿ te ní xica-güedé cuáháⁿ-güedé. Te òré ní quexio-güedé ñuú-án, te ní cana-güedé nchaa ñáyi sàndáa iní tnúhu Jèsús, te ní sǎñaha-güedé tutú xií-yu. ³¹ Te ní dǎcuáhǎ-yu tutú ní sǎñaha-güedé-án, te ní cudíí víhí iní-yu chi ío váha cǎháⁿ tutú-án. ³² Te té Jüdás ndihí té Silás tnàhá-güedé ní nduu táhú-güedé cǎháⁿ-güedé tnúhu sá dǎcǎhu iní ñáhá Yǎ Ndiǒxí. Te ní xáhaⁿ-güedé vai tnúhu nàcuáa cáda-yu, te víhi-gá

ní cudíí ìní-yu cadá-yu nàcuáa càháⁿ Yă Ndiôxí cadá-yu. ³³ Te ní xíndecu-güedé ìⁿ úú nduu ndihí-yu, te dătnùní ní quide ndee ìní ñáhă-yu xii-güedé cuendá sá nùhú-güedé núú vëxi-güedé, te mee-ni tē Jùdás cuánuhú-dé. ³⁴ Te té Silás ní xáhaⁿ-dē sá vă nùhú-ni-dé. ³⁵ Te té Păblú ndihí té Bèé ní ndóo-güedé ní cáháⁿ-güedé tnúhu Yá Ndiôxí ñuú Antiôquiá, te vâi-gá tucu ñáyiú Antiôquiá ní cáháⁿ-yu tnúhu-gá.

Xito cùu uú cuáháⁿ té Păblú càháⁿ-dé tnúhu Yá Ndiôxí núú ñăyiú

³⁶ Te sâtá ñí cuu cuéhé nduu, te ní xáhaⁿ tē Păblú xii té Bèé:

—Na quíhíⁿ-ó nchàa ñuú núú ñí sáháⁿ-ó ñí cáháⁿ-ó tnúhu Yá Ndiôxí cáháⁿ ndihí-o nchàa ñáyiú ní tuha ichi-gá cuendá quini-ó ñuú ndècu váha-yu —càchí-dé xáhaⁿ-dē.

³⁷ Te té Bèé ní xáhaⁿ-dē sá quíhíⁿ ndihí-güedé té Juáá, àdi Mácú chi úú dîu-dé. ³⁸ Dico té Păblú ñă ní dàña-gá-dé quíhíⁿ té Juáá, chi ní dándôo ñaha-dē xii-güedé cútnàhá ní xíndecu-güedé Pànfiliá, te ní nacuico-dē cuánuhú-dé, te ñă túú-gă ní sáháⁿ ndihí ñaha-dē xii-güedé. ³⁹ Xíăⁿ ní cuu ní tenáá tnàhá tē Bèé ndihí té Păblú, te ichi càa ichi caa ní cuu-güedé. Te té Bèé ndihí té Mácú ní quée-güedé bàrcú cuáháⁿ-güedé Chìpré. ⁴⁰ Te té Păblú ní xáhaⁿ-dē xii té Silás sá quíhíⁿ ndihí ñaha-dē, te ñáyiú sàndáá ìní-xi tnúhu Jèsús ní cáháⁿ ndihí-yu Yá Ndiôxí sá chíndèe ñaha-gá xii-güedé. ⁴¹ Te ní xica-güedé cuáháⁿ-güedé te ní yáha-güedé ñihîi distrítú Sìriá ndihí distrítú Cìliciá. Te ní cáháⁿ-güedé tnúhu Jèsús núú nchàa ñáyiú ní sàndáá ìní tnúhu-gá,

núu xiǎⁿ ío-gá ní cudíí ìní-yu cadá-yu nàcuáa càháⁿ
Yá Ndiǒxí.

16

*Tnàhá té Timùteú cuáháⁿ ndihí-dé té Păblú ndihí
té Silás*

¹ Te té Păblú ndihí té Silás cuáháⁿ-güedé ñuú Dèrbé ndihí ñuú Lìstrá, te ñuú Lìstrá yàcáⁿ ndécú ìⁿ té nàni Timuteú. Te té-áⁿ sàndáá ìní-dé tnúhu Jèsús, te tnàhá nàná-dé sàndáá ìní-aⁿ tnúhu-gá, te ñaha isràél cúú-áⁿ, te té griégú cúú tătă-dě.

² Te nchaa ñáyiú ní sàndáá ìní tnúhu-gá ñáyiú ndècu ñuú Lìstrá, ndihí ñáyiú ñuú Ìconiú, nchaa ñáyiú-áⁿ cudíí ìní-yu nàcuáa quide-dé. ³ Te ní cuiní té Păblú sá tnàhá té Timùteú quíhíⁿ ndihí-dé dava-gá ñuú, núu xiǎⁿ díhna-gá sèñá ní sáha té Păblú ñii té Timùteú, chi ñá ní tnàhá ìní té Păblú sá càháⁿ cuèhé ñáyiú isràél cuèndá té Timùteú. Te nchaa ñáyiú isràél ndécú ñuú-áⁿ xìní-yu sá tée griégú cúú tătă-dě, te ñá díú tée isràél cúú-dě, te xiǎⁿ ní sáha té Păblú sèñá ñii té Timùteú. ⁴ Te ndi tnahá ñuú ndi tnahá ñuú cuáháⁿ-güedé càháⁿ ndihí-güedé nchaa ñáyiú ní sàndáá ìní tnúhu Jèsús. Te ní xáhaⁿ-güedé nàcuáa càháⁿ tutú ní cadúha cue té ní táuchíúⁿ Jèsús dacuàha ñaha xií-yu tnúhu-gá, ndihí cue té yìndaha ñáyiú sàndáá ìní tnúhu-gá ñuú Jerusàlén. ⁵ Te cuèndá ducaⁿ ñi sáháⁿ-güedé nchaa ñuú núú ndécú ñáyiú sàndáá ìní tnúhu-gá ní dácuahá ñaha-güedé xií-yu, núu xiǎⁿ tá cùu túha-gá-yu tnúhu Yá Ndiǒxí, te vài-gá-yu ní tuhá-yu ichi-gá.

Ní dácótó ñàha-xi xii té Păblú sá nǐ xini-dé ìn téé distrítú Macèdoniá

⁶ Te ñá ní dàña Espíritú Yă Ndiöxí quíhíⁿ-güedé cáháⁿ-güedé tnúhu-gá distrítú Àsiá, núu ní sáháⁿ-güedé distrítú Frìgiá ndihí distrítú Gàlaciá cáháⁿ-güedé tnúhu-gá. ⁷ Te ní sáá-güedé yuhu distrítú Mìsiá. Te quíhíⁿ-güedé distrítú Bitiniá ní cùu, dico ñá ní dàña Espíritú Yă Ndiöxí quíhíⁿ-güedé yàcáⁿ. ⁸ Te ní yáha-güedé Mìsiá, te ní quexìo-güedé ñuú Tròás, te yàcáⁿ ní nanítnáháⁿ-ndí ndihí-dé. ⁹ Te ìn niú ní dácótó-xí nǔú tẹ Păblú sá nǐ xini-dé ìn téé distrítú Macèdoniá nútñí-dé, te ní xáhaⁿ tée-án xii té Păblú: “Cada ndee iní-n quíhíⁿ-n Mácèdoniá chi dacuàha ñaha-n nchaa sá xini-n”, càchí-dé xáhaⁿ-dẹ, ní dácótó ñàha-xi xii té Păblú. ¹⁰ Te cuendá sá dúcáⁿ nǐ dácótó ñàha-xi xii té Păblú nǔú ní ndatnúhu-ndí quíhíⁿ-ndí Macèdoniá, chi ní cutnùní iní-ndí sá cáná ñàha Yá Ndiöxí quíhíⁿ-ndí cáháⁿ-ndí tnúhu-gá núú ñăyiu yàcáⁿ.

Té Păblú ndihí té Silás ndécú-güedě ñuú Fìlipú

¹¹ Te ní quée-ndí bàrcú ñuú Tròás, te cuáháⁿ ndáá-ndí ñuú Samòtraciá, te yàcáⁿ ní quexìo-ndí, te ní yáha-ni-ndí cuáháⁿ-ndí. Te nduu tněé ní quexìo-ndí ñuú Nèápolís. ¹² Te yàcáⁿ ní quene-ndí bàrcú, te xica-na-ndí cuáháⁿ-ndí ñuú Fìlipú te ñuú-án yíndèhu-xi distrítú Macèdoniá. Te yàcáⁿ ní cudíi-ndí ní xíndecu tnaa-ndí. Te ñuú Fìlipú-án ïo cùnuu-xi, chi ío chitu ñăyiu ròamá ní ngóo-yu. ¹³ Te nduu ndètátú-yu ní quée-ndí ñuú cuáháⁿ-ndí ìn xio yuhu yǔte, chi yàcáⁿ sàháⁿ-yu càháⁿ ndihí-yu Yá

Ndiöxí. Te òré ní quexìo-ndí, te ní naníhí tnáhá-ndí ndihí mee-ni ñáyiú dîhí, te ní cáháⁿ-ndí tnúhu Yá Ndiöxí ní xíndedóho-yu. ¹⁴ Te ndècu ìⁿ ñaha nani Lidiá ní xíndedóho-aⁿ nàcuáa ní cáháⁿ-ndí, te ñaha ñúú Tiàtirá cúú-áⁿ, te dîco-aⁿ dóó muràdú, te ío càháⁿ ndihí-aⁿ Yá Ndiöxí. Te diu-ni mee Yá Ndiöxí ní chindee ñàha-gá ní sándáá iní-aⁿ tnúhu ní cáháⁿ té Păblú. ¹⁵ Te ní sandute-aⁿ ndihí landú-aⁿ, ndihí nchaa ñáyiú xînu cuechi núú-aⁿ, te ní cachí-aⁿ xii-ndí:

—Te núu ní cutnùní iní-ndó sǎ ñí sándáá ndisa iní-í tnúhu Jèsús, te cundecu tnaa-ndo vèhe-í —càchí-aⁿ xii-ndí.

Te ní quide yica-aⁿ ñí xíndecu-ndí vèhe-aⁿ.

¹⁶ Te ìⁿ nduu ñùhu-ndí ichi cuáháⁿ-ndí núú càháⁿ ndihí-yu Yá Ndiöxí, te ní naníhí-ndí ìⁿ xíchí ñúhú ìchi, te yîhí ñaha espíritú cündîhí yucu ñávăha xii-xi. Te xǎⁿ ní quide ní cáháⁿ-xi nchaa sá vǎ yǎo tnàhí cùtnuní iní-xi núú nchaa ñáyiú ní sángándîhí ñaha xî-xi. Te ñáyiú dîi vèhe-xi xînu cuechi-xi ío vǎi dîhúⁿ ñí níhí-yu chî ní cháhu nchaa ñáyiú ní sángándîhí ñaha xî-xi. ¹⁷ Te xíchí-ǎⁿ ñí chinchícúⁿ ñáhá-xí xî-ndí ndihí té Păblú nděndaha ñàha-xi cuáháⁿ, te ní cáháⁿ níhi-xi xǎhaⁿ-xí xîi dava-gá ñáyiú:

—Cue téa-xînu cuechi-güedé núú Yá Ndiöxí, chî ío càhnu cuu-gá, te càchí tnúhu-güedé nása cada-ndo nàníhí tǎhú-ndó —càchí-xi xǎhaⁿ-xi xîi-yu.

¹⁸ Te tîtní xito ní yáha-ndí ducaⁿ-ni ñí cáháⁿ-xi. Te ñá ní cùndee-gá iní té Păblú sá dúcáⁿ càháⁿ-xi, núu

ní nanchocuĩhnu-dé núú nútnĩ-xi, te ní xáhaⁿ-dě xii espíritú cúndĩhi yucu ñávãha yĩhi ñaha xii-xi:

—Ío càhnu cuu Xítoho Jesucrístú, núú xĩáⁿ càchí-í sá xócuĩñĩ-n vã quĩhĩ-gã-n yìquĩ cuñú xíchí-a — càchí-dé xãhaⁿ-dě.

Te òré-ni ní quee espíritú cúndĩhi yucu ñávãha-án yìquĩ cuñú-xi.

¹⁹⁻²⁰ Te ñáyiu dii vèhe-xi xinu cuechi-xi-áⁿ nĩ cutnùní iní-yu sá vã ñihĩ-gá-yu díhúⁿ cuendá tnúhu càháⁿ-xi, núú ní tñí-yu té Pãblú ndihĩ té Silás ndécá ñàhá-yu cuáháⁿ núú cuè tée cùchiuⁿ Romá, te xãháⁿ-yu xii-güedé:

—Cue téa cùu-güedé cue téa isràél, te ío dusaⁿ xĩquide-güedé ñuú-ó. ²¹ Te cuení-güedé cada-o nàcuáa quide-güedé, te vá cúú dùcaⁿ cada-o chi ñáyiu nàcióⁿ Rómá cúú-ó —càchí-yu xãháⁿ-yu xii cue téa cùchiuⁿ.

²² Te uuⁿi ní cáháⁿ nchaá-yu, te xãháⁿ-yu sá ñà túú quide váha té Pãblú ndihĩ té Silás. Te cue téa cùchiuⁿ ní cándeé-güedé dóó tẽ Pãblú ndihĩ dóó tẽ Silás ní ndátá-güedé, te ní táúchíúⁿ-güedé caniha-güedé ndihĩ tnudĩ xii-güedé. ²³ Te ní caniha-güedé, te dătnùní ní chihi ñaha-güedé vecaá. Te ní xáhaⁿ-güedé xii téa nděenchito vecaá sá cáda cuèdadú víhĩ-dě cuendá ná canú-güedé vecaá. ²⁴ Te cuendá sá dúcáⁿ nĩ cáháⁿ-güedé, núú téa nděenchito vecaá ní dáyãha ñaha-dě ingá cuártú ndécú xití vecaá, te ní chihi-dé sáhá-güedé yaú nduhu, te ní quide tĩ-dé.

²⁵ Te dava niú ní cáháⁿ ndihĩ té Pãblú ndihĩ té Silás Yã Ndiõxí, te ní xita-güedé ndudú ní quide

càhnu ñaha-güedé xii-gá. Te dava-gá cue téé yìhi vecaá ní xíndedóho-güedé nàcuáa ní xita-güedé. ²⁶ Te uuⁿni níhi vìhi ní tnáa ní quidi-xi ndéé cimièntú vecaá, te ní nacaáⁿ nchaa yèhe vecaá, te ní ndìhi cadèná ndútú cuè téé yìhi vecaá ní nandáxí. ²⁷ Te ní ndiquíú cúnú ìní téé nděenchito vecaá, te ní guide cuendá-dé nchìi nchaa yèhe vecaá. Te ní tava-dé machití-dé cahni-dé méé-dě ní cùu, chi ní cáháⁿ-dě sá nì ndìhi cue téé yìhi vecaá ní xinu ni cùu. ²⁸ Te té Pàblú ní cáháⁿ níhi-dé, te xăhaⁿ-dě xii téé nděenchito vecaá:

—Vá dúcáⁿ càda-n cahni-n mee-n, chi nchaa-ni-ndí yíhí —càchí-dé xăhaⁿ-dě xii téé nděenchito vecaá.

²⁹ Te dătnùní ní xícáⁿ téé nděenchito vecaá ñuhú, te xínu-dé cuánguihu xití vecaá núú yíhí tē Pàblú ndìhi té Silás, te quidi ñaha-ná-xi xii-dé ní quexìo-dé ní ngüíñí xití-dě núú-güedě. ³⁰ Te dătnùní ndécá ñàha-dé xii-güedé ní ndee vecaá, te ní xícáⁿ tnúhú-dě núú-güedě, te xăhaⁿ-dě:

—Nchòhó cachí tnúhu-ndo năsa cada-í naníhí tàhú-í —càchí-dé xăhaⁿ-dě.

³¹ Te ní xăhaⁿ-güedě:

—Quindáá iní-n ndìhi ñadihí-n, ndìhi landú-n, ndìhi nchaa ñáyiu xínu cuechi núú-n tnúhu càháⁿ Xítóhó Jesucrístú, te naníhí tàhú-ndó —càchí-güedé xăhaⁿ-güedě.

³² Te ní dăcuáhá ñàha-güedé xii téé nděenchito vecaá ndìhi nchaa ñáyiu ndècu vehe-dé tnúhu Yá Ndiöxí. ³³ Te diu-ni òré-áⁿ nì naquete-dé sátá-güedě núú nì ñáni, te dătnùní ní sandute-dé ndìhí-yu.

³⁴ Te ndèca ñàha-dé cuáháⁿ vehe-dé ní sáñaha-dě

sá nĩ xexi-güedé, te ní cudíí víhí ìní té nděchito vecaá ndihĩ nchaa-dé vehe-dé sá nĩ tuhá-yu ichi Yá Ndiõxí. Te cuándihu tucu té Páblú ndihĩ té Silás vecaá.

³⁵ Te nduu tněé ní xáhaⁿ cuè té cùchiuⁿ xii poleciá cuáháⁿ-güedé cúu-güedé té nděchito vecaá queñuhu-dé úú cue té cuánguihu ndedí nduu ìcu núhú-güedé. ³⁶ Te té nděchito vecaá ní xáhaⁿ-dě xii té Páblú ndihĩ té Silás:

—Cue té cùchiuⁿ ní cachí-güedé sá quée-ndó nũhú-ndó, chi ñá túú-gă ná cada-güedé, chi sa ní yáha cuendá-ndó —càchí té nděchito vecaá xáhaⁿ-dě xii-güedé.

³⁷ Te té Páblú ní xáhaⁿ-dě xii cue té cùu poleciá:

—Tée rò má cúú-ndí, te vá cúú dùcaⁿ-ni cunduu, chi ní caniha-güedě tnudi xii-ndí, te ní xiní-yu nchaá-yu. Te ñá túú tnàhí ni xìcáⁿ tnúhú-güedě nũ ndáá ndècuéchi-ndí àdi ñáhá, chi cuendá-ni ní chihi ñaha-güedě vecaá xii-ndí. Te vitna cuìní-güedé dacăcu ñaha-güedě núhú-ndí cuendá sá vă yõo quini ñáhá nũhú-ndí cáháⁿ-güedě, dico vá cúú dùcaⁿ cada ñaha-güedé xii-ndí. Chí cuáháⁿ cúñaha-ndo na quìxi mee-güedé queñuhu ñaha-güedě —càchí té Páblú xĩ-dé cue poleciá.

³⁸ Te cue té cùu poleciá cuánuhú-güedé núú ndécú cuè té cùchiuⁿ, te ní xáhaⁿ-güedě nàcuáa ní cáháⁿ té Páblú. Te sá dúcáⁿ nĩ xáhaⁿ pòleciá sá tée rò má cúú-güedě, xĩáⁿ ní yùhú-güedé. ³⁹ Te ní sáháⁿ cue té cùchiuⁿ yehe vecaá, te ní xáhaⁿ-güedě sá cádá cànũ iní-güedé sá nĩ chihi ñaha-güedě vecaá, te ní ndeñuhu ñaha-güedě vecaá. Te

ní cáháⁿ ndàhú-güedé núú cuè téé ní xíhi vecaá sá ndéé-güedé ñuú-áⁿ nùhú-güedé. ⁴⁰ Te ní ndee-güedé vecaá, te cuáháⁿ-güedé vehe tá Lidiá, te ní ndatnúhu-güedé ndihi nchaa ñáyu ní sándáá iní-xi tnúhu Jèsús, te ní xáhaⁿ-güedé xií-yu nàcuáa cadá-yu, te ío ní cudíí iní-yu, te ducaⁿ te ní xica-güedé cuáháⁿ-güedé.

17

Ío dusaⁿ quide ñáyu ñuú Tesalónica

¹ Te ní yáha-güedé ñuú Anfípolís ndihi ñuú Apòloniá, te ní quexìo-güedé ñuú Tesalónica, te yacáⁿ cáá ìⁿ veñúhu ñáyu isràél. ² Te ní sáháⁿ té Pàblú veñúhu-áⁿ, chi ducaⁿ tnàhí quide-dé, te ndi tnahá nduu ndetátú-yu ní sáháⁿ-dé veñúhu-áⁿ ùní xito. Te ní ndatnúhu ndihi ñaha-dé xií-yu nàcuáa ní chídó tnùnì cue téé ní xóo cáháⁿ tnúhu Yá Ndiòxí ndéé sanaha. ³ Te ní xitnúhu ñaha-dé nàcuáa ní cáháⁿ cue téé-áⁿ sá Crìstú Yáá tendaha Yá Ndiòxí quixi ñuyíú-a ndoho vîhi-gá, te cuú-gá, te ndoto-gá, te xâhaⁿ-dê:

—Te diu Jèsús cúú Crìstú Yáá ní tendaha Yá Ndiòxí ní quixi ñuyíú-a, núu xiâⁿ càchí tnúhu-í vitna —càchí té Pàblú xâhaⁿ-dê xií-yu.

⁴ Te dava ñáyu isràél ní sándáá iní-yu tnúhu ní cáháⁿ té Pàblú, te ní níhí tnâhâ-yu ndihi-dé, ndihi té Silás. Te vâi ñáyu griégú ñáyu càháⁿ ndihi Yá Ndiòxí ní sándáá iní-yu tnúhu Jèsús. Te ndècu titní ñáyu dìhí ñáyu cùnûu, te ñáyu-áⁿ tnâhâ-yu ní sándáá iní-yu tnúhu-gá. ⁵ Te dava ñáyu isràél ñá túú ní cùu váha iní-yu núú tẽ Pàblú nûu ní ndúcû-yu cue téé cuihna iní-xi tuhío-güedé cada

chiuⁿ-güedé, chi ndi cuíhnu ndi cuíhnu-ni-güedé, te nchaá-yu ndihi cue téé-áⁿ ndi coyo ndi coyó-yu xicuáá-yu. Te sátá ní tecú dóho dava-gá-yu, te ní sáháⁿ tuhá-yu, te ío ní quide dùsáⁿ-yu. Te nísáháⁿ-yu vehe té Jàsón, te ní quide yìcá-yu ní quíhu-yu vehe-dé nándücú-yu té Păblú ndihi té Silás cuendá queñuhu ñàhá-yu núú nchàa ñáyi. ⁶ Te ñá ní nàníhí ñáhă-yu xii-güedé, núu xíăⁿ ní tñí-yu té Jàsón ndihi ĩⁿ ũú-gá cue téé sàndáá iní tñúhu Jèsús, te tãñuhu ñahá-yu xii-güedé cuáháⁿ núú cuè téé cùchiuⁿ. Te òré ní quexió-yu núú ndécú cuè téé cùchiuⁿ, te ní ngüíta-yu ní cuáá-yu, te xăhăⁿ-yu xii-güedé:

—Ní quexió cue téé-ăⁿ ñuú-ó, te ío dusaⁿ quide-güedé, te ducaⁿ-ni quide-güedé nchaa ñuú núú xícá cùu-güedé. ⁷ Te té Jàsón-ăⁿ ní xáhaⁿ-dě sá cúú cùndecu-güedé vehe-dé, te ñá túú sàndáá iní-güedé nacuáa càháⁿ té Cèsár té yìndaha cuéhé nàcióⁿ, te càchí-güedé sá ndécú ìngá téé cùnūu-gá tucu nàni-dé Jèsús —càchí-yu xăhăⁿ-yu xii cue téé cùchiuⁿ.

⁸ Te sátá dúcáⁿ ní cáháⁿ-yu, te ní cudééⁿ víhí cuè téé cùchiuⁿ ndihi dava-gá ñáyi ndèdóho. ⁹ Te vài díhúⁿ ní xícáⁿ cue téé cùchiuⁿ núú tē Jàsón ndihi dava-gá cue téé cuáháⁿ ndihi-dé cuendá té Păblú ndihi té Silás, te núu na ndèe-güedé núhú-güedé, te nacuáñaha cuè téé cùchiuⁿ díhúⁿ-güedě.

Té Păblú ndihi té Silás ndécú-güedě ñuú Bèréá

¹⁰ Te òré ní cundiquíⁿ, te ní quide ndee iní ñáhá ñáyi sàndáá iní tñúhu Jèsús xii té Păblú ndihi té Silás, te ní xica-güedé cuáháⁿ-güedé ñuú Bèréá.

Te diu-ni nduu nĩ sáá-güedé yàcáⁿ ní sáháⁿ-güedé veñúhu ñáyiú isràél. ¹¹ Te váha-gá iní ñáyiú ñuú Bèréá dàcúúxí ñáyiú ñuú Tesàlónicá, chi ío ní cudíí iní-yu ní xíndedóho-yu tnúhu Jèsús, te ñⁿ nduu ñⁿ nduu ní dácúáhă-yu tnúhu ní chídó tnùnĩ cue téé ní xóo cáháⁿ tnúhu Yá Ndiöxí ndéé sanaha cuèndá cuíní-yu quíní-yu núu ndáá cáháⁿ té Păblú ndihĩ té Silás. ¹² Te titní ñáyiú isràél ní sándáá iní-yu tnúhu-gá ndihĩ titní cue téé griégú ndihĩ ñáyiú dîhĩ ñáyiú cùnuu ní sándáá iní-yu. ¹³ Te dava ñáyiú isràél ndécũ-yu ñuú Tesàlónicá, te ñáyiú-áⁿ nĩ níhĩ-yu tnúhu sá ndécú tẽ Păblú ndihĩ té Silás ñuú Bèréá cáháⁿ-güedé tnúhu Yá Ndiöxí, núu xíáⁿ ní sáháⁿ-yu ñuú Bèréá ní dácúándèhndé-yu núu nchàa ñáyiú vátá dácúàha-gá. Te ñáyiú-áⁿ nĩ sándáá iní-yu tnúhu ndehnde te ní cudééⁿ víhĩ-yu núú-güedě. ¹⁴ Te òré-áⁿ nĩ xáhaⁿ ñáyiú sándáá iní tnúhu-gá xii té Păblú sá quíhĩⁿ-dé yuhu làmár, te ní xica-dé cuáháⁿ-dé, te té Silás ndihĩ té Timùteú ní quendóo-güedé ñuú Bèréá. ¹⁵ Te ñⁿ ùú-güedé cuáháⁿ ndihĩ-güedé té Păblú, te ndèca ñaha-güedé cuáháⁿ ndéé ñuú Àtenás, te ní xáhaⁿ tẽ Păblú xii-güedé:

—Núu na nùhú-ndó, te cúu-ndo tẽ Silás ndihĩ té Timùteú ná quíxí ndihĩ-ni-güedé nanítnáhá-ndĩ iha —càchí-dé xăhaⁿ-dě.

Te ní xica-güedé cuánuhú-güedé.

Té Păblú ndécú-dě ñuú Àtenás

¹⁶ Te ñuú Àtenás ndétú tẽ Păblú quíhĩⁿ té Silás ndihĩ té Timùteú. Te yàcáⁿ ní xíní-dé sá ïo cuéhé sã càchí-yu cùu ndiöxĩ-yu ndècu te ñá ndáá sá díú ndiöxí cúu-xí, te xíáⁿ ñá túú ní cùu váha iní-dé,

chi ñá tnàhá iní-dé nàcuáa quidé-yu. ¹⁷ Te ní sáháⁿ-dé veñúhu ní cáháⁿ ndihí-dé ñáyiú isràél ndihí dava-gá ñáyiú càháⁿ ndihí Yá Ndiöxí. Te ñⁿ nduu ñⁿ nduu sáháⁿ-dé xití ñuú càháⁿ-dé tnúhu-gá ndihí nchaa ñáyiú xìca cuu yacáⁿ. ¹⁸ Te cue téé cùu epicureú ndihí cue téé cùu estoicú, cue téé-áⁿ nĩ ndatnúhu-güedé ndihí té Páblú, te dava-güedé xĩtnàha-güedé:

—¡Ná tnúhu vñhi cáháⁿ téé lùcú-ǎⁿ! —càchí-güedé xĩtnàha-güedé.

Te dava-güedé xĩtnàha-güedé:

—Sàñi iní-ndí sá càháⁿ-dé cuendá ndiöxí sá vǎtá quĩnì-gá-ó —càchí-güedé xĩtnàha-güedé.

Te ducaⁿ xĩtnàha-güedé, chi càháⁿ té Páblú tnúhu Jèsús, te ní cáháⁿ-dé nàcuáa ní dándótó ñàha Yá Ndiöxí xii-gá, xǎⁿ nùu ducaⁿ xĩtnàha-güedé. ¹⁹ Te ndèca ñàha-güedé xii té Páblú cuáháⁿ ñⁿ xichi núú nání Àreópagú, te ní xáhaⁿ-güedé xii-dé:

—Cachí tnúhu ndáá-n nǎsa cuáháⁿ tnúhu càháⁿ-n, chi na cùtnuní ndáá iní-ndí, ²⁰ chi ducaⁿ-ni càháⁿ-n tnúhu sá ñà túú sàcúndedóho-ndí, te cuĩnì-ndí cachí tnúhu ndáá-n nǎsa ndùu tnúhu-áⁿ cuendá cutnùnì váha iní-ndí —càchí-güedé xǎhaⁿ-güedé xii-dé.

²¹ Te nchaa ñáyiú ñuú Àtenás ndihí ñáyiú dava-gá ñuú, mee-ni tnúhu saa cuĩnì-yu cáháⁿ-yu, nchaa sá vǎtá cúndedóho-gá-yu cuĩnì-yu cundedóho-yu.

²² Te té Páblú ní ngúnutnǎi-dé núú xǎxúcu-yu nchaá-yu, te xǎhaⁿ-dǎ:

—Nchòhó cue ñáyiú ñuú Àtenás, cundedóho-ndo nchàa tnúhu na càháⁿ-í-a. Ío quidè cahnu nchohó sá càchí-ndó cùu ndiöxí-ndó. ²³ Te vitna ní quexìo-í

ñuú-ndó, te ní xiní-í sá yàyacáⁿ ndécú nchàa sá càchí-ndó cùu ndiòxí-ndó càháⁿ ndihi-ndo. Te ní xiní-í ìⁿ xichi núú ndèé tnuní quidé cànnu-ndo Yá Ndiòxí Yáá ñá túú xìní-ndó, te diu-ni ducaⁿ càháⁿ lètrá ndèé tnuní xíaⁿ, te càchí-xi: “Tha quíde cahnú-ndí Ndiòxí sá ñà túú xìní-ndí”, duha càháⁿ lètrá-áⁿ. Te quíde cahnú-ndo Yá Ndiòxí càháⁿ-ndó, dico ñá túú xìní-ndó ñàsa càa-gá, te yúhú xìní ndáá-í nàcuáa càa Yá Ndiòxí, chi diu-ni Yá Ndiòxí càháⁿ ndihi-í, te diu tnúhu-gá càháⁿ-í vitna.

²⁴ Te diu Yá Ndiòxí ní cadúha-gá ñuyíú-a ndihi nchaa sá ió, núu diu-gá cúú Xítoho ñuyíú-a ndihi andiú. Te ñá túú xìní ñuhu-gá vehe dàcaa ñáyíu ñuyíú-a cundecu-gá. ²⁵ Te ñá túú xìní ñuhu-gá ñáyíu chindee ñàhá-yu xii-gá, chi mee-gă quidé-gă nchító-ó ndècu-o te tàxi-gá yócó tǎchí-ó ndihi nchaa sá xíní ñuhu-o.

²⁶ Te ndéé sanaha ñí cadúha-gá ìⁿ dîi-ni téé, te diu-ni níñí-dě cúú ñáyíu ndècu ñicaxico ñuyíú. Te diu-ni mee Yá Ndiòxí ní xáhaⁿ-gă nchaa núú cùndécú-yu, te mee-gă ní càháⁿ-gá ná daha cuía cudíi nchaa nàcióⁿ ndihi mèé-yu. ²⁷ Te cuíní-gá sá ncháá ñáyíu nanducu ñàhá-yu càháⁿ ndihi ñàhá-yu xii-gá, te mee-gă ndécú túha-gá sá càháⁿ ndihi ñàha-gă xii-yu ìⁿ ìⁿ-yu. ²⁸ Te diu-ni Yá Ndiòxí xító ñàha-gá xii-yu núu cùdíi-yu ndécú-yu te càndá-yu. Te duha ní càháⁿ ìⁿ ñaní tnàhá-ndó, téé ní cutnùní iní-xi ní xíndecu ndéé sanaha, te ní xáhaⁿ-dě xii-yu: “Nchaa-o cùu-o déhe Yá Ndiòxí”, duha ní xáhaⁿ-dě xii-yu. ²⁹ Te núu déhe Yá Ndiòxí cúú-yu ncháá-yu, te vá cúú cǎháⁿ-yu sá Yá Ndiòxí cúú sǎ ñí cadúha-yu ndahá-yu. Te sá ñí cadúha-yu cùu ndiòxí-yu-áⁿ, dava cùu-xi díhúⁿ cuàáⁿ, dava cùu-xi díhúⁿ cuixíⁿ,

dava cùu-xi yúú. Te mèé-yu ní cahu iní-yu nàcuáa cunduu sá cúú ndiöxí-yu. ³⁰ Te cútnàhá ñá túú ní cùtnuní iní-yu sá nèhé ní quidé-yu ní cadúha-yu nchaa xǎⁿ, te ñá túú ní quide cuendá Yǎ Ndiöxí sá dúcáⁿ ñí quidé-yu. Te vitna càchí Yǎ Ndiöxí sá dáñá nchaa ndi túhú-yu nchaa sá cuèhé sá dúhá quidé-yu. ³¹ Te Yá Ndiöxí nánhá-gǎ ná nduu cùndecu nchaa ñáyiu núú-gǎ, te mee-gǎ sa nàha-gǎ ndëndida càa ñáyiu ní quide váha, te ndëndida càa ñáyiu ñá túú ní quide váha. Te mee-gǎ ní xáhaⁿ-gǎ xii Déhe-gǎ Yaá nání Jèsús cúñaha-gǎ xií-yu núu ndëndida càa-yu ní quide váha te ndëndida càa-yu ñá túú ní quide váha. Te mee Jèsús cáháⁿ ndáá cuiti-gǎ, te sa nàha-o sá ncháá xǎⁿ cada Jèsús, chi ñiu cuendá-áⁿ ñí dándótó ñàha Yá Ndiöxí xii-gǎ — càchí té Pǎblú xǎhaⁿ-dǎ xií-yu.

³² Te òré ní cáháⁿ té Pǎblú sá ñí ndoto Jèsús, te dava ñáyiu ñá ní tnàhá iní-xi tnúhu ní cáháⁿ-dé ní cáháⁿ yíchí-yu. Te davá-yu ní xáhǎⁿ-yu xii-dé:

—Te ingá xito quixi-n, te cáháⁿ tucu-n tnúhu ní cáháⁿ-n vitna —cachí-yu xáhǎⁿ-yu xii-dé.

³³ Te ní xica-dé cuáháⁿ-dé. ³⁴ Te dava ñáyiu ní xíndedóho tnúhu ní cáháⁿ té Pǎblú ní sándáá iní-yu Jèsús, te ní chindee tnúhu ñàhá-yu xii-dé. Te ñⁿ té cùchiuⁿ Areópagú nání-dǎ Nǐxú ndihi ñⁿ ñadìhí nání-áⁿ Dǎmarís, tnàhá-yu ní sándáá iní-yu tnúhu-gǎ ndihi dava-gǎ-yu.

18

Té Pǎblú ndécú-dǎ ñuú Còrintú

¹ Te té Pǎblú ní quee-dé ñuú Àtenás cuáháⁿ-dé ñuú Còrintú. ² Te yàcáⁿ ní naníhí tnàhá-dǎ ndihi

ɿⁿ té israhél nání-dě Àquilú, te té-áⁿ cúú-dě té distritú Pòntó, te ní xíndecu-dé ndihí ñadìhí-dé tá Priscilá ñuú Rómá. Te té Cèsár té yíndaha cuéhé nàcióⁿ, té nàni Claudiú ní xáhaⁿ-dě sá vǎ cúú-gǎ cundecu ñáyíu israhél ñuú Rómá, te xǎⁿ núu ní ndee té Àquilú ndihí ñadìhí-dé cuáháⁿ-yu ñuú Còrintú. Te sácú-ni nduu ní cuu sá nǐ quexió-yu ñuú-áⁿ, te ní sáháⁿ té Pǎblú ní ndatnúhu ndihí ñaha-dě xii-yu vehé-yu. ³ Te ní xáhǎⁿ-yu sá cùndècu-dé cada chiuⁿ ndihí ñahá-yu, chi ɿⁿ-ni chiuⁿ quide-dé ndihí-yu, te ní xóo dacáá-yu vehe dóó. Te núu xǎⁿ ní xíndecu ndihí ñaha tǎ Pǎblú ní quide chiuⁿ ndihí ñaha-dé xii-yu. ⁴ Te núú ùná núú ùná nduu, nduu ndètátú-yu, ní xóo quíhíⁿ-dé veñúhu ñáyíu israhél. Te ní ndatnúhu-dé ndihí ñáyíu israhél ndihí ñáyíu ñá túú cùu ñáyíu israhél, te ní xáhaⁿ-dě sá quíndáá iní-yu tnúhu Jèsús.

⁵ Te té Silás ndihí té Timùteú ní quee-güedé distritú Macèdoniá cuáháⁿ-güedé núú ndécú tǎ Pǎblú. Te òré ní quexió-güedé, te ní cáháⁿ-ni té Pǎblú tnúhu Yá Ndiǒxí núú ñáyíu israhél, te xáhaⁿ-dě xii-yu sá Jèsús cúú-gǎ Crìstú Yaá ní tendaha Yǎ Ndiǒxí ní quixi ñuyíú-a. ⁶ Te sá dúcáⁿ nǐ cáháⁿ-dé núu ní nàá ndihí ñahá-yu xii-dé, te ní cáháⁿ cuèhé-yu cuèndá-dé, núu xǎⁿ ní naquidi-dé dóó-dě. Te ducaⁿ nǐ quide-dé cuèndá sá cútnùní iní-yu sá ñǎ ní tnàhá iní-dé nàcuáa ní cáháⁿ-yu, te ní xáhaⁿ-dě xii-yu:

—Yúhú ñá túú cuèchi-í, te núu ní xíta nihnu-ndo, xǎⁿ quèndóo cuèchi mee-nǎ-ndó. Te vitna quíhíⁿ-í cáháⁿ ndihí-í ñáyíu ñá túú cùu ñáyíu israhél, te vǎ nándùcu-gá-í nchòhó ñáyíu israhél cáháⁿ ndihí ñaha-í xii-ndo —càchí-dé xáhaⁿ-dě xii-yu.

⁷ Te ní xica-dé cuáháⁿ-dé vehe ñⁿ téé nàni Justú, te téé-áⁿ ndécú yàtni-dé núú cáá veñúhu, te tnàhá-dé càháⁿ ndihi-dé Yă Ndiöxí. ⁸ Te té Crispú téé yìndaha veñúhu-áⁿ ñí sándáá iní-dé Jèsús ndihi ñadìhí-dé ndihi landú-dé. Te vại ñáyiú ñuú Còrintú ní sáháⁿ-yu ní xíndedóho-yu tnúhu-gá, te ní sándáá iní ñáhă-yu xii-gá, te ní sanduté-yu. ⁹ Te ñⁿ niú ní cáháⁿ saní té Păblú sá ñí xáhaⁿ Yă Ndiöxí xii-dé:

—Cáháⁿ-ni-n tnúhu-í, te vá yùhú-n nchàa tnúhu cuèhé tnúhu duha càháⁿ ñáyiú, ¹⁰ chi yúhú chindee ñàha-í xii-n, te vá yôo ñⁿ cada úhú ñáhá xii-n, te vại-gá ñáyiú ñuú-áⁿ quìndáá iní-yu tnúhu-í — càchí-gá xáhaⁿ-gă núú sàní-dé.

¹¹ Te ñuú Còrintú ní xíndecu té Păblú ñⁿ cuíá dava, te mee-ni tnúhu Yă Ndiöxí ní xóo dacuàha-dé ñáyiú.

¹² Te ndècu-gá-dé ñuú-áⁿ ñí ngóo té Gàlìon chiuⁿ taxi tnuní-dé distrítú Acáyá. Te dàvá-áⁿ ñí cudééⁿ ñáyiú isràél núú tē Păblú, te ní tñi ñàhá-yu xii-dé ndécá ñàhá-yu cuáháⁿ núú cuè téé cùchiuⁿ. ¹³ Te ní xáhă-yu xii té Gàlìon téé cùu gobiernú:

—Tée-a ní quexìo-dé ñuú-ó xica cuu-dé te cuiní-dé dandàhú ñáhá-dě chitnahá-ndí-dé cada-ndí nàcuáa quide-dé quidé càhnu-dé Ndiöxí-dě, te dañá-ndí vá cádá-gă-ndí nàcuáa càháⁿ tnúhu sá sánú ìchi ñàha xii-o nacuáa cundecu-o cuiní-dé —càchí-yu xăhăⁿ-yu xii téé cùu gobiernú.

¹⁴ Te té Păblú cuiní-dé cani-dé cuèndú ní cùu, te ní ngùita té Gàlìon càháⁿ-dé, te xáhaⁿ-dě xií-yu:

—Nchòhó ñáyiú isràél, cundedóho-ndo tnúhu na càháⁿ-í-a. Te núu ndècu núú ñⁿ cuéchi ní quide-dé àdi ní sahani-dé ñⁿ ndíyi, te cuu cundáá-xi ìha, te cáháⁿ-ndó ñuú nándi cùu sá ñí quide-dé,

15 àdi dico-ni sá ííⁿ tnũhu ní cáháⁿ-dé, te yáchí-gá chí cuáháⁿ yàcáⁿ ndatnúhu-ndo nũú méé-ndó, chi mee-ni sá ñà túú quide-dé nàcuáa càháⁿ tnũhu sá sánú ìchi ñaha xii-ndo caháⁿ-ndó, te yúhú ñá túú tnàhá iní-í cada ndáá-í nchaa xíăⁿ —càchí-dé xáhaⁿ-dě.

16 Te ní cudééⁿ-dě, te ní ndeñuhu ñaha-dě xii-yu vechi^u. 17 Te ñáyiu ñá túú cùu ñáyiu isràél ní tñi^u-yu té Sòstenés té yìndaha veñúhu ñáyiu isràél, te ndèhe té Gàlìón té cùu gobiernú ní canìhá-yu xii-dé, dico ñá túú tnàhí ná tnũhu ní cãháⁿ-dé taunihnu-dé té ní caní-yu-áⁿ.

Té Păblú cuáháⁿ tucu-dé ñuú Antiòquiá, te yàcáⁿ ní xica tucu-dé cuáháⁿ-dé dava-gá ñuú càháⁿ-dé tnũhu Yá Ndiôxí

18 Te titní-gá nduu ní xindecu té Păblú ñuú Còrintú, te ní quide ndee iní-dé nchaa ñáyiu ní sándáá iní-xi tnũhu Jèsús, te ní tñi^u-dé ìchi cuáháⁿ-dé distritú Sìriá ndihí té Àquilú ndihí ñadìhí té Àquilú-áⁿ tă Priscilá, te ní quexiô-yu ñuú Cèncreá. Te cùmání-gă tñi^u-yu ìchi quíhíⁿ-yu ñuú Éfesú, te ní dèté díquí tẽ Păblú, chi ducaⁿ ñi xáhaⁿ-dě xii Yá Ndiôxí sá ndéé xínu ìⁿ chiuⁿ ní sani iní-dé cada-dé cuendá-gá, te dătnùní dèté-dé. Te ní quée-yu bàrcú cuáháⁿ-yu. 19 Te ní quexiô-yu ñuú Éfesú, te yàcáⁿ ní xáhaⁿ tẽ Păblú sá cùndecu té Àquilú ndihí ñadìhí-dé, te mee-dě quíhíⁿ-dé dava-gá ñuú. Te cùmání-gă caca-dé quíhíⁿ-dé, te ní sáháⁿ-dé veñúhu ñáyiu isràél ní ndatnúhu ndihí ñaha-dě xii-yu. 20 Te ní xáhăⁿ-yu sá cùndecu-dé titní nduu, te ñá ní cuìní-dé cundecu-dé. 21 Te ní xáhaⁿ-dě:

—Núhú-í chi dacuítí xìní ñuhu-xi cundecu-í vico coo ñuú Jerusàlén, te quixi tucu-í te núu Ndiöxí ná càchí-gá, te vitna chí cáda ndèe iní —càchí-dé xáhaⁿ-dè xií-yu.

Te ní quée-dé bàrcú cuáháⁿ-dé. ²² Te ní quexìo-dé ñuú Cèsareá, te ní quene-dé bàrcú, te ní xica-dé cuánuhú-dé ñuú Jerusàlén, te ní ndexìo-dé, te ní dándácõ vâha-dé ñáyu ndècu ichi Yá Ndiöxí, te dătnùní ní xica-dé cuáháⁿ-dé ñuú Antiòquiá. ²³ Te yacáⁿ ní xíndecu-dé titní nduu, te dătnùní ní tñi-dé ichi cuáháⁿ-dé. Te ní sáháⁿ-dé ñihí distritú Gàlaciá ñihí distritú Frìgiá. Te ñi tnahá ñuú ní sáháⁿ-dé ní cáháⁿ-dé ñihí ñáyu sàndáá iní tnúhu Yá Ndiöxí, te ní ndúcú ndée-gă-yu ní quidé-yu nchaa nàcuáa ní xáhaⁿ-dè cadá-yu.

Té Àpolós càháⁿ-dé tnúhu Yá Ndiöxí ñuú Éfesú

²⁴ Te dàvá-áⁿ ñi quèxio ñiⁿ tée isràél ñuú Éfesú, te nani-dé Àpolós, te cùu-dé téé ñuú Alejándriá, te ío vâha túha-dé tnúhu Yá Ndiöxí, te ío vâha ñuhu díquí-dè nàcuáa cáháⁿ-dé, ²⁵ chi sa xìní-dé nàcuáa ní xóo cáháⁿ ñi Juáá cútnáhá ní xóo dacuàndute ñi ñáyu. Te ío ní cudíⁿ iní-dé ní cáháⁿ-dé nchaa nàcuáa ní cuu cuendá Jèsús, dico vátá dăcuàha-gá-dé nchaa tnúhu ní cáháⁿ méé Jèsús. ²⁶ Te ní sáháⁿ-dé veñúhu ñáyu isràél, te yacáⁿ ní cáháⁿ-dé ñi yùhu ñi iní-dé. Te ndècu té Àquilú ñihí ñadihí-dé tá Priscilá ndedóho-yu tnúhu ní cáháⁿ-dé, te ní xáhă-yu sá quihíⁿ-dé vehé-yu, te ní sáháⁿ-dé, te ní xitnùhu ñahá-yu xii-dé dăva-gá tnúhu Yá Ndiöxí sá ña túu xìní-dé. ²⁷ Te ní cachí té Àpolós sá quihíⁿ-dé distritú Acăyá, núu xiăⁿ ní cadúha ñáyu ñuú Éfesú

ĩⁿ tutú canehe-dé quíhíⁿ ndaha ñáyiú sàndáá iní tnúhu-gá xĩndecu Acăyá. Te xăhăⁿ-yu núú tûtú-yu: “Cáháⁿ váha-ndo ndĩhi té Àpolós nũu ní quexìo-dé”, cächí-yu xăhăⁿ-yu núú tûtú-yu. Te ní xica-dé cuáháⁿ-dé, te ní quexìo-dé Acăyá. Te nchaa ñáyiú sàndáá iní tnúhu-gá yàcáⁿ, diu-ni mee Yă Ndiõxí ní chindee ñàha-gá ní sàndáá iní ñáhă-yu xii-gá. Te té Àpolós ío váha ní cáháⁿ-dé tnúhu Yă Ndiõxí núũ-yu, te xiăⁿ ío ní ndúcú ndée-gă-yu ní quidé-yu chĩuⁿ-gá. ²⁸ Te té Àpolós ní ndatnúhu-dé ndĩhi ñáyiú isrâél, te ní xĩndedóho dava-gă-yu. Te ío váha ní cani-dé cuendú nchaa năcuăa ní xóo cáháⁿ cue téé ndée sanaha să quíxí Crístú ñuyíú-a. Te ní cáháⁿ ndáá-dé ní xáhaⁿ-dě sá díú-ní Jèsús cúú-gă Crístú Yaá ní tendaha Yă Ndiõxí ní quixi ñuyíú-a. Te ñáyiú isrâél xĩndatnúhu-yu sá ñă ndáa năcuăa cáháⁿ-dé, dico ñá ní ñĩhĩ-yu tnúhu cúñháhă-yu xii-dé, chi ío váha ñũhu díquí-dě tnúhu cáháⁿ-dé.

19

Té Păblú ndécú-dě ñuú Éfesú

¹ Te cútnàhá ndécú-gă té Àpolós ñuú Còrintú, te ní xica té Păblú cuáháⁿ-dé tá yăha-dé mee-ni xitĩ yucu cuáháⁿ, te ní sáá-dé ndée ñuú Éfesú. Te ñuú-áⁿ ñĩ naníhí tnáhă-dě ndĩhi cue téé sàndáá iní tnúhu Jèsús. ² Te ní xícáⁿ tnúhú-dé núú-güedě, te xăhaⁿ-dě:

—¿Sa ní quexìo Espíritú Yă Ndiõxí ní ngũndecu ndĩhi-ndo ndée òré ní sàndáá iní-ndó Jèsús-ăⁿ? — cächí-dé xăhaⁿ-dě xii-güedě.

Te ní xáhaⁿ-güedě:

—Ñá túú xìní-ndí sá ìò Espíritú Yă Ndiöxí —
càchí-güedé xăhaⁿ-güedě xii-dé.

³ Te ní xăhaⁿ tùcu-dé:

—¿Nása ní cáháⁿ tée ní dăcuándùte ñaha xii-ndo-i?
—cachí-dé xăhaⁿ-dě xii-güedé.

Te ní xăhaⁿ-güedě:

—Ní cáháⁿ-dé năcuăa ní xóo cáháⁿ ndí Juăa —
càchí-güedé xăhaⁿ-güedě xii-dé.

⁴ Te ní xăhaⁿ tē Păblú:

—Ndí Juăa ní dăcuándùte ñaha ndí xii ñáyíu,
chi ní cuíní-yu sá dáñă-yu nchaa sá cuèhé sá dúhá
quidé-yu. Te ní xăhaⁿ ndí xii-yu: “Quindăá iní-ndó
tnúhu Jèsús chi dacuití quixi-gá ìⁿ nduu”, duha
ní xăhaⁿ ndí Juăa xii-yu —càchí té Păblú xăhaⁿ-dě
xii-güedé.

⁵ Te sá dúcáⁿ nî cáháⁿ té Păblú xăhaⁿ-dě xii-güedé,
núu xiăⁿ ní sandute-güedé năcuăa ní dándöo tnúhu
Jèsús. ⁶ Te ní sacáⁿ ndodo té Păblú ndahá-dé
díquí-güedě, te òré-ni ní quexìo Espíritú Yă Ndiöxí
ní ngúndecu ndíhi-güedé, te ní ngüíta-güedé ní
cáháⁿ-güedé tnúhu sá dăcàhu iní ñáhá Espíritú-gá,
tnúhu sá ñà túú xìní-güedé cáháⁿ-güedé, te ní
cáháⁿ-güedé tnúhu Yă Ndiöxí năcuăa ní dăcáhu ìnî
ñáhá Espíritú-gá xii-güedé. ⁷ Te cùu datná úxúú
tnàhá-güedé.

⁸ Te té Păblú ní sáháⁿ-dé veñúhu ñáyíu isràél
ní cáháⁿ ndíhi-dé-yu, te úní yóo nî xínu ní xica
cuu-dé veñúhu-yu. Te ío váha ñúhu díquí-dě tnúhu
cáháⁿ-dé, núu xiăⁿ ní cuyî-dě ní cáháⁿ-dé, te ní
xăhaⁿ-dě sá quindăá iní-yu tnúhu Jèsús, te ducaⁿ te
ndíhu ndaha ñàha Yă Ndiöxí xii-yu. ⁹ Te davá-yu
ío sàá iní-yu ñà ní cuíní-yu quindăá iní-yu, te

ío ní cáháⁿ cuèhé-yu cuèndá Jèsús xití veñúhu núú dàva-gá-yu. Te té Păblú ní ndee-dé veñúhu cuáháⁿ-dé ndihí ñáyiú sàndáá iní tnúhu Jèsús. Te ñⁿ nduu ñⁿ nduu ní sáháⁿ-dé scuèlá té Tiranú ní dăcuáhá ñàha-dé xii-yu. ¹⁰ Te úú cuíá ducaⁿ ní sáháⁿ-dé scuèlá ní dăcuáhá-dě ñáyiú. Te nchaa ñáyiú isràél ñáyiú ndècu nihií distrítú Àsiá ndihí nchaa ñáyiú ñá túú cùu ñáyiú isràél ní xíndedóho-yu tnúhu Jèsús. ¹¹ Te té Păblú ío ní chindee ñàha Yá Ndióxi xii-dé ní quide-dé vâi núú sã vã yôo tnàhí ndàcu cada. ¹² Te pàñú díquí-dě ndihí dóó cándèé núú yíquí-dě ní xícáⁿ-yu nèhé-yu ní sáháⁿ núú ndécú ñáyiú cùhú, te xiăⁿ ní tñi ñáyiú cùhú ndihí ñáyiú yìhi ñàha espíritú cùndihí yucu ñávãha, te ní ndúha-yu.

¹³ Te ñuú Isràél véxi cue tée tatna xica cuu-güedé quidé tătna-güedé ñáyiú yìhi ñàha espíritú cùndihí yucu ñávãha. Te ní ngüíta-güedé ní cacu nèhe-güedé Jèsús cuèndá quee espíritú-áⁿ yiqui cùñú-yu, te ní xáhaⁿ-güedě:

—Xocuñí-n, chi càchí Jèsús sá vã cùndècu ndihí-gá-n tée-a. Te diu-ni Jèsús cácu nèhe té Păblú òré càháⁿ-dé tnúhu-gá —càchí-güedé xáhaⁿ-güedě xii espíritú-áⁿ.

¹⁴ Te úsá tnàhá-güedé ducaⁿ ní xóo cada-güedé. Te tătá-güedě ní xínani-dě Èsevá, te tée-áⁿ ní cuu-dé dútú cùnùu. ¹⁵ Te sá dúcáⁿ ní cáháⁿ-güedé, te ní xáhaⁿ espíritú cùndihí yucu ñávãha-áⁿ xii-güedé:

—¿Te ná cúú nchòhó nñu dayùhú ñáhá-ndó? Te xìní-í Jèsús, te xìní-í yoo cùu té Păblú, te nchòhó ñá

túú xìní ñàhà-í xii-ndo —càchí espíritú-án xăhaⁿ-xi xii-güedé.

¹⁶ Te téé yîhi ñaha espíritú cündîhi yucu ñávăha-án nî ndanchita-dé ní tnî-dé cue téé quide tátna-án, te ní ndîhi dóó-güedé ní ndátá-dě, te ní dánîcuèhé ñáhá-dě xii-güedé, te ní xinu-güedé cuáhán-güedé.

¹⁷ Te nchaa ñáyîu isrâél ndécú ñùú Êfesú ndîhi dava-gá ñáyîu ndècu diu-ni ñuú-án nî níhî-yu tnúhu nàcuáa ní cuu, te ío ní yùhú-yu, te vâi-yu ní cachí sá ïo càhnu cuu Xítohó Jesucrîstú.

¹⁸ Te dava ñáyîu ní sándáá iní-xi tnúhu Jèsús ní sáhán-yu núú ndécú tē Păblú, ndîhi núú ndécú nchaa ñáyîu ní sándáá iní tnúhu-gá ní náhmá-yu nàcuáa ní xóo cada-yu. ¹⁹ Te titní ñáyîu ni xóo cada ndùu nehé-yu tutú-yu ní sáhán núú ndécú nchaa ñáyîu sándáá iní-xi tnúhu-gá, te yâcáⁿ ní ndada cuendá-yu sá ïo yahu ní sáha-yu tutú-yu, chi ndéé údico úxí mîl díhúⁿ cuixíⁿ ní sáha-yu núú ncháá. Te nchaá-yu ní sahmí-yu tutú-yu. ²⁰ Te sátá nî cáyú nchaa tutú-án, te vâi-gá ñáyîu ní tuhá-yu ichi Yá Ndiôxí, te ní sáha-yu cuendá sá ïo xìni ñuhu tnúhu Yá Ndiôxí.

²¹ Te ní cachí té Păblú sá quîhîⁿ-dé distrítú Macèdoniá ndîhi distrítú Acăyá, te dătnûní núhú-dé ñuú Jerusálén, te ducaⁿ te dătnûní quîhîⁿ-dé ñuú Rómá. ²² Te ndècu ndîhi-dé té Timûteú ndîhi té Êrastú cue téé chîndee ñaha xii-dé. Te té Păblú ní xáhaⁿ-dě xii-güedé sá códó nùu-güedé quîhîⁿ Macèdoniá, te ní xica-güedé cuáhán-güedé, te mee-dě ní quendóo-dé.

Ñáyîu Êfesú ío dusaⁿ quidé-yu ñuú-yu

23 Te dàvá-án ìo ní cudéěⁿ-yu núú nchàa ñáyiú ní tuha ichi Yá Ndiöxí. 24 Te ìⁿ téé ñuú Éfesú nání-dě Demètriú. Te téé-án ñí xóo canehe chiúⁿ-dé mee-ni díhúⁿ cuìxíⁿ ní xóo cadúha-dé veñúhu lìhli, dàtná cuìní-ndó càa veñúhu Diàná sá cúú ndiöxí-yu. Te vài díhúⁿ ñí xóo níhí-dě ndihí cue téé ní xóo cada chiúⁿ ndihí-dé. 25 Te ní cana-dé cue téé quide chiúⁿ ndihí-dé, ndihí nchaa cue téé quide chiúⁿ ndihí díhúⁿ cuìxíⁿ, te ní xáhaⁿ-dě xii-güedé:

—Nàha-ndo sá ìo váha ñihí-ó díhúⁿ cuèndá chiúⁿ quide-o. 26 Te nàha-ndo sá càchí té Păblú sá ñà díú ndiöxí cúú sǎ ñí cadúha ñáyiú ñuyíú-a. Te ducaⁿ càháⁿ-dé ñuú-ó, te ducaⁿ-ni càháⁿ-dé ñihí distritú Àsiá, te ío-gá vài ñáyiú sàndáá iní tnúhu càháⁿ-dé. 27 Te ío úhú ñuú na cuíta chiúⁿ quide-o, vá yóo-gá cuaaⁿ sá cadúha-o. Te nguíta-yu cáháⁿ-yu sá veñúhu Diàná ñá túú càváha, te vá cadá càhnu-gá-yu sàndú-ó. Te nàha-ndo sá ìo càhnu cuu Dianá, chi nchaa ñáyiú distritú Àsiá quidé càhnu ñahá-yu ndihí ñáyiú xĩndecu ñí càa xico ñuyíú — càchí té Demètriú xáhaⁿ-dě xii-güedé.

28 Te sá dúcáⁿ ñí cáháⁿ té Demètriú, xǎⁿ ní cudéěⁿ-güedé núú té Păblú, te uuⁿni ní cuáá-güedé te càchí-güedé:

—Ío càhnu cuu Dianá sàndú ñáyiú Éfesú! — càchí-güedé.

29 Te nchaa ñáyiú ñuú Éfesú ndí coyo ndi coyo-yu xícáháⁿ-yu. Te tnàhá úú cue téé distritú Macèdoniá xícá cùu-güedé ndihí té Păblú, ìⁿ-dé nání-dě Găyú, te ìⁿ-dé nání-dě Aristarcú. Te ní tnì-güedé úú cue téé-án, te cuánguihu coyo ndihí ñaha-güedé vehe núú quidé-güedé jùndá. 30 Te té Păblú cuìní-dé

quíhu-dé tnàhá-dé vehe-áⁿ cǎháⁿ ndihí ñaha-dě ní cùu, te ñá ní dàña cue téé ní sándáá iní tnúhu-gá.

³¹ Te ñⁿ úú cue téé cùn^{uu} distritú Àsiá ní cǎháⁿ váha-güedé cuendá té Pǎblú, te ní xáhaⁿ-güedě xii ñⁿ téé xínu cuechi núú-güedě ní sáháⁿ-dé ní xáhaⁿ-dě xii té Pǎblú sá vǎ quíhu-dé vehe núú quidé-güedě jündá. ³² Te uuⁿⁱ ní cuáá-yu nchaá-yu, te ñá ñⁿ-ní tnúhu ni cǎháⁿ-yu, chi ndi dííⁿ tnúhu ní cǎháⁿ-yu ñⁿ ñⁿ-yu. Te chitu-gǎ ñáyiú ñá ní cùtnuní iní-yu ná cuendá ní dátacá ñáhá-güedě xití vehe-áⁿ, chi ñá ñⁿ-ní tnúhu ni cǎháⁿ-yu. ³³ Te davá-yu ní cǎháⁿ-yu sá cuéchi té Lijandrú cúú-xí, chi ní xáhaⁿ ñáyiú israél xii-dé sá cǎháⁿ-dé yuhú-yu chindee tnúhu ñaha-dě xií-yu. Te ní quide-dé ndaha-dé núú-yu sá cündedóho-yu tnúhu cǎháⁿ-dé chindee tnúhu ñaha-dě xií-yu yòtnúhu. ³⁴ Te ní cutnùní iní-yu sá tée israél cúú-dě, te uuⁿⁱ ní cuáá tucú-yu, ñá ní dàña-yu cǎháⁿ-dé, te cǎchí-yu:

—Ílo cùn^{uu} Dianá sándú ñuú Éfesú! —cǎchí-yu. Te dàtná úú òré ñⁿ-ní tnúhu ní cǎháⁿ-yu.

³⁵ Te téé cùu secretariú-ni-gá ní cǎháⁿ-dé, te dǎtnùní cuée cuée ní sadí-yu yuhú-yu. Te ní xáhaⁿ-dě xií-yu:

—Nchaa-ndo cündedóho-ndo ñⁿ tnúhu na cǎháⁿ-í-a. Ílo cùn^{uu} Dianá, te nchaandi túhú ñáyiú sa nàhá-yu sá ncháá-ó ío nèhe cuendá-ó venúhu-áⁿ. Te nàhá-yu sá néhé cuendá-ó sándú-áⁿ, chi véxi cuuⁿ-gá andiú. ³⁶ Te vá yóo ñⁿ cǎchí sá ñá ndàá. Te coto-ndo mée-ndo, te vá cuídó-ndó càda-ndo, te vá cuídó-ndó cǎháⁿ-ndó. ³⁷ Te ná cuendá ndécá-ndó cuè téé-áⁿ vèxi, te ñá túú nǎ ní

quìde-güedé, te ñá túú nă ní dùhu-güedé veñúhu, te ñá túú càháⁿ cuèhé-güedé cuendá Diàná. ³⁸ Te núu ío yoo nàá ndihí ñaha xì té Demètriú ndihí cue téé quìde chiuⁿ ndihí-dé, te quíhíⁿ-güedé cacáⁿ cuéchi-güedé núú cuè téé cùchiuⁿ. Te cue téé cùchiuⁿ na cundoho-güedé núu quehndé-güedé cuéchi-yu àdi ñáhá. ³⁹ Àdi ío-gá ná cuendú ñúhú ìní-ndó, te càháⁿ-ndó òré ná cóo jundá. ⁴⁰ Te ío úhú núu na nihí téé tàxi tnuní ñáhá xì-o tnúhu sá dúhá ïo quìde dusaⁿ-o, te cachí-dé sá ndècuéchi-o chi ñá túú sàndáá ìní-ó-dě quesaha-dě. Te ñá túú tnàhí ndùu váha-xi sá dúhá càda-o ni cuu, te vitna duha ní quide-o, te ñá cùtnùní ìní-ó năsa cúñaha-o xì téé tàxi tnuní ñáhá xì-o núu na càna ñaha-dé —càchí téé cùu secretariú xăhaⁿ-dě xií-yu.

⁴¹ Te ní xăhaⁿ-dě sá nùhú-yu te ní ndihí-yu cuánuhú.

20

Té Păblú cuáháⁿ-dé distrítú Macèdoniá ndihí distrítú Grèciá

¹ Te òré ñá túú-gă ní quìde dusaⁿ-yu, te ní cana ñaha tẽ Păblú xii nchaa ñáyiu sàndáá ìní tnúhu Jèsús ní càháⁿ-dé dóho-yu năcuáa cadá-yu. Te ní quide ndee ìní ñáhá-dě xií-yu, te ní tnî-dé ichi cuáháⁿ-dé distrítú Macèdoniá. ² Te tayăha-dé cuáháⁿ ìn ìn ñúú yíndèhu Macedoniá. Te càháⁿ-dé dóho nchaa ñáyiu sàndáá ìní tnúhu Jèsús năcuáa cadá-yu, te ní cudíí ìní-yu cadá-yu năcuáa càháⁿ Yă Ndiõxí cadá-yu sá dúcáⁿ nĩ càháⁿ-dé dóho-yu. Té ní quexiò-dé distrítú Grèciá. ³ Te xiáⁿ nĩ xíndecu-dé úní yóó. Te xiáⁿ quëe-dé bàrcú quíhíⁿ-dé distrítú Sîriá ní

cùu, te ní níhí-dě tnúhu sá ndétú ñàha ìⁿ úú cue téé israhél cahni ñàha-güedě xii-dé ní cùu, núu xiáⁿ ní tní-dé ichi cuáháⁿ-dé ní yáha-dé ichi distritú Macèdoniá. ⁴ Te cuáháⁿ ndihí-dé té Sopàtér téé ñuú Bèréá, ndihí té Aristarcú, ndihí ìⁿ téé nàni Segundú. Te ndi ndùú cue téé-áⁿ cúú-güedě cue téé ñuú Tesalónica. Te tnàhá té Gáyú téé ñuú Dèrbé, ndihí té Timùteú cuáháⁿ ndihí-dé, te tnàhá té Tiquicú ndihí té Trõfimú cuáháⁿ ndihí-dé, te úú cue téé-áⁿ cúú-güedě cue téé distritú Àsiá. Te nchaa cue téé-áⁿ cuáháⁿ ndihí-güedě té Păblú. ⁵⁻⁶ Te ní quexìo-güedě ñuú Fìlipú, te yàcáⁿ ní naníhí ñàhá-güedě xii-ndí. Te té Păblú ní tendaha-dě cue téé ndihí-dé cuáháⁿ-güedě ñuú Tròás, te ní xáhaⁿ-dě sá díú-ní yàcáⁿ cundetu ñàha-güedě xii-ndí. Te ní ndóo-í ndihí-dé, te ní xíndecu-ndí vico xèxí-yu pàá sá ñà túú yìhi levadurá. Te sátá ñí yáha vico, te ní quée-ndí bàrcú cuáháⁿ-ndí, te ní xúhuⁿ-ndí ichi úhúⁿ nduu, te ní quexìo-ndí ñuú-áⁿ. Te yàcáⁿ ní naníhí tnàhá-ndí ndihí cue téé yòdo nuu cuáháⁿ ní xíndecu-ndí úsá nduu.

Té Păblú cuáháⁿ ngándihí-dé ñáyíu ñuú Tròás

⁷ Te ìⁿ nduu ndumìngú ní naníhí tnàhá-ndí ndihí nchaa ñáyíu ní sándáá iní-xi tnúhu Jèsús ní xexi-ndí pàá ndihí-yu. Te ducaⁿ ñí quide-ndí, chi ní cachí Jèsús sá dúcáⁿ càda-o cuendá sá vǎ nácuànaa-o sá ñí xíhí-gá cuendá naníhí tàhú-ó. Te té Păblú ní ngúíta-dé càháⁿ-dé tnúhu-gá, te càháⁿ-dé ní cuu dava niú, chi cuendá ná tũndaá ingá nduu-áⁿ, te caca-dé quíhíⁿ-dé ingá xichi. ⁸ Te ndècú-yu vehe

yòdo tnaha, te yìhí-yu ndéé cuàrtú cúú ùní núú nñnu, te càyú víhí ñùhú xití cuàrtú-áⁿ. ⁹ Te ìⁿ téé sa ta cùu sacuéhé luha nàni-dé Eùticú núcõo-dé yèhe ventaná, cuìní-dé cúdú-dé, chi ní cunaha vèhi caháⁿ té Păblú, te ní tnî ñaha sàní xii-dé ní xídí-dé, te ní ngava-dé ndéé ñuhu. Te ní nuú-yu núú ñùhú cuendá ndacani ñàhá-yu, te sa ní xíhí-dé, chi ío dùcúⁿ ní ngava-dé. ¹⁰ Te tnàhá té Păblú nchícúⁿ-dé ní nuu. Te ní quexìo cunu-dé núú cáttu téé ní xíhí-áⁿ, te ní numi ñaha-ni-dě, te ní xáhaⁿ-dě xií-yu:

—Vá ndìhú iní-ndó, chi ní ndoto-dé —càchí-dé xăhaⁿ-dě xií-yu.

¹¹ Te dătnùní cuándaa ndihî ñaha tùcu-dé xií-yu cuàrtú núú yíhî-yu ni cùu, te yàcáⁿ ní xexi ndihî ñaha-dě xií-yu, dătnùní ní ngüíta-dé vâi-gá tnúhu ní cáháⁿ-dé, te càháⁿ-ni-dé ní túndaá, te dătnùní ní xica-dé cuáháⁿ-dé. ¹² Te téé ní ngava-áⁿ ní sánúndeca ñàhá-yu xii-dé ndéé vehe-dé, te ío ní cudîí iní-yu sá nî ndoto-dé.

Ní quee-güedé ñuú Tròás cuáháⁿ-güedé ñuú Miletú

¹³ Te té Păblú ní cachí-dé sá quîhîⁿ-ndí ndihî bàrcú ndéé ñuú Àsón, te mee-dě caca saha-dě, te yàcáⁿ naníhî tnàhá-ndî ndihî-dé te quée-dé bàrcú, te ní quée-ndí bàrcú cuáháⁿ-ndí. ¹⁴ Te ní naníhî tnàhá-ndî ndihî-dé ñuú Àsón, te yàcáⁿ ní quée-dé bàrcú tnàhá-dé cuáháⁿ-ndí ñuú Mitilené. ¹⁵ Te ní quexìo-ndí ndéé ingá nduu yatni ñuú Quiú, te ndéé nduu tnée ní quexìo-ndí ñuú Sămú te yàcáⁿ ní yáha-ndí, te ní quexìo-ndí ñuú Trògiliú. Te ndéé nduu ìdá ní quexìo-ndí ñuú Miletú. ¹⁶ Te té Păblú ñá

ní cuíní-dé yáha-ndí ñuú Éfesú, chi ñá túú ní tnàhá iní-dé cuyaa-dě ichi, chi ío ndíhi iní-dé cuendá cuíní-dé quíní-dé ñuú vá ndácú-dě ndexìo-dé ñuú Jerusàlén cundecu-dé vico Pentecòstés.

Té Păblú càháⁿ ndíhi-dé cue téé yìndaha ñaha xii ñáyiú sàndáá iní tnúhu Jèsús ñuú Éfesú

¹⁷ Te òré ndécú tē Păblú ñuú Miletú, te ní cana-dé cue téé yìndaha ñaha xii ñáyiú sàndáá iní tnúhu Jèsús ñuú Éfesú sá quíhíⁿ-güedé núú ndécú-dě. ¹⁸ Te sátá ñí quexìo-güedé, te ní xáhaⁿ-dě xii-güedé:

—Nàha-ndo nacuáa ní quide-í ndéé cútnàhá ní quexìo-í distritú Àsiá. ¹⁹ Chi ní quide-í nàcuáa ní càháⁿ Yă Ndiòxí cada-í, ñá túú ní tùhíó-í, te ñá túú ní quide cahnu-í mée-í, te ío ní ndáhyú-í sá quidé dàvá-yu, chi ío sàá iní-yu. Te sa nàha-ndo sá tìtní xito ní cuíní ñáyiú isràél cahni ñàhá-yu xii-í ní cùu, te ío ní ndoho-í ní cácu-í. ²⁰ Te sa nàha-ndo sá ncháándi túhú sa ní cachí tnúhu-í nàcuáa cada-ndo cuendá sá chíndée ñaha Yă Ndiòxí xii-ndo. Te ní càháⁿ-í tnúhu-gá núú-ndó ncháa-ndo, te ñuú-ndi ducaⁿ ñí quixi-í ndi tnahá vehe-ndo ñí càháⁿ-í tnúhu-gá núú-ndó. ²¹ Te ní xáhaⁿ-í xii ñáyiú isràél ndíhi ñáyiú ñá túú cùu ñáyiú isràél sá dáñá-yu nchaa sá cuèhé sá dúhá quidé-yu te quíndáá iní-yu tnúhu Xítohó Jesucrìstú. ²² Te dacuítí quíhíⁿ-í ñuú Jerusàlén, chi Espíritú Yă Ndiòxí ní cachí-xi sá dái quíhíⁿ-í, te ñá túú xìní-í nándi cada ñaha-güedě xii-í yàcáⁿ te núu na quèxio-í. ²³ Te ñí ñí ñuú núú sàháⁿ-í càchí tnúhu Espíritú-gá sá chíhí ñàha-güedé vecaá, te cada úhú ñàhá-güedě. ²⁴ Dico ñá túú tnàhí ná cuu cuèi na càhni ñàha-güedé xii-í, dico cuíní-í sá

dĩ iní dandihí-í nchaa sá nĩ cachí Xítoho Jesucrístú cada-í. Te ní cachí Yă Ndiöxí sá cãháⁿ-í núú ñăyiu sá ïo cùu iní ñáhã-gă xii-yu, te naníhí tãhú-yu núu na quĩndáá iní-yu tnúhu-gá.

²⁵ 'Te sa ní cachí tnúhu-í xii-ndo nchãa-ndo sá núu na quĩndáá iní-ndó Yă Ndiöxí, te ndihu ndaha ñãha-gá xii-ndo. Te na cãchí tnúhu-í sá nĩ ìⁿ nduu-gá vã quĩnĩ ñáhã-ndó xii-í ñuyíú-a. ²⁶⁻²⁷ Te yúhú ñã túú cuẽchi-í núu ïó ñăyiu vã nãnihí tãhú, chi sa ní cachí tnúhu-í nchaa sá nĩ cáháⁿ mée Yă Ndiöxí cada-ndo. ²⁸ Te coto-ndo mée-ndo, te coto-ndo tnãhá ñăyiu sãndáá iní tnúhu-gá, chi Espíritú-gá ní cachí-xi sá cúnũu-ndo núũ-yu dacuãha-ndó-yu tnúhu-gá. Te cada-ndo cuendá sá dàtnã mbée-ndó cùú-yu, te mee-ndo cùu-ndo datná toli xito-ndó-yu ducaⁿ cãda-ndo cuendá, chi nãha-ndo sá Jèsús ní sati níñĩ-gă, te ní xíhí-gá cuendá naníhí tãhú-ó ndihí-yu. ²⁹ Te yúhú sa cùtnunĩ iní-í sá òrẽ ñã túú-gă-í ndécú, te quixi ñăyiu dandãhú ñáhã xii-ndo cuendá dañã-ndo tnũhu Yă Ndiöxí, te cada ñáhã-yu xii-ndo dàtnã quídẽ ñãñã òrẽ tníí-dí mbée. ³⁰ Te ñiu-nĩ ìⁿ úú cue tée ndècu ndihĩ-ndo, cue tée-áⁿ dacuãndehnde-güedé, te cudana davá-yu quĩndáá iní-yu chítñáhã ñáhã-yu xii-güedé. ³¹ Te xĩãⁿ núu cãchí tnúhu-í sá ïo quihĩ iní-ndó cùndecu-ndo ndihĩ nchaa ñăyiu sãndáá iní tnúhu-gá. Te nãha-ndo sã yũhú ní xĩndecu-í únĩ cuíá nĩ cáháⁿ-í tnúhu Jèsús núú ñăyiu cuẽi nduu cuẽi niú. Te áma ní xóo ndáhyú-í, chi ñã ní cuĩnĩ-yu quĩndáá iní-yu nchãá-yu tnúhu ní cáháⁿ-í —cãchí té Pãblú xãhaⁿ-dẽ xii-güedé.

³² Te xãhaⁿ tùcu-dé:

—Nchòhó cue téé ndècu ndihí-í ichi Xítóhó Jesucrístú, ío cuíní-í sá méé Yă Ndiǒxí chindee ñàha-gá xii-ndo. Te mee-gă ní cáháⁿ-gá sá ïo cùdíí ìní ñáhá-gă xii-ndo. Te naníhí tàhú-ndó ndihí nchaa ñáyiú cùu cuendá-gá, te chindee ñàha-gá xii-ndo cuendá cada-ndo nchàa sá càháⁿ-gá. ³³ Te òré ní xíndecu ndihí ñàha-í xii-ndo, te ní dǐhúⁿ ní dǒó ñà túú ní cùdíí ìní-í. ³⁴ Te mee-ndo sà naha-ndo sá yǔhú ní quide chiúⁿ-í, te ní níhí-í nchaa sá nǐ nandíhí-í ndihí cue téé xǐca cuu ndihí-í. ³⁵ Te sa ní xíní-ndó nàcuáa ní quide-í ní quide chiúⁿ-í, te diu-ni ducaⁿ càda chiúⁿ-ndo cuendá chindee-ndo nchàa ñáyiú ndàhú, chi sa nàha-ndo nacuáa ní cachí Xítóhó Jesucrístú, te duha ní cachí-gá: “Cùdíí-gă ìní-ó cuăha-o ñáyiú ndàhú sá xíní ñùhú-yu dàcúúxí sǎ táxǐ-yu xii mee-o”, duha ní cachí-gá —càchí té Pǎblú xàhaⁿ-dě xii-güedé.

³⁶ Te sátá dúcáⁿ nǐ cáháⁿ-dé, te ní ngüíñí xítí-dě ndihí dava-gá-güedé, te ní cáháⁿ ndihí-dé Yă Ndiǒxí. ³⁷ Te sátá nǐ túhú tnúhu ní cáháⁿ-dé ndihí Yă Ndiǒxí, te ní ndáhyú víhí-güedě sá quihíⁿ-dé, te ní numi ñàha-güedě, te ní teyuhu ñàha-güedé. ³⁸ Te ní ndíhú víhí ìní-güedé, chi ní xàhaⁿ tǎ Pǎblú sá nǐ ñⁿ nduu-gá vǎ náníhí tnáhá-güedě cáháⁿ ndihí tnàha-güedé. Te cuáháⁿ ndihí ñàha-güedě xii-dé núú ndécú bàrcú.

21

Té Pǎblú cuáháⁿ-dé ñuú Jerusàlén

¹ Te ní quide ndee ìní-ndí nchaa cue téé cùnuu. Te ní quée-ndí bàrcú cuáháⁿ ndáa ichi-ndí ñuú Cǒs. Te nduu tnée ní sáháⁿ-ndí ñuú Ròdás, te ní yàha-ndí

cuáháⁿ-ndí ñuú Pàtará. ² Te yàcáⁿ ní naníhí-ndí ñⁿ bàrcú ñúhú ìchi-xi quíhíⁿ-xi distrìtú Fèniciá, xiáⁿ ní quée-ndí cuáháⁿ-ndí. ³ Te ichi cuáháⁿ-ndí ní xiní-ndí distrìtú Chìpré cáá cuǎdava xití làmár, te ní yáha-ndí, te ní quendóo ñuú-áⁿ xio dàtni-ndí. Te cuáháⁿ-ndí ñuú Tìrú ñⁿ ñuú yíndèhu distrìtú Sìriá cuendá yàcáⁿ tava-güedé nchaa sá nchídó bàrcú. ⁴ Te yàcáⁿ ní naníhí tnáhá-ndí ndihi ñáyiu ní sándáá iní tnúhu Jèsús, te ní xíndecu-ndí úsá nduu ndihí-yu. Te ní xáháⁿ-yu sá vǎ quíhíⁿ té Pǎblú ñuú Jerusàlén, chi Espiritú Yǎ Ndiǒxí ní xáhaⁿ-xi xíi-yu sá ndóhó vǐhi-dé ñu na quíhíⁿ-dé. ⁵ Te sátá ñí yáha nduu úsá, te ní quee-ndí cuáháⁿ-ndí yuhu làmár. Te ní quee nchaa ñáyiu ní sándáá iní tnúhu-gá, té, ñadìhí, nchaa landú, nchaá-yu ní sándeca ñàhá-yu yuhu làmár, te òré ní quexìo-ndí, te ní ngüíñí xítí-ndí ní cáháⁿ ndihi-ndí Yǎ Ndiǒxí. ⁶ Te ní quide ndee iní tnáhá-ndí ndihí-yu, te dǎtnùní ní quée-ndí bàrcú, te ní naquehéⁿ-yu ichi cuánuhú-yu vehé-yu.

⁷ Te ní xica bàrcú ñúhú-ndí ní quee-xi ñuú Tìrú cuáháⁿ-ndí ndihi-xi ñuú Tolèmaidá. Te xiáⁿ ñí sáá-xi te ní quene-ndí, te ní sáháⁿ-ndí ní cáháⁿ ndihi-ndí nchaa ñáyiu sándáá iní-xi tnúhu Jèsús, te ní xíndecu-ndí ndihí-yu ñⁿ nduu. ⁸ Te nduu tnée ní ndée tucu-ndí bàrcú cuáháⁿ-ndí ñuú Cèsareá, te yàcáⁿ ní quene tucu-ndí bàrcú, te cuáháⁿ-ndí vehe té Lìpé cundecu-ndí ndihi-dé. Te té-áⁿ ñí xóo cada chùⁿ ndihi-dé íñú-gá cue té ní chindee ñàha xii ñáyiu sándáá iní tnúhu-gá ñuú Jerusàlén ní

xóo cuáñaha-güedě sá nĩ xóo caxí-yu. Te dătnùní mee-nă tnúhu Yá Ndiǒxí cǎháⁿ-dé xícá cùu-dé. ⁹ Te té Lìpé-áⁿ ndècu cúmí dēhe dīhí-dé, te nĩ ĩⁿ-yu vátá ndúcú ñàha-gá téé xii-yu, te nchaá-yu cǎháⁿ-yu tnúhu Yá Ndiǒxí tnúhu sá dácàhu iní ñáhá mēe-gá.

¹⁰ Te xíaⁿ nĩ cuu titní nduu ndècu-ndí, te ní quexìo ĩⁿ téé nàni Agabú ñuú-áⁿ, véxi-dé distrítú Jùdeá, te téé-áⁿ tnàhá-dé cǎháⁿ-dé tnúhu Yá Ndiǒxí. ¹¹ Te ní níhí-dé tnúhu núú ndécú-ndí nũu ní quixi-dé ní cǎháⁿ ndihí ñaha-dě xii-ndí. Te ní xícáⁿ-dé cìrchú té Pǎblú, te ní ngóo-dé, te ní ngúita-dé ní dácútú-dě sáhá-dě ndihí ndaha-dé, te ní cachí-dé xii-ndí:

—Espiritú Yǎ Ndiǒxí ní cachí-xi sá tēe dii cìrchú-xi-a tñi ñaha cuè téé isràél ñuú Jerusálén, te duha dacutu ñaha-güedé xii-dé, te cuáha cuendá ñáhá-güedě xii-dé núú cuè téé ñuú Rómá. Duha ní cǎháⁿ Espiritú-gá —càchí té Àgabú.

¹² Te sá dúcáⁿ nĩ cǎháⁿ-dé, te ní xáhaⁿ-ndí nchaa-ndí sá vǎ quihíⁿ té Pǎblú ñuú Jerusálén. ¹³ Te té Pǎblú ní cachí-dé:

—¿Ná cuendá ndéé dúcáⁿ ndàhyú-ndó dándihú iní ñáhá-ndó xii-í-í? Te ñá túú nǎ cuu cuēi na dàcutu ñaha-güedé, àdi cuēi na cǎhni ñaha-güedé xii-í cuendá sá cǎháⁿ ndihí-í Jèsús, chĩ sa ndècu túha-í sá cùú-í —càchí-dé.

¹⁴ Te ñá túú ní sàndáá iní-dé sá dúcáⁿ xǎhaⁿ-ndí, núu xíaⁿ ñá túú-gǎ ná ní xǎhaⁿ-ndí xii-dé sá vǎ quihíⁿ-dé, te ní xitnàha-ndí:

—Mee-ni-gǎ Yǎ Ndiǒxí ná cùnaha-gá nása sàni iní-gá cada-gá —xìtnàha-na-ndí.

¹⁵ Te ní queheⁿ-ndí ndàchiuⁿ-ndí, te ní xica-ndí cuáháⁿ-ndí ñuú Jerusálén. ¹⁶ Te cuáháⁿ ndihí-ndí

ĩⁿ ũú cue té Cèsareá, cue té ní sándáá iní tnúhu Jèsús. Te ndèca ñaha-güedé xii-ndí cuáháⁿ vehe té Mnàson, te té-áⁿ cúú-dě té distritú Chìpré, te ndècu-dé ñuú Jerusàlén, te sa ní cuu vài nduu ní sándáá iní-dé tnúhu-gá, te vehe té-áⁿ nĩ xíndecu-ndí.

Té Păblú ndátnũhu-dé ndihí té Jàcobó

¹⁷ Te òré ní quexìo-ndí ñuú Jerusàlén, te nchaa ñáyiu ní sándáá iní tnúhu Jèsús ní quixí-yu ní dándácõ váha ñàhá-yu, chi ní cudíí víhí iní-yu sá nĩ quexìo-ndí. ¹⁸ Te nduu tněé cuáháⁿ ndihí-ndí té Păblú cuendá cáháⁿ ndihí-ndí té Jàcobó, te òré ní quexìo-ndí núú ndécú-dě, te ndècu ndihí-dé nchaa cue té yìndaha ñaha xii ñáyiu sándáá iní tnúhu Jèsús. ¹⁹ Te té Păblú ní dándácõ váha ñaha-dě xii-güedé, te ní xáhaⁿ-dě nàcuáa ní quide Yá Ndiõxí ní chindee ñàha-gá xii-dé ní cáháⁿ-dé tnúhu-gá núú ñáyiu ñá túú cùu ñáyiu isràél. ²⁰ Te sátá nĩ yáha ní cáháⁿ-dé, te ní ndácáⁿ táhũ-yu núú Yá Ndiõxí cuendá nchaa sá nĩ quide-gá. Te dàtnùní ní xáhaⁿ-güedé xii té Păblú:

—Yòhó sa nàha-n sá nĩ cuu titní mĩ ñáyiu isràél ní sándáá iní-yu tnúhu Jèsús, te cāchí-yu sá ïo xini ñuhu-xi cadá-yu nchaa nàcuáa cāháⁿ tnúhu sá nĩ chídó tnùnĩ ndii Moisés. ²¹ Te ní níhĩ-yu tnúhu sá dācuàha-n ñáyiu isràél ñáyiu ndècu ñuú xícá cuendá sá vā cadá-gā-yu nàcuáa ní cachí ndii Moisés cadá-yu. Te xāhaⁿ-n xii-yu sá vā cuāha-gā-yu sēñá ñii landú-yu, te vā cadá-gā-yu dàtná ní xóo cada ñáyiu ndéé sanaha, duha dācuaha-n ñáyiu ní níhĩ-yu tnúhu. ²² Te na nihĩ-yu tnúhu sá

ndécú-n ìha, te tnàvíí ngüíta-yu cáháⁿ cuèhé-yu cuèndá-n. ²³ Te na càchí tnúhu-ndí nàcuáa cada-n. Ndècu cúmí cue téé vátá cádá-gã-güedé nàcuáa ní cáháⁿ méé-güedé sá cádá-güedé cuèndá nduu vétú iní Yă Ndiöxí. ²⁴ Te quíhíⁿ-n ndíhi-güedé te cada-n nchàa nacuáa ní xóo cada ñáyi ndéé sanaha cuèndá nduu vétú iní Yă Ndiöxí. Te tava-n díhúⁿ cuu núu-güedé cháhu-güedé veñúhu, te ducaⁿ te dătnuní ndacu dèté díquí-güedé. Nchaa xǎⁿ cada-n, te quíní ñáyi sá ñă ndàá tnúhu càháⁿ nchaa ñáyi càháⁿ cuèhé cuèndá-n. Te na cùtnuní iní-yu sá tnàhá-n guide-n nchaa nacuáa ní chídó tnuní ndí Moisés cadá-yu. ²⁵ Te sa ní guide ndáá-ndí cuèndá nchaa ñáyi ñuú xícá, nchaa ñáyi ní tuha ichi Jèsús. Te sa ní cadúha-ndí tutú ní tendaha-ndí cuáháⁿ ndaha nchaa ñáyi-áⁿ sǎ vǎ cáxí-yu nchaa sá nchító-ó nduu táhú nchaa sá càchí-yu cùu ndióxí ní cadúha cue ñáyi ñuyú-a. Te ní xáhaⁿ-ndí sá vǎ cáxí-yu níñí, te vǎ cáxí-yu cuñú nchaa quití cuèhné. Te vǎ càháⁿ ndíhi cue téé ñadíhí te núu ñá díú ñadíhí-güedé cúu-yu, te ní cuè ñáyi díhí vǎ càháⁿ ndíhi-yu téé te núu ñá díú yí-yu cùu-güedé. Duha ní tee-ndí núu tütú cuáháⁿ —càchí-güedé xǎhaⁿ-güedé xii té Pǎblú.

Ní tñi-güedé té Pǎblú xití veñúhu ñáyi isràél

²⁶ Te nduu tnéé cuáháⁿ té Pǎblú ndíhi cúmí cue téé veñúhu càhnu sá ïo cùnuu núu ñáyi isràél cada-güedé nàcuáa ní xóo cada ñáyi ndéé sanaha cuèndá nduu vétú iní Yă Ndiöxí. Te ní quíhu-dé veñúhu càhnu sá ïo cùnuu-áⁿ ní xáhaⁿ-dē ná daha-gá nduu cùmání dandíhi-güedé nàcuáa ní xóo cada

ñáyiú ndéé sanaha, te dătnùní cànehe-güedé sá ndúú tǎhú Yǎ Ndiǒxí quíhíⁿ veñúhu.

²⁷ Te cùmání-gǎ cuu úsá nduu sá nǐ sáháⁿ-güedé veñúhu càhnu sá ïo cùnuu, te sa ndècu tucu té Pǎblú veñúhu. Te cue tée isràél véxi distritú Àsiá ní xiní-güedé té Pǎblú yíhí-dě veñúhu, te ní tnií ñaha-güedě xii-dé, te ío ní cáháⁿ cuèhé-güedé cuendá-dé núú dǎva-gǎ ñáyiú yíhi veñúhu cuendá sá cúděěⁿ-yu núú tǎ Pǎblú. ²⁸ Te níhi ní cáháⁿ-güedé, te xǎhaⁿ-güedě xii-yu:

—¡Nchòhó ñáyiú isràél, yáchí-ndó chì cuánùndaha ñaha-ndo! Chi tée-a yayàcáⁿ cuáháⁿ-dé càháⁿ-dé sá ñà túú nàndíhi-o, te càháⁿ-dé sá vǎ cádá-ó nchàa nacuáa càháⁿ tnúhu sá nǐ chídó tnùní ndíi Moisés, te càchí-dé sá ñà túú nàndíhi veñúhu-a. Te ñá díú-ní xǎⁿ chì sa ní quíhu-dé veñúhu-a ndíhi cue tée ñà túú cùu ñáyiú isràél, te sá dúcáⁿ nǐ quide-dé, te ñà túú-gǎ ní cànehe íí-dě xití veñúhu. Te veñúhu-a cùu-xi vehe Yǎ Ndiǒxí —càchí-güedé xǎhaⁿ-güedě xii-yu.

²⁹ Te ducaⁿ nǐ cáháⁿ-güedé chì ní sani iní-güedé sá nǐ quíhu ndíhi-dé té Trǒfimú veñúhu-güedé, chì ní xiní-güedé xícá cùu ndíhi ñaha-dé xití ñuú. Te tée-áⁿ cúú-dě tée ñuú Éfesú, te ñá díú tée isràél cúú-dě.

³⁰ Te chitu ñáyiú ñuú-áⁿ nǐ tacá-yu ní tnií-yu té Pǎblú tǎñùhu ñahá-yu ní ndee veñúhu càhnu sá ïo cùnuu, te òré-ní ní nacadí-güedé yèhe veñúhu-áⁿ.

³¹ Te sa cahni-yu té Pǎblú ní cùu, te ní sáháⁿ ñⁿ úú-güedé núú ndécú tée cùu capitáⁿ cúnùu-gǎ, te ní xǎhaⁿ-güedě xii-dé sá ncháá ñáyiú ñuú Jerusàlén xǎnàá-yu. ³² Te òré-áⁿ cuáháⁿ tée cùu capitáⁿ

cúnùu-gá ndihi dava-gá cue té nchìcún-gá ndihi sandàdú-dé. Te òré ní xíní-yu ní quexì coyo-güedé núú xǐxúcu-yu, te ní yùhú-yu ñá túú-gǎ ní càní-yu té Pǎblú. ³³ Te té cùu capitáⁿ ní sátuha-dé té Pǎblú, te ní xáhaⁿ-dě xii cue sandàdú-dé sá tníí ñàha-güedé dacùtu ñaha-güedé úú cadená. Te dǎtnùní ní xícáⁿ tnúhú-dě núú-yu, te xáhaⁿ-dě:

—¿Ná cúú tǎe-a? ¿Ná ní quide-dé? —càchí-dé xáhaⁿ-dě xií-yu.

³⁴ Te té cùu capitáⁿ-áⁿ ñǎ ní cùtnuní iní-dé núu ná cúú sǎ ní quide té Pǎblú, chi uuⁿni ní cuáá-yu. Te tucu càháⁿ ìⁿ, tucu càháⁿ ìⁿ-yu, núu xǎⁿ ní xáhaⁿ-dě cue sandàdú-dé sá cándèca ñaha-güedé xii-dé quíhíⁿ cuàrtél núú ndécú-güedé. ³⁵⁻³⁶ Te nchìcún ñáhǎ-yu cuáháⁿ ní quexì ndéé nàcuáa càa nchio cùní-yu cahni ñáhǎ-yu xii-dé ní cùu. Te níhi ní cáháⁿ-yu xǎhǎⁿ-yu sá cáhní ñaha-güedé, te xǎⁿ ní ndacani ñaha-güedé ndécá ñaha-güedé cuásaá nchio-ǎⁿ.

Té Pǎblú xáhaⁿ-dě xii-güedé sá ñà túú cuěchi-dé

³⁷ Te cuánguihu-güedé cuàrtél ndihi té Pǎblú ní cùu, te ní xáhaⁿ-dě xii té cùu capitáⁿ cúnùu-gá:

—Càháⁿ ndàhú-í núú-n cùndetu-n na cúñaha-ǎ ìⁿ úú tnúhu xií-yu —càchí-dé xáhaⁿ-dě.

Te té tàxi tnuní-áⁿ ní xáhaⁿ-dě:

—¿Náa tnàhá yòhó càháⁿ-n tnúhu grìégú? ³⁸ Te ní cáhàⁿ-í sá tǎe ègíptú cúú-n, chi diu-n ní ndúcú-n cuè té ní nǎá ndihi té cùchiuⁿ Cesár ní cáhàⁿ-í, chi diu ìⁿ té yàcáⁿ ní ndúcú-dě cúmí mǐl cue té ní sahni ndíyi. Te ndèca tnaha-güedé ní sáháⁿ xití yucu ní xíhi váha-güedé —càchí-dé xáhaⁿ-dě xii té Pǎblú.

³⁹ Te té Pǎblú ní xáhaⁿ-dě:

—Ñá díú tée ègiptú cúu-í, chi tée isràél cúu-í, chi diu-ni tée isràél cúú tătà-í, te dicó-ni sá nĩ cacu-í ñuú Tàrsú ñuú cáhnú, te ñuú-án yíndèhu-xi distritú Cìliciá. Te cuíní-í cada ndee ìní-n dàña-n na caháⁿ ndihí-í-yu —càchí-dé xáhaⁿ-dě.

⁴⁰ Te ní xáhaⁿ tée cùu capitán cùnùu-gá sá cúu cāháⁿ té Pāblú, núu ní ngúnutnĩ-dé núú nchio, te ní quide-dé ndaha-dé sá cùndedóho-yu. Te ní sadí-yu yuhú-yu, te ní cáháⁿ-dé tnúhu ñáyiú isràél, te xáhaⁿ-dě xií-yu:

22

¹ —Chí cádá càhnu ìní nchòhó cue tée sa cuéhé ndihí nchòhó cue tée cuechi, na càháⁿ-í ñⁿ tnúhu cùndedóho-ndo sã ñà túú cuèchi-í, chi ñà túú nã ní quide-í, te ní ñà túú nã tnúhu càháⁿ-í —càchí-dé xáhaⁿ-dě xii-güedé.

² Te cuendá sá dúcáⁿ nĩ cáháⁿ-dé tnúhu mée-yu núu tnàvíi-nã ní sadí-yu yuhú-yu ní xíndedóho-yu ní cáháⁿ-dé, te xáhaⁿ-dě:

³ —Yúhú cúu-í tée isràél, te ní cacu-í ñuú Tàrsú, te ñuú-án yíndèhu-xi Cìliciá. Te davitna lĩhli-í cútnàhá ní quexìo-í ñuú Jerusàlén ní dácúáhá ñàha té Gamaliél. Te ní dácúáhà-í nchaá tnúhu ní chídó tnùní nchaá cue tée ndée sanaha nàcuáa cada ñáyiú. Te yúhú ní cahu ìní-í ní quide-í titnĩ núú chiuⁿ nacuáa cuu váha ìní Yã Ndiõxí ní cáháⁿ-í, te diu-ni ducaⁿ quide nchohó tucu. ⁴ Te ní sánú ndúcù-í nchaá ñáyiú sàndáá ìní-xi tnúhu Jèsús, cuèi tée, cuèi ñáyiú dìhí ní dácútù-í-yu, te ní chihi-í-yu vecaá, te ní níhì-í tnúhu ndee ìní sá cáhní-ndĩ-yu. ⁵ Te dútú cùnùu-gá ndihí cue tée cùnùu núú-ndó nàha-güedé sá ndàá càháⁿ-í chi

mee-güedě ní taxi-güedé tutú cuáñaha-ĩ xii ñáyiú isráel ñáyiú ndècu ñuú Dàmascú cuendá cutnùní iní-yu ná chíúⁿ cuáháⁿ-í ní cùu. Te ñùhu-í ichi cuáháⁿ-í ñuú-áⁿ cuánúndúcù-í ñáyiú ní sándáá iní-xi tnúhu Jèsús cuendá dacùtu-í-yu te candeca-í-yu ndixi, te iha cada úhú ñáhá-güedě xií-yu ni cùu.

Té Păblú xăhaⁿ-dě xii ñáyiú nàcuáa ní cuu ní tuha-dé ichi Jèsús

(Hch. 9:1-19; 26:12-18)

⁶ Te ta cùyatni-í ñuú Dàmascú cuáháⁿ-í, te cùu-xi datná òré caúxúú nduu, te uuⁿni ní quee ñuhú andiú, te ní dáyèhé-xi ndéé núú nùtní-í. ⁷ Te ní quide nee-xi núù-í, xíáⁿ ní nduá-í ndéé ñuhu. Te ní tecú dóho-í càháⁿ ìⁿ sá càháⁿ andiú, te càchí-xi: “Yòhó té Sàulú, ¿ná cuendá cúú úhú iní ñáhá-n dándoho ñaha-n xii-í?”, càchí sá càháⁿ-áⁿ. ⁸ Te ní xáhaⁿ-ĩ: “¿Ná cúú yòhó sá càháⁿ-áiⁿ?”, xăhaⁿ-ĩ. Te ní cáháⁿ tucu ingá xito te càchí-xi: “Yúhú cúù-í Jèsús téé ní xíndecu ñuú Nazàrét, te ducaⁿ ïo dándoho ñaha-n xii-í”, càchí sá càháⁿ-áⁿ. Te xíáⁿ ní cutnùní iní-í sá díú Jèsús càháⁿ. ⁹ Te nchaa cue téé ndihí-í ní xiní-güedé ní dáyèhé ñuhú, te ní yùhú-güedé, dico ñá túú ní tècú dóho-güedé òré ní cáháⁿ-gá. ¹⁰ Te ní xáhaⁿ-ĩ xii-gá: “Yòhó Xítoho Jesucristú, ¿ná cuíní-n càda-í?”, xăhaⁿ-ĩ xii-gá. Te ní cachí-gá: “Ndacóo, te quíhíⁿ-n ñuú Dàmascú, yacáⁿ tecú tnúhu-n nchaa nacuaa cuíní Yă Ndiôxí cada-n”, càchí-gá —càchí té Păblú xăhaⁿ-dě xii-yu.

¹¹ Te ní xáhaⁿ tùcu té Păblú:

—Te cuendá sá ñí dăcuáá ñàha ñuhú xii-í ñuú ní tní cue téé ndihí-í ndaha-í ndéca ñàha-güedé cuáháⁿ ndéé ñuú Dàmascú.

12 'Te yàcáⁿ ndécú ñⁿ téé nàni Ananiás, te ío vài sá ñí chídó tnùní ndíi Moisés cadá-yu quide-dé. Te nchaa ñáyíu ñuú Dàmascú ío váha càháⁿ ndíhi ñàhá-yu xii-dé. 13 Te ní quexìo-dé núú ndécù-í, te ní cachí-dé: “Yòhó té Sàulú, téé ndècu ndíhi-í ichi Xítóhó Jesucrístú, ndúha núú-n”, càchí-dé. Te òré-ni ní nacaáⁿ núú-í te ní xiní-í-dé. 14 Te dǎtnùní ní cachí-dé: “Yá Ndiǒxí ní cáháⁿ ndíhi-gá ñaní tnáhá-ó ñí xíndecu ndéé sanaha. Te diu-gá ní cáxi ñaha-gǎ xii-n cuendá quiní-n nchàa sá vǎha cuíní-gá cada-n. Te quiní-n Jèsús Yaá ñǎ túú cuèchi-xi, te diu-ni mee-gǎ cáháⁿ ndíhi ñaha-gǎ xii-n. 15 Te cáháⁿ-n tnúhu Jèsús núú nchàa ñáyíu, te cáháⁿ-n nchàa sá ñí xiní-n ndíhi nchaa sá ñí xíndedóho-n. 16 Tnàvíí, te quíhíⁿ-n cuàndute-n, te cáháⁿ ndíhi-n Yá Ndiǒxí cuendá cada càhnu iní-gá nchaa sá cuèhé sá dúhá ñí quide-n”, duha ní cachí té Anàniás xii-í — càchí té Pǎblú xǎhaⁿ-dè xií-yu.

Té Pǎblú ní cani-dé cuèndú nàcuáa ní xáhaⁿ Jèsús cada-dé quíhíⁿ-dè ñuú núú xíndecu ñáyíu ñǎ túú cùu ñáyíu isràél

17 Te ní xáhaⁿ tùcu té Pǎblú:

—Te ní ndee-í cuándixi-í ñuú Jerusàlén. Te ní sáháⁿ-í veñúhu càhnu sá ño cùnūu ní cáháⁿ ndíhi-í Yá Ndiǒxí, te ní dácótó núú ñàhá-xí sǎ mée Jèsús ní xiní-í xití veñúhu, 18 te ní cachí-gá: “Yáchí, quee-n ñuú Jerusàlén, chi ñáyíu-a vá quíndáá iní-yu nàcuáa ní cachí-í cúñaha-n xií-yu cuendá-í”, duha ní cachí-gá xii-í. 19 Te ní xáhaⁿ-í xii-gá: “Yòhó Xítóhó Jesucrístú, sa xiní-n sǎ ncháá ñǎyíu nàhá-yu sá ñí sáháⁿ-í ndí tnahá ñⁿ ndí tnahá ñⁿ veñúhu nànducu-í ñáyíu sàndáá iní tnúhu-n, te ní tñi-í-yu,

ní chihi-í-yu vecaá, te ní táuchíùⁿ-í ní caniha-güedě xií-yu. ²⁰ Te cútnàhá ní sahní-güedé ndíi Těvá téé ní xóo cáháⁿ tnúhu-n, te tnàhá-í ndécú òré-án te ní xindeé-í dóó cue téé ní sahní ñaha xii ndíi. Te yúhú ní cáhàⁿ-í sá nǐ quide váha-güedé sá dúcáⁿ nǐ quide-güedé”, duha ní xáhaⁿ-í xii-gá. ²¹ Te ní cachí tnúhu-gá xii-í: “Cuàháⁿ chi cuíní-í quíhíⁿ-n nchàa ñúú xícá nǔú xĩndecu cue ñáyiú ñá túú cùu ñáyiú isràél cáháⁿ-n tnúhu-í”, càchí-gá —càchí té Păblú xăhaⁿ-dě xií-yu.

Te Păblú ndíhi téé tàxi tnuní ñáhá xii cue sandadú

²² Te sá dúcáⁿ nǐ cáháⁿ-dě, te ñá ní tnàhá-gá iní-yu cundedóho-yu tnúhu càháⁿ-dě. Te ñⁿ-ni nǐ cuú-yu nchaá-yu, te ní cuáá-yu, te xăhăⁿ-yu:

—¡Chí cáhní-dě! ¡Ñá díú sá cündecu-dě ñuyíú-a! —càchí-yu xăhăⁿ-yu.

²³ Te mei òré ducaⁿ nǐ cáháⁿ-yu, te ní ndátă-yu dóo-yu, te ní dáquéně-yu núú nǐnu sá sàtú iní-yu. Te ní quéhnu-yu ñuhu, te ní dácácòyó-yu núú nǐnu sá ïo sàtú iní-yu. ²⁴ Te téé cùu capitáⁿ cúnùu-gá ní xáhaⁿ-dě xii cue sandadú-dě:

—Chí dítá-dě ná quíhu-dé ndéé xití vehe, te cani-ndo-dě ñii, chi na quène yuhu-dé ná tnúhu ní cáháⁿ-dě nǔu ndéé dúcáⁿ cùdēēⁿ-yu núú-dě —càchí-dě xăhaⁿ-dě xii-güedé.

²⁵ Te sátá nǐ dácútú ñaha-güedé xii té Păblú sá cání ñaha-güedé ní cùu, te ní xáhaⁿ-dě xii téé cùu capitáⁿ ndécú-ăⁿ:

—Te na càchí tnúhu-í sá vă cúú cànha-güedé ñii, chi téé ròmə cúù-í, te vátá quíní ndáá-gă-ndó nǔu ndècuéchi-í àdi ñáhá —càchí-dě xăhaⁿ-dě xii téé cùu capitáⁿ.

26 Te sá dúcáⁿ nǐ cáháⁿ-dé, te ní sáháⁿ té cùu capitáⁿ núu tée cùnūu-gá, te ní xáhaⁿ-dě:

—Vá cúu càni-o tée-ǎⁿ, chi tée ròma cúu-dě — cǎchí-dé xáhaⁿ-dě.

27 Te ní sáháⁿ té cùu capitáⁿ cùnūu-gá ndée núu tǐ Pǎblú, te ní xáhaⁿ-dě:

—Cáháⁿ ndáá-n núu ndisa tée ròma cúu-n — cǎchí-dé xáhaⁿ-dě.

Te ní xáhaⁿ tǐ Pǎblú:

—Ndáá sá tǐe ròma cúu-í — cǎchí té Pǎblú xáhaⁿ-dě xii tée cùnūu-áⁿ.

28 Te ní xáhaⁿ tǐe cùnūu-áⁿ:

—Yúhú tnàhá-í cúu-í tée ròma, chi vǎi díhúⁿ nǐ cháhu-í — cǎchí-dé xáhaⁿ-dě.

Te té Pǎblú ní xáhaⁿ-dě:

—Tnàhá-í cúu-í tée yàcáⁿ tucu, chi tǎtà-í cúu-dě tée ròma — cǎchí té Pǎblú xáhaⁿ-dě xii tée cùu capitáⁿ cùnūu-gá.

29 Te uuⁿni ní nacaca sata cuè tée cuáháⁿ caniha xii-dé ní cùu. Te ní yùhú tée tàxi tnuní sá dúcáⁿ nǐ xáhaⁿ tǐ Pǎblú sá tǐe ròma cúu-dě, chi ní xáhaⁿ-dě ní dácútú ñàha-güedé xii-dé, núu xiǎⁿ ní yùhu-dé.

Té Pǎblú ní cáháⁿ ndíhi-dé cue tée cùnūu oré ní quide-güedé jùndá

30 Te tée tàxi tnuní sandàdú ñá ní xìní-dé ná cuéchi ní dácáá ñǎyiu isràél díquí tǐ Pǎblú, núu xiǎⁿ nduu tnée ní cana-dé cue dútú cùnūu, ndíhi cue tée cùchiuⁿ, ndíhi cue tée cùu sacuéhé, te ní xáhaⁿ-dě sá cáda-güedé jùndá cuèndá nducu tnùhu-güedé núu tǐ Pǎblú ná cuéchi ní dácáá-yu díquí-dě. Te ní xáhaⁿ-dě xii cue sandàdú sá nándàxi ñàha-güedé cadená ndútú-dě, te candeca ñàha-güedé quíhín núu cáda-güedé jùndá. Te ní sáháⁿ-güedé ní nandaxi ñàha-güedé xii-dé ndécá ñàha-güedé cuáháⁿ

jùndá, te ní quexìo-güedé, te ní ngúnutnîi-dé núú cuè té cùchiuⁿ.

23

¹ Te yàcáⁿ ní xíndéhé vǎha té Pǎblú núú nchàa-güedé, te ní xáhaⁿ-dě:

—Cada càhnu iní nchòhó cue té cùchiuⁿ, te ducaⁿ nchòhó cue té cùu sacuéhé, véxi-í càchí tnúhu-í sá ñá túú cuèchi-í, chi mee Yǎ Ndiǒxí náhá-gǎ nása ndècu-í ñuyíú-a, te ñá túú cùcahaⁿ núu-í núú-gǎ —càchí té Pǎblú xáhaⁿ-dě xii-güedé.

² Te té Anàniás té cùu dútú cúnùu-gá ní xáhaⁿ-dě xii cue té nùtnîi yatni òñîi té Pǎblú sá cáni-güedé déhndé yuhu-dé. ³ Te té Pǎblú ní xáhaⁿ-dě xii dútú-ǎⁿ:

—Yòhó, chi úhú tnàhí iní-n, chi ní ndúcú-n tée ní caniha xì-í, te ñá túú cuèchi-í, dico quini-n nǎ cada ñaha Yǎ Ndiǒxí xii-n. Te yòhó ní cana ñaha-n ndùcu tnúhu-n nùu quide-í nchaa nàcuáa càháⁿ tnúhu sá ñi chídó tnùní ndíi Moisés cada-o. Te mee-n ñi ndúcú-n tée ní caniha, te ñá túú dùcaⁿ ní càháⁿ ndíi cada-o —càchí té Pǎblú xáhaⁿ-dě xii dútú cúnùu-gá-áⁿ.

⁴ Te cue té xǐnutnîi òñîi té Pǎblú ní xáhaⁿ-güedé xii-dé:

—Nèhé ní quide-n chi ní xícuèhé-n dútú cúnùu-gá té xìnu cuechi núú Yǎ Ndiǒxí —càchí-güedé xáhaⁿ-güedé xii té Pǎblú.

⁵ Te té Pǎblú ní xáhaⁿ-dě xii-güedé:

—Cada càhnu iní-ndó chi ñá túú xìní-í sá dútú cúnùu-gá cúu-dé, chi núú tùtú Yǎ Ndiǒxí càchí-xi sá vǎ cúu càháⁿ cuèhé-ó cuèndá ñⁿ té cùnùu ñuú-ó yòtnúhu. Te yúhú ñá túú xìní-í sá tée cùnùu cuu-dé

nũu ní sácóo-í ní cáháⁿ-í —càchí té Păblú xăhaⁿ-dě xii-güedé.

⁶ Te òré-áⁿ nĩ cutnùní iní té Păblú sá dává-güedé cündìhi-güedé cue tée cùu saducéú, te dava-güedé cündìhi-güedé cue tée cùu fariséú, te níhi ní cáháⁿ-dé ní xăhaⁿ-dě xii-güedé:

—Yúhú cúu-í té fariséú, te tnàhá tătà-í ndìhi xī-í cúu-güedé cue tée fariséú tucu. Te tnàhá yúhú sàndáá iní-í sá ndótó nchàa ñáyiu ní xīhí, te núu xǎⁿ cuiní-ndó ndùcu tnúhu-ndo nũu-í cáná ñàha-ndo —cachí-dé xăhaⁿ-dě xii-güedé.

⁷ Te sá dúcáⁿ nĩ cáháⁿ-dé xǎⁿ ní nàá ndìhi tnàha cue tée cùu fariséú ndìhi cue tée cùu saducéú, chi ñá ĩⁿ-ní tnúhu nĩ cáháⁿ-güedé, chi ní ndì queheⁿ ndì queheⁿ-güedé sá nĩ cáháⁿ-güedé. ⁸ Te cue tée cùu saducéú càchí-güedé sá vǎ ndótó cuè ñáyiu ní xīhí, te cue tée cùu fariséú càchí-güedé sá ndótò-yu. Te cue tée cùu saducéú càchí-güedé sá ñà túú espíritú xínú cuèchi núú Yǎ Ndiǒxí, te cue tée cùu fariséú càchí-güedé sá ió espíritú xínú cuèchi núú-gǎ. ⁹ Te ta cùdééⁿ-güedé cuáháⁿ, te níhi-gá cúu ìní-güedé càháⁿ-güedé, te ĩⁿ ũú cue tée cùu fariséú cue tée dàcuaha ñaha xii ñáyiu nchaa tnúhu ní chídó tnùní ndíi Moisés ní cáháⁿ níhi-güedé, te xăhaⁿ-güedé:

—Ñá túú cuèchi-dé, te cudana te ní cáháⁿ ndìhi-dé ĩⁿ espíritú xínú cuèchi núú Yǎ Ndiǒxí te vǎ ngǒo vǎ cúu vǎha iní-ó nũú-gǎ —càchí cue tée cùu fariséú xăhaⁿ-güedé xii-güedé.

¹⁰ Te cuendá sá ïo xǎnàá-güedé, xǎⁿ ní yùhú tée cùu capitáⁿ cúnùu-gá sá cáhní-güedé té Păblú, núu xǎⁿ ní xăhaⁿ-dě sá quihíⁿ-güedé cúnúcuaca ñaha-güedé candeca ñaha-güedé núhú cuàrtél.

11 Te ndéé niú cúú ùú ní quexìo Xítóhó Jesucrìstú núú ndécú tẽ Păblú, te ní xáhaⁿ-gă:

—Ñí cunduu-n, vá yùhú-n, chi nàcuáa ní cáháⁿ-n nĩ cacunehe ñaha-n xì-i iha, te òu-ni ducaⁿ cǎháⁿ-n cǎcunehe ñaha-n xii-í quíhíⁿ-n ñùú Ròmá —càchí-gá xáhaⁿ-gă xii-dé.

Cahni-güedé té Păblú ní cùu

12-13 Te nduu tnéé ní natacá vîhi-gá údico cue téé isràél ní ndatnúhu-güedé sá cáhni-güedé té Păblú, te ní xítnàha-güedé:

—Ní dítá vǎ cáxí-ó te ní ndùte vǎ cóhó-ó ndéé ndacu-o cǎhni-o té Păblú, te dǎtnùní caxi-o dítá, te coho-o ndùte, chi sa ní sani iní-ó sǎ cǎdá-ó, te cuu cuéchi xii-o nũu vǎ cǎdá-ó —càchí-güedé xítnàha-güedé.

14 Te ní sǎháⁿ-güedé núú ndécú nchàa dútú cúnùu ndihí nchaa cue téé cùu sacuéhé, te ní xáhaⁿ-güedé:

—Ní cachí-ndí sá ní dítá vǎ cáxí-ndí ndéé nũu ní ndacu-ndí ní sahní-ndí té Păblú, chi sa ní sani iní-ndí sǎ cǎdá-ndí, te cuu cuéchi núu vǎ cǎdá-ndí. 15 Te duha cada-ndo ndihí dava-gá cue téé cùnũu, chi cúñaha-ndo xii téé cùu capitáⁿ cúnùu-gá: “Quixi ndihí-n tẽ Păblú núú ndécú-ndí cuendá ndatnúhu ndihí-ndí-dé, chi cuíní-ndí nducu tnũhu váha-gá-ndí ná cúú sǎ nĩ quide-dé”, duha cúñaha-ndo xii téé tàxi tnuní sandàdú. Te ducaⁿ-ni cǎñaha-ndo dǎndahú-ndó-güedé cuendá quixi ndihí-güedé té Păblú, te nchúhú sa cundetu-ndí-güedé ichi, chi quíní té Păblú ná cahni-ndí-dé —càchí-güedé xáhaⁿ-güedé xii cue téé cùchiuⁿ.

16 Te déhe cúha té Păblú ní níhí-dě tnúhu nàcuáa cada-güedé ditó-dé. Te ní sáháⁿ-dé cuartél, te ní xáhaⁿ-dě xii ditó-dé nàcuáa càháⁿ-güedé cada ñaha-güedě. 17 Te ní cana té Păblú ñⁿ tée cùu capitáⁿ, te ní xáhaⁿ-dě:

—Vá cündèe iní-n, quíhíⁿ ndíhi-n tée-a na càháⁿ ndíhi-dé tée cùnuu-gá, chi ndècu ñⁿ cuendú cùñaha-dě cuíní-í —càchí té Păblú xáhaⁿ-dě xii tée cùu capitáⁿ.

18 Te dătnùní ní xica tée cùu capitáⁿ ndécá-dě dăxíⁿ tẽ Păblú cuáháⁿ núú ndécú tẽ cùnuu-gá, te òré ní quexìo-güedé núú-dě, te ní xáhaⁿ tẽ cùu capitáⁿ xii-dé:

—Té Păblú tée yìhi vecaá ní cana ñaha-dě xii-í, te ní cachí-dé véxi-í ndíhi tée-a cuendá cachí tnúhu-dé ñⁿ cuendú cuíní-dé —càchí-dé xáhaⁿ-dě xii tée cùnuu-gá.

19 Te tée cùnuu-áⁿ ñⁿ tní-dé ndaha dăxíⁿ tẽ Păblú, te tànehe ñaha-dé cuáháⁿ ñⁿ xio, te ní xícáⁿ tnúhú-dě núú-dě, te xáhaⁿ-dě:

—¿Ná cuendú cuíní-n cáháⁿ-n? —càchí-dé xáhaⁿ-dě xii dăxíⁿ tẽ Păblú.

20 Te ní xáhaⁿ-dě xii tée cùnuu-áⁿ:

—Cue tée isràél ní ndatnúhu ndáá-güedé sá quíxí-güedě tneé cáháⁿ ndàhú-güedé núú-n càndeca-n té Păblú quíhíⁿ jùndá, te yàcáⁿ cacăⁿ tnúhú ndáá-güedé núú-dě ná cúú sã ñⁿ quide-dé, càchí-güedé xìtnàha-güedé. 21 Te vá quíndáá iní-n chi dicó dandàhú ñáhá-güedě, chi vìhi-gá údico-güedé ndátnúhu-güedé cundedí-güedé ichi cahni ñaha-güedě. Te xìtnàha-güedé sá ni dítá vã cáxí-güedě, te ni ndùte vá cóhó-güedě ndée ñuu ní ndacu-güedé ní sahani ñaha-güedě, te dătnùní

caxi-güedé dítá, te coho-güedé ndute, chi sa ní sani iní-güedé sá cáda-güedé, te cuu cuéchi núu vá cáda-güedé, cächí-güedé xĩnàha-güedé. Te cundecu túha-ná-güedé cundetu ñaha-güedé tneé, te núu na quìndáá iní-n càndeca-n-dé quíhíⁿ jùndá —cächí-dé xǎhaⁿ-dě xii té cùnuu-áⁿ.

²² Te té cùnuu-áⁿ nĩ xáhaⁿ-dě:

—Cuanùhú, te vá yõo tnàhí cúñaha-n sǎ nĩ quixi-n nĩ cachí tnúhu-n nàcuáa càháⁿ-güedé cada-güedé té Pǎblú —cächí-dé xǎhaⁿ-dě.

Ndèca-güedé té Pǎblú cuáháⁿ núu tẽ Juělí té cùu gobiernú

²³ Te té cùnuu-gá ní cana-dé úú cue té cùu capitáⁿ, te xǎhaⁿ-dě:

—Tava-ndo úú ciendú sandàdú cue té xica saha, ndihí únídico úxí sandàdú cue té yòdo cuayú, ndihí úú ciendú sandàdú mee-ni cuè té xĩnehe lànzá. Te cada túha-ndo chi caca-ndo òré caá ííⁿ niú quíhíⁿ-ndó ñúú Cèsareá ndihí té Pǎblú. ²⁴ Te nducu-ndo cuèdìcò ííⁿ úú cuayú codo-dě ndihí cue té ndèé ñáhá xii-dé. Te cada cuèdàdú-ndó-dě ichi, te candeca-ndo-dě quíhíⁿ quíndeca-ndo-dě núu tẽ cùu gobiernú —cächí té cùnuu-áⁿ xǎhaⁿ-dě xii cue té cùu capitáⁿ.

²⁵ Te té cùnuu-áⁿ nĩ cadúha-dé tutú cuèndá quíhíⁿ ndaha té Juělí té cùu gobiernú. Te duha ní chídó tnùnì-dé núu tütú cuáháⁿ:

²⁶ “Cóvǎha díí-n, tǎtǎ gobernàdór. Ío cada càhnu iní, yúhú nání-í Clàudiú Lisiás. Yúhú ní tendaha-í ííⁿ tutú véxi ndaha-n cuèndá quínì tnùnì-n nàcuáa ní cuu iha. ²⁷ Cue té isràél ní tní-güedé ííⁿ té nàni Pǎblú cuínì-güedé cahni ñaha-güedé ní cùu, te

ní níhì-í tnúhu sá tẽ ròmá cúú-dẽ nõu ní sáháⁿ-í ndihì sandàdú-í ní dácăcu-ndí-dẽ. ²⁸ Te ní cuiní-í quini-í ná cuendá tée ñàha-güedé cuéchi xii-dé, nõu xiáⁿ ndécà-í-dé ní sáháⁿ nõú nĩ quide cue tée cùchiuⁿ israél jùndá. ²⁹ Te yàcáⁿ ní níhì-í tnúhu sá ñà túú nã cuéchi nĩ quide-dé, chi cuendá-nĩ sá nĩ níhì-güedẽ tnúhu sá ñà túú sàndáá iní-dé cada-dé nchaa sá nĩ xóo cada ñáyiu ní xindecu ndée sanaha nchìcúⁿ nihnu-güedé quide-güedé, xiáⁿ ní cudéeⁿ-güedẽ nõú-dẽ. Te ñà túú cuéchi càhnu nĩ quide-dé nõu quíhìⁿ-dé vecaá àdi cahni-í-dé. ³⁰ Te ní níhì-í tnúhu sá cuè tée isràél ndúcú-güedẽ nàcuáa cada-güedé cahni ñaha-güedẽ xii-dé, xiáⁿ ní xáhaⁿ-í xii sandàdú-í sá cándèca ñaha-güedé quixi xiáⁿ. Te ní xáhaⁿ-í xii cue tée tée ñaha cuéchi sá quíxì-güedẽ ndée xiáⁿ cãháⁿ-güedé nõu ná cuéchi ní quide-dé. Te cada càhnu iní-n chi duha-ni ndùu tnúhu càháⁿ-í, te cundee ìní-n quèheⁿ cuendá-n-dẽ”, duha ní chídó tnùnì tée ní cadúha tutú cuáháⁿ ndaha té Juélì.

³¹ Te cue sandàdú ní quide-güedé nàcuáa ní xáhaⁿ tẽ tàxi tnunì ñáhá xii-güedé chi ní xica-güedé ndihì té Păblú òré caá ííⁿ niú, te dıu-ni niú-áⁿ nĩ quexio-güedé ñuú Antipatrís. ³² Te sátá nĩ túndaá, te ní nacuico cuè tée xĩnehe lànzá ndihì dava-gá sandàdú xícá sàha cuánuhú-güedé cuártél, te mee-nã sandàdú cue tée yòdo cuayú cuáháⁿ ndihì té Păblú. ³³ Te òré ní quexio-güedé ñuú Cèsareá, te ní sàha-güedé tée cùu gobiernú tutú néhé-güedẽ cuáháⁿ. Te ní queheⁿ cuendá-dé té Păblú. ³⁴ Te sátá nĩ dăcuáhá tẽ cùu gobiernú-áⁿ tutú-áⁿ te ní xícáⁿ tnúhú-dẽ nõú tẽ Păblú, te xăhaⁿ-dẽ:

—¿Ndéé téé cùu-n? —cachí-dé xǎhaⁿ-dě.

Te ní xǎhaⁿ tǝ Pǎblú:

—Téé Ciliciá cùu-í —càchí-dé xǎhaⁿ-dě.

³⁵ Te ní xǎhaⁿ tǝ cùu gobiernú-áⁿ:

—Òré quexìo cue téé tǝ ñaha cuéchi xii-n, te cáháⁿ-n nása ní cuu, chi níhi-í nàcuáa cada ndáá-í cuendá-n —càchí-dé xǎhaⁿ-dě xii té Pǎblú.

Te ní xǎhaⁿ-dě xii sandádú sá cùndéé-güedé té Pǎblú vehe càhnu té Hèrodés.

24

Té Pǎblú xǎhaⁿ-dě xii té Juǎlí sá ñà túú cuéchi-dé

¹ Te sátá ní cuu úhúⁿ nduu, te té Anàniás dútú cùnùu-gá cuáháⁿ-dé ñuú Cèsareá ndihi cue téé cùu sacuéhé ndihi ñⁿ téé nàni Tértulú téé cáháⁿ yuhu-güedé. Te cuáháⁿ-güedé núú tǝ cùu gobiernú cuáháⁿ dácúándèhnde-güedé núú-dě sá ndècuéchi té Pǎblú. ² Te ní sǎnguaca-güedé té Pǎblú. Te òré ní quexìo-dé núú-güedé, te ní ngüíta té Tértulú xǎhaⁿ-dě xii té Juǎlí nàcuáa càa cuéchi tǝ-güedé té Pǎblú:

—Ío càhnu cada iní tǎtá gobiernádór. Duha ndùu chiuⁿ ndéé iní ñáhá-ndǎ xii-n vǝxi-ndǎ, núu nása cachí-n cùnduu. Táxǎhu xii-n, chi ío váha ndècu nchaa ñáyiu, te ñá túú nàá-yu chi ío váha quíde-n.

³ Te ío cùdíí iní-yu chi nchaa-ni nduu xǎndecu váha-yu ncháá-yu, te ío táxǎhu Ndiǎxí xii-n sǎ dúcáⁿ quíde-n. ⁴ Te cada càhnu iní, cuíní-í ndatnúhu-o ñⁿ úú-ni cuèndú cuendá sá vǎ cùyàa-o dácúíta-í chiuⁿ-n. ⁵ Te ñⁿ téé iha ío dàsatú iní ñáhá-dě, chi ndèni ní cuu cuáháⁿ-dé ndátnúhu-dé ndihi ñáyiu isráel dánáá-dé-yu. Te nèhé quíde-dě chi cuáháⁿ-dé dácáháⁿ-dé nchaa ñáyiu cuendá quíndáá iní-yu

tnúhu téé ní xíndecu ñúú Nazàrét. ⁶ Chi ducaⁿ càháⁿ cue téé iha sá ñí sáháⁿ-dé veñúhu càhnu sá ïo cùnunu, te cuíní-dé daqueè tihú-dé veñúhu cuendá cuíní-dé xocàni-dé sá ïí ndécú, núu xíáⁿ ní tñi ñaha-güedé ndécá ñaha-güedé cuáháⁿ núu cuè téé cùchiuⁿ cuendá cácaⁿ tnúhú-güedé núu-dé nñu ná cuendá ducaⁿ cuíní-dé cada-dé, chi ducaⁿ càa lei ndécú ndihi-güedé sá cáda ndáa-güedé nñu ná ñiⁿ sá cúu. ⁷ Te té Lisiú téé cùu capitáⁿ cùnù-gá ní quexìo-dé ndihi sandàdú, te ní dácúnú-güedé nchaa cue téé nùtniⁿ ndihi té Pàblú, te dàtnùní ní tñi ñaha-güedé xii-dé ndécá ñaha-güedé cuáháⁿ. ⁸ Te sáta xíáⁿ, te ní xáhaⁿ-dé sá quixí-güedé ndéé ndiha cundáa cuéchi-dé. Te yòhó cundee ìni-n càcáⁿ tnúhú-n nñu-dé, te núu ndáa ducaⁿ ñí guide-dé àdi ñáhá —càchí té Tèrtulú xáhaⁿ-dé xii té Juèlí téé cùu gobiernú.

⁹ Te dava-gá cue téé isràél xínutniⁿ xíáⁿ ñí cáháⁿ-güedé sá ndáa càháⁿ té Tèrtulú. ¹⁰ Te téé cùu gobiernú ní guide-dé ndaha-dé núu tè Pàblú cuendá cáháⁿ-dé, te té Pàblú ní xáhaⁿ-dé:

—Yòhó sa ní cuu titní cuía ndécú-n ìha xehndé-n cuéchi nchaa ñáyiú xíàá, núu xíáⁿ ïo cùdñiⁿ ìni-í sá ndiha téhndé cuéchi tèe ñaha-güedé xii-í. Te cundee ìni-n cùndedóho-n na càni-í cuendú nàcuáa ní cuu. ¹¹ Te nducu tnúhu-n te quiniⁿ nă càháⁿ ndáa-í, chi sa ní cuu úxúú nduu sá ñí sáháⁿ-í veñúhu càhnu sá ïo cùnunu ñúú Jerusàlén ní cáháⁿ ndihi-í Yá Ndiòxí. ¹² Te ni ñà túú ní nàa-í ndihi ñáyiú xití veñúhu, te ñà túú ní xáhaⁿ-í nàa-yu ni ñiⁿ xichi, te ni ñiⁿ veñúhu lĩhli ní sáháⁿ-í ñà túú nă ní xáhaⁿ-í cáda-yu. ¹³ Te ni ñà túú quèñuhu-güedé cue téé cáháⁿ ndáa te núu

ndáá ducaⁿ nĩ quide-í. ¹⁴ Te yúhú càháⁿ ndáá-í sá càháⁿ ndihí-í Yă Ndiöxí, chi diu-ni Yă Ndiöxí ní xóo cáháⁿ ndihí ñáyiú ndéé sanaha, núu xíăⁿ ní tuha-í ichi-gá. Te cue té-e-a cächí-güedé sá ñă díú ñⁿ ichi váha ni tuha-í. Te yúhú sàndáá iní-í nchaa sá nĩ chídó tnùní ndíi Moisés ndihí dava-gá cue té-e ní xóo cáháⁿ tnúhu Yă Ndiöxí ndéé sanaha. ¹⁵ Te sàndáá tucu iní-í sá ndótó nchàa ñáyiú ní xíhí, cuěi ñáyiú váha iní-xi, te cuěi ñáyiú úhú iní-xi, dico ndotó-yu. Te ducaⁿ nĩ xóo quindáá iní nchaa ñáyiú ní xíndecu ndéé sanaha. ¹⁶ Te yúhú ío ndùcu ndee-í quidè-í nchaa sá càháⁿ Yă Ndiöxí cuendá sá vă cúú càhaⁿ núú-í núú-gă ndihí núú ñáyiú ñuyíú-a.

¹⁷ Te sa ní cuu titní cuíá să ñă túú-gă sàháⁿ-í ñuú Jerusálén, te ní sáháⁿ tucu-í néhè-í díhúⁿ nĩ taxi ñáyiú ñuú xícá cuendá cuáñaha-í xii ñáyiú ñuú Jerusálén. Te ní ndúcù-í sá cuăha táhù-í Yă Ndiöxí. ¹⁸ Te ní xíndecu-í veñúhu càhnu sá ío cùnunu ní quide-í nchaa nàcuáa ní xóo cada ñáyiú ní xíndecu ndéé sanaha cuendá nduu vétú iní Yă Ndiöxí. Te ñă túú chítú-yu ni sáháⁿ, te ni ñă túú nă ní cùu, te ní naníhí ñáhá ñⁿ úú cue té-e isràél xii-í, cue té-e véxi distritú Àsiá. ¹⁹ Te quixi mee-güedé iha cáháⁿ-güedé, te núu sá ndáá ní xini-güedé sá yúhú ndècuéchi-í ní cùu, ²⁰ àdi ñáhá. Dico cachí tnúhu cue té-e-áⁿ năsa ní cuu òré ní xíndecu-í jündá-güedé nũu ndècuéchi-í àdi ñă túú ndècuéchi-í. ²¹ Dico ñă túú cuéchi-í chi ñⁿdi-ni tnúhu ni cáháⁿ-í ní xáhaⁿ-í xii-güedé sá sàndáá iní-í sá ndótó nchàa ñáyiú ní xíhí, te diu-ni núu xíăⁿ cächí-güedé sá ndècuéchi-í — cächí té Păblú xăhaⁿ-dě xii té Juělí.

²² Te té Juělí sa xíní váha-dé nàcuáa cuáháⁿ tnúhu Jèsús, núu xíăⁿ ñă ní cuíní-gá-dé ndatnúhu-dé ndihí

té Păblú, te ní xáhaⁿ-dě:

—Sa ní cuu, cundetu-n na quèxio té Lìsiú té cùu capitáⁿ cúnùu-gá, te òré-áⁿ cundáá cuendá-n —càchí té Juělí xáhaⁿ-dě.

²³ Te ní xáhaⁿ-dě xii té cùu capitáⁿ:

—Cundeé-n tē Păblú-ăⁿ, te núu nása càchí-dé cada-n, te dañá-n na càháⁿ ndihí-dé cue té xíní tnáhá ndihí-dé núu cuáñaha-güedē nchaa sá xíní ñùhu-dé àdi nása cada-güedē —càchí té Juělí xáhaⁿ-dě xii té cùu capitáⁿ.

²⁴ Te ní cuu titní nduu, te ní sáháⁿ té Juělí vechiùⁿ ndihí ñadihí-dé, te ñaha-áⁿ nání-áⁿ Drùsilá, te ñaha israél cúu-áⁿ. Te ní xáhaⁿ-dě sá quǵueñuhu-güedé té Păblú, te òré ní quexiò-dé vechiùⁿ, te ní cáháⁿ-dé núũ-yu nchaá-yu sá quìndáá iní-yu tnúhu Xítóhó Jesucristú. ²⁵ Te ní xáhaⁿ-dě:

—Mee-ni sǎ vǎha cada-ndo. Te coto-ndo mēe-ndo, te vǎ cáda-ndó nì ìⁿ sá cuèhé sá dúhá, chí ìⁿ nduu cáháⁿ Yǎ Ndiǒxí ndēdacà ñáyiú váha iní-xi, te ndēdacà ñáyiú úhú iní-xi —càchí té Păblú xáhaⁿ-dě.

Te sá dúcáⁿ nǐ xáhaⁿ-dě, te ní yùhú té Juělí, te ní xáhaⁿ-dě:

—Vǎ càháⁿ-gá-ó tnàvíí, cuàháⁿ, te òré cúyǎchí-í, te cana ñaha-í xii-n —càchí-dé xáhaⁿ-dě.

²⁶ Te té Juělí ní quide-dé cuendá sá cuáñaha tē Păblú díhúⁿ te vǎ ndǐhu-gá-dé vecaá ní cùu, núu xiǎn titní xito ní cana-dé té Păblú vechiùⁿ ní ndatnúhu ndihí tnàha-güedé, dico ñá túú ní chǎhu-dé. ²⁷ Te úú cuíá ducaⁿ nǐ quide-güedé, te dǎtnùní ní xínu té Juělí chìuⁿ-dé, te ní ngúnutní té Pòrsiú Fèstú. Te òré ní xínu té Juělí chìuⁿ-dé, te ní

dándõo-dé té Păblú yíhí-ni-dě vecaá. Te ducaⁿ nĩ guide-dé cuendá ní cuiní-dé cudìu-dé núú cuè téé isràél.

25

Té Păblú càháⁿ ndihí-dé té Fèstú

¹ Te ní cuu úní nduu sá nĩ quexìo té Fèstú ñuú Cèsareá ní queheⁿ-dé chiuⁿ, te ní quee-dé cuáháⁿ-dé ñuú Jerusálén. ² Te yàcáⁿ ní naníhí tnáhá-dě ndihí nchaa dútú cúnùu ndihí nchaa cue téé tàxi tnuní ñáhá xii ñáyiú isràél, te xăhaⁿ-güedě xii té Fèstú sá ndáá ndècuéchi té Păblú. ³ Te ní cáháⁿ ndàhú-güedé núú-dě sá téndàha-dé sandàdú-dé quíngueñuhu ñaha-güedě vecaá xii-dé ndéé ñuú Cèsareá te candeca ñaha-güedě quíhíⁿ. Te ducaⁿ nĩ cáháⁿ-güedé, chi ní ndatnúhu-güedé sá cáhní ñaha-güedé xii té Păblú ichi ni cùu. ⁴ Te té Fèstú ní xăhaⁿ-dě:

—Vá cúú quixi-dé ndéé ndíha. Na cùndetu-dé ñuú Cèsareá chi sacú-ni nduu cuyaa-í iha te dătnuní núhú-í yàcáⁿ. ⁵ Te yáchí-gá quíhíⁿ ndihí-í cue téé cùnuu-gá, te yàcáⁿ cuu cáháⁿ-ndó nñu ndáá ndècuéchi-dé àdi cáháⁿ méé-dě nñu ndáá ndècuéchi-dé àdi ñáhá, te cutnùní iní-ndó —càchí-dé xăhaⁿ-dě.

⁶ Te ní xíndecu té Fèstú úná úxí nduu ñuú Jerusálén, te dătnuní cuánuhú-dé ñuú Cèsareá. Te nduu tnéé cuáháⁿ-dé vechiⁿ, te òré ní quexìo-dé, te ní xăhaⁿ-dě xii cue sandàdú xínú cuèchi sá quíhíⁿ-güedé queñuhu-güedé té Păblú vecaá te candeca ñaha-güedě quíhíⁿ vechiⁿ. ⁷ Te òré ní quexìo té Păblú vechiⁿ, te sa ndècu cue téé isràél cue téé ní quee ñuú Jerusálén, te cuánguihu-güedé ndéé dìñi té Păblú ní ngúnutnîi-güedé, te xăhaⁿ-güedě xii

cue té cùchiuⁿ sá ndècuéchi vîhi-dé, dico ñá túú ní cùndee tnúhu-güedé. ⁸ Te té Păblú ní xáhaⁿ-dě xii té Fèstú:

—Ñá túú ndècuéchi-í, ñá túú nă ní quide-í, chi ñá túú tnàhá iní-í cada-í ñⁿ sá cächí lèí sá vă cúú càda-o. Te ni xití veñúhu cànnu sá ïo cùnū ñá túú nă quide-í, te ni té Cèsár té yîndaha cuéhé nacióⁿ ñá túú cáháⁿ cuéhé-í cuëndá-dé —cächí té Păblú xáhaⁿ-dě xii-dé.

⁹ Te té Fèstú ní cuiní-dé cada-dé nàcuáa cudîu-dé núú cuè tée isràél ní cùu, núu xîáⁿ ní xáhaⁿ-dě xii té Păblú:

—¿Cundee iní-n quîhíⁿ-n ñùú Jerusàlén-ăⁿ? Te yàcáⁿ cundáá cuéchi sá sàá díquí-n —cächí té Fèstú xáhaⁿ-dě xii té Păblú.

¹⁰ Te xáhaⁿ tē Păblú:

—Dîu-ni ñⁿ vechîuⁿ té cùchiuⁿ Cèsár ndécù-í iha, te dîu-ni iha cada ndáá-n nûu cuiní-n ní cùu. ¿Te ná cuëndá candeca ñaha-n quîhíⁿ ingá xichi? Yòhó tnàhá-n xini-n să ñà túú nă quide-í ñá yiu isràél. ¹¹ Chi núu dîcô yúhú ní quide-í ñⁿ cuéchi cànnu, te ñá túú nă cada-xi cuēi na cànhi ñaha-ndo xii-í ní cùu. Te sa ní cutnùní iní-n să ñă ndàá, chi mee-ni tnúhu ndehnde xîcáháⁿ-güedé, te ñá túú ndûu váha-xi ducaⁿ càda-n cúñaha-n să quîhíⁿ-í ndîhi-güedé ingá xichi. Te xîáⁿ cuiní-í quîhíⁿ-í núú tē Cèsár té yîndaha cuéhé nacióⁿ, te yàcáⁿ cáháⁿ méé-dē nûu ndáá ndècuéchi-í —cächí té Păblú xáhaⁿ-dě xii té Fèstú.

¹² Te ní ndatnúhu té Fèstú ndîhi cue tée chîndee tnúhu ñaha xîi-dé, te dătnùní ní xáhaⁿ-dě xii té Păblú:

—Te sa ní cáháⁿ-n sǎ quíhíⁿ-n quítnahá-n tǎ Cèsár
te ñu-ni quíhíⁿ-n, te quiniⁿ-n ñása cáháⁿ tée-ǎⁿ yàcáⁿ
—càchí-dé xǎhaⁿ-dě xii té Pǎblú.

*Té Pǎblú càháⁿ ndihí-dé té Àgripá tée yìndaha
nacióⁿ Isràél*

¹³ Te sǎtá ñí cuu cuéhé nduu, te ní quee té Àgripá
tée yìndaha nacióⁿ Isràél cuáháⁿ-dé ñuú Cèsareá
ndihí ñadihí-dé, te ñaha-áⁿ nání-áⁿ Berènicé te òré
ní quexìó-yu, te ní cáháⁿ ndihí-yu té Fèstú. ¹⁴ Te
sǎtá ñí cuu titní nduu, te ní cáháⁿ té Fèstú cuèndá
té Pǎblú ní xii-dé té Àgripá:

—Ndècu ñíⁿ tée ní dándõo té Juéli vecaá nání-dě
Pǎblú. ¹⁵ Te cútnahá ní sáháⁿ-í ñuú Jerusalén ní
nanítnáhà-í ndihí cue dútú cúnùu ndihí cue tée cùu
sacuéhé nùú ñǎyiu isràél. Te ní dácáá díquí-güedě
té Pǎblú cuéchi, te ní cachí-güedé sá táuchùuⁿ-í cahni
ñaha-güedě xii-dé ní cùu. ¹⁶ Te ní xáhaⁿ-í xii-güedé
sá vǎ cúú, chi ñǎ túú dùcaⁿ quide nchúhú cue tée
rómá cùtexínu cada castiú-ndí ñáyiu, chi díhna-gá
ndúcú tnǎhu-ndí núú ñǎyiu sàá cuéchi díquí-xi
cuèndá quiniⁿ-ndí nùu nása cáháⁿ méě-yu ndihí
ñáyiu sàcáⁿ cuéchi cuèndá-yu, te òré-áⁿ cútnùní
iní-ndí nùu ndáá ndècuéchi-yu àdi ñáhá, te ducaⁿ
te ñihí-ndí nàcuáa quide ndáá-ndí cuèndá-yu, duha
ní xáhaⁿ-í xii-güedé —càchí té Fèstú xǎhaⁿ-dě xii té
Àgripá.

¹⁷ Te ní xáhaⁿ tùcu té Fèstú:

—Te sǎtá ñí quexìo-güedé ndéé ndíha, te nduu
tnéě ní sáháⁿ-ni-ndí vechiùⁿ. Te ní xáhaⁿ-í sá
quingueñuhu-güedé té Pǎblú candeca ñaha-güedě
quixi, te òré ní quexìo-dé, ¹⁸ te ní ngüíta-güedé

xăhaⁿ-güedě sá ndècuéchi-dé. Te ní sani iní-í sá ííⁿ cuéchi cằhnu tee ñaha-güedé dico ñáhá, chi dìcò-ni sá ííⁿ tnũhu ní cáháⁿ-dé, xĩaⁿ ducaⁿ nĩ quide-güedé. ¹⁹ Te ní tenàá ñáhá-güedě xii-dé, chi cằchí-güedé sá ñà túú cằháⁿ váha-dé cuendá ndiõxí-güedě. Te tnàhá-ni cuendá ííⁿ tée nani Jesús cằháⁿ-dé, chi cằchí-dé sá nĩ xíhí tée-áⁿ te ní ndoto-dé cằchí-dé xăhaⁿ-dě xii-güedé, cằchí-güedé. ²⁰ Te ñà ní cùtnuní iní-í nása cúñaha-ĩ xii-güedé cuendá téhndé cuéchi-dé. Te xĩaⁿ ní xícáⁿ tnúhu-í núú tẽ Păblú nũu cundee ìní-dé quíhíⁿ-dé ñuú Jerusàlén, te ndéé ndíacăⁿ cada ndáá-ndí cuendá-dé, te núu ndáá ndècuéchi-dé nàcuáa cằháⁿ-güedé àdi ñáhá ní cùu. ²¹ Te dătnuní té Păblú ní cằchí-dé sá cùndècu tnaa-dé vecaá te dătnuní quíhíⁿ-dé núú tẽ Cèsár, te tée-áⁿ cada ndáá-dé cuendá-dé. Te cuendá sá dúcáⁿ nĩ cáháⁿ té Păblú, xĩaⁿ nũu ní xáhaⁿ-ĩ sá cùndéé ñáhá cuè sandadú xii-dé, nini na còto-í nása cada-í quíhíⁿ-dé núú tẽ Cèsár, duha ní xáhaⁿ-ĩ xii-güedé — cằchí té Fèstú xăhaⁿ-dě xii té Àgripá.

²² Te té Àgripá ní xáhaⁿ-dě xii té Fèstú:

—Te tnàhá yúhú ío cudíí ìní-í cundedóho-í tnúhu cằháⁿ-dé —cằchí-dé xăhaⁿ-dě.

Te ní xáhaⁿ tẽ Fèstú:

—Tneé cana-í-dé te cundedóho-n nása cáháⁿ-dé —cằchí-dé xăhaⁿ-dě.

²³ Te nduu tněé ní quexì té Àgripá ndihì ñadìhí-dé tá Berènicé vechiunⁿ, te ío ní quide cằhnu ñaha-güedé xií-yu. Te cuánguihú-yu vechiunⁿ ndihì cue tée cùu capitáⁿ cùnũu-gá ndihì cue tée cùnũu ñuú Cèsareá. Te té Fèstú ní xáhaⁿ-dě sá quĩngueñuhu-güedé té Păblú vecaá, te òré ní

quexìo-dé, ²⁴ te ní xáhaⁿ tẽ Fèstú xii té Àgripá ndihi nchaa ñáyiú xĩndecu-áⁿ:

—Chí cùndèhe téé iha chi téé-a càchí cue téé isràél sá ndècuéchi-dé, te cùtnàhá ní xĩndecu-í ñuú Jerusàlén ní cachí-güedé sá ndàá ndècuéchi-dé, te diu-ni ducaⁿ càháⁿ-güedé iha. Te nchaa-güedé ní cuáá-güedé te càchí-güedé sá táuchìuⁿ-í cahni ñaha-güedé xii-dé ní cùu. ²⁵ Te sáta ní ndihi cuèndú ní cáháⁿ-güedé, te ní cutnùní iní-í sá ñà túú nì ìⁿ cuéchi càhnu nì guide-dé, núu ñá túú ní tàuchìuⁿ-í cahni ñaha-güedé xii-dé. Te mee-dé ní cachí-dé sá quíhíⁿ-dé núú tẽ Cèsár téé yìndaha cuéhé nacióⁿ, te ní xáhaⁿ-í sá cúú quíhíⁿ-dé. ²⁶ Te ñá túú ní xìní váha-í nása ní guide-dé, núu xǎⁿ ñá ní ñhì-í nàcuáa cadúha-í tutú quíhíⁿ ndaha té Cèsár, te xǎⁿ ní cana-í-dé véxi-dé iha cuèndá nchaa-ndo cǎháⁿ ndihi-ndo-dě. Te ducaⁿ cànuu cadíhna-gá yòhó tǎtá Àgripá cácaⁿ tnúhú-n nǔú-dě nǔu nása cáháⁿ-dé, te òré-áⁿ cutnùní iní-í nása cada-í cadúha-í tutú quíhíⁿ ndaha té Cèsár. ²⁷ Chi sàni iní-í sá ñà túú ndùu váha-xi sá quíhíⁿ ìⁿ téé tàú cuéchi te núu vá códó tnùní núú ìⁿ tutú nàcuáa càa cuéchi tàú-dé —càchí té Fèstú xǎhaⁿ-dě xii-güedé.

26

Te Pǎblú càháⁿ ndihi-dé té Àgripá

¹ Te dǎtnùní ní xáhaⁿ tẽ Àgripá téé yìndaha nacióⁿ Isràél xii té Pǎblú:

—Te vitna cáháⁿ-n nǔu nása ní cuu cuèndá-n —càchí-dé xǎhaⁿ-dě.

Te té Păblú ní ndacani-dé ndaha-dé sá cùndedóho-güedé, te ní xáhaⁿ-dě xii té Àgripá té yìndaha nacióⁿ Isràél:

2-3 —Tătá Àgripá, ío cùdíí ìní-í sá nǐ naníhí tnáhá-ó vitna, chi yòhó ío váha xìní-n nchàa nacuáa quide ñáyiú isràél quidé càhnú-yu Yá Ndiǒxí, te ío váha xìní-n nchàa tnúhu xǐtnáhá-yu. Te vitna cundee ìní-n cùndedóho-n ìⁿ úú tnúhu na càháⁿ-í. Na càchí tnúhu-í sá ñă ndáá ní quide-í nchaa sá càháⁿ cue téé isràél.

Té Păblú càháⁿ-dé nàcuáa ní quide-dé cútnàhá vátá túhá-gă-dé ichi Yá Ndiǒxí

4 Te sa nàha nchaa cue téé cùnuu núú ñáyiú isràél nàcuáa ní quide-í ñuú-í ndihí ñuú Jerusàlén cútnàhá ní cuu landú-í. 5 Te mee-güedě nàhá-güedě sá ndée lǐhli-í ní chitnahá-í cue téé cùu fariséú. Te núu cuìní-güedé càháⁿ-güedé sá tée fariséú cùu-í àdi ñàhá dico nchaa-güedé sa nàha-güedé sá cuè téé-áⁿ nǐ chitnahá-í. Te cue téé cùu fariséú-áⁿ ío cuìní-güedé cada-güedé nchaa nàcuáa nchìcúⁿ nihnu ñáyiú quidé-yu. Te yúhú nchaa sá nchìcúⁿ nihnú-yu quidé-yu-áⁿ nǐ quide-í. 6 Te vitna ndècu-í iha, te càháⁿ-n núu váha-ni quide-í àdi ñàhá, chi cue téé-ăⁿ tée ñàha-güedé cuéchi xii-í cuèndá sá sàndáá ìní-í sá ndótó nchàa ñáyiú ní xíhí. Te ñu-ni ducaⁿ nǐ xáhaⁿ Yá Ndiǒxí xii nchaa ñaní tnáhá-ó nǐ xíndecu ndée sanaha. 7 Te nchaa ñáyiú-áⁿ xǐndetú-yu nduu ndòto ñáyiú ní xíhí ní cùu. Te ñu-ni ducaⁿ ndètu nchaa ñaní tnáhá-ó ndècu ñuyíú-a ndée vitna, te xǐăⁿ núu cuèi nduu cuèi niú càháⁿ ndihí-yu Yá Ndiǒxí. Te sá sàndáá ìní-í núu xǐăⁿ ní càháⁿ-í, te tèé ñàha cue téé isràél cuéchi xii-í. 8 ¿Te ná cuèndá

nchòhó cue tée isràél ñá túú cuíní-ndó quìndáá iní-ndó sá dándòto Yá Ndiǒxí nchaa ñáyiú ní xíhí? —càchí té Păblú xăhaⁿ-dě.

Té Păblú cání-dě cuèndú sá nǐ xóo chihi-dé ñáyiú sàndáá iní tnúhu Jèsús vecaá

⁹ Te ní xăhaⁿ tucu té Păblú:

—Ndéé dàvâ-áⁿ nǐ quide úhú-í ñáyiú sàndáá iní-xi tnúhu Jèsús Yaá ní quee ñuú Nazàrét, te ní cáhàⁿ-í sá văha-ni ní quide-í sá dúcáⁿ nǐ quide-í.

¹⁰ Te diu-ni ducaⁿ nǐ quide-í ñuú Jerusàlén. Te cue dútú cúnúú ní taxi-güedé ìⁿ tutú cuendá tñi-í ñáyiú ní sàndáá iní tnúhu Jèsús, te vâi-yu ní chihi-í vecaá. Te òré ní cáhàⁿ-güedé sá cáhni-güedé ñáyiú-áⁿ, te tnàhá-í ní cáhàⁿ-í sá cúú càhni ñaha-güedé xií-yu.

¹¹ Te títñí xito ní sáhàⁿ-í nchaa veñúhu ñáyiú isràél, te ní cani-í-yu te ní xăhaⁿ-í sá dáñă-yu ichi Jèsús. Te cuendá ío ní cudéèⁿ-í núŭ-yu, xǎⁿ ní sáhàⁿ-í nchaa ñuú xícá nǐ sánúndúcù-í dava-gá ñáyiú sàndáá iní tnúhu-gá cuendá dandòho ñaha-güedé xií-yu.

Té Păblú càháⁿ tucu-dé nása ní cuu ní tuha-dé ichi Yá Ndiǒxí
(Hch. 9:1-19; 22:6-16)

¹² Te cuendá xǎⁿ ní xica tucu-í cuáhàⁿ-í ñuú Dàmascú, néhè-í tutú nǐ taxi cue dútú cúnúú cuáhàⁿ, cuendá sá ndácù-í tñi-í nchaa ñáyiú sàndáá iní tnúhu Jèsús ní cùu. ¹³ Te òré caúxúú nduu ñùhu-í ichi cuáhàⁿ-í, te uuⁿni ní quee ñuhú andiú nǐ dáyèhé-xi ndéé núú nútñi-í ndihi cue tée ndèca tnaha ndihi-í, te níhi-gá ní dáyèhé-xi dàcúúxí nchĩcanchii. ¹⁴ Te nchaa-ndí ní nduá-ndí ndéé ñuhu, te ní tecú dóho-í càháⁿ ìⁿ sá càháⁿ tnúhu ñáyiú isràél, te càchí-xi: “Yòhó Sàulú, ¿Ná cuendá cúú ũhú

iní ñáhá-n xii-í dándòho ñaha-n? Te ío dándòho-n mee-n, chi dàtná cuíní-n quide ndicutu quide-n chi quiti-áⁿ òré cǔxi-güedé-di pùyá te sǎha-di patadá núú-xi, te sá dúcáⁿ quide-di te quide úhú-di mee-di. Te ducaⁿ sǎtnahá-xi cùu yohó chi ñá túú sàndáá iní ñáhá-n xii-í”, cǎchí sá nǐ cǎháⁿ-áⁿ. ¹⁵ Te ní xáhaⁿ-í: “¿Ná cúú yòhó sá nǐ cǎháⁿ-ái?””, xáhaⁿ-í. Te cǎchí sá cǎháⁿ-áⁿ: “Yúhú cúú-í Jèsús Yáá cúú úhú iní-n”, duha ní cachí sá cǎháⁿ-áⁿ. Te xiǎⁿ ní cutnùní iní-í sá Jèsús cǎháⁿ. ¹⁶ Te ní cachí-gá: “Ndacuñí-n chi yúhú cǎháⁿ-í chi cuíní-í quíhíⁿ-n càda-n chiuⁿ-í, chi quíhíⁿ-n cǎháⁿ-n núú ñǎyiu nàcuáa ní cuu ní xiní ñáhá-n xii-í vitna, te quixi tucu-í cǎháⁿ ndihí ñaha-í xii-n, te cúñaha-n xii-yu nàcuáa cǎháⁿ-í. ¹⁷ Chi cuíní-í quíhíⁿ-n cǎháⁿ-n tnǔhu-í núú ñǎyiu isràél ndihí núú ñǎyiu ñá túú cùu ñáyiu isràél, te coto ñaha-í xii-n cuèndá vá cǎhní ñàhá-yu xii-n. ¹⁸ Te cuíní-í quíhíⁿ-n cǔñaha-n xii-yu sá dáñǎ-yu nchaa ichi cuèhé ichi duha ndècú-yu, te tuhá-yu ichi váha cuèndá vá quíndáá iní-yu cadá-yu sá cǎháⁿ yucu ñǎvǎha, te quíndáá iní-yu cadá-yu nchaa nàcuáa cǎháⁿ Yǎ Ndiǒxí. Te núu na quíndáá iní-yu tnúhu cǎháⁿ-í, te cada cǎhnu iní-í nchaa cuéchi-yu, te naníhí tàhú-yu ndihí dava-gá ñáyiu sa ní xócuíñí nchaa sá cuèhé sá dúhá nǐ xíndecu iní-yu”, duha ní cachí-gá xii-í —cǎchí té Pǎblú xáhaⁿ-dǎ xii té Àgripá té yíndaha nacióⁿ Isràél.

Té Pǎblú quidé-dǎ nchaa nàcuáa ní xáhaⁿ Jèsús cada-dé

¹⁹ Te ní xáhaⁿ tùcu té Pǎblú xii té Àgripá:

—Ñá túú dàña ndeé-í quidè-í nchaa nàcuáa ní cáháⁿ Jèsús òré ní cáháⁿ-gá andiu. ²⁰ Te díhna-gá ñáyiú ñuú Dàmascú ní cáháⁿ-í tnúhu-gá núú-yu, te ní xáhaⁿ-í xii-yu sá dáñá-yu nchaa sá cuèhé sá dúhá quidé-yu, te cáháⁿ ndihí-yu Yá Ndiöxí, te cadá-yu mee-ni sã vãha cuendá cutnùní iní dava-gá-yu sá nĩ dáñá-yu nchaa sá ñà túú vãha ní xóo cadá-yu. Te ducaⁿ-ni nĩ xáhaⁿ-í xii ñáyiú ñuú Jerusàlén ndihí ñáyiú nihíi nàcióⁿ Isràél ndihí nchaa ñáyiú ñá túú cùu ñáyiú isràél. ²¹ Te cuendá sá dúcáⁿ nĩ cáháⁿ-í núu ní tñii ñaha cuè téé isràél xii-í cútnàhá ní sáháⁿ-í veñúhu càhnu sá ïo cùnuu càhni ñaha-güedé ní cùu. ²² Te ñu-ni mee Yá Ndiöxí ní chindee ñàha-gá xii-í núu ndècu-í iha tnàvíí cáháⁿ-í tnúhu-gá, te mee-ni tnúhu-gá cáháⁿ ndihí-í ncháa-yu, cuèi ñáyiú cuica, te cuèi ñáyiú ndàhú. Te ndíi Moisés ndihí dava-gá cue téé ní xóo cáháⁿ tnúhu Yá Ndiöxí ndéé sanaha nĩ cáháⁿ-güedé nàcuáa cada-xi vitna, te ñu-ni ducaⁿ cáháⁿ-í nchaa-ni nduu. ²³ Te cue téé-áⁿ nĩ cachí-güedé sá Crístú Yaá tendaha Yá Ndiöxí quixi ñuyíú-a ndoho tnahá-gá, te cuú-gá, te dàtnùní ndoto-gá. Te ducaⁿ càda-xi nchaa ñáyiú ní xihí ndotó-yu núu na sàá nduu chi ducaⁿ càda-xi ní cachí méé Yá Ndiöxí. Te cuendá sá dúcáⁿ nĩ ndoto-gá, xĩáⁿ cútnùní sá cúú nàníhí tàhú ñáyiú, cuèi ñáyiú isràél, te cuèi ñáyiú ñá túú cùu ñáyiú isràél. Te dàtná-ni ndùu tnúhu ní cáháⁿ cue téé ní xóo cáháⁿ tnúhu-gá ndéé sanaha-áⁿ, te ñu-ni ducaⁿ cáháⁿ yúhú tucu —càhí té Páblú xáhaⁿ-dě.

Té Páblú xáhaⁿ-dě xii té Àgripá sá quèndáá iní-dé tnúhu Jèsús

²⁴ Te sá dúcáⁿ nĩ cáháⁿ té Păblú, te ní cáháⁿ níhi té Fèstú, te xăhaⁿ-dě:

—Păblú, ío lùcú càháⁿ-n! Cuendá ío vại ní dăcuáhăⁿ, núu xăăⁿ ndádă lùcú ñáhă-xí xìi-n —cachí-dé xăhaⁿ-dě.

²⁵ Te ní xăhaⁿ tẽ Păblú:

—Ñáhă, vá dúcáⁿ căháⁿ-n chi ñă díú să lùcú-í duha càháⁿ-í, chi tnúhu ndáá càháⁿ-í. ²⁶ Te té Àgripá-a sa năha-dé ndihĩ nchaa ñăyiu isrăél năcuăa ní cuu, chi sa ní níhĩ-dě tnúhu ndihĩ dava-gá-yu năcuăa ní cáháⁿ-í, núu xăăⁿ cùyî-í càháⁿ ndihĩ-í-dé —cachí-dé xăhaⁿ-dě xii té Fèstú.

²⁷ Te ní xăhaⁿ-dě xii té Àgripá:

—Yúhú sa xìnĩ-í sá sàndăá inĩ-n tnúhu ní chídó tnùnĩ cue tée ní xóo cáháⁿ tnúhu Yă Ndiôxí ndée sanaha —cachí-dé xăhaⁿ-dě.

²⁸ Te ní xăhaⁿ tẽ Àgripá:

—¿Quide-n cuendá sá íĩⁿ úú tnúhu ní cáháⁿ-n te quindăá inĩ-í tnúhu Jèsús cáháⁿ-n-ăⁿ? —cachí-dé xăhaⁿ-dě.

²⁹ Te ní xăhaⁿ tùcu té Păblú:

—Cuěi vîtna te cuěi ndée cuée-gá dico cuinĩ-í sá dăcuitĩ să quindăá inĩ-n tnúhu Jèsús. Te diu-ni ducaⁿ xicáⁿ táhù-í núú Yă Ndiôxí sá nchăá ñăyiu ndècu ndihĩ-o iha quindăá inĩ-yu tnúhu-gá dătnă cuinĩ-n nĩ quide yúhú, ducaⁿ cădă-yu. Dìcô-ni sá nũu vá quihĩⁿ-ni-yu vecaá dătnă cuinĩ-n ndòho yúhú —cachí-dé xăhaⁿ-dě xii té Àgripá.

³⁰ Te sátă dúcáⁿ nĩ cáháⁿ-dé, te ní ngúnutrăĩ té Àgripá tée yîndaha nacióⁿ Isrăél, ndihĩ té Fèstú tée cùu gobiernú, ndihĩ tá Berènicé ndihĩ dava-gá ñăyiu xîncúo yatni. ³¹ Te ní tnahă-yu ndèca tnahă-yu cuáhăⁿ ĩⁿ xio. Te ní xítñahă-yu:

—Tée-ǎⁿ ñá túú nǎ cuéchi ní quède-dé nǔu chihi ñaha-güedě vecaá àdi cahni ñaha-güedé —càchí-yu xǐtnàhá-yu.

³² Te té Àgripá ní xáhaⁿ-dě xii té Fèstú:

—Cuéchi mee-dě chi ní cachí-dé sá quǐtnahá-dé té Cèsár, xǎⁿ nǔu ndíhu tucu-dé vecaá, te núu ñá túú dùcaⁿ ní cáháⁿ-dé, te cácu-dé ní cùu —cachí-dé xáhaⁿ-dě xii té Fèstú.

27

Té Pǎblú cuáháⁿ-dé ñuú Ròmá

¹⁻² Te ní ndatnúhu-güedé sá quíhíⁿ té Pǎblú ndíhi bàrcú nàcióⁿ Itàliá, te tnàhá yúhú quíhíⁿ-í ndíhi-dé. Te tnàhá ìⁿ té nàni Aristarcú cuìní-dé quíhíⁿ ndíhi-ndí-dé, te cùu-dé té ñuú Tesàlónicá, te ñuú-áⁿ yíndèhu-xi distritú Macèdoniá. Te ní sáha cuèndá-güedé té Pǎblú ndíhi ìⁿ úú-gá cue té xìxíhi vecaá ní queheⁿ cuèndá ñáhá tǎ Jǔliú té cùu capitáⁿ, té yíndaha nchaa sandadú nání Àugustú, te ní quée-ndí nchaa-ndí bàrcú ñuú Adràmitiú. Te ní xica bàrcú-áⁿ cuáháⁿ-ndí ndíhi-xi te cuita yáha-ndí ìⁿ úú ñuú yíndèhu distritú Àsiá quíhíⁿ.

³ Te nduu tnée ní quexìo-ndí ñuú Sídón. Te ío váha ní quide té Jǔliú, chi ní dáñá-dě ní quene té Pǎblú ní sáháⁿ-dé ní cáháⁿ ndíhi-dé cue té ío váha tnàhá tnúhu ndíhi-dé nǔu cudana cundàhú iní ñáhá-güedé cuáñaha-güedé nchaa sá xíní ñùhu-dé.

⁴ Te dàtnùnì ní ndée tucu-dé bàrcú cuáháⁿ-ndí. Te ío níhi táchí te ñá ní dàña-xi caca ndáá bàrcú, te ní sáháⁿ bàrcú ndée yatni yuhu dìstritú Chìpré, te distritú-áⁿ cáá cuǎdava xití làmár, te xǎⁿ ñá túú cuéhé táchí ní yáha-ndí. ⁵ Te ta yáha-ndí cuáháⁿ, te

ní yáha-ndí ìíⁿ xio yuhu dìstritú Cìliciá ndìhì yuhu dìstritú Pànfilíá, te ní sáá-ndí ndéé ñuú Mírà ìíⁿ ñuú yíndèhu dìstritú Lìciá.

⁶ Te ní quene téè cùu capitáⁿ cuándúcú-dě ingá bàrcú, te ní níhí-dě ìíⁿ bàrcú téè ñuú Alejàndriá, ñúhú ìchi-xi quíhíⁿ-xi nàcióⁿ Itàliá. Te ní ndìcuaca ñaha-dě xii-ndí cuáháⁿ-ndí ní quée-ndí bàrcú-áⁿ, te ní xica-xi cuáháⁿ-xi. ⁷ Te ío cuèé cuáháⁿ bàrcú-áⁿ, cuéhé nduu ní xúhuⁿ-xi ìchi, te yica-ni ní quexìo-ndí yuhu ñuú Nidú, te ñá ní dàña-gá táchí quíhíⁿ ndáá bàrcú ñuú ní xícó ndùú-xi. Te ní yáha-ndí ìíⁿ xio yuhu dìstritú Crètá núú ñà túú quène vihi táchí, te ñu-ni cuádava tucu làmár cáá dìstritú-áⁿ. Te ní yáha-ndí yuhu ñuú Sàlmón, te ñu-ni Crètá yíndàha-xi ñuú-áⁿ. ⁸ Te ní yáha-ndí cuáháⁿ-ndí mee-nă núú ràyá dìstritú Crètá, te ío ní ndoho-ndí ní sáá-ndí ìíⁿ xichi núú nání Puèrtú Váha, yatni víi-ni-gá ñuú Làseá.

⁹ Te ní cuyaa vihi-ndí ìchi, ducaⁿ-ni cùu-ndí ní tnahá yóó cúúⁿ dăú táchí, te ío úhú yáha bàrcú ñuú na quíhíⁿ-ni-xi. ¹⁰ Te ní xáhaⁿ tē Păblú xii-güedé:

—Nchaa-ndo cùndedóho-ndo tnúhu na càháⁿ-í-a. Ío úhú núú na càda yica-o quíhíⁿ-ó ndìhì barcú chì cuíta càrgá te cuíta bàrcú, te cuu-ni iní-xi tnàhá-ni mee-o cúú-ó chì cáhá-ó ñuú na ngàunihnu-o xití ndute —càchí-dé xăhaⁿ-dē xii-güedé.

¹¹ Te téè cùu capitáⁿ ñá ní sàndáá iní-dé tnúhu ní cáháⁿ té Păblú. Dico tnúhu ní cáháⁿ téè dàcaca barcú ndìhì xitohó-xi chì ní sàndáá iní-dé. ¹² Te ñá ní tnàhá iní-güedé Puèrtú Váha cuèndá sá ní tnahá yóó cúúⁿ dăú táchí, te ñá túú dăhu váha

táchí xǎⁿ, núu vài-güedé ní cuiní-güedé yáha-güedé quíhíⁿ-güedé sáa-güedé ndéé ñuú Fènicé ní cùu. Te yàcáⁿ cundecu-güedé yóó cúúⁿ dǎú táchí cuěi ñá túú cāváha vīhi, chí nchìi nàcuáa yǎha bàrcú, te yàcáⁿ quǐhu táchí, dico dǎhu-gá. Núu xǎⁿ ndéé ndíacǎⁿ nátacá bàrcú yóó cúúⁿ dǎú táchí, te diu-ni Crětá yíndàha-xi ñuú-áⁿ.

Nitùhú làmár cúúⁿ dǎú táchí

¹³ Te duha ní quene nuu luha táchí, xǎⁿ ní sani iní-güedé sá ndácú-güedé quíhíⁿ-güedé, núu ní natava-güedé caá ndètní ndéé bàrcú, te ní xica-xi cuáháⁿ-xi ní yáha-ndí yatni víi yuhu dìstrítú Crětá. ¹⁴ Te tnaa-ni ní cuu sá ñí xica bàrcú, te duha ní cunuu dǎú táchí ñⁿ xio yuhu ñuú-áⁿ ¹⁵ te nchìta ichi cuáháⁿ bàrcú. Te ñá ní ndàcu-gá-xi quíhíⁿ ndáá-xi nàcuáa cuáháⁿ-xi ní cùu, núu ní dáñá-ndí cuáháⁿ méé-ñǎ bàrcú. ¹⁶ Te ní yáha-ndí ñⁿ ñuú nání Clàudá, te ñuú-áⁿ cáá cuǎdava xití làmár. Te ñⁿ xio yuhu ñuú núú ñà túú quène vihi táchí ñí yáha-ndí, te bàrcú lǐhli sá nchìcúⁿ sátá bàrcú cáhnú, chí ní ndacu-ndí ní taxúha-ndí xití bàrcú cáhnú. ¹⁷ Te sátá ñí ndacu-ndí ní taxúha-ndí bàrcú lǐhli, te ní ducúⁿ nuu-güedé yoho bàrcú cáhnú. Te ío ní yùhú-güedé sá yǎha bàrcú ndéé núú ñúhú cǔchí yuhu ñuú Sǐrté, núu xǎⁿ ní ndíhi dóó nchítá dǐquí bàrcú ní nuu nehe-güedé, chí dóó-ǎⁿ ío níhi chìndaha táchí, núu xǎⁿ cuáháⁿ bàrcú ñⁿ xio. Te ní dáñá-güedé ñá túú-gǎ ní dàcaca-güedé, núu cuáháⁿ méé-ñǎ-xi ta chìndaha táchí cuáháⁿ. ¹⁸ Te ío níhi dǎú táchí, te ñá ní cuiní tnàhí-xi yáha. Te nduu úú sá dúcáⁿ ñà túú-gǎ ní dàcaca-güedé bàrcú te ní

ngüíta-güedé ní dängöyo-güedé sá nchídó-xí cuendá cuíní-güedé nduu ñamá-xi. ¹⁹ Te nduu úní ní dängoyo-güedé nchaa ndachìuⁿ cánehe chiuⁿ-güedé xítí bàrcú. ²⁰ Te cuéhé nduu ñá túú ní xíní-ndí ní chòdíní ní nchĩcanchii, chi ío níhi ní cuuⁿ dáú táchí, núu ní cáháⁿ-ndí sá vǎ cǎcu-ndí, chi ndihí-ndí cáhá ní cáháⁿ-ndí.

²¹ Te ní cuu titní nduu ñá túú-gǎ xéxí-ndí, núu xíǎⁿ ní ngúnutnǎi té Pǎblú núú-güedé, te xǎhaⁿ-dě:

—Quindáá iní-ndó tnǎhu ní cáháⁿ-í, te cundecu nahi-o Crětá ní cùu. Te núu ní tnǎi-ndo tnúhu-í, te vǎ dǎcuíta-o cǎrgá ndihí dava-gǎ ndàchìuⁿ ní cuu. ²² Te vǎ yùhú-ndó chi vǎ cùú ní ñⁿ-ndo dico bàrcú chi cuíta. ²³ Te nàha-ndo sá yùhú càháⁿ ndihí-í Yǎ Ndiǒxí te quide-í nàcuáa càháⁿ-gǎ. Te ñi-u-ni mee-gǎ ní techiuⁿ-gǎ ñⁿ espíritú xínú cuèchi núú-gǎ ní quixi, ²⁴ te ní cachí-xi xii-í: “Vǎ yùhú-n chi vǎ cùú-n, dico dacuítí quǎhíⁿ-n cǎháⁿ ndihí-n tǎ Cèsár. Te ní ñⁿ té ndihí-n vǎ cùú, chi ío cùdíí ìní ñáhá Yǎ Ndiǒxí xii-n”, duha ní cáháⁿ espíritú xínú cuèchi núú-gǎ ní cachí tnúhu-xi xii-í. ²⁵ Núu xíǎⁿ cǎchí tnúhu-í sá vǎ yùhú-ndó, chi sa cùtnuní iní-í sá cádá Yǎ Ndiǒxí nàcuáa ní cáháⁿ espíritú xínú cuèchi núú-gǎ. ²⁶ Te mee táchí chindaha-xi bàrcú daquǎhíⁿ-xi ndéé yuhu ndùte —cachí té Pǎblú xǎhaⁿ-dě xii-güedé.

²⁷ Te sa ní cuu sáhúⁿ nduu sáhúⁿ niú sá ñí ngüíta-xi cùuⁿ dáú táchí, te ñá túú-gǎ dǎcàca-güedé bàrcú, chi mee-nǎ táchí tá chindaha-xi barcú cuáháⁿ núú ndute làmár Àdriá. Te sátá ñí cuu dava niú, te ní quide cuendá cue té dǎcaca barcú sá tá cùyatni-güedé ñuhu yìchí. ²⁸ Te ní

chicuàhá-güedé ná daha-gá mētrú néhé-xí sǎ cùnú xití ndute cuendá cutnùní iní-güedé sá tá cùyatni-xi ndéé yuhu làmár, te nèhe-xi ócó sáhúⁿ ìⁿ-ni-gá mētrú. Te ní xica tucu bàrcú luha-gá, te dǎtnùní ní chicuàhá tucu-güedé, te xiáⁿ néhé-xí ócó úsá-ni-gá mētrú. ²⁹ Te ní yùhú-güedé sá candaundeé-xi cava, te ní queheⁿ-güedé cúmí caá náhnú sǎ nchìcúⁿ yoho, te ní dáquēe-güedé xití ndute ndàa sátá bàrcú, te dǎtnùní ní ngüíñí-xi ñá ní xica-gá-xi, te ní cuiní-güedé sá òré-ni tũndaá ní cùu. ³⁰ Te cue tée dàcaca barcú ní natava-güedé bàrcú lĩhli dǎndéé-güedé núú ndute ni cùu, te ní cachí-güedé sá quìhíⁿ-güedé ndàa núú bàrcú dàquēe-güedé úú-gá caá cuendá cuita candee-xi bàrcú cáhnú cuendá sá vǎ cáca-xí. Te cuiní-güedé dandàhú-güedé dava-gá nchúhú cue tée ñùhu ndìhi-güedé bàrcú, chì ní ndatnúhu-güedé sá cùnú-güedé ní cùu. ³¹ Te té Pǎblú ní xáhaⁿ-dě xii tée cùu capitáⁿ ndìhi dava-gá sandàdú:

—Te núu na dǎndóo ñaha cuè tée dàcaca barcú cunu-güedé, te vǎ cǎcu-o —càchí-dé xǎhaⁿ-dě.

³² Te sá dúcáⁿ ñí xáhaⁿ-dě nũu ní sáháⁿ sandàdú ní xehndé-güedé yoho nchìcúⁿ bàrcú lĩhli dǎngáúnìhnu-güedé xití ndute cuáháⁿ-xi.

³³ Te váha váha-ni ta tũndaá cuáháⁿ, te ní xáhaⁿ tē Pǎblú:

—Sa ní cuu sáhúⁿ nduu ñá túú tnàhí xèxi-ndo sá ndìhú iní-ndó. ³⁴ Te vitna yáchí-ndó, chì caxi-ndo cuendá naníhí ndéé-ndó, te vǎ yùhú-ndó chì ñá túú nǎ tnahá ni ìⁿ-ndo —cachí-dé xǎhaⁿ-dě xii-güedé.

³⁵ Te sátá dúcáⁿ ñí cáháⁿ-dé, te ní queheⁿ-dé ìⁿ pàá, te ní ndacáⁿ táhú-dé núú Yǎ Ndiǒxí,

te núu-güedě nchaa-güedé ducaⁿ nĩ quide-dé, te dătnùní ní táhú-dě luha ní xexi-dé. ³⁶ Te ducaⁿ te dătnùní ní cuyii-güedě ní xexi-güedé nchaa-güedé. ³⁷ Te úú ciendú únídico sáhúⁿ iⁿ-ndí ñúhú bàrcú núú tnàhá té Păblú, te nchaa-ndí ní xexi ndihí-ndí-dé. ³⁸ Te ní xexi-ndí ní ndahá xití-ndí. Te dătnùní ní ngúita-güedé ní tava-güedé nchaa ngohnchi triú ní dăngoyo-güedé xití ndute cuendá nduu ñamá-gá bàrcú.

Ní dáhu bàrcú xití làmár

³⁹ Te sátá nĩ túndaá, te ñá ní cùtnuní-gá iní-güedé ndèé cúu-xí núú nĩ sáá-güedé, te ní xini-güedé iⁿ xichi núú nĩ xícó ndúu luha yuhu làmár, te vâi vihi cúchí dándáá-xí yùhu ndute, te xiáⁿ ñà túú dàcandá víhí táchí ndute. Te ní ndatnúhu-güedé sá ndácú-güedě dacàca-güedé bàrcú quíhíⁿ-xi ndéé núú ñúhú cùchí. ⁴⁰ Te xiăⁿ núu ní sáháⁿ-güedé ní xehndé-güedé nchaa yoho nchícúⁿ caá tácàndéé bàrcú ní ndóo xití làmár, te ní nadatàya-güedé vítú sâ dăcuico-xi bàrcú, te ní nacata caa-güedé iⁿ dóó dĩquí bàrcú, te ta chîndaha táchí cuáháⁿ yuhu làmár tá cùyatni-xi ñuhu yichí cuáháⁿ. ⁴¹ Te ndècu iⁿ xichi ní natacá víhí cùchí xití ndute, te xiáⁿ nĩ nguindúxi nihnu bàrcú-güedé, te ní cutii-xi xití cúchí, te ñá ní ñihí-gă-güedé năcuăa cada-güedé nene-xi. Te ío níhi ní dăcandá táchí ndute, te ní chúcú ndéé-xi ndăa sátá bàrcú, te ní ndihí ní táhú-xí. ⁴² Te cue sandadú ní xítnàha-güedé sá cáhní-güedě nchaa cue téé ní xíhi vecaá cuendá sá vă quíhíⁿ-güedé núú ndute te cunu-güedé. ⁴³ Te téé cùu capitán ñá ní dàña-dé cahni-güedé cue téé ní xíhi vecaá, chi ñá

ní cùndee iní-dé cahni-güedé tnàhá té Păblú. Te ní xáhaⁿ-dě xii-güedé sá cuè téé xícuu cada quíhíⁿ núú ndute te na yăha-güedé ndute quene-güedé yuhu làmár. ⁴⁴ Te dava cue téé ñá cúú càda, ní xáhaⁿ-dě nanducu-güedé vítú ñí àdi vítú nǐ táhú sǎ nǐ xíhi bàrcú, te núú xǎⁿ caundodo-güedé yăha-güedé ndute quene-güedé ndéé yuhu làmár. Núu duha ní cuu ní cácu-ndí nchaa-ndí.

28

Té Păblú ndécú-dě ñuú Măltá cáá cuădava làmár

¹ Te sátá nǐ cácu-ndí ní nene-ndí ñuhu yìchí, te ní níhí-ndí tnúhu nàcuáa nàni ñuú núú nǐ sáá-ndí, te ñuú-án nání-xí Măltá, te càa-xi cuădava làmár. ² Te ío quide víxiⁿ-xi cuendá ío cùuⁿ dáú. Te ñáyíu ñuú-án nǐ cundàhú iní ñáhă-yu xii-ndí, ní dáttnàhá-yu ñuhú te ní cana ñàhá-yu ní sáháⁿ-ndí ní nacuídí-ndí. ³ Te té Păblú dátacá-dé nducú, te tnàhá-ni ñⁿ cóó děéⁿ nǐ tñi nihnu-dé-di, te òré cuáháⁿ ndaha-dé chucu-dě núú ñuhú, te ní ñáni-di cahni, te ní ndee-di xití nducú ní sánduú-di ndaha-dé, te ní xexihaⁿ-di xii-dé. ⁴ Te nchaa ñáyíu ndèhé-yu sá táccandé-di ndaha-dé, te ní ngüíta-yu ní xítnàhá-yu:

—Váa ndíyí ní sahani téé-a, te ñá ní xíhí-dé làmár, te dacuítí sǎ cùú-dé vitna, chi sa nàha Yá Ndiöxí ná nǐ quide-dé ñuyíú-a —càchí-yu xítnàhá-yu.

⁵ Te té Păblú ní quidi-dé ndaha-dé ní ngau-nihnu-di núú ñuhú, te ñá túú tnàhí ná ní cùu núú nǐ xexi-di. ⁶ Te ñáyíu ñuú-án xíndéhě-yu núu daquihíⁿ-xi chúhúⁿ àdi nduá-dé cuú-dé. Te naha nǐ xíndéhé ñàhá-yu núu nása cada ñaha-xi xii-dé, te ñá túú tnàhí ná ní quide ñaha-xi, te ní xítnàhá-yu:

—Váa ndiöxí cúú tẽe-a núu dàcáⁿ ñá túú tnàhí ná ní quide-xi ndaha-dé núú nĩ xexi cóó —càchí-yu xĩtnàhá-yu.

⁷ Te yatni núú dúcáⁿ nĩ xexihaⁿ cõó-ăⁿ cáá ñũhu xitu tée nàni Publiú, te tée-ăⁿ táxí tnùnı́-dé nıhı́ ñuú cáá cuădava xití lâmár núú ndécú-ndĩ nduu-ăⁿ. Te ío váha inı́-dé chi ní cana ñaha-dẽ ní sáháⁿ-ndı́ ní xındecu-ndı́ únı́ nduu vehe-dé. ⁸ Te tătá tẽ Pùbliú-ăⁿ cáá-dẽ cùhú-dé ñũhú-dẽ cahni, te tnàhá-dé daxi. Te té Păblú ní sáháⁿ-dé núú cáá-dẽ, te ní cáháⁿ ndıhi-dé Yă Ndiöxı́, te ní sacáⁿ ndodo-dé ndaha-dé díquí tẽe cùhú-ăⁿ, te ducaⁿ-ni nĩ quide-dé, te ní ndúha tée cùhú-ăⁿ. ⁹ Te sátá dúcáⁿ nĩ quide té Păblú, te ní quixi nchaa ñáyıu cùhú núú ndécú-ndĩ, te ní quide tátna ñaha tẽ Păblú xiı́-yu te ní ndúha-yu. ¹⁰ Te òré ndécú-ndĩ xıáⁿ, te vài sá nĩ taxi táhú-güedẽ, te òré ní xica-ndı́ ní taxi tucu-güedé nchaa sá xıní ñũhu-ndı́ ichi.

Té Păblú ní quexıo-dé ñuú Ròmá

¹¹ Te yàcáⁿ ní xındecu-ndı́ únı́ yóó, te sa ndècu ııⁿ barcú tée ñuú Alejándriá òré ní quexıo-ndı́, te ní xındecu-xi nıhı́ yóó cúúⁿ dăú táchı́. Te núú-xi cåndodo sandú sá dănàni-güedé Căstór ndıhi sândú sá dănàni-güedé Pölúx, te xití bàrcú-ăⁿ nĩ quée-ndı́ cuáháⁿ-ndı́. ¹² Te ní quexıo-ndı́ ñuú Sirăcusá, te yàcáⁿ ní xındecu-ndı́ únı́ nduu. ¹³ Te ní xica tucu bàrcú cuáháⁿ-xi, te ní quexıo-ndı́ ñuú Règiú. Te nduu tnèe duha ní quene nuu táchı́. Te ní xica bàrcú cuáháⁿ-xi, te ndée nduu úú ní quexıo-ndı́ ñuú Pùteolí. ¹⁴ Te yàcáⁿ ní nanıhı́ tnàhá-ndĩ ndıhi ñáyıu sàndáá inı́ tnúhu Jèsús, te ní cachı́-yu sá

cúndècu-ndí úná nduu, núu xíáⁿ ní xíndecu-ndí úná nduu ndihí-yu. Te ní xica tucu bàrcú cuáháⁿ-xi, te ní quexìo-ndí ñuú Ròmá. ¹⁵ Te ñáyiú ròmá ñáyiú sàndáá iní tnúhu Jèsús, ní níhí-yu tnúhu sá cuáháⁿ-ndí, te ní quixí-yu ní quixi tnahá ñáhă-yu ichi. Te davá-yu ní naníhí-ndí ñuú Fòrú Àpiú, te davá-yu ní naníhí-ndí ñuú Úní Tàbernás. Te òré ní xiní té Păblú nchaa ñáyiú véxi tnahá ñáhá xii-ndí, te ndee ndèe ní cuu iní-dé, te ní ndacáⁿ táhú-dě núú Yă Ndiôxí sá dúcáⁿ ní quidé-yu. ¹⁶ Te sátá nĩ quexìo-ndí ñuú Ròmá, te cue téè cùchiuⁿ ní xáhaⁿ-güedě xii té Păblú sá cúndècu dîⁿ-dé, te ní xíndéé ñáhá cuàa sandadú xii-dé.

Té Păblú càháⁿ-dé tnúhu Yă Ndiôxí ñuú Ròmá

¹⁷ Nduu úní sá nĩ quexìo té Păblú, te ní cana-dé cue téè cùnūu núú ñáyiú isràél ndécú ñuú Ròmá, te ní sáháⁿ-güedé núú ndécú-dě, te ní xáhaⁿ-dě:

—Nchôhó cue téè isràél, càchí tnúhu-í sá ñă túú nă ní quide-í ni ñⁿ ñáyiú cútnàhá ní xíndecu-í ñuú Jerusálén. Te ñă túú ní cǎháⁿ cuèhé-í sá quidě-yu nchaa nàcuáa ní xóo cada cue ñaní tnáhá-ó nĩ xíndecu ndéé sanaha, te ñă túú nă ní quide-í te ní tnî ñaha-güedě ní sáha cuèndá ñáhá-güedě xii-í núú cuè téè ròmá, cue téè ndècu yacáⁿ. ¹⁸ Te cue téè-áⁿ nĩ ndúcú tnúhu-güedé nūu ndáá ndècuéchi-í, te ní cutnùní iní-güedé sá ñă túú nă ní quide-í, te xíáⁿ cuiní-güedé queñuhu ñaha-güedě xii-í vecaá ní cùu. ¹⁹ Te diu-ni cue téè isràél ñă ní dàña-güedé cácu-í, chi cuiní-güedé sá cáhní ñaha cue téè ròmá, cue téè xíndecu yacáⁿ xii-í ní cùu, te xíáⁿ nūu ní xáhaⁿ-í sá quixì-í cǎháⁿ ndihí-í té Cèsár cuèndá iha cada ndáá méé-dě cuèndá-í, te vá yôo ñⁿ tee-í cuéchi. ²⁰ Núu

xíǎⁿ ní cana ñaha-ǎ xii-ndo cuendá cunaha-ndo nàcuáa ní cuu. Te ní xáhaⁿ-ǎ sá sàndáá iní-í sá ndótó ñǎyiu ní xíhí, te diu-ni ducaⁿ càháⁿ dava-gá ñáyiu israél, te sá dúcáⁿ nǐ cáháⁿ-í, te ní chihi ñaha-güedě vecaá, te xǐndeé ñáhá-güedě ndéé vitna —càchí té Pǎblú xáhaⁿ-dě xii-güedě.

²¹ Te ní xáhaⁿ-güedě xii-dé:

—Ñá túú tnàhí tutú ní tëndaha cue téé distritú Jùdeá quixi cuendá-n. Te ní cuè téé israél ñá túú ní quixi-güedě cáháⁿ cuèhé-güedě cuendá-n.

²² Te cuìní-ndí cundedóho-ndí nása cunduu tnúhu cáháⁿ-n, chi sa ní níhí-ndí tnúhu sá ncháá xìchi ío xícáháⁿ cuèhé-yu cuendá nchaa ñáyiu sàndáá iní tnúhu Jèsús —càchí-güedě xáhaⁿ-güedě xii té Pǎblú.

²³ Te ní xáhaⁿ-güedě nduu cùyáchí-güedě te quixi-güedě cundedóho-güedě dava-gá cuendú cáháⁿ té Pǎblú. Te ní tnahá nduu nǐ ndatnúhu-güedě quíhíⁿ-güedě núú quidé vèhe-dé, te vǎi-yu ní sáháⁿ-yu ní xíndedóho-yu tnúhu ní cáháⁿ-dé, te ncháca nchaa ní cáháⁿ ndihi-dé-yu. Te ní xáhaⁿ-dě xíi-yu sá ndí Moisés ndihi dava-gá cue téé ní xóo cáháⁿ tnúhu Yá Ndiöxí ndéé sanaha nǐ chídó tnùní-güedě núú tütú-güedě sá díú-gǎ tendaha-gǎ Crístú quixi-gá ñuyíú-a. Te ní chídó tnùní-güedě nchaa nàcuáa cada-gá, te diu-ni nàcuáa càháⁿ tutú-güedě cada Crístú, te ducaⁿ nǐ quide-gá cútnàhá ní xica cuu-gá ñuyíú-a, núu xǎⁿ ní cutnùní sá díú Jèsús cúú-gǎ Crístú Yaa ní tendaha Yǎ Ndiöxí ní quixi ñuyíú-a. Te núu quíndáá iní-yu, te ndíhu ndaha ñàha Yá Ndiöxí xíi-yu. ²⁴ Te davá-yu ní sàndáá iní-yu tnúhu ní cáháⁿ-dé, te davá-yu ñá túú ní sàndáá iní-yu. ²⁵ Te

cuendá sá ñă ĩⁿ-ní tnũhu ni cǎháⁿ-yu, núu xǎⁿ cuiní-yu núhú-yu ni cùu. Te ní xáhaⁿ tẽ Pǎblú sá cùndetu tnaá-yu cǎháⁿ-dé ingá tnũhu, te xǎhaⁿ-dẽ:

—Ní xáhaⁿ Espíritú Yǎ Ndiǒxí xii ndíi Chàíá nàcuáa cǎháⁿ ndíi núu nchàa ñaní tnáhá-ó nĩ xíndecu ndéé sanaha. Te ní cǎháⁿ Espíritú-gá ĩⁿ sá ndáa ní xáhaⁿ-xi xii ndíi, te duha ní xáhaⁿ-xi:

²⁶ Quíhíⁿ-n te cúñaha-n xii ñáyiu:

Nchòhó mee-ni cùndedóho-ndo tnũhu cǎháⁿ Yǎ Ndiǒxí, dico ni vǎ tēcú tnùní-ndó.

Te cada-gá titní núu sǎ vǎ yǒo tnàhí ndàcu cada, dico ni vǎ cútnùní iní-ndó nàcuáa ndùu sá cáda-gǎ,

²⁷ chi cuendá sá ĩo sàá iní-ndó,

xǎⁿ ducaⁿ ñà túú sǎha-ndo cuendá nása cuáhánⁿ tnũhu cǎháⁿ-gǎ,

chi ñá cuiní-ndó cùndedóho-ndo, te ni ñă sàndáá iní-ndó.

Te ni ñă cuiní-ndó dàña-ndo nchaa sá cuèhé sá dúhá quède-ndo

cuendá xocàni-gǎ nchaa xǎⁿ iní-ndó,

duha cúñaha-n xií-yu.

Càchí Espíritú-gǎ xǎhaⁿ-xi xii ndíi. ²⁸ Te na càchí tnũhu-í sá quíhíⁿ cue tée cǎháⁿ tnũhu Yǎ Ndiǒxí cǎháⁿ-güedé tnũhu-gǎ núu ñáyiu ñá túú cùu ñáyiu isràél, chi ñáyiu isràél ñá túú cuiní-yu cund-edóho-yu. Dico ñáyiu ñá túú cùu ñáyiu isràél chi cùdíi iní-yu cundedóho-yu, núu xǎⁿ naníhí tàhú-yu —càchí té Pǎblú xǎhaⁿ-dẽ xií-yu.

²⁹ Te sátá nĩ ndíhi cuendú ní xáhaⁿ-dẽ, te ní ndéé-yu cuánuhú-yu ta ndàtnũhu-yu cuáhánⁿ.

³⁰ Te úú cuíá nĩ xínu ní xíndecu té Pǎblú ĩⁿ vehe ní cháhu-dé. Te ní xóo cǎháⁿ váha-dé ndíhi nchaa

ñáyu ní xóo quíhíⁿ vehe-dé. ³¹ Te ní xáhaⁿ-dě sá ndíhu ndaha ñàha Yá Ndiǒxí xií-yu núu quindáá iní-yu tnúhu-gá, te vá yǒo ìⁿ ni sàdí yuhu-dé. Te mee-ni tnúhu Xítóhó Jesucristú ní cáháⁿ-dé núǔ-yu.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

872f7754-0986-5ecd-a059-925a708a6939